













# MEDULLA THEOLOGICA

EX SACRIS SCRIPTURIS,

Conciliorum, Pontificumque Decretis, & SS. Patrum, ac Doctorum placitis expressa,

*In qua quidquid tum ad Fidei Mysteria sane, ac recte intelligenda, & ab erroribus quibusvis secernenda, tum ad Sacramenta debite conficienda, & ministranda, tum ad actiones humanas juxta Divinae Legis normam dirigendas spectare potest, facili, ac compendiaria methodo explicatur.*

AUCTORE

LUDOVICO ABELLY

Episcopo Ruthenensi.

*Cum opportunis Indicibus, necnon Methodica Catechesi ex ipsius Medullae Theologicae effatis concinnata.*

PARS PRIMA.



PATAVII, Typis Seminarii, MDCCXXXV.

Apud Joannem Manfrè.

Superiorum Permissu, ac Privilegio.



JESU CHRISTO  
ÆTERNO SACERDOTI,  
PRINCIPI PASTORUM,  
ANIMARUM EPISCOPO,  
DEO VERO,  
VERI DEI FILIO.



Ignis es, Domine, accipere Librum, & aperire signacula ejus, quoniam occisus es, & redemisti nos Deo in sanguine tuo. *Librum equidem illum æternæ veritatis tuæ arcana continentem, nemo neque in cælo, neque in terra, neque subtus terram aperire, nedum respicere dignus erat: Abscondita erat in mysterio Sapientia,*



tia ; nec ulli Principum hujus sæculi pervia ,  
donec venisti , & vicisti , Librumque de dex-  
tera sedentis in Throno accepisti , ac illius si-  
gnacula omnia reserasti . Cui ergo mystici illius  
Libri hoc qualecunque fragmentum offerrem ,  
ac dicarem , quam tibi ? in quo , & ex quo  
sunt omnes thesauri Sapientie , & ad quem pro-  
inde , tanquam ad proprium fontem , Sapientia  
omnis Angelica , & Humana recurrere debet .  
Quamvis autem Divinitatis tuæ lucem inaccessi-  
bilem revereatur , & reformidet tam exilis o-  
pusculi tenuitas ; invitat tamen , imo attrahit  
singularis illa tua , & ineffabilis prorsus beni-  
gnitas , ac humanitas , quæ apparuit omnibus  
hominibus erudiens illos . Certe ad prisci illius  
tui tabernaculi fores , non gemmea solum , &  
aurea vasa , sed etiam caprarum pili , & alia  
perexigua munuscula , rerumque vilissimarum li-  
bamina offerebantur . Nec minuta illa duo in  
gazophylacium missa tibi displicuerunt . En igi-  
tur , ne vacuus omnino in tuæ Majestatis con-  
spectum appaream , Libellum hunc supplex offe-  
ro , & obnixè precor , ut qui vilia , & contem-  
ptibilia eligere consuevisti , ut fortia quæque  
confundas , id etiamnum præstare digneris ; me-  
que non in gladio , hasta , aut clypeo , sed in  
funda tantum , & lapide contra errorem , ac  
pecca-

*peccatum decertantem, dexterae tuae virtute con-  
firmes, omnesque, quibus opusculum istud ut-  
cunque usui esse poterit, gratiae tuae benedictio-  
nibus adeo copiosis praevenias, excites, & ad-  
juves, ut veritatis tuae lucem agnoscere, &  
amplecti, illi firmiter inhaerere, tibi in san-  
ctitate, & iustitia omnibus diebus deservire  
valeant; ac in ævum confiteri: quoniam di-  
gnus es accipere virtutem, & Divinitatem,  
& sapientiam, & fortitudinem, & hono-  
rem, & gloriam, & benedictionem.*

# P R Æ F A T I O

*In qua explicatur , quis sit huius Operis scopus ,  
quodve Auctoris consilium .*

**C**Um inter plurima , & maxima , quæ propria sunt Sacerdotis munera , illud in primis recenseatur , quod ( sicut olim per Prophetam sancivit Deus Malach. 2. ) doctrinam Legis ab illius ore populus requirere debeat , ideoque ( ut S. Leo Papa edixit Epist. 23. ) inscitia in Sacerdotibus nec excusatione digna sit , nec venia , cum illa ( ut habetur in Concil. Tolet. IV. cap. 24. ) cunctorum errorum mater , imo innumerorum prope malorum in Ecclesia radix sit , & origo : inde inferri potest , qua ratione illi , quos in sortem suam Christus Dominus elegit , & quibus docendi , ducendique alios officium commisit , scientiam illam Divinæ legis non solum sedulo adipisci , sed & adeptam sollicitè custodire teneantur .

Quæ cum ita se habeant , experientia nihilominus satis manifeste compertum est , plurimos sacrorum Ordinum characterè insignitos , Divinæ illius scientiæ studium vel omnino abjicere , vel , si annos aliquot in eo impendunt , illis elapsis , continuo libros , ac scripta deponere , & eorum oblivionem paulatim incurrere , quorum cognitionem sibi non sine labore comparaverant .

Idcirco quibusdam spectatæ virtutis viris , ac in eo doctrinæ genere versatissimis visum est Ordini Sacerdotali consultissimum fore , si ex universa Theologia , tam speculativa , seu ( ut vocant ) Scholastica , quam practica , seu morali , ea potissimum seligerentur , ac in quoddam veluti compendium redigerentur , quæ ab universis Sacerdotibus maxime sciri oporteret , ut muneri suo satisfacere , omnesque injuncti sibi officii partes , ut par est , adimplere possent . Qua ratione iis aliquo pacto provideretur , qui jam ad Sacerdotium promoti , huius tamen Divinæ Scientiæ notitiam , temporis in-



juria ; aut rerum sibi ad id necessariarum defectu , aut alia quavis ex causa comparare vel neglexerunt , vel nullatenus potuerunt . Ac etiam alii , qui Theologiæ operam navarunt , illiusque stadium aut totum , aut in partem emensi sunt , ex plurimis , & variis , quæ in palæstra Theologica didicerunt , ea potissimum ob oculos haberent , quæ maxime ipsis utilia , imo & necessaria esse censentur .

Hinc patet , quisnam sit hujus Operis scopus , nimirum his , & illis æque consulere , & ad hoc præcipuas , ac scitu maxime necessarias veritates ex vastissimo illo Theologiæ Scientiæ sinu , veluti pretiosas quasdam margaritas colligere , ipsisque in mente recondendas offerre .

Ut vero hunc finem , ac scopum Auctor assequeretur , ea potissimum in hac Theologica Synopsi seligere propositum illi fuit , quæ tum ad Fidei mysteria sane , ac recte intelligenda , & a quibusvis erroribus secernenda , tum ad Sacramenta debite conficienda , & ministranda , tum ad actiones humanas juxta Divinæ Legis normam dirigendas conducere possunt : omissis aliis difficilioribus , & subtilioribus ipsius Theologiæ questionibus , non quidem ut inutilibus , quippe quæ multum splendoris , ac roboris huic Divinæ Scientiæ afferre possunt , ideoque a sapientissimis Magistris , & Doctoribus cum uberrimo ingeniorum fructu tractantur , sed ut fini a se intento minus necessariis .

In hac autem prima hujus Operis Parte , quam exhibet , quæque præcipuarum veritatum ad Fidei mysteria spectantium elucidationem complectitur , hunc sibi majoris facilitatis gratia ordinem præfixit , ut scilicet primum explicaret ea , quæ ad ipsius Fidei rationem spectant , cum hæc virtus sit veluti basis , ac fundamentum non modo rerum sperandarum ( quod dixit Apostolus Hebr. 11. ) sed etiam veritatum cognoscendarum , tum de primario illius Fidei objecto agere , nempe Deo , sive ut in Essentia uno , sive ut trino in Personis , exinde rerum omnium emanationem ab ipso Deo , & sic Angelorum naturam , primi Hominis conditionem , ejusdemque , ac simul totius humani generis lapsum exponeret , postea de ipsius humani generis per Divini Verbi Incarnationem reparatione , ac demum de præcipuo ipsius Incarnationis fru-

P R Æ F A T I O.

cti, nimirum Gratia Divina, tractaret. Et sic hæc Prima Pars in sex Tractatus divideretur, quorum primus esset de Fide, secundus de Deo, ut in Essentia uno; tertius de eodem, ut trino in Personis; quartus de creatione Angeli, & hominis, & utriusque lapsu; quintus de humani generis reparatione per Verbi Divini Incarnationem; sextus denique, & ultimus de Gratia Divina, ejusque effectibus, nempe justificatione, ac merito.

Hoc etiam in quolibet Tractatu sibi peculiari studio servandum proposuit, ut quantum fieri potest, res veras a falsis, & certas ab incertis discerneret, ac etiam, ut quoties aliqua veritates probandæ occurrerent, illæ præsertim, quæ erroribus ab Ecclesia proscriptis sunt oppositæ, ad earum probationem primo adhiberet Scripturas, tum Conciliorum, aut Pontificum decreta (si quæ sint) exinde Sanctorum Patrum auctoritates, ac demum argumenta aliqua Theologica: servata tamen semper in omnibus ea brevitate, ac facilitate, quam compendii ratio exigit.

Ex quibus intelligi potest, quare Opusculum istud MEDULLÆ THEOLOGICÆ titulo inscriptum sit; quia nimirum sepositis omnibus aliis (ut supra dictum est) quæ mysticam Theologiæ arborem instar corticis circumvestiunt, aut vice frondium, vel florum exornant, sola hic illius veteri medulla expressa reperitur. Et eo libentius titulus is usurpatus est, quo insolentius eundem ante aliquot annos Pseudotheologus quidam Amstelodamensis libello variis erroribus, & mendaciis consarcinato affixerat; illum videlicet hac ratione ab injusto possessore vindicando, & veræ, ac legitimæ Theologiæ restituendo.

Non deerunt fortassis, qui post tot, & tam nobiles insignium Theologorum elucubrationes, Opusculum istud frustra, & inutiliter in lucem prodire arbitrentur; præsertim cum jam alias, & etiam nuper viri doctissimi in Theologia compendiaro modo explicanda operam posuerint, ejusque Synopsis absolutissimam ediderint, ita ut idem iterum attentare, nihil aliud esse videatur, quam actum agere. Verum ex iis, quæ supra dicta sunt, facile quivis intelligere poterit, scopum huic Operi propositum longe diversum esse

P R Æ F A T I O.

se ab eo, quem alii spectasse videntur. Illi siquidem hoc præsertim intenderunt, ut ipsius Theologiæ arcana omnia, etiam reconditissima, & subtilissima evolverent, Lectoremque aptum, & idoneum efficerent ad exercitationes in Theologicis palæstris assuetas: at vero in hoc Opusculo, omissis omnibus aliis, necessitati soli consultum est, idque præsertim intentum, ut illi, qui Ordinibus Sacris adscripti sunt, eam (quam scientiam salutis Propheta vocat) probe teneant; sicque & seipsos, & alios, quos juvare, & instituire tenentur, salvos facere possint.

Cæterum an scopum illum sibi propositum Auctor attigerit, pio, atque benevolo Lectori judicandum relinquit: hocque ab illo solum enixe precatur, ut si quid in hoc qualicumque Opusculo improbandum occurrat (quod utique fore non diffitetur) id sibi, tanquam Christiano Christianus, condonet, & ignoscat; si quid utile, aut aptum, illud omne Deo Optimo Maximo, ejusque gratiæ adscribat, ei que proinde laudem omnem, & gloriam illi soli debitam rependat.



# NOI RIFORMATORI

Dello Studio di Padova.

**A** Vendo veduto per la Fede di Revisione, ed Approvazione del *P. F. Tommaso Maria Gennari Inquisitore*, nel Libro intitolato: *Medulla Theologica ex Sacris Scripturis, Conciliorum, Pontificumq; decretis: Auctore Ludovico Abelly Episcopo Ruthenen- si*, non vi esser cosa alcuna contro la Santa Fede Cattolica; e parimente per Attestato del Segretario nostro, niente contro Principi, e buoni costumi, concediamo Licenza a *Gio: Manfrè Stampatore*, che possa essere stampato, osservando gli ordini in materia di Stampe, e presentando le solite Copie alle Pubbliche Librerie di Venezia, e di Padova.

Dat. 19. Aprile 1735.

( Gio: Pietro Pasqualigo Rif.  
( Michiel Morosini Kav. Rif.  
(

*Agostino Gadaldini Segr.*

1735. 22. Aprile.  
Registrato nel Magistrato Eccellentissimo contro  
la Bestemmia.

*Angelo Legrenzi Segr.*

**A P.**

# A P P R O B A T I O D O C T O R U M.

**N**Os in sacra Theologiæ Facultate Parisiensi Doctores Sorbonici fidem facimus, lectum esse, examinatumque a nobis librum, cui titulus est: *Medulla Theologica, &c. Pars I. Auctore Magistro LUDOVICO ABELLY, Doctore Theologico, & Sancti Judo-ci Parisiis Rectore*, nihilque repertum in eo, quod sit Catholicæ, Apostolicæ, & Romanæ Fidei, ac doctrinæ, bonisque moribus contrarium.

Datum Parisiis die trigesima Septembris .  
anno Domini 1651.

*M. GRANDIN.*

*R. DU. VAL.*

*IN.*

# I N D E X

## TRACTATUM, CAPITUM, ET SECTIONUM

Primæ Partis.

### QUÆSTIONES PROEMIALES

De ipsa Theologia.

- Quæst. I. Quid sit Theologia, & quodnam sit ejus objectum.*  
*II. Ex quibus locis argumenta Theologica educantur.*  
*III. Quenam sit conclusionum Theologicarum certitudo.*  
*IV. Quanam dispositiones requirantur in eo, qui investigandis Theologicis veritatibus incumbit.*

### TRACTATUS I.

#### DE FIDE.

#### CAPUT I.

De Fidei necessitate.

- Sect. I. Quid sit, & quotuplici modo sumatur Fides. fol. 2.*  
*II. An Fides necessaria sit ad salutem neffitate præcepti. 4.*  
*III. An Fides necessaria sit ad salutem neffitate medii. 5*  
*IV. An ad salutem sit neffarium explicitam mysteriorum aliquorum Fidem habere, & quorum. 6*  
*V. An Fides externa sit ad salutem neffaria. 8*

#### CAPUT II.

De objecto mateteriali Fidei.

- Sect. I. Quinam libri Sacre Scripturæ sint Canonici. 11*  
*II. De variis Sacre Scripturæ editionibus, & quenam ex illis sit authentica. 12*  
*III. Ad quem pertineat definire verum, & legitimum Sacre Scripturæ sensum. 14*  
*\* IV. Quenam sit vera Ecclesia, ad quam pertinet verum, & legitimum Scripturæ sensum definire, & quibus notis illa dignoscatur. 16*  
*V. An*



V. <i>An præter Canonicas Scripturas sint aliqua traditiones Fide divina credendæ.</i>	18
VI. <i>De Symbolo Fidei.</i>	19
VII. <i>An objecta Fidei creverint successu temporis.</i>	20

### C A P U T III.

#### *De objecto formali Fidei.*

Sect. I. <i>AN Deus, quatenus est suprema, &amp; infallibilis veritas revelans, sit formale objectum Fidei.</i>	22
II. <i>An revelatio Divina, ut sit formale objectum Fidei, debeat esse obscura, &amp; inevidens.</i>	24
III. <i>An Divina revelatio debeat esse publica, vel privata.</i>	25
IV. <i>Unde possit dignosci, an revelatio privata sit a Deo, ac proinde sufficiens pro eliciendo actu Fidei.</i>	27
V. <i>An Fidei Divinæ possit subesse falsum.</i>	29
VI. <i>An sit aliqua evidentia credibilitatis in iis veritatibus, quæ Fide supernaturali credi debent.</i>	31
VII. <i>Quibus argumentis, seu motivis veritates nostræ Fidei sint evidenter credibiles.</i>	32
VIII. <i>Quodnam sit illud, in quod ultimo Fides resolvitur.</i>	34
IX. <i>Quomodo actus Fidei in praxim redigendus.</i>	36

### C A P U T IV.

#### *\* De vitiis Fidei oppositis.*

Sect. I. <i>AN infidelitas sit peccatum.</i>	38
* II. <i>AN Quot sint species infidelitatis.</i>	39
* III. <i>Quid sit hæresis.</i>	40
* IV. <i>Quanam ratione dignosci possit, an doctrina aliqua, seu propositio sit hæretica.</i>	42
* §. I. <i>Ad illud dignoscendum certissimam regulam esse auctoritatem sacre Scripturæ, ac Divinæ traditionis.</i>	43
* §. II. <i>Auctoritatem Ecclesiæ ad id quoque necessariam esse.</i>	44
* §. III. <i>Conciliorum universalium decreta esse quoque medium certissimum ad dignoscendos errores.</i>	45
* §. IV. <i>Pontificis Romani auctoritatem in iis, quæ Fidem spectant, esse etiam medium certissimum ad doctrinam Orthodoxam ab hæretica discernendam.</i>	46
* §. V. <i>Quomodo juxta ea, quæ dicta sunt, quivis Theologus de doctrina aliqua iudicium ferre possit.</i>	48

# T R A T A C T U S II.

## D E D E O.

### C A P U T I.

#### De existentia Dei.

Sect. I.	<b>Q</b> uibus rationibus probari possit, Deum esse.	50
II.	<b>Q</b> uibus rationibus demonstrari possit, unum esse Deum, & non plures.	52
III.	<i>An possit a nobis aliquod nomen Deo imponi, &amp; qualiter nominari debeat.</i>	53

### C A P U T II.

#### De Attributis Divinis.

Sect. I.	<b>A</b> N, & quomodo Attributa Dei inter se, & ab ejus essentia distinguantur.	55
II.	<i>An Divina Essentia sit omnino simplex.</i>	57
III.	<i>An, &amp; qua ratione Divina Essentia in sua simplicitate contineat omnes rerum omnium perfectiones.</i>	58
IV.	<i>An Deus sit immutabilis.</i>	59
V.	<i>An Deus sit eternus.</i>	60
VI.	<i>An, &amp; qua ratione Deus sit ubique præsens.</i>	61
VII.	<i>An Deus sit in omni genere perfectionis infinitus.</i>	62

### C A P U T III.

#### De scientia Dei.

Sect. I.	<b>A</b> N sit in Deo Scientia, & qualis illa sit.	63
II.	<b>Q</b> uodnam sit objectum Scientiæ Divinæ, seu quasnam res Deus cognoscat.	65
III.	<i>Quomodo Deus cognoscat futura contingentia.</i>	66
IV.	<i>An Deus cognoscat futura conditionata.</i>	69
V.	<i>An aliquæ rerum creatarum idee in Deo sint.</i>	71

### C A P U T IV.

#### De voluntate Dei.

Sect. I.	<b>A</b> N sit in Deo Voluntas, & qualis.	72
II.	<b>Q</b> uænam sint objecta Divinæ Voluntatis.	73
III.	<i>An Voluntas Dei sit libera.</i>	75
IV.	<i>Quænam sit Divinæ Voluntatis efficacia.</i>	78
V.	<i>An, &amp; qua ratione in Divina Voluntate amor, odium, misericordia, justitia, &amp; similes affectus reperiantur.</i>	79
VI.	<i>An sit in Deo providentia, &amp; ad quæ se extendas.</i>	81

C A-



## C A P U T V.

### De prædestinatione.

- Sect. I.** **Q**uid prædestinationis, quid item reprobationis nomina  
debeat intelligi. 83
- II.** Quid Fides Catholica de prædestinatione, & reprobatione creden-  
dum proponat. 85
- \* **III.** An solum peccatum originale sit causa reprobationis positiva  
tam adultorum, quam infantium. 88
- IV.** An prædestinatio ad gloriam sit ante, vel post prævisa merita. 92
- V.** Quid super questione in Sectione præcedenti proposita sentiendum  
videatur. 94
- VI.** Quinam sine effectus prædestinationis, & reprobationis. 97
- VII.** An prædestinatio sit certa, & an a prædestinato cognosci pos-  
sit. 98

## C A P U T VI.

De cognoscibilitate Dei, seu de modo, quo ab intellectu creato  
Deus clare cognosci potest.

- Sect. I.** **A**N clara Dei cognitio sit intellectui creato possibilis. 100.
- II.** An de facto nunc Beati Essentiam Dei clare videant. 102
- \* **III.** An intellectus creatus indigeat specie aliqua intelligibili ad  
videndum Deum. 103
- IV.** An ad Deum clare videndum intellectus creatus lumine aliquo  
supernaturali indigeat. 105
- V.** Quid intellectus lumine gloriæ illustratus in Divina Essentia vi-  
deat. 107
- VI.** Quasnam res præter Deum in statu gloriæ Beati cognoscant. 109
- VII.** An omnes Beati equaliter Deum videant. 111

## T R A C T A T U S III.

### De Sanctissime Trinitatis mysterio.

## C A P U T I.

### De iis, quæ spectant ad mysterium Sanctissimæ Trinitatis in genere.

- Sect. I.** **A**N mysterium Sanctissimæ Trinitatis naturali ratione  
cognosci possit. 113
- II.** An sint plures in Deo Personæ. 114
- III.** An sint aliquæ processiones in Personis Divinis, & quot. 117
- IV.** An sint aliquæ relationes inter Personas Divinas, quot, &  
quales. 118
- V.** An sint admittenda aliquæ notiones in Personis Divinis, & quæ. 121
- \* VI.



* VI. Quot in Divinis substantiæ, quot existentia, quot item substantia, & hypostasies admittenda sint.	122
---	-----

## C A P U T II.

### De Personis Divinis in particulari.

Señt. I. <b>Q</b> uenam nomina primæ in Divinis Personæ proprie conveniant.	124
II. Quid Fides Catholica de secunda sanctissimæ Trinitatis Persona credendum proponat.	126
III. Ob quam rationem Filii processio dicatur, & vere sit Generatio, Spiritus Sancti vero nec sit, nec dici possit.	128
IV. Quo sensu secunda in Divinis Persona vocetur Verbum.	130
V. Quid Fides Catholica de tertia in Divinis Persona credendum proponat.	132
VI. Quo sensu Spiritus Sanctus vocetur Amor.	134
VII. Qua ratione Persona una in Divinis mitti dicatur ab alia.	136
VIII. Quomodo de Sanctissimæ Trinitatis mysterio sit loquendum.	137

## T R A C T A T U S IV.

### De creatione Angeli, & hominis, & de utriusque lapsu.

## C A P U T I.

### De Creatione rerum in genere.

Señt. I. <b>A</b> N Deus sit causa efficiens rerum omnium.	139
II. <b>A</b> n solius Dei proprium sit creare.	141
III. An aliqua creatura fuerint, vel esse potuerint ab æterno.	142

## C A P U T II.

### De creatione Angelorum, eorumque natura.

Señt. I. <b>Q</b> uandonam Angeli creati sint.	144
II. <b>U</b> binam creati sint Angeli.	145
III. An Angeli sint omnino incorporei.	146
IV. Quid de loco, & motu Angelorum sentiendum sit.	148
V. Quomodo Angeli cognoscant se, vel alias res.	150
VI. Quasnam res Angeli cognoscant.	153
VII. Qualis sit Angelorum voluntas.	157
VIII. Quomodo Angeli inter se loquantur.	159
IX. Quid de ordinibus Angelorum sentiendum sit.	160

C A-

### C A P U T III.

De bonorum Angelorum merito, ac beatitudine, & malorum peccato, ac damnatione.

Sect. I.	<b>Q</b> uodnam fuerit Angelorum bonorum meritum, & malorum peccatum.	162
II.	Quisnam sit status Angelorum in gloria.	165
III.	Qualia sint officia Angelorum beatorum erga homines.	166
IV.	Qualis sit status damnationis reproborum Angelorum.	168
V.	Que sit Demonum conditio quoad intellectum, & voluntatem.	171
VI.	Quomodo a demonibus homines impugnentur.	173

### C A P U T IV.

De creatione hominis, ac statu innocentiae.

Sect. I.	<b>Q</b> uid de creatione hominis sentiendum sit, & qualis sit ejus anima, an incorporea, & immortalis.	174
II.	Qualis fuerit conditio primi hominis quoad intellectum.	176
III.	Qualis fuerit conditio primi hominis quoad voluntatem, & alias animi potentias.	178
IV.	An in statu innocentiae homo fuisset immortalis.	180

### C A P U T V.

De lapsu hominis, & peccato originali.

Sect. I.	<b>Q</b> uale fuerit primorum parentum peccatum.	181
II.	An peccatum primi hominis in ejus posteros traducatur.	183
III.	Quid sit proprie peccatum originale.	185
IV.	Quinam sint effectus peccati originalis in hac vita.	188
V.	Quinam sint effectus peccati originalis in futura vita.	190

### T R A C T A T U S V.

De Generis humani reparatione per Verbi Divini Incarnationem.

### C A P U T I.

De veritate mysterii Incarnationis.

Sect. I.	<b>Q</b> uid nomine Incarnationis Verbi Divini intelligendum sit.	193
II.	Quomodo hujus mysterii veritas contra Ethnicos probari possit.	194



III. Quomodo ejusdem mysterii veritas probari possit contra Judæos.

<sup>197</sup>  
IV. Quomodo eadem veritas possit contra Hæreticos propugnari.

<sup>198</sup>  
V. An conveniens fuerit Incarnationis mysterium. 200

VI. An Incarnationis mysterium fuerit necessarium. 201

VII. An si homo non peccasset, Filius Dei Incarnatus fuisset. 204

## C A P U T II.

De modo, quo peractum est Incarnationis mysterium.

Señt. I. **Q**uid sit unio hypostatica. 207

II. **An sola Filii Persona naturam humanam assumpserit.** 208

III. An post duarum in Christo naturarum unionem manserit proprietatum utriusque nature distinctio. 210

IV. Quenam humane nature partes a Verbo assumptæ sint. 211

V. Quo ordine partes humane nature a Verbo assumptæ sint. 213

VI. An Christus aliquos corporis defectus assumpserit. 214

VII. An Christus in anima sua defectus aliquos habuerit. 215

## C A P U T III.

De modo quo de mysterio Incarnationis loquendum est.

Señt. I. **A**n in Christo aliqua communicatio idiomatum admittenda sit. 218

II. Traduntur quedam regulæ in hac communicatione idiomatum enuncianda observanda. 219

III. Observationes aliquæ traduntur super regulis superiori Sectione propositis. 220

## C A P U T IV.

De Gratia Christi.

Señt. I. **Q**ualis fuerit Gratia Christi. 222

II. **An in Christo fuerint virtutes, & dona Spiritus Sancti.** 225

## C A P U T V.

De Scientia Christi.

Señt. I. **Q**ualis fuerit scientia Christi. 227

II. **Ad quasnam res Christi scientia se extenderit.** 229

CA-



## C A P U T VI.

### De voluntate, & merito Christi.

Sect. 1.	<b>A</b> N Christi voluntas fuerit libera.	230
II.	Qua ratione Christi voluntas libera fuerit.	232
III.	An, & qua ratione Christi actiones fuerint meritoriae.	234
IV.	Quid Christus Dominus sibi, & quid nobis meruerit.	236
V.	An, & qua ratione Christi merita omnibus hominibus applicentur.	238
VI.	Quando Christus Deum Patrem oraverit.	243

## C A P U T VII.

### De vitæ, ac mortis Christi Domini mysteriis.

Sect. I.	<b>D</b> E Christi Domini ingressu in hunc mundum.	245
II.	De Circumcisione, & impositione nominis Jesu.	247
III.	De progressu vitæ Christi Domini in hoc mundo.	248
IV.	De regressu Christi Domini ex hoc mundo.	250
V.	De Christi Domini descensu ad Inferos.	252
VI.	De Christi Domini resurrectione.	254
VII.	De Christi Domini in Cælos ascensione, & ad dexteram Patris sessione.	255
VIII.	De Regia Christi potestate.	256
IX.	De judiciaria Christi Domini potestate.	257
X.	De dignitate Capitis, quæ Christo Domino competit respectu tantæ Angelorum, quam hominum.	258
XI.	De Sacerdotio Christi.	262
XII.	De eximio & honorifico Redemptoris, & Mediatoris titulo, qui in Scripturis Christo Domino tribuitur.	263

## C A P U T VIII.

### De adoratione Christo Domino debita, nec non de veneratione sanctissimæ Matri ejus, cæterisque Sanctis, ac eorum Reliquiis, & imaginibus exhibenda.

Sect. I.	<b>Q</b> uam adoratio humanitati Christi debeat.	266
II.	Quomodo Sancti a nobis colendi sint.	269
III.	Qualis cultus Sanctissimæ Virgini Deiparæ Mariæ debeat.	271
IV.	Qualis veneratio imaginibus, & Reliquiis exhibenda sit.	276

## TRACTATUS VI.

### De Gratia Divina.

#### CAPUT I.

##### De necessitate Gratiæ Divinæ.

- Señ. I. **Q**uid nomine Gratiæ intelligatur. 280
- II. **Q**uam fuerint errores Pelagianorum circa Gratiæ necessitatem. 282
- §. I. Quid de Pelagianorum erroribus censuerint Africana Concilia, Carthagenense, ac Milevitanum. 283
- §. II. Quale iudicium fuerit Innocentii Papæ super iisdem erroribus. 284
- §. III. Quid contra eosdem errores in altero Concilio Carthagenense statutum fuerit. 285
- §. IV. Quid super Pelagianorum, & Semipelagianorum erroribus edixerit Cælestinus Papa. 286
- §. V. Quid Gelasius Papa, quid item Concilium Arausicanum secundum, contra Pelagianorum, & Semipelagianorum reliquias decreverint. 288
- III. De variis humane nature statibus. 290
- IV. An, & qua ratione Gratia, quæ in statu innocentie collata fuit, differat ab illa, quæ in statu nature lapsæ confertur. 292
- V. An Gratia necessaria sit ad cognoscendum quodlibet verum. 294
- VI. An possit homo velle, aut facere bonum aliquod sine Gratia. 296
- VII. An possit homo sine Gratia habituali bonum aliquod opus exercere. 299
- VIII. An sine Fide possit aliquod opus moraliter bonum exerceri. 301
- IX. An homo iustus indigeat Gratiæ actualis auxilio ad operandum bonum, & ad finalem perseverantiam consequendam. 303

#### CAPUT II.

##### De gratia sufficienti.

- Señ. I. **Q**uid sit Gratia preveniens, excitans, & operans. 305
- II. **Q**uid sit Gratia adjuvans, cooperans, comitans, & subsequens. 307
- III. An detur aliqua Gratia sufficiens. 309
- §. I.

- §. I. *Gratiam sufficientem, quæ in statu naturæ lapsæ homini datur, salem esse, ut illi resistere possit, & de facto aliquando resistat, probatur ex variis Scripturæ locis.* 311
- §. II. *Eadem sententia Conciliorum auctoritate probatur.* 312
- §. III. *Probatur eadem sententia ex sanctis Patribus.* 313
- §. IV. *Solvuntur objectiones.* 314
- IV. *An cuilibet homini detur Gratia sufficiens ad salutem.* 316
- V. *An Deus velit omnes homines salvos fieri.* 318
- \* VI. *Daturne Gratia sufficiens ad mandata Dei servanda omnibus illis, qui ea servare tenentur, & peccant non servando.* 320
- \* VII. *Daturne peccatoribus obduratis auxilium Gratiæ sufficiens ad conversionem.* 322
- \* VIII. *An vere dici possit, etiam parvulis absque Baptismo decedentibus dari media ad salutem sufficientia.* 325

### C A P U T III.

#### De Gratia efficaci.

- Sect. I. **Q**uid sit Gratia efficax, & qua ratione a sufficienti distinguatur. 327
- II. *In quo proprie consistat ipsius Gratiæ efficacia.* 329

### C A P U T IV.

#### De Gratiæ effectibus, ac in primis de justificatione.

- Sect. I. **I**N quo proprie, & formaliter consistat hominis justificationis. 331
- II. *Quinam sint effectus Gratiæ habitualis sanctificantis.* 335
- III. *An simul cum habituali Gratia aliqui virtutum habitus in animam infundantur.* 337
- IV. *An Gratia habitualis a charitate distincta sit.* 339
- V. *An aliquæ dispositiones ad justificationem requirantur, & quæ* 340
- VI. *An Gratia habitualis, seu charitas augeri, vel minui, vel amitti possit.* 343
- VII. *An aliquis certo scire possit, se esse justificatum.* 344



## C A P U T V.

De altero Gratiam effectu, seu de merito.

Sect. I.	<b>A</b> N possit homo aliquid a Deo mereri.	346
II.	An meritum recte dividatur in meritum de condigno, & meritum de congruo.	347
III.	Quenam condiciones requirantur ad meritum ex parte illius, qui meretur.	348
IV.	Quenam condiciones requirantur ex parte actus meritorii.	349
V.	Quenam res cadant sub meritum.	352
VI.	An justus de condigno mereri vitam aeternam possit.	355
VII.	An unus possit alteri mereri primam Gratiam, & alia dona ad salutem necessaria.	358
	Relatio Gallicanorum Episcoporum ad Pontificem Max. Innocentium X.	360
	Constitutio SS. in Christo P. ac D. Innocentii Papae X. qua decla- rantur, & definiuntur quinque propositiones in materia Fidei.	361
	Rescriptum SS. D. N. Innocentii Papae X. ad universos Archiepisco- pos, & Episcopos Galliae.	363
	Epistola Archiepiscoporum, & Episcoporum Galliae in Parisiensi urbe congregatorum.	364
	Alia eorundem Epistola.	366
	Aliud Rescriptum SS. D. Innocentii Papae X.	369
	Epistola Archiepiscoporum, & Episcoporum Galliae in generalibus Cleri Comitibus.	370
	Constitutio SS. in Christo P. ac D. N. D. Alexandri Papae VII.	372
	Alia Epistola Archiepiscoporum, & Episcoporum Galliae in generali- bus Cleri Comitibus.	375
	Rescriptum SS. D. Alexandri Papae VII.	

QUAE.

# QUÆSTIONES

## PROŒMIALES

### De ipsa Theologia.

#### QUÆSTIO PRIMA.

*Quid sit Theologia, & quodnam sit ejus objectum.*

**N**omen Theologiæ, si vim, & significationem illius spectemus, pro quacunque de Deo, ac rebus Divinis Doctrina sumi potest, ut docet S. Aug. lib. 8. de Civit. cap. 1. Unde & ipsi Ethnici Scriptores, qui de rebus Divinis tractaverunt, olim Theologi dicti sunt, ut observat idem S. Pater lib. 18. de Civit. c. 14. Si vero illius nominis apud Scriptores Ecclesiasticos communem acceptionem attendamus, Theologiæ nomine eam solum de Deo, ac rebus Divinis Doctrinam significari inveniemus, quæ non solo rationis lumine compatatur, sed Divina præsertim revelatione nititur.

Est autem duplex Doctrina, quæ Divina revelatione innixa est.

Una est ipsa Fides, qua res divinitus revelatas intelligimus. Altera est Facultas quædam, qua res ipsas per Fidem intellectas explicare, persuadere, ac contra Hæreticos, & alios ipsius Fidei Adversarios propugnare possumus. De utraque loquitur idem S. Aug. lib. 14. de Trin. c. 1. *Aliud est, inquit, scire, quid credere debeamus, quod docet Fides, aliud autem scire, quemadmodum hoc ipsum & piis opituletur, & contra impios defendatur, quod proprio appellare vocabulo Scientiam videtur Apostolus.* Et hæc secunda Doctrinæ species, secundum receptum communiter usum, proprio nomine Theologia vocatur. De qua proinde quæritur, an sit Scientia, an vero ad aliquam aliam virtutem intellectualem pertineat. Pro resolutione

Dicendum 1. Theologiam non esse Scientiam stricte sumptam, eo modo, quo Scientiæ nomen a Philosophis sumi solet.

Ad rationem enim Scientiæ secundum illos requiritur, ut sit cognitio certa, & evidens; quamvis autem Theologia sit certissima, imo Scientias quascunque certitudine antecellat, non est tamen evidens, cum ejus principia, quæ a Fide petuntur, obscura sint, & inevidentia.

Di-

Dicendum 2. Theologiam non esse Fidem Divinam ; quamvis eam præsupponat, ipsique innitatur.

Theologica siquidem Doctrina discursiva est, Fides autem nullo utitur discursu, sed in ipsa revelatione Divina simpliciter acquiescit.

Dicendum 3. Theologiam, quamvis nec scientia proprie dicta, nec Fides sit, ex utraque tamen aliquid participare, ex Fide quidem certitudinem cum inevidentia, ex Scientia vero tum certitudinem, tum discurrendi rationem.

Quatenus enim nititur principiis per Divinam revelationem cognitis, ex Fide habet, quod sit certissima, licet inevidens: quatenus vero conclusiones aliquas ex illis principiis per discursum elicit, ex Scientia habet, quod sit discursiva, seu argumentativa, simulque ex illa certitudinem illam accipit, quæ per ipsam discurrendi rationem haberi potest.

Dicendum 4. Theologiam, si alicujus intellectualis Habitus nomine appellanda sit, dici posse Sapientiam.

Proprietates siquidem omnes, quæ sapientiæ communiter tribuntur, maxime illi conveniunt. Sunt autem quatuor præcipuæ a Philosopho lib. 1. Metaph. cap. 2. enumeratæ.

Prima est, Sapientiam esse cognitionem universalissimam. At nulla Doctrina universalior esse potest ipsa Theologia, quæ Deum ipsum, qui est prima, & universalissima causa, tanquam principale objectum suum, considerat. Unde etiam aliquo modo spectat ad illam agere de omnibus rebus, quatenus a Deo sunt, tanquam a causa prima efficiente, vel ad ipsum, tanquam ad ultimum finem, referuntur.

Secunda Sapientiæ proprietas est, quod sit circa res difficillimas, & maxime a sensibus remotas. Et hoc Theologiæ convenit, cum versetur circa cognitionem rerum supernaturalium, quæ sunt non solum a sensibus, sed etiam ab ipsa ratione humana maxime remotæ, ac proinde difficillimæ, cum ad illarum intelligentiam captivandus sit intellectus in obsequium Fidei.

Tertia Sapientiæ proprietas est, quod sit certissima, & procedat ex principiis certissimis. Et hoc etiam Theologiæ competit, ut ex ante dictis patet.

Quarta denique Sapientiæ proprietas est, ut ad nullam aliam cognitionem ordinetur, sed aliis omnibus præsit, easque dirigat. Et hoc etiam habet Theologia. Ad nullam enim aliam Scientiam superiorem ordinatur, imo aliis scientiis, tanquam ancillis utitur, juxta illud Prov. 9. *Misit ancillas suas vocare ad arcem*, hoc est, quod alias scientias ad altiorem finem dirigit, & ordinat, v. g. Moralis Philosophiæ cognitionem ad assecutionem vitæ æternæ. Sicque Theologia recte dici potest vera, & perfecta hominis Sapientia.

Jam quod spectat ad ipsius Theologiæ objectum,

Dicimus 1. illius objectum materiale, hoc est, id quod primo, & per se



se ab ipsa Theologia consideratur, & in ordine ad illud cætera omnia, esse Deum. Cætera enim, de quibus præter ipsum Deum agit Theologia, referuntur, & ordinem dicunt ad illum, vel ut est principium, vel ut est finis rerum omnium creatarum.

Dicimus 2. objectum formale ipsius Theologiæ esse ipsummet Deum, quatenus de illo, aliisve rebus, quæ ad illum dicunt ordinem, aliquid demonstrari potest per discursum revelationi Divinæ innixum.

Hac enim ratione Theologia distinguitur ab omnibus aliis Scientiis, quæ circa Deum quocumque modo versari possunt. Illum enim solummodo considerant, quatenus ex principiis naturali lumine notis aliquid de ipso demonstrari potest.

## Q U Æ S T I O II.

*Ex quibus locis argumenta Theologica educantur.*

**P**ER locos Theologicos intelligimus sedes, ac veluti promptuaria, ex quibus ipsi Theologi argumenta sibi propria desumunt. Varii autem sunt illi loci, & varie a Doctoribus recensentur. Alii siquidem plures, alii pauciores enumerant. Probabilissime loqui videntur ii, qui proprios locos Theologicos tres præsertim esse asserunt, ex quibus argumenta Theologica certissima educantur.

Primus locus est ipsa Sacra Scriptura in Bibliis contenta, quæque ab Ecclesia tanquam canonica proponitur. De cujus auctoritate, interpretatione, aliisque ad eam spectantibus agetur infra, Tract. 1. cap. 2.

Secundus locus est Traditio Divina, quæ (ut loquitur Conc. Trid. sess. 4.) *ex ipsius Christi ore ab Apostolis accepta, aut ab ipsis Apostolis, Spiritu Sancto dictante, quasi per manus tradita ad nos usque pervenit.* Et de hac etiam agetur infra loco proxime citato.

Tertius denique locus est auctoritas ipsius Ecclesiæ, sive per Concilia generalia, sive per Summos Pontifices loquatur. Cum enim ipsa sit (ut dicit Apostolus) *Columna, & firmamentum veritatis*, ejus proinde auctoritas infallibilis est, & argumenta illi innixa non possunt non esse certissima.

Ad hos tres Theologicos locos proxime accedit auctoritas sanctorum Patrum, quæ, maximi semper ponderis fuit apud Catholicos, & ex qua proinde argumenta Theologica recte desumi possunt. Unde S. Aug. passim in libris contra Julianum adhibet auctoritatem SS. Irenæi, Athanasii, Nazianzeni, Chrysostomi, & aliorum ad propugnandas veritates circa materiam Gratiæ, quas Pelagiani Hæretici (quorum antesignanus erat ille Julianus) impugnabant.

Est tamen observandum (sicut recte monet idem S. Augustinus lib.

21. contra Faustum cap. 3. ) auctoritatem sanctorum Patrum , quamvis maximi faciendam , nullo modo tamen Canonica sacrarum Literarum auctoritati coequari , & quod , quamvis in illorum libris inveniat eadem veritas , longe tamen est impar auctoritas , Et Epist. 19. ad S. Hieronymum : *Alios , inquit , ita lego , ut quantalibet san-ctitate , doctrinaque præpolleant , non ideo verum putem , quia ipsi ita senserunt . Et Epist. 3. Neque enim quorumlibet disputationes , velut Scripturas Canonicas habere debemus , ut nobis non liceat salva honorificentia , quæ illis debetur hominibus , aliud in eorum scriptis improbare , aut recidere , &c. Talis ego sum in scriptis aliorum , tales volo esse item lectores meorum .*

Præter supra dictos locos , argumenta etiam deduci possunt ad confirmationem veritatum Theologicarum ex historia , non solum Ecclesiastica , sed etiam profana , præsertim adversus ipsos Ethnicos , qui nec Scripturas sacras , nec Traditiones , aut Ecclesiæ auctoritatem recipiunt . Idem etiam dicendum est de dogmatibus Philosophicis , & ipsa naturali ratione . Videmus siquidem , multos antiquos Patres variis argumentationibus , & ratiociniis ex Philosophia petitis ad elucidandas nostræ Fidei veritates usos fuisse , quoties adversus Ethnicos agendum illis fuit , ut a S. Justino Martyre , Arnobio , Lactantio , Tertulliano , & aliis factum esse , in eorum scriptis comperimus .

### Q U Æ S T I O III.

*Quenam sit Conclusionum Theologicarum certitudo .*

**N**omine Conclusionis Theologicæ intelligimus propositionem illam , cui assentitur intellectus ratione discursus Theologici , seu ex vi assensus , quem illius præmissis , tanquam ex Fide veris , & certis , præbuit . Hoc prænotato ,

Dicendum 1. Conclusionem Theologicam , etiam ex duabus præmissis Fide Divina cognitis deductam , inferioris tamen esse certitudinis , quam sint ipsæ veritates immediate a Deo revelatæ , & per Ecclesiam ad credendum propositæ .

Hæc assertio constat , non solum ex eo , quod ( ut dicunt Philosophi ) major sit semper certitudo principiorum , quam conclusionis , quæ ex illis deducitur , sed præsertim quia veritates Fidei immediate Divina revelatione innitantur , quæ est omnino infallibilis ; at Conclusiones Theologicæ non nisi mediante discursu , qui cum sit operatio intellectus creati , æqualem cum veritatibus Fidei certitudinem habere non potest , cum omnis intellectus creatus in operationibus sibi propriis falli , & decipi possit .

Dicendum 2. Conclusionem Theologicam certiozem semper esse quavis alia Conclusionem cujuslibet Scientiæ naturalis .

Id patet ex eo, quod motivum, quo Theologica Conclusio innititur, semper est certius motivo cujuscunque conclusionis cujuslibet Scientiæ naturalis, cum hæc solo lumine, & ratione naturali, illa vero lumine Fidei, & attestatione Divina innitatur.

#### Q U Æ S T I O IV.

*Quanam dispositiones requirantur in eo, qui investigandis veritatibus Theologisis incumbit.*

**P**rima dispositio ad Theologiæ notitiam recte capeffendam est sana Fides. Cum enim ( ut diximus ) primarium, & præcipuum Theologiæ fundamentum sit ipsa Fides, nisi sana sit & inconcussa teneatur, reliquum ipsius Theologiæ ædificium, quod superstructum fuerit, consistere non potest.

Secunda dispositio est cordis mundities. Quod ipse Christus Dominus satis aperte innuit, cum dixit Matth. 5. *Beati mundo corde, quoniam ipsi Deum videbunt.* Unde S. Gregorius Nazianz. orat. 33. adversus Eunomianos recte monet, *Non omnium esse de Deo disputare, sed eorum duntaxat, qui explorati sunt, ac contemplando longe processerunt, ac prius etiam tam corpus, quam animum repurgarunt, aut saltem purgare jam instituunt.* Impuro enim rem puram attingere fortasse ne tutum est quidem, quemadmodum nec ægris oculis Solis radios intueri.

Tertia dispositio est ipsius intentionis rectitudo. Cum enim ( ut æque sapienter, ac vere dixit Christus Dominus Matth. 6. ) ex oculi, id est, intentionis simplicitate, ac rectitudine totius corporis, id est totius operis claritas, ac perfectio pendeat; quisquis in hujus cœlestis Disciplinæ investigatione proficere desiderat, is oculum mentis simplicem, ac rectum habere debet, qui neque ad lucri emolumenta, neque ad honoris blandimenta reflectatur, sed recta intentione in solum Deum feratur, illiusque gloriam, tanquam ultimum, ac unicum sibi finem propositum, spectet.

His ad Theologiam capeffendam præcipuis, & maxime necessariis dispositionibus breviter explicatis, duo adhuc monita subjungenda sunt.

Primum est ( quod recte docuit Theodoretus præfatione in Cantica ) ad hoc ut quis Divinas veritates pervidere, & in hujus ultimæ Scientiæ arcana penetrare possit, mentem agilem, ac veluti pennis quibusdam instructam requiri, neque segniter, aut perfunctorie, sed totis ingenii viribus, maximaque sedulitate, ac diligentia studiis Theologicis esse incumbendum, alias nullus profectus, imo non leve periculum, ne in illa cœlesti disciplina vel inscii, vel semidocti ( quod non raro evenit ) falsum pro vero, dubium pro certo accipiant, ac postea  
non



non sine Fidei Catholicæ detrimento aliis venditent .

Secundum est in disquisitionibus veritatum Theologicarum modum quendam esse servandum , illudque humiliter tenendum , quod præmonuit Apostolus Rom. 12. *Non plus sapere , quam oportet sapere , sed sapere ad sobrietatem : unicuique sicut Deus divisit mensuram Fidei . Ut igitur ( sicut loquitur S. Hilarius lib. 10. de Trinit. ) Sol ita videndus est , ut possit videri , tantusque excipiens lumine est , quantus admittitur , ne si plus velimus expetere , minus quoque , quam possumus , consequamur : ita & ratio cœlestis in tantum intelligenda est , in quantum se permittit intelligi , in tantum expetenda est , in quantum apprehendendam se dedit , ne si contenti indulgentiæ moderatione non simus , amittamus indulta .*

# MEDULLA THEOLOGICA

EX SACRIS SCRIPTURIS,

Conciliorum, Pontificumque Decretis, & Sancto-  
rum Patrum, ac Doctorum pla-  
citis expressa.

TRACTATUS I.

DE FIDE.



Um Fides ( ut ait S. Basilius in Psal. 115. ) *fit sacrorum, quæ de Deo sunt, eloquiorum Dux, vel ( ut S. Bernardus loquitur ser. 75. in Cant. ) ea sit, quæ attingit inaccessible, deprehendit ignota, comprehendit immensa, apprehendit novissima, ipsam denique aeternitatem* : illo vastissimo sinu quodam modo circumcludit; nobis, quibus in hoc veritatum Theologicarum Compendio, de Deo, ejusque perfectionibus, necnon de Decretis, & Operationibus Divinis, de Donis supernaturalibus, de Sacramentis divinitus institutis, aliisque similibus rebus rationi humanæ inaccessibleis, & ignotis, agendum incumbit, hac coelesti face in primis opus esse existimavimus, quæ, depulsis errorum quorumlibet tenebris, veritatis certum, ac securum tramitem ostendat.

Ut igitur, sicut propositum nobis est, compendiaria via procedamus, ex multis, quæ a Theologis disputari de Fide solent, pauca tantum excerpemus, quæ magis necessaria visa sunt, & ad tria capita revocabimus, in quorum primo videbimus, quæ sit necessitas Fidei: in secundo, quodnam sit ejus objectum materiale: in tertio denique, quodnam sit ejusdem objectum formale, seu, quod in idem recidit, an sit ad salutem necessarium credere, quid oporteat credere, quomodo, & qua ratione oporteat credere; quibus & caput quartum subjungemus de vitiis Fidei oppositis.

*Quid sit , & quotuplici modo sumatur Fides .*

1. **O**Missis variis , ac multiplicibus modis , quibus passim in sacra Scriptura nomen Fidei accipitur , nos hic per Fidem intelligimus virtutem illam supernaturalem , per quam ( ut Catechismus Romanus loquitur par. 1. cap. 11. ) *id ratum habemus , quod a Deo traditum esse sanctissimæ Matris Ecclesiæ auctoritas comprobavit .*

\* Eo sensu accepta Fides communiter a Theologis definitur , *Virtus supernaturalis , & Theologica , qua homo firmiter assentitur iis , quæ Deus revelavit , & per Ecclesiam credenda proposuit , sive scripta illa sint , sive non sint .*

Dicitur 1. *virtus supernaturalis* , quia naturæ vires excedit , hominemque elevat ad cognitionem earum rerum , ad quas naturali capacitate pertingere non potest .

Dicitur 2. *Theologica* , quia Deum immediate pro objecto respicit , ut inferius explicabitur .

Dicitur 3. *qua homo firmiter assentitur iis , quæ Deus revelavit* , quia cum ratio formalis , qua movetur homo ad assentiendum , sit suprema , & infallibilis Dei veritas , ut supponimus ex dicendis , hinc sequitur , assensum illum Fidei debere esse ita firmum , ut omnem prorsus dubitationem excludat . Unde D. Bernardus ep. 190. *Ab sit , inquit , ut putemus , in Fide nostra esse aliquid dubie æstimatione pendulum , & non magis totum , quod in ea est , certa , & solida veritate subnixum .*

Dicitur 4. *& per Ecclesiam credenda proposuit* , quia ad Ecclesiam pertinet ea definire , & proponere , quæ Fide credenda sunt : & ( ut loquitur S. Hier. in c. 1. ep. ad Galat. ) *didicimus ab ea , quæ firmamentum est , & columna veritatis , Ecclesia , in illius interpretatione , de finitioneque acquiescere , neque fluctuare , atque omni vento doctrinæ circumferri .*

Dicitur denique , *sive illa scripta sint , sive non sint* , quia ut Conc. Trid. definivit sess. 5. in Decreto de lib. Canon. *Veritas , & disciplina Christiana continetur in libris scriptis , & sine scripto traditionibus .*

2. Porro Fides multipliciter a Theologis dividi solet ; quod hic præmittendum esse duximus , ut quæ de illius necessitate dicenda sunt , distinctius , & clarius possint intelligi . Alia liquidem est Fides habitualis , alia actualis , alia Fides externa , alia interna , alia explicita , alia implicita , alia formata , sive viva , alia informis , sive mortua .

Fides habitualis est ipse Fidei habitus , qui cum sit supernaturalis ,

non



## D E F I D E.

non producitur per actus, sicut alii habitus naturales, sed a Deo infunditur in animam. Unde ab Apostolo Ephes. 2. vocatur donum Dei. *Gratia, inquit, salvati estis per Fidem, & hoc non ex vobis, Dei enim donum est.*

Habitus autem ille Fidei non tantum in intellectu, sed etiam in voluntate, tanquam in subiecto, recipitur, ut docet S. Thom. 2. 2. qu. 4. art. 2. in intellectu quidem, quia assensus Fidei pertinet ad potentiam cognoscitivam, cum habeat verum pro objecto, in voluntate autem, quia movere debet intellectum ad assentiendum, ut libere assentiatur, alioquin assensus ille Fidei virtutis actus esse non posset. Unde August. lib. de Prædest. Sanct. cap. 5. dicit, quod Fides *in credendum voluntate consistit.*

Fides actualis est assensus ipse libere elicitus, quo quis credit actu alicui veritati divinitus revelatæ propter auctoritatem Dei revelantis. Qui quidem assensus est supernaturalis tum ratione objecti formalis, cui innititur ( de quo infra dicendum est ) tum etiam ratione principii, a quo producitur. Non enim per solas naturæ vires produci potest, sed ad hoc supernaturali aliquo auxilio opus est, ut supponimus ex tractatu de Gratia.

3. In illo autem assensu Fidei triplex communiter notatur a Theologis respectus circa Deum; quod ab illis ex S. August. tr. 29. in Jo: desumptum est. Primus est circa Deum, tanquam objectum materiale, quod creditur, secundus circa Deum, tanquam objectum formale, quo creditur, tertius denique circa Deum, tanquam finem ultimum, in quem assensus Fidei dirigitur. Unde intelligi potest, quid sit credere Deum, credere Deo, & credere in Deum.

Fides interna est ille idem assensus Fidei, quatenus in animo solo libere concipitur, nec ullis verbis, aut signis exterioribus se prodit.

Fides vero externa est illius assensus interni per verba, aut signa exteriora manifestatio. De utraque loquitur Apost. Rom. 10. dicens: *Corde creditur ad justitiam, ore autem confessio fit ad salutem.*

Fides implicita est ea, qua quis in genere assentitur iis omnibus veritatibus, quas Deus revelavit, & per Ecclesiam credendas proposuit, licet nullam illarum in particulari vel cogitet, vel cognoscat.

Fides vero explicita est, qua assentitur in particulari veritati alicui a Deo revelatæ, ut cum quis credit, esse Deum unum in essentia, trium in Personis.

Denique Fides formata, & viva est illa, quæ cum Gratia, & Charitate conjuncta est, qualis in justis reperitur.

Fides vero informis, & mortua est, quæ a Gratia, & Charitate sejuncta est, sine qua cum operationes vitales, seu æternæ vitæ meritorias habere non possit, recte ab Apostolo Jacobo mortua appellatur.

# D E F I D E .

## S E C T I O I I .

*An Fides necessaria sit ad salutem necessitate præcepti.*

**Q**uæstio intelligenda est de Fide actuali interna ( de externa enim agetur postea ) respectu adultorum . Nam si de parvulis sermo sit , cum sine actuali Baptismi susceptione salvi esse non possint ( ut supponimus ex tractatu de Sacramentis ) & in Baptismo simul cum Gratia sanctificante habitus Fidei , aliarumque virtutum supernaturalium iis infundantur ( ut Concilium Tridentinum expresse declarat sess. 6. c. 7. ) certum est , illos , cum Fidei actualis incapaces sint , sine Fide habituali tamen non posse salutem consequi .

1. Notandum autem est ad hujus quæstionis solutionem , aliquid duplici modo dici posse ad salutem necessarium , vel necessitate medii , vel necessitate præcepti . Illud dicitur necessarium ad salutem necessitate medii , quod secundum legem ordinariam ita necessarium est , ut sine illo salus obtineri nullatenus possit . Illud autem dicitur necessarium necessitate præcepti , quod ea solum ratione necessarium est , quia præceptum est . Unde quæ priori modo sunt necessaria , licet aliquando in nostra potestate non sint , eandem tamen semper inferunt necessitatem : quæ autem posteriori , si possibilia esse desinant , desinunt etiam esse necessaria . Hac distinctione supposita , ad quæstionis propositæ solutionem

2. Dicendum est 1. impositum esse hominibus a Deo præceptum in genere de actu Fidei supernaturalis eliciendo .

Hoc constat 1. ex his Christi verbis , Matth. ult. *Qui crediderit , & baptizatus fuerit , salvus erit , qui vero non crediderit condemnabitur .* Neque enim damnaretur quis ob alicujus actus omissionem , nisi præceptum aliquod de illo eliciendo impositum esset .

Præterea , cum omnibus hominibus impositum sit præceptum de Deo ex toto corde diligendo , quod quidem Christus Matth. 22. vocat primum , & maximum ; ex præcepto illo diligendi recte inferri potest præceptum credendi , siquidem dilectio supernaturalis Dei ejusdem cognitionem supernaturalem necessario præsupponit . Unde Apostol. Hebr. 11. dicit , *Accedentem ad Deum credere oportet .* Et hac de causa ( ut recte observat S. Th. 2. 2. q. 16. a. 1. ) præceptum de credendo in Deum , in primo Decalogi præcepto contineri censetur , tanquam fundamentum , ac principium totius Legis Divinæ , & sine quo cætera religionis , & charitatis officia , quæ Deum spectant , impleri nullatenus possunt .

3. Dicendum 2. Præceptum Fidei duplex esse , unum affirmativum , ut credamus ea omnia , quæ a Deo revelata sunt , & ut talia nobis ab Ecclesia proponuntur , alterum negativum , ut erroneis dogmatibus Divinæ veritati contrariis , & ab Ecclesia proscriptis fidem non adhibeamus .

Utrunque illud præceptum primis Decalogi verbis insinuat , in  
qui-

## D E F I D E.

quibus una ex parte præcipitur, ut unum Deum per Fidem agnoscamus, & ex altera prohibetur, ne Diis alienis, & falsis Fides habeatur.

### S E C T I O I I I.

*An Fides necessaria sit ad salutem necessitate medii.*

1. **L**icet quidam Doctores, ut Andreas Vega, & Dominicus a Soto, existimaverint, Fidem esse tantum necessariam ratione præcepti Divini, ac proinde illos, qui mysteriorum per eam credendorum ignorantia invincibili laborant, si tamen aliunde secundum rectam rationem vivant, & Deum ut auctorem naturæ cognoscant, & ament, posse nihilominus salutem consequi: contraria tamen sententia communis est inter Theologos, ac proinde ut certa tenenda est, prout in sequenti assertionem declarabitur.

2. Dicendum est igitur, actum Fidei supernaturalis esse ad salutem necessariam necessitate non tantum præcepti, sed etiam medii, ita ut nullus adultus possit sine tali actu justificari.

Prob. 1. ex Apost. in Ep. ad Hebr. c. 11. ubi dicit, quod *Sine Fide impossibile est placere Deo*: quæ verba non nisi de medii necessitate intelligi possunt, cum omnem possibilitatem placendi Deo excludant, nisi per Fidem, tanquam per medium absolute necessarium.

Prob. 2. ex Conc. Trid. sess. 6. c. 7. ubi postquam dixit, Baptismum esse Sacramentum Fidei, addit, *sine qua nulli unquam contigit justificatio*. Et. c. 8. *Fides est humane salutis initium, & radix omnis justificationis, sine qua impossibile est placere Deo, & ad filiorum ejus consortium pervenire*: quæ verba Concilium desumpsit ex S. August. ser. 38. de temp. ubi hæc, quæ sequuntur, addit, *Sine Fide nullus in hoc seculo justificationis consequitur gratiam, nec in futuro vitam possidebit eternam*.

3. Objicies, multos fuisse olim, & hodie adhuc esse Infideles in variis mundi partibus, qui de Christo, & Evangelio nihil prorsus audierint, omniaque Fidei mysteria invincibiliter ignoraverint, & adhuc ignorent: quibus proinde ad consequendam salutem sufficere videtur, ut Deum, prout possunt, cognoscant, & super omnia diligant, cum aliud præstare non possint, & ad impossibile nemo teneatur.

Respondetur, Ignorantiam illam in prædictis Infidelibus vincibilem esse, si non proxime, & immediate, saltem remote, & mediate, in quantum scilicet sufficiens Divinæ Gratiae auxilium ipsis offertur ad legem naturæ servandam, ut ex tractatu de Gratia supponimus, cui si fideliter cooperentur, ipsamque naturæ legem servant, Deus pro sua ineffabili bonitate uberiora illis Gratiae suæ præstabit auxilia, & alia media externa necessaria præparabit, quibus tandem ad Fidem recipiendam sufficienter disponentur.

Id colligi potest ex c. 1. Evangelii S. Joannis, ubi dicitur, quod Deus



*illuminat omnem hominem venientem in hunc mundum*; hoc est ( ut explicat S. Chrysostomus in eum locum ) quod Deus, quantum in ipso est, illuminat omnem hominem; si qui non illuminantur, ideo non illuminantur, quia lumen oblatum recipere nolunt. Ita etiam sentit S. Basil. in Regulis brevioribus, Reg. 224. & S. Thom. q. 14. de verit. ar. 11. ad 1. ubi agit de parvulo infante, qui in mediis sylvis procul a cætu, & commercio Christianorum educaretur; dicitque, certissime tenendum esse, quod si rationis naturalis ductum sequeretur, Deus ei vel per internam inspirationem revelaret ea, quæ credenda sunt, vel aliquem Fidei Prædicatorem ad eum dirigeret, sicut misit S. Petrum ad Cornelium.

## S E C T I O I V.

*An sit ad salutem necessarium explicitam mysteriorum aliquorum Fidem habere, & quorum.*

1. Duo certa sunt.

Primum est, Christianos adultos ad credenda omnia, & singula mysteria generaliter Fide implicita obligari. Hoc enim nihil aliud est, quam assentiri debere huic generali principio, quo asseritur, omne, quod Deus Ecclesiæ revelavit, esse infallibiliter verum: quod qui negaret, Fidelis, & Christianus dici non posset.

Secundum, non omnes Christianos obligari ad habendam Fidem explicitam de omnibus, & singulis Fidei dogmatibus: alias non esset opus Doctoribus, & frustra dixisset S. Paulus 1. Cor. 12. alii dari per Spiritum sermonem scientiæ, alii sermonem sapientiæ, &c. si omnes æque scientes, & sapientes in rebus Fidei esse deberent.

Quæstio est igitur, An omnes adulti teneantur aliqua Fidei nostræ mysteria explicite, & distincte credere, & quænam illa sint. Pro cuius resolutione.

2. Dicendum 1. omnes adultos obligari ad aliquid credendum explicite, ac in primis, unum esse Deum, illumque justum remuneratorem decernere præmia justis, & supplicia improbis, non tantum in hac vita, sed potissimum in futura.

Hæc veritas constat manifeste ex verbis S. Pauli in ep. ad Hebr. c. 11. ubi, postquam dixit, quod *impossibile est sine Fide placere Deo*, mox declarans, quænam sit illa Fides, per quam Deo possimus placere, subjungit, *Credere enim oportet accedentem ad Deum, quia est, & inquirentibus se remunerator sit*. Qualis autem sit illa remuneratio declarat Christus S. Matthæi cap. 25. his verbis, *Ibunt bi in supplicium æternum, justi autem in vitam æternam*.

3. Dicendum 2. omnes adultos teneri similiter ad habendam Fidem explicitam de mysterio SS. Trinitatis. Ita S. Th. 2. 2. q. 2. a. 8.

Constat 1. ex verbis Christi, qui mittens Apostolos, injunxit illis

ex-

## D E F I D E.

7

expresse, ut docerent omnes gentes, & baptizarent in Nomine Patris, & Filii, & Spiritus Sancti.

Constat 2. ex S. Athanasio in Symbolo, ubi postquam dixit, Fidem Catholicam ab eo tenendam esse, qui velit esse salvus, subjungit, *Fides autem Catholica hæc est, ut unum Deum in Trinitate, & Trinitatem in unitate veneremur.* Et etiam ex S. Cyrillo lib. 1. in Jo. cap. 16. ubi sic loquitur: *Non sufficit nobis cognitio Dei absque cognitione Patris, & Filii, & Spiritus Sancti.*

Constat 3. ex ritu S. Ecclesiæ Catholicæ, quæ neminem ad Baptismum recipit, quin prius diligenter inquirat, an credat in Deum Patrem? an credat in Jesum Christum Filium ejus? an credat in Spiritum Sanctum? qua cæremonia satis aperte declarat, neminem Gratia Baptismalis, ac proinde justificationis esse capacem, qui non explicitam, & distinctam de sanctissimæ Trinitatis mysterio Fidem habeat.

4. Dicendum 3. omnes adultos præterea teneri ad habendam Fidem explicitam de mysterio Incarnationis.

Probatur 1. ex variis locis novi Testamenti id expresse declarantibus, ut S. Jo. c. 1. *Dedit potestatem filios Dei fieri his, qui credunt in nomine ejus, non aliis.* Ejusdem cap. 3. *Qui non credit, jam judicatus est, quia non credit in nomine unigeniti Filii Dei.* Item c. 17. *Hæc est vita æterna, ut cognoscant te verum Deum, & quem misisti, Jesum Christum.* Act. cap. 8. S. Philippus Baptismum Eunuchō postulanti conferre noluit, quin prius professus fuisset expressis verbis: *Credo Filium Dei esse Jesum Christum.* Denique videmus Christum Dominum passim in Evangeliiis exacte petiisse a cæco nato, & pluribus aliis, ut distincte, & explicitè in se crederent.

Probatur 2. ex Symbolo S. Athanasii supra citato, in quo proposito mysterio Sanctissimæ Trinitatis, adjungit postea, *Sed necessarium est ad æternam salutem, ut Incarnationem quoque Domini nostri Jesu Christi fideliter credat.*

Probatur 3. ex Sanctis Patribus. S. Hieron. in cap. 3. Epist. ad Ephes. *Non possumus, inquit, esse filii per adoptionem, nisi prius Fidem Filii Dei, & intelligentiam recipiamus.* Et S. August. lib. de bono perseverant. cap. 1. *Nullum, inquit, verius initium Christiani hominis, quam credere in Christum.*

Observandum est autem, ea, quæ diximus, intelligenda esse tantum respectu temporis consequentis Christi Incarnationem. Alia enim ratio est eorum, qui sive in lege Moyse, sive in lege naturæ vixerunt.

Plurimorum enim Theologorum sententia est, Fidem explicitam Trinitatis tunc illis non fuisse necessariam nec medii, nec præcepti necessitate: licet quidam existiment, Pontifices, Sacerdotes, ac Legis Doctores ad illam Fidem fuisse obligatos, utpote sibi sufficienter in Scripturis propositam.

Quod vero spectat ad mysterium Incarnationis plurimi existimant,

A 4

ante

ante Christi adventum fuisse necessariam Fidem aliquam generalem, & implicitam de Mediatore, ac Redemptore futuro, non vero distinctam, & explicitam eo modo, quo nunc ad eam obligamur.

3. Quæres, an præter illa mysteria sint adhuc alia, de quibus explicita Fides ab omnibus adultis habenda sit?

Respondetur, omnes adultos obligari præterea,

Primo ad ea omnia scienda, & credenda, quæ tum in Symbolo Apostolorum, tum in Oratione Dominica continentur. Hoc manifeste colligitur ex Catechismo Concilii Tridentini par. 2. c. 11. ubi dicitur, teneri paternos ad Symbolum, & Orationem Dominicam eos docendum, quos de fonte levaverint: ergo si illi ad docendum tenentur, ii, qui baptizantur, ad discendum adhuc strictius tenebuntur. Idem expresse declaratur de consecr. dist. 4. c. *vos ante omnia*, ubi hæc verba ex S. August. serm. 6. de Temp. desumpta ad paternos diriguntur, *Ante omnia Symbolum, & Orationem Dominicam & vos ipsi tenete, & illis, quos de sacro Fonte suscepistis, ostendite.*

Secundo ad ea cognoscenda, & credenda, quæ in Decalogo continentur, cum illorum observatio ad salutem sit necessaria, dicente Christo Matth. 19. *Si vis ad vitam ingredi, serva mandata*: servari autem non possunt, si ignorentur.

Tertio ad ea etiam cognoscenda, & credenda, quæ ad eorum Sacramentorum rationem pertinent, quorum susceptio illis est ad salutem necessaria. Cum enim (ut ex tractatu de Sacramentis supponimus) prima dispositio ad Sacramentum aliquod digne suscipiendum in adultis sit Fides respectu Sacramenti illius, quod suscipi debet; sequitur, quod obligatio illius Sacramenti suscipiendi necessario secum inferat obligationem habendæ Fidei explicitæ respectu illius. Quod & similiter dicendum est de his Sacramentis, ad quæ suscipienda non obligatio, sed sola devotio impellit; cum utrobique sit par ratio.

Quarto denique ad ea omnia, & singula explicitè credenda, quæ secundum exigentiam peculiarem cujusque status, & conditionis, ad salutem consequendam, juxta Divinæ Legis præscriptum, necessaria sunt. Et ea ratione in Pastoribus, & Doctoribus Ecclesiæ Fides haud dubie magis explicita requiritur, quam in aliis, qui eorum curæ sunt commissi; in Sacerdotibus item magis, quam in Laicis, quia sine Fide illa magis explicita omnibus officii sui partibus digne, ut par est, fungi non possunt.

## S E C T I O V.

*An Fides externa sit ad salutem necessaria.*

1. **D**icendum est, externam Fidei confessionem esse necessariam ad salutem necessitate præcepti affirmativi.

Prob. 1. ex Christi verbis S. Matth. c. 10. *Qui me negaverit coram boni-*



## D E F I D E.

*hominibus, & ego negabo eum coram Patre meo, qui in cælis est. Et S. Lucæ 9. Qui me erubuerit, & sermones meos, hunc Filius hominis erubescet, cum venerit in maiestate sua. Item ex verbis Apostoli Rom. 10. Corde creditur ad justitiam, ore autem confessio fit ad salutem.*

Probatur 2. ex S. Aug. lib. de Fide, & Symbolo. *Fides, inquit, a nobis exigit duplex officium, cordis, & linguae: nec salvi esse possumus, nisi Fidem ore profiteamur, quam corde gerimus.*

Probatur 3. exemplo sanctorum Martyrum, qui potius elegerunt tormenta omnia, & ipsam mortem subire, quam Christi Fidem vel ad momentum negare. Quod si quis atrocitate tormentorum victus Fidem negavisset, aut dissimulasset, ejiciebatur ab Ecclesia, tanquam gravissimi peccati reus: nec, nisi publica Poenitentia peracta, in eam recipiebatur, ut constat ex Sancto Cypriano lib. de lapsis c. 3. & Ambr. lib. de Poenitentia.

Hæc autem assertio est de Fide; cui opposita olim fuit hæresis Elche-saitarum dicentium, negari posse Fidem exterius, instante persecutio-ne, etiam addito juramento; ac sufficere, ut tunc in animo interius retineretur; ut docet Eusebius lib. 6. c. 31. Quæ quidem Hæresis dam-nata fuit in Concilio Romano sub S. Cornelio Papa, ut colligi pot-est ex iis, quæ habentur apud Baron. ad an. 254. & 255. ubi dicitur in illo Concilio (cujus quidem acta interciderunt) firmo decreto sta-bilitum fuisse, non alia ratione iis, qui etiam ore tenus Fidem eju-raverant, veniam esse concedendam, nisi post gravem poenitentiam ab illis impletam. Unde sequitur, Apostasiam, etiam ore tenus fa-ctam, tamquam gravissimum peccatum, damnatam fuisse.

Diximus in assertione, *præceptum obligans ad externam Fidei confes-sionem esse affirmativum*: quæ est S. Th. doctrina 2. 2. q. 3. a. 2. ex qua proinde sequitur, illud non obligare omni tempore, sed tantum certo, ac determinato. Ut ergo distingui possit, quo tempore obliget:

2. Dicendum 2. tunc nos obligari ad externam Fidei confessionem, quando necessaria est vel ad honorem Dei, vel ad utilitatem proximi.

Ita S. Thom. loc. cit. quod probat in respons. ad 1. ex eo, quod fi-nis nostræ Fidei, sicut & aliarum virtutum, referri debet ad finem charitatis, qui est amor Dei, ac proximi; & ideo, quando Dei ho-nor, vel proximi utilitas id requirit, non debet esse contentus ho-mo, (ut ait S. Doctor) ut per Fidem suam ipsi veritati Divinæ con-jungatur, sed Fidem illam debet exterius profiteri.

Dicendum 3. etsi nunquam liceat ullo modo negare Fidem Christi, tamen quando, spectatis circumstantiis, nulla honori Divino irroga-tur injuria, nec ullum proximi saluti damnum infertur, non solum licitum esse, sed etiam aliquando necessarium Fidem occultare.

Ita S. Doctor l. c. in resp. ad 3. ubi dicit, quod, quando ex confes-sione Fidei manifesta turbatio aliqua Infidelium oriretur, in tali casu laudabile non esset Fidem publice confiteri. Et ad hoc probandum af-fert

fert verba Christi dicentis, Matth. 7. *Nolite sanctum dare canibus, neque mittatis margaritas vestras ante porcos, ne conversi dirumpant vos.*

Cum autem occultatio illa Fidei variis modis fieri possit, vel fugiendo, vel aliquo signo exteriori fidem dissimulando:

3. Dicendum 4. licitum esse homini Christiano tempore persecutionis fugere.

Hoc permisit Christus, dicens Matth. 20. *Cum persequentur vos in civitate ista, fugite in aliam.*

Hoc tamen limitandum est, nisi ex hac fuga damnum aliquod redundet in honorem Dei, vel proximi salutem, ut si Episcopus, aut Pastor tempore persecutionis fugiat, cum tunc maxime illius ope subditi indigeant. Nam, ut recte dicit Nicolaus Papa cap. *Sciscitaris* 7. q. 1. *Si gubernator navis in tranquillitate non debet deferere navim, multo minus in tempestate.*

Dicendum 5. licitum quidem esse occultare Fidem signis, quæ ex se sunt indifferentia, non vero illis, quæ ad profitendam falsam Religionem instituta sint. Est communis Doctorum sententia, præsertim S. Antonini par. 2. tit. 12. c. 6. Alexan. Halensis par. 2. q. 183, Navar. lib. 5. Consilior. tit. de Hæc. c. 10. & in Manuali c. 11. n. 25, & aliorum.

Prior assertionis pars probatur, quia hæc signa, cum sint ex se indifferentia, nihil in se mali habent, qualia sunt illa, quibus natio una ab altera secernitur, vel status unus ab altero, militis v. g. a mercatore distinguitur, nec lædunt honorem Divinum, nec proximi conscientiam feriunt. Sic S. Sebastianus in aula Diocletiani Imperatoris Ethnica ( ut observat S. Th. 2. 2. q. 10. a. 10. ad 2. ) Fidem suam sub militari sago, & chlamyde occultabat, ut Christianis commodius opitulari posset, eosque in tormentis confortare.

Posterior vero pars assertionis probatur ex eo, quod qui talibus signis uteretur, censeretur non solum veram Religionem occultare, sed falsam profiteri: quod omnino illicitum est. Unde lib. 2. Machab. c. 6. Eleazarus non tantum porcinas carnes in lege prohibitas, sed & alias Idolis immolatas manducare noluit: quia illa manducatio, licet ex se indifferens ( ut dicit S. August. ) tamen instituta censebatur ad falsam Religionem profitendam. Quæ etiam fuit ratio, cur olim præceperint Apostoli, Act. 15. ut omnes ab immolatis Simulacrorum abstinerent. Et eo sensu vestes Paganorum illicitas esse dixit Tertull. lib. de Idol. cap. 18. nempe eas, quibus homo astringitur officiis, vel Sacerdotiis Idolorum: quas ideo asserit Profanationis suæ maculam habere, & neminem posse esse mundum, qui tunicam inquinatam induerit.

## C A P U T I I.

*De objecto materiali Fidei.*

**A**D clariorem intelligentiam eorum, quæ dicenda sunt, notandum est, nos hic sumere nomen objecti sive materialis, sive formalis, eo sensu quo a S. Th. sumitur 2.2. q.1. a. 10. & quo etiam communiter a Philosophis, & Theologis sumi solet, scilicet per objectum materiale alicujus habitus cognoscitivi intelligimus id omne, quod cognoscitur, & per objectum formale id per quod illud cognoscitur. Unde per objectum materiale Fidei intelligimus ea omnia, quæ Fide Divina creduntur, aut credi debent; per objectum vero formale illud, per quod, seu ratione cujus iis omnibus assentimur.

Cum igitur quærimus, quodnam sit objectum materiale Fidei, idem est, ac si quæramus, quænam sint ea, quæ nobis a Deo revelata sunt, ac proinde quæ Fide credenda sunt.

Hoc autem Conc. Trid. sess. 4. contineri dixit, partim in Sacris, & Canonicis Scripturis, partim in Traditionibus non scriptis, quæ ipsius Christi ore ab Apostolis acceptæ aut ab ipsis Apostolis Spiritu Sancto dictante, quasi per manus traditæ, ad nos usque pervenerunt. De utrisque proinde in sequentibus Sectionibus agendum nobis est.

## S E C T I O I.

*Quinam Libri sacræ Scripturæ sint Canonici.*

1. **C**UM Concilium Tridentinum sess. 4. supra citata, sacram Scripturam vocet Canonicam, ejusque legitimos Libros jam olim appellari consuevisse Canonicos testetur S. Aug. Epist. 19. ad S. Hieronymum cap. 2. observandum est ad faciliorem intelligentiam eorum, quæ dicenda sunt, sic appellari duabus de causis ex duplici vocabuli Canonis significatione desumptis.

Canon enim significat normam aliquam, seu regulam, & præterea catalogum, seu numerum aliquarum rerum. Scripturæ sacræ igitur vocantur Canonice, & earum libri Canonici, tum quia continent normam, seu regulam, quam in Fide, & moribus sequi debemus, tum etiam quia, cum Hæretici a primis Christianismi temporibus, ut veritati fucum facerent, erroribusque suis patrocinaerent, aliquando falsas Scripturas pro veris supponerent, aliquando veras pro libito repudiarent, Ecclesia eorum fraudibus, & impiis conatibus obistere volens, certum Canonem, & catalogum Librorum sacræ Scripturæ constituit, unde Libri illi, quos Ecclesia pro veris, & legitimis agnovit, Canonici dicti sunt.

Hoc



Hoc colligi potest ex variis Conciliis, præsertim ex Concilio Carthaginensi tertio, quod celebratum est temporibus Siricii Papæ, circa annum Domini 397. in cujus canone 47. hæc verba leguntur; *Placuit, ut præter Scripturas Canonicas, nihil in Ecclesia legatur sub nomine Divinarum Scripturarum: sunt autem Canonica Scriptura Genesis, Exodus, Leviticus, &c.* Ubi eisdem libros Canonicos enumerat, qui postmodum in Concilio Tridentino sessione supra citata recensiti sunt.

2. De iis autem libris Canonicis duo sunt hic observanda.

Primum est, ad Ecclesiam pertinere veram, & legitimam Scripturam Canonicam populo Christiano, ut talem, proponere, eamque a falsa, & supposita Scriptura discernere.

Hoc constat 1. ex usu ipsius Ecclesiæ supra relato, quo illius Scripturæ Canonem constituendi jus, atque auctoritatem perpetuo sibi vindicavit.

Constat 2. ex S. Aug. l. contra Epist. Fundamenti c. 5. ubi sic loquitur, *Evangelio non crederem, nisi me Ecclesiæ Catholicæ commoveret auctoritas.* Et paulo post loquens de libro Actuum Apostolorum, *Cui libro, inquit, necesse est, ut credam, si credo Evangelio, quoniam utramque Scripturam similiter mihi Catholica commendat auctoritas.*

Secundum est, nihil in Scriptura Canonica contineri, quod non Fide Divina tenendum sit.

Hoc expresse definitum est in Concilio Tridentino loc. cit., ubi post enumerationem Librorum Canonicorum hæc habentur, *Si quis autem Libros integros, cum omnibus suis partibus, prout in Ecclesiæ Catholica legi consueverunt, & in veteri vulgata Latina editione habentur, pro sacris, & Canonicis non susceperit, anathema sit.*

Unde patet, omnino repudiandum esse id, quod Erasmus dixit in annotationibus super c. 2. & 27. S. Matth. posse aliquem errorem levem in sacris Libris reperiri, & sanctos Evangelistas aliquando memoria lapsos esse. Quanto humiliter, & sapientius dixit S. August. scribens ad S. Hieron. Epist. sup. cit. cap. 1. Ego, inquit, *fateor charitati tuæ, quod Libris illis Scripturarum, qui jam Canonici appellantur, didici hunc timorem, honoremque deferre, ut nullum eorum Auctorem scribendo aliquid errasse firmissime credam: at si aliquid in eis Libris offendero, quod contrarium videatur veritati, nihil aliud, quam vel mendosum, codicem, vel interpretem non assecutum esse, quod dictum est, vel me minime intellexisse non ambigam.*

## S E C T I O II.

*De variis sacrae Scripturae editionibus, & quænam ex illis sit authentica.*

1. **N**otandum est Sacrae Scripturae libros variis linguis, & idiomatibus editos fuisse.

Ac

Ac in primis vetus Testamentum, licet primum lingua Hebraica a Moyse, Prophetis, & aliis Auctoribus conscriptum sit, variis tamen ex causis Chaldaice, Syriace, Græce, & Latine temporum successu translatum, & editum fuisse.

Quod autem spectat ad novum Testamentum, constat omnes ejus Libros fuisse primum Græce conscriptos, si tres tantum excipias, scilicet S. Matthæi Evangelium, quod Hebraice primum ab illo scriptum fuit, Evangelium S. Marci, quod multi existimant Latina lingua primum ab illo editum fuisse, & Epistolam ad Hebræos, de qua ambigitur, an primum Hebraice, an vero Græce scripta fuerit. De his omnibus agit fusissime Bellarm. lib. 2. de Verbo Dei, c. 1. & seq. Hac observatione præsupposita,

2. Dicendum est, ex his omnibus Scripturæ sacræ editionibus, solam vulgatam editionem Latinam, Decreto Concilii Tridentini, & Romani Pontificis auctoritate factam, esse veram, legitimam, & authenticam Canonicam scripturam.

Hoc expresse definitum est in Conc. Trid. in decreto supra sæpius cit. sess. 4. his verbis, *Insuper eadem sacrosancta Synodus considerans, non parum utilitatis accedere posse Ecclesiæ Dei, si ex omnibus Latinis editionibus, quæ circumferuntur, sacrorum Librorum, quænam pro authentica habenda sit, innotescat: statuit, & declarat, ut hæc ipsa vetus, & vulgata editio, quæ longo tot sæculorum usu in ipsa Ecclesia probata est, in publicis lectionibus, disputationibus, prædicationibus, & expositionibus pro authentica habeatur.*

Illud idem præterea constat ex comparatione ipsius vulgatæ editionis, & aliarum, quæ supra memoratæ sunt.

Hebraicam enim editionem, partim negligentia Librariorum, partim Rabbiorum ignorantia, qui puncta addiderunt, quæ vocalium literarum, quibus carebant Hebræi, supplerent vicem, fuisse aliquo pacto depravatam, & quosdam etiam in eam errores irrepsisse certum est, ut notat Bellarm. loc. cit.

Quod spectat ad editionem, vel potius paraphrasim Chaldaicam (si paucos libros veteris Testamenti excipias, scilicet Tobiae, & Judith, & aliquam Esdræ, & Danielis partem, qui libri existimantur fuisse primum Chaldaice editi) tota illa paraphrasis (quæ Targum a Rabbis vocatur) nullius umquam momenti fuit in Ecclesia, cum in ea multa reperiantur Christianæ veritati parum consentanea.

Editio Syriaca (quæ fuit tantum novi Testamenti, & quorundam librorum veteris) licet ab illius linguae peritis probetur, nunquam tamen ab Ecclesia authentica declarata est.

Quod pertinet ad Græcam, cum plures editiones lingua illa prodierint ex variis Auctoribus, ut Aquila, Theodotione, Symmacho, & aliis; editio tamen Græca, quæ a Septuaginta Interpretibus in Ægypto tempore Ptolemæi Philadelphi facta est, omnibus aliis Græcis merito ante-

anteponenda censetur. Quia tamen etiam illam vitiatam esse, & corruptam multis in locis constat, ut testatur S. Justinus Martyr in Dialogo cum Tryphone, & S. Hieronymus Præfatione in libros Paralipomenon, & in Esdram.

3. Restat editio Latina, quæ quidem multoties, & multipliciter etiam facta est, ita, ut ante tempora S. Hieronymi innumerabiles prope reperirentur versiones, & editiones Latinæ, ut testatur S. August. lib. 2. de doctr. Christiana cap. 11. Verum una fuit inter omnes illas, quæ specialem semper in Ecclesia auctoritatem obtinuit; quæ vetus, & vulgata editio dicebatur, ut constat ex S. Greg. præfat. in lib. Moral. c. 5. & ex S. Hieron. in c. 14. & 49. Isaïæ, quam etiam S. August. lib. cit. c. 15. Italiam vocat, & omnibus aliis anteponit.

Est autem difficultas inter Doctores, an editio Latina vulgata, quæ nunc in usu est apud Catholicos, sit eadem cum illa editione veteri, an vero diversa ab illa. Quidam contendunt, esse diversam, asseruntque, editionem hanc nostram vulgatam esse S. Hieronymi: alii contra eandem esse volunt cum illa veteri, solumque a S. Hieronymo fuisse emendatam: alii denique (quod probabilius existimamus) censent, vulgatam hanc nostram editionem mixtam esse ex utraque, & partim eandem esse cum veteri, partim vero esse ex translatione S. Hieronymi. Quod etiam asserit Bellarminus sup. cap. 9. ubi docet, novum Testamentum editionis nostræ vulgatæ esse ex antiqua illa editione, quam S. Hieronymus emendavit; similiter & Psalterium Davidicum ab eodem etiam emendatum, necnon & libros Sapientiæ, Ecclesiastici, & Machabæorum, & reliquos Sanctæ Scripturæ libros nostræ editionis esse ex versione ejusdem S. Hieronymi.

Porro quisquis editionis hujus nostræ vulgatæ Auctor sit, certum est, illam ab Ecclesia universa receptam, & novissime in Concilio Tridentino authenticam esse declaratam; proindeque in illa verum, & legitimum Dei verbum contineri. Unde sequitur, omnia; & singula, quæ in Canonicis Sacræ Scripturæ Libris secundum illam authenticam editionem continentur, pertinere ad Fidei Divinæ objectum & tanquam divinitus revelata, & attestata, ab omnibus esse recipienda, & credenda.

### S E C T I O I I I.

*Ad quem pertineat definire verum, & legitimum Scripturæ sensum.*

**A**Ntequam ad propositam quæstionem respondeamus, supponendum est tanquam certum, multis in locis Sacræ Scripturæ sensum esse maxime reconditum, & abstrusum, unde fit, ut non sine magna difficultate percipi, & intelligi possit.

Hoc constat ex Epist. 2. S. Petri, cap. ult. ubi loquens de Epistolis S. Pauli, dicit, in illis esse *quedam difficulta intellectu, quæ indocti,*



*docti, & instabiles depravant, sicut & ceteras Scripturas, ad suam ipsorum perditionem. Et S. Ambros. Epist. 44. ad Constant. Mare, inquit, est Scriptura Divina, habens in se sensus profundos, altitudinem Prophetarum anigmatum, &c. Sanctus item Augustinus l. 2. de Doctr. c. 7. postquam dixit, Scripturam sacram plenam esse multiplicibus obscuritatibus, & ambiguitatibus, addit hæc verba: Quod totum provisum divinitus esse non dubito ad edomandam labore superbiam, & intellectum a fastidio revocandum, cui facile investigata plerumque viluerunt.*

2. Ex quibus patet, quam falso Hæretici hujus temporis dicant, Scripturas esse apertas, & cuivis ad intelligendum facillimas: nempe ut eo prætextu eas ad libitum contorqueant.

Cum igitur Scriptura Sacra obscura sit, & interpretatione indigeat, quæritur, unde petenda sit illa interpretatio, & ad quem pertineat ejus verum, ac legitimum sensum definire. Pro cujus quæstionis resolutione

3. Dicendum 1. verum, ac legitimum Scripturæ sensum petendum non esse ab ingenio, ac judicio privato cujusque hominis.

Probatur ex verbis Jerem. c. 23. *Nolite audire Prophetas, qui loquuntur de corde suo.* Et ex Epist. 2. S. Petri, c. 1. ubi dicit, quod *Omnis Prophetia divinitus inspirata propria interpretatione non fit.* Quibus verbis (ut exponit Glossa ordinaria super hunc locum) declarat, Scripturæ expositionem, & interpretationem petendam non esse ex proprio ingenio. Quod confirmatur ex verbis proxime sequentibus, ex quibus sic possumus argumentari: Eodem ingenio, ac judicio Libri sacri interpretandi sunt, quo scripti fuerunt; atqui humano ingenio, ac judicio non fuerunt conscripti; ergo non sunt ingenio, aut judicio humano explicandi, seu interpretandi.

4. Dicendum 2. ad Ecclesiam pertinere de vero, & legitimo sensu Scripturarum judicare.

Id constat ex Concilio Trident. in Decreto sæpius jam citato sess. 4. ubi hæc verba habentur: *Præterea ad coercenda petulantia ingenia, dæternit sancta Synodus, ut nemo suæ prudentiæ innixus, in rebus Fidei, & morum, ad edificationem Christianæ Doctrinæ pertinentium, sacram Scripturam ad suos sensus contorqueans, contra eum sensum, quem tenuit, & tenet sancta Mater Ecclesia, cujus est judicare de vero sensu, & interpretatione Scripturarum sanctarum, aut etiam contra unanimem, consensum Patrum, ipsam Scripturam sacram intepretari audeat.*

Unde apposite ad hujus veritatis confirmationem S. Augustinus contra Cresconium cap. 33. *Tunc, inquit, Scripturarum a nobis tenetur veritas, cum id facimus, quod universæ placuit Ecclesiæ, quam ipsa Scripturarum commendat auctoritas.*

\* *Quenam sit vera Ecclesia, ad quam pertineat verum, & legitimum Scripturæ sensum definire, & quibus notis illa dignoscatur.*

1. **N**omine Ecclesiæ ( ut explicat Bellarm. lib. de Eccl. milit. c. 2. & cum eo communiter Theologi ) intelligitur cœtus hominum baptizatorum ejusdem Fidei professione & eorundem Sacramentorum communione inter se unitorum, sub regimine legitimorum Pastorum, ac præcipue unius summi Pastoris, Romani scilicet Pontificis, qui in terris Christi vices gerit.

Dicitur 1. *Cœtus hominum baptizatorum*, ut excludantur Judæi, Turcæ, Pagani, & alii ejusmodi Infideles, qui nunquam in Ecclesiam fuerunt per Baptismi Sacramentum admissi.

Dicitur 2. *ejusdem Fidei professione, & eorundem Sacramentorum participatione unitorum*, ut excludantur Hæretici, & Apostatæ, qui licet fuerint baptizati, quia tamen a vera Fide exciderunt, & ea de causa Sacramentorum communione privati sunt, ideo sunt ab Ecclesia alieni.

Dicitur 3. *sub regimine legitimorum Pastorum, ac præsertim unius summi Pastoris, Romani scilicet Pontificis*, ut excludantur Schismatici, qui quidem Fidem habent, & exterius aliquando de Sacramentis participant, sed quia legitimo Pastori non subduntur, nec ejus vocem audire volunt, ideo censentur etiam ab Ecclesia extorres. Et hoc optime expressit S. Augustinus lib. 1. de vera Relig. cap. 5. ubi dicit, quod *neque in confusione Paganorum, neque in purgamentis Hæreticorum, neque in languore Schismaticorum quærenda est vera Religio, sed apud eos solos, qui Christiani, Catholici, & Orthodoxi nominantur.*

2. Huic definitioni Ecclesiæ oppositi fuerunt varii Hæreticorum errores. Vuicleffus enim, & Joannes Hus, quibus postea subscripsit Calvinus, asserebant Ecclesiam militantem in terris esse Congregationem Prædestinatorum, contendebantque, omnes, & solos Prædestinatos esse de Ecclesia.

Lutherani, & Confessionistæ ex solis justis Ecclesiam constare dicebant. Anabaptistæ vero ex solis perfectis, ut fusius explicat Bellarm. sup. apud quem etiam Hæreticorum illorum refutatio videri potest. Nos hic solum breviter adnotabimus, omnes supradictos errores manifeste repugnare sacris Evangeliiis, in quibus passim Ecclesia designatur sub variis similitudinibus, ut *Area*, in qua triticum cum paleis reperitur, Matth. 3. *Agri*, in quo zizania cum tritico usque ad messem crescere sinuntur, Matth. 13. *Convivii nuptialis*, ad quod boni, & mali admittuntur, Matth. 2. *Ovilis*, in quo simul cum ovibus hædi habitare permittuntur, Matth. 25. *Sagene missæ in mare*, in qua pisces boni,

boni, & mali simul congregari dicuntur, Matth. 13. *Magnæ domus*, in qua dicuntur esse vasa aurea, & argentea, lignea quoque, & fictilia, alia quidem in honorem, alia vero in contumeliam, 2. ad Timoth. 2.

Quæ quidem satis aperte significant, in Ecclesia militante reprobato-  
ros simul cum prædestinatis, justos cum injustis, perfectos cum imper-  
fectis permixtos reperiri. Unde S. Aug. ser. 1. de conv. S. Pauli dicit,  
Paulum, quamvis ab æterno prædestinatum, fuisse tamen prius lupum,  
deinde ovem. Et S. Chrys. hom. 6. in 2. ad Tim. dicit, Paulum fuisse  
prius vas fictile, sed esse versum postea in vas aureum, & e contra Ju-  
dam fuisse vas aureum, sed postea propria malitia conversum in fictile.

3. Porro ad dignoscendam illam veram Ecclesiam quatuor præci-  
pue notæ assignantur in Symbolo Constantinopolitani Concilii, quo  
postmodum in sacris Liturgiis usa est ipsa Ecclesia Catholica, quæ  
quidem ita illi conveniunt, ut nulli alteri Hæreticorum, aut In-  
fidelium Congregationi aptari possint. Hæ autem notæ sunt, quod  
Ecclesia sit Una, Sancta, Catholica, & Apostolica.

Una, quia unam, & eandem Fidei doctrinam ubique profiteamur,  
& omnes Catholici toto terrarum orbe diffusi, licet moribus, lin-  
guis, & vitæ ratione disparati, de omnibus tamen dogmatibus Fi-  
dei idem sentiunt. Est etiam una, quia est unum corpus mysticum sub  
uno capite Christo, & ejus in terris Vicario Pontifice Romano.

Sancta, quia disciplina ejus est sancta, nihilque continet falsum in  
doctrina Fidei, nihil injustum, aut a vera virtute absonum in doctrina  
morum. Est sancta, quia Divina lex, quam profitemur, est *immaculata*,  
& *convertens animas*, ut Psalmista loquitur. Est etiam sancta, quia in  
ea verum Sacrificium peragitur, per quod sanctificamur, & vera repe-  
riuntur Sacramenta, ex quibus tanquam ex Salvatoris fontibus hau-  
ritur aqua illa munda, & viva, per quam a peccatis emundamur, &  
ad opera bona fructuose peragenda vires nobis suppeditantur. Unde  
S. Gregorius lib. 35. Moral. cap. 6. *Sola est*, inquit, *Ecclesia*, per  
quam *Sacrificium Dominus libenter acceptat*, *sola*, quæ pro errantibus  
*fiducialiter intercedit*, *sola*, in qua opus bonum fructuose peragitur.

Catholica, idest universalis, quia a prima Evangelii publicatione,  
vera Ecclesia per totum orbem diffusa est, & per omnia anteriora sæcu-  
la duravit, & omnibus futuris sæculis usque ad finem sæculi duratura  
est, juxta id, quod Christus Dominus pollicitus est Apostolis, & in  
eorum persona universæ Ecclesiæ, cum dixit Matth. 28. *Ecce ego vo-  
biscum sum omnibus diebus usque ad consummationem sæculi*. Aliæ  
autem quæcunque Hæreticorum Sæctæ alicujus ut plurimum Pro-  
vinciæ, aut Regni, aut Regionis limitibus concluduntur, & ubi  
aliquo tempore apparuerunt, continuo evanescunt. Quare, ut  
recte dixit S. Aug. lib. de vera Religione, cap. 7. *Tenenda est  
nobis ejus Ecclesiæ communicatio, quæ Catholica est, & Catholica  
nominatur, non solum a suis, verum etiam ab omnibus inimicis.*



Apostolica, quia ab Apostolis fundata, quibus Episcopi in propriis quique Ecclesiis successerunt, ac præsertim Romani Pontifices Apostolorum Principis successores in universalis Ecclesiæ regimine. Unde S. Paulus Ephes. 2. Christianos alloquens, *Jam non estis, inquit, hospites, & advena, sed estis cives Sanctorum, & domestici Dei, superædificati super fundamentum Apostolorum, &c.*

## S E C T I O V.

*An præter Canonicas Scripturas sint aliqua Traditiones Fide Divina credenda.*

1. **O**bservandum est, nos hic sumere nomen Traditionis, prout communiter sumi solet a Sanctis Patribus, & Doctoribus, nempe pro Doctrina divinitus revelata, & tradita, quæ tamen scripta non invenitur in ullo Scripturæ Canonice libro.

Unde S. Epiphanius hæresi 81. *Non omnia, inquit, a Divina Scriptura possunt accipi: quapropter aliqua in scriptis, aliqua in Traditione Sancti Apostoli tradiderunt.* Hoc supposito

2. Dicendum est, dari aliquas Traditiones Divinas, quæ & Apostolicæ vocantur, quia Apostoli eas a Christo acceptas ad nos transmiserunt. Quæ Traditiones parem cum Scripturis Canonicis auctoritatem habent; quibus proinde eadem Fide, atque illis credendum est.

Probat 1. ex Apost. 2. ad Thess. c. 2. *Tenete Traditiones, quas didicistis sive per sermonem, sive per Epistolam nostram.* In quem locum ita scribit S. Chrysostomus. *Hinc patet, quod non omnia per Epistolam tradiderit, sed multa etiam sine literis.*

Probat 2. ex Concil. Trident. sess. 4. in citato decreto de Canonicis Scripturis, ubi dicitur *Veritatem, & disciplinam Christianam contineri in libris scriptis, & sine scripto Traditionibus, quæ ex ipsius Christi ore ab Apostolis acceptæ, aut ab ipsis Apostolis, Spiritu Sancto dirigente quasi per manus traditæ, ad nos usque pervenerunt.* Eadem veritas antea definita fuerat in Conc. Nicæno II. act. 7. ubi hæc verba habentur. *Fatemur unanimiter, nos Ecclesiasticas Traditiones, sive scripto, sive consuetudine valentes, & decretas, retinere velle, quantum a numero est Imaginum effiguratio.* Et paulo post. *Qui ausus fuerit aliud sentire, aut docere, aut more impiorum Hæreticorum Ecclesiasticas Traditiones contaminare, anathema sit.*

Probat 3. auctoritate Sanctorum Patrum, S. Basilii lib. de Spiritu Sancto cap. 17. *Dogmata, inquit, quæ in Ecclesia prædicantur, quædam habemus ex doctrina scripto prodita, quædam rursus ex Apostolorum Traditione in mysterio, id est in occulto tradita, recipimus: quorum utraque parem vim habent ad pietatem, S. Epiphanius hæresi 61. Oportet autem, inquit, & Traditione uti: non enim omnia a Scriptura Divina pos-*

*possunt accipi, quapropter aliquæ in Scripturis, aliquæ in Traditione sancti Apostoli tradiderunt.*

Probatur 4. ex eo, quod multa sunt, quæ Fide Divina credimus, quæ tamen nusquam in Scripturis reperiuntur. Ex. gr. credimus in una Divina Essentia esse tres Personas distinctas, & tamen nomen Personæ in Scripturis ad id significandum expressum non reperitur. Credimus, filium esse Patri consubstantialem, & ita in Concilio primo Nicæno definitum est; nec tamen vox Consubstantialis habetur in Scriptura. Credimus, Sanctissimam Mariam Matrem Dei fuisse, & esse semper Virginem: & Helvidius, Jovinianus, alique contrarium docentes tanquam Hæretici proscripti sunt, ut patet ex S. Epiphanio, hæresi 48. & ex S. Augustino, hæresi 82. & 84. item ex S. Hieron. in lib. contra præfatos Hæreticos; & tamen nullibi in Scripturis hæc veritas expressa invenitur. Credimus similiter ad Baptismi validitatem necessario proferendas esse has voces, *Ego te baptizo in nomine Patris, & Filii, & Spiritus Sancti*, & tamen nusquam in Scripturis hæc prolatio ore facienda præscribitur, aut necessaria esse dicitur. Denique ipsam Scripturam sacram esse a Deo revelante, ac in ea verbum Dei contineri nusquam nisi ex Traditione scimus, & tamen ut articulum Fidei credimus. Ergo multa sunt, quæ Fide Divina creduntur, licet in Scripturis expressa non habeantur.

Observandum est autem, præter Traditiones illas Apostolicas, seu Divinas, esse quasdam alias pure Ecclesiasticas, quæ ipsius Ecclesiæ, seu Prælatorum, & Pastorum vel auctoritate, vel approbatione expressa, aut tacita post Apostolorum tempora introductæ sunt. Quæ licet parem cum Apostolicis auctoritatem non habeant, merito tamen a Christianis servandæ sunt, sicut & aliæ leges ab Ecclesia ipsis impositæ.

## S E C T I O VI.

*De Symbolo Fidei.*

1. **C**Um inter Apostolicas Traditiones una ex præcipuis, & populo Christiano maxime necessariis sit Symbolum Fidei, ideo de illo breviter hic agendum est. Itaque

Dicendum 1. valde necessarium fuisse condi Libellum illum, qui dicitur vulgo Symbolum Fidei, quo primaria Catholicæ Fidei capita velut in compendium brevissimum redigerentur.

Hac enim brevitate (ut docet S. August. lib. 1. de Symb. ad Catech. cap. 1. consultum fuit idiotis, rusticis, & pueris, ut Fidem explicitam de præcipuis mysteriis facilius concipere, & retinere possent. Deinde eadem brevis aptissima fuit, ut Fidei unitas, & conformitas toto orbe facilius servaretur, omnesque Christiani essent unius labii, & unius oris, ut innuit S. Irenæus lib. 1. contra Hæreses cap. 3.

2. Dicendum 2. Symbolum Fidei Catholicæ ab Apostolis fuisse conditum .

Hoc tanquam certum tenendum est : ac merito temeritatis , & erroris damnandus Erasmus, qui in præfatione ad suas paraphrases in S. Matth. dubitat de hac veritate ; quam tamen indubitatam universa semper tenuit Ecclesia , quam unanimiter docent sancti Patres, ut S. Ambrosius in serm. de Elia , & jejuniis , S. Hieron. Epist. 61. S. Leo Epist. 13. S. August. ser. 2. Dom. in Palmarum Ramis , ubi etiam unicuique Apostolorum suum articulum tribuit . Et ideo illud Fidei Compendium vocatum est Symbolum , quasi collatio , & mutuum consilium ; quia scilicet ( ut docet S. Clemens Epist. 1. ad Jacobum ) Apostoli communi consilio inter se habito illud condiderunt , vel quia est quasi indicium , seu signum , quo Fideles ab infidelibus discerni possent , ut notat idem S. Clemens ibid.

3. Dicendum 3. alia quoque Fidei Symbola in Ecclesia Catholica edita esse variis temporibus occasione diversarum Hæreseon erumpentium : quæ tamen nihil aliud continent , quam pleniorrem ipsius Symboli Apostolici explicationem . Sunt autem tria præ cæteris in Ecclesia recepta .

Primum est illud , quod in I. Concilio Nicæno adversus hæresim Arii editum fuit ; in quo ea , quæ ad Divinitatem Filii spectant ( quam impie negabat Arius ) fusius exponuntur .

Secundum Symbolum editum fuit in Concilio Constantinopolitano I. contra Macedonium Hæreticum , qui Divinitatem Sancti Spiritus impugnabat : in quo proinde , quæ ad ipsius Spiritus Sancti Divinitatem spectant , explicantur . Et illud idem est , quo Ecclesia Romana in Missæ Sacrificio utitur , uno tantum verbo adversus errorem Græcorum addito , quo profitetur Ecclesia , Spiritum Sanctum non tantum a Patre , sed etiam a Filio procedere . Cui Symbolo etiam ipsi Græci in Concilio Florentino subscripserunt .

Tertium denique Symbolum est S. Athanasii , quod ipse , cum Arianis persequentibus Romæ profugus esset , composuit , & Julio summo Pontifici obtulit , illi tanquam Christi Vicario Fidei suæ rationem reddens : quod postea universa Ecclesia in tanta veneratione habuit , ut ubique terrarum ( sicut docet Baronius ann. Christi 340 ) variis idiomatibus versum fuerit , & pro legitima Fidei professione susceptum .

## S E C T I O VII.

*An objecta Fidei creverint successu temporis .*

1. **S**ensus quæstionis est , an plures veritates , tamquam a Deo revelatæ , uno tempore credendæ fuerint , quam alio , v. g. tempore legis Gratiæ , quam legis Mosaicæ , item his posterioribus sæculis ,



lis, post tot Conciliorum in materia Fidei definitiones, quam primis Ecclesiae temporibus, in quibus nulla, vel paucissima Concilia habita fuerunt. Pro cuius resolutione

Dicendum 1. eandem fuisse prorsus Fidem, etsi non æqualiter explicatam, in sanctis Patriarchis ante Christum, quæ postea fuit in Apostolis, & aliis Christianis post ejus adventum.

Probatur 1. ex S. Paulo Ep. 2. ad Cor. c. 4. ubi postquam locutus est de Fide antiquorum Patriarcharum, hæc verba subjicit. *Habentes autem eundem spiritum Fidei, credimus, propter quod & loquimur.*

Probatur 2. ex sanctis Patribus. S. Epiph. l. 1. contra Hæreses initio ipsius libri, ubi loquens de Fide Patriarcharum, *illa*, inquit, *eandem obtinebat, quæ hodie in sancta, & Catholica Dei Ecclesia perseverat Fides.* Et S. Aug. l. 18. de Civ. Dei c. 47. *Unus*, inquit, *Mediator Dei & hominum, homo Christus Jesus in carne venturus, sic antiquis Sanctis prænuntiabatur, quemadmodum nobis venisse nuntiatus est: ut una, eademque Fides per ipsum omnes prædestinatos perducatur ad Deum.*

2. Dicendum 2. nec Concilia, nec summos Pontifices, cum aliquam veritatem ad Fidem pertinere definierunt, condidisse novos Fidei articulos, sed illas veritates jam divinitus revelatas, quæ non ita perspectæ, ac cognitæ Fidelibus erant, vel quæ Hæresibus obscuratæ videbantur, suæ luci reddidisse, ac Fidelibus credendas proposuisse.


Probatur 1. ex Apostolo Epist. 1. ad Timoh. c. 6. *O Timothee depositum custodi.* Quæ Apostoli verba explicans Vincentius Lirinensis l. 1. advers. hæres. c. 27. *Quid est, inquit, depositum? quod tibi creditum est, non quod a te inventum, quod accepisti, non quod excogitasti, rem non ingenii, sed doctrinæ, non usurpationis privatæ, sed publicæ traditionis, rem ad te perductam, non a te prolatam: in qua non auctor debes esse, sed custos, non constitutor, sed sectator, non ducens, sed sequens.*

Probat. 2. ex praxi totius Ecclesiae, etiam in Conciliis Oecumenicis, in quibus, quando aliqua difficultas in materia Fidei solvenda erat, diligens semper Scripturarum, & Conciliorum, ac sanctorum Patrum inquisitio fiebat. Unde S. Basilii (ut refertur lib. 7. Hist. tripartitæ c. 36.) dicebat, Episcopos non esse inventores alicujus doctrinæ, sed tantum custodes depositi sibi per Apostolos commissi.

### C A P U T III.

#### *De objecto formali Fidei.*

**P**ER objectum formale Fidei intelligimus motivum illud, quo intellectus excitatur ad assentiendum Divinæ revelationi. Certum est autem, objectum illud formale ad Deum, utpote omnis veritatis fontem, referri debere, cum Fides sit virtus Theologica, quæ Deum ut objectum suum immediate attingit. Sed difficultas est, sub qua ratione



ad Deum referatur . Cujus difficultatis solutio ex dicendis in Sectionibus sequentibus pendet .

## S E C T I O I.

*An Deus, quatenus est suprema, & infallibilis veritas revelans, sit formale objectum Fidei.*

1. **N**Otandum est, veritatem hoc loco sumi non pro veritate transcendentali ( ut loquuntur Philosophi ) quæ omnibus rebus inest, in quantum veram habent entitatem, sed pro veracitate, qua quis verax est in dicendo.

Hæc autem veracitas, ut sit perfecta, & infallibilis, duo requirit in eo, qui loquitur. 1. Talem sapientiam, ut perfecte, & infallibiliter cognoscat rem, de qua loquitur, ita ut errare, aut decipi nullo modo possit. 2. Talem bonitatem, ut neque velit eum fallere, cui loquitur, neque etiam illud velle possit. Hoc prænotato pro quæstionis propositæ resolutione

2. Dicendum 1. objectum formale Fidei, seu rationem formalem, qua movetur intellectus ad assentiendum, esse supremam, & infallibilem Dei veritatem. Ita S. Thomas 2. 2. quæst. 1. artic. 1.

Probatur 1. ex Apostolo Ep. 1. ad Corinth. c. 2. *Ut Fides vestra non sit in sapientia hominum, sed in virtute Dei.* Et Epist. 1. ad Thes. sal. c. 2. *Cum accepissetis a nobis verbum auditus Dei, accepistis illud, non ut verbum hominum, sed sicut vere est verbum Dei.*

Probatur 2. ex sanctis Patribus. S. Basil. in serm. de Fidei confessione, seu de vera, ac pia Fide in Asceticis, *Est, inquit, Fides eorum, quæ dicta sunt, assentiens approbatio sine ulla hesitatione, cum animi persuasione de veritate eorum, quæ Dei munere sunt prædicata.* Et S. Aug. lib. 11. de Civit. *Ut mens, inquit, in Fide fidentius ambularet ad veritatem, ipsa veritas Deus, Dei filius, homine assumpto, non Deo consumpto, eandem constituit, ac fundavit Fidem.*

Probatur 3. hac ratione, quam S. Thom. insinuat loco citato. Illud est objectum formale Fidei, propter quod immediate, & formaliter credimus rebus Fidei; atqui non ob aliam formalem, & immediatam rationem illis credimus, nisi quia Dei summe, & infinite veracis auctoritate, & attestatione nituntur; Ergo Deus, quatenus summe, & infinite verax, seu quatenus suprema, & infallibilis veritas, est objectum formale Fidei. Major evidens est. Minor probatur exemplo Fidei humanæ, quæ non alio motivo innititur, quam veracitate attestantis. Nec enim ob aliam rationem credimus alicui, nisi quia veracem arbitramur, & quo magis constat, illum esse veracem, eo etiam firmior Fides ejus attestationi habetur. Unde similiter dicendum est, Fidem Divinam Divina veracitate, quæ perfecta,

fecta, & infallibilis est, tanquam formali, & immediata ratione, niti.

3. Dicendum 2. æternalem revelationem earum rerum, quæ credendæ sunt, pertinere ad rationem objecti formalis Fidei.

Probatur 1. ex variis Scripturæ locis, in quibus revelatio divinitus facta ponitur, ut basis, & fundamentum, cui omnis Fides nostra innititur. S. Matth. 6. cap. *Beatus es Simon Bar-ionæ, quia caro, & sanguis non revelavit tibi, sed Pater meus, qui in cælis est.* Ad Gal. cap. 1. *Notum vobis facio Evangelium meum, quia non est secundum hominem, neque enim ab homine accepi illud, nec didici, sed per revelationem Jesu Christi.*

Probatur 2. ex S. Athan. orat. (quod unus sit Christus.) ubi de Fide loquens, *Oportet, inquit, in sublimi rationem istarum verum petere, non humi ex sanguine, & carne conquirere, sed ex revelatione Divina, & cælesti.* Et ex S. Iren. l. 4. c. 14. *Deum scire nemo potest, nisi Deo docente.*

Probatur 3. hac ratione. Fides est rerum non apparentium (ut loquitur Apostolus) & quæ in cor hominis non ascendunt; atqui ejusmodi res sublimes, minimeque apparentes non possunt aliter credi Fide Divina, quam per revelationem Dei. Fides enim illa necessario requirit, ut homo cum firmissimo assensu, qui omnem penitus dubitationem excludat, rebus illis inhæreat; non potest autem, imo nec debet talem assensum præbere, nisi certo sciat, Deum esse, qui res illas revelavit. Ubi enim supponit, vere Deum illas revelasse, statim videt, se debere firmiter, & citra omnem Dubitationem assentiri: cum Deus nec falli, nec fallere possit.

4. Objicies, constare ex Evangelio, multos credidisse in Christum non propter revelationem primæ, & infallibilis veritatis, sed propter miracula ipsius Christi.

Respondetur, miraculorum patratiorem non fuisse, proprie loquendo, motivum formale, & immediatum, quo Fides illorum supernaturalis innixa est, sed fuisse tantum rationem inductivam ad hoc, ut agnoscerent Divinæ veritati esse credendum. Quod ut facilius intelligatur,

Notandum est, objectum aliquod materiale Fidei supernaturalis posse duobus modis fieri credibile. 1. Per miracula, & alia similia motiva (de quibus infra) quæ id tantum evincunt, ut per illa homo agnoscat, tale objectum prudenter credi posse. 2. Per revelationem Primæ, & infallibilis veritatis, quæ, ut talis cognita, facit hominem firmissime, & citra omnem dubitationem illud credere.

Unde duplex formari potest judicium intellectus circa tale objectum. 1. Quo judicat, tale objectum prudenter, & cum maxima ratione credi posse. 2. Quo judicat, illud esse infallibiliter verum, ob Divinam revelationem; & sic firmissime, ac indubitanter credi debere. Ex quibus primum est naturale, nec pertinet proprie ad rationem Fidei, secundum vero est verus, ac proprius Fidei supernaturalis actus, soli veritati Divinæ revelanti innixus.



*An revelatio Divina, quatenus pertinet ad formale objectum Fidei, debeat esse obscura, & inevidens.*

1. **D**Uobus modis potest Divina revelatio esse obscura, seu inevidens. 1. ex parte rei revelatæ, quando ipsa non repræsentatur per revelationem evidenter intellectui. 2. ex parte Dei revelantis, quando non constat evidenter ipsam revelationem esse a Deo. Est ergo quæstio, an utroque modo revelatio debeat esse obscura. Pro cuius resolutione

Dicendum 1. revelationem Divinam, quatenus pertinet ad objectum formale Fidei, debere esse obscuram, & inevidentem ex parte rei revelatæ.

Probatur 1. ex Apost. ad Hebr. 11. *Fides est argumentum non apparentium*. Et Epist. 1. ad Cor. c. 13. loquens de cognitione, quam nunc habemus per Fidem, & comparans illam cum visione beatifica, *Videmus, inquit, nunc per speculum in enigmate, tunc autem facie ad faciem*.

Probatur 2. ex S. Aug. tract. 4. in Jo. *Quid est fides, nisi credere, quod non vides?* Et S. Chrys. hom. 12. in Epist. ad Hebr. *Fides est aspectus eorum, quæ non sunt manifesta*.

Probatur 3. ex eo, quod experientia ipsa constat, nos nullam evidentiam proprie dictam habere de mysteriis, quæ per Fidem credimus. Et, si aliqua sit ipsius Fidei veritas, quam evidenter agnoscamus, prout ita cognoscitur, ad Fidem non pertinet, sed ad aliquod genus cognitionis.

Observandum est, hujus assertionis veritatem talem esse, ut illius oppositum inter Manichæorum Hæreses recensuerit S. Augustinus 1. de utilitate credendi, c. 1. ubi ait, illos existimasse, vana superstitione teneri Christianos in eo, quod Fides illis imperaret ante rationem; & hanc fuisse inter Manichæos, & Catholicos differentiam, quod Catholici crederent, ut cognoscerent, Manichæi autem prius vellent cognoscere, ut postea, si liberet, crederent.

Objicies hæc Christi verba Jo. 20. *Quia vidisti me, Thomas, credidisti*, ex quibus infertur, S. Thomam prius vidisse, ac proinde evidentiam habuisse, & postea credidisse.

Respondetur cum S. Greg. hom. 26. in Evang. S. Thom. aliud vidisse, aliud credidisse, vidisse scil. Christi humanitatem, credidisse divinitatem; proindeque evidentiam ejus, quod credidit, non habuisse.

2. Dicendum 2. ad perfectam rationem Fidei necessarium esse, ut revelatio Divina sit etiam obscura, & inevidens ex parte revelantis.

Probatur ex iis omnibus sacræ Scripturæ, & SS. Patrum auctoritatibus, quibus supra ostensum est, revelationem Divinam obscuram esse

esse debere ex parte rei revelatæ: quia quidquid cognoscitur evidenter a Deo esse revelatum, eo ipso, quo ut tale cognoscitur, cessat esse obscurum, sed fit aliquo modo evidens intellectui propter infallibilitatem Dei revelantis.

Quod quamvis verum sit: probabilis tamen est eorum sententia, qui existimant, Fidem posse subsistere cum evidentia ex parte Dei revelantis; sed semper verum est, Fidem cum tali evidentia fore in ratione Fidei longe imperfectiorem illa, in cuius assensu nulla prorsus reperiretur evidentia, imo maxima obscuritas tam ex parte rei revelatæ, quam ex parte Dei revelantis.

Ex dictis aliquot consectaria colligi possunt.

3. Primum est, objectum Fidei non posse proprie cognosci sensibus. Unde S. Greg. hom. 26. in Euang. *Fides, inquit, illarum rerum est, quæ apparere non possunt; quæ enim apparent, jam Fidem non habent.*

Secundum est, nihil, proprie loquendo, sciri posse per Fidem, sed tantum credi: licet diversis mediis ejusdem veritatis duplex notitia in eodem intellectu possit reperiri, una obscura per Fidem, altera evidens per demonstrationem scientificam: quo pacto v. g. & credimus; & scimus, esse unum Deum; credimus, quia Scriptura credendum proponit; scimus, quia naturali ratione demonstrari potest.

Tertium est, inter hæc duo media cognitionis hanc esse differentiam, quod cognitio per scientiam evidens sit, cognitio vero per Fidem, quamvis obscura sit, certitudine tamen, & infallibilitate antecellat, cum maxime certo, & infallibili fundamento nitatur, nempe revelatione, & attestatione divina. Unde S. Th. 2.2.q.4.a.8.ad 2. dicit, hominem esse certiores de eo, quod audit a Deo, qui falli non potest, quam de eo, quod videt propria ratione, quæ falli potest.

### S E C T I O I I I.

*An Divina revelatio debeat esse publica, vel privata.*

1. **N**otandum est, revelationem illam dici publicam, quæ Prophetis, & Apostolis a Deo facta est pro tota Ecclesia, & per totum orbem publicata; privatam vero, quæ alicui personæ privatæ fit.

Hoc prænotato, sensus quæstionis duplex esse potest. 1. An sufficiat revelationem illam Divinam, quæ ad objectum formale Fidei pertinet, esse publicam, & toti Ecclesiæ factam, an vero præterea privata aliqua revelatio unicuique credentium facta requiratur. 2. an, si daretur aliqua revelatio privata, illa sola sufficere posset ad formale objectum Fidei supernaturalis. Pro cuius duplicis quæstionis resolutione

2. Dicendum 1. publicam revelationem sufficere ad rationem objecti formalis Fidei, eamque singulis sufficienter applicari per Evangelii prædicationem, & Ecclesiæ auctoritatem, nec opus esse ulla alia privata.

Hæc

Hæc assertio de Fide est contra Calvinistas, qui in art. 4. confessionis Fidei suæ profitentur, se libros Scripturæ Canonicos a non Canonicis dignoscere, non tam communi Ecclesiæ consensu, quam interiori testimonio, & suasionem Spiritus Sancti.

Refellitur hic error, & veritas nostræ assertionis probatur 1. ex cap. ult. S. Marci, ubi postquam Christus Discipulis suis dixit, *Euntes in mundum universum, prædicate Evangelium omni creaturæ*, statim subjungit: *Qui crediderit, & baptizatus fuerit, salvus erit, qui vero non crediderit, condemnabitur*. Quibus verbis aperte declarat, revelationem factam Apostolis, & per prædicationem illorum aliis notificatam, sufficere ex parte notificationis ipsius objecti ad credendum. Si quid enim aliud requireretur, Christus eos, qui credere nollent, damnationi æternæ non subjecerit.

Probatur 2. auctoritate S. Aug. lib. 1. de Doctr. Christ. statim initio, ubi agit ex professo contra eos, qui dicunt, se accepisse divinitus cognitionem Scripturarum; monetque, unumquemque debere sibi cavere ab illa superbissima, & periculosissima tentatione, ut velit edoceri a Deo, & non ab hominibus; quod ibi pluribus exemplis urget.

Probatur 3. ex eo, quod, ut refert Eusebius lib. 5. Histor. Eccles. cap. 15. jam a primis Ecclesiæ temporibus Montanus, & Maximilla tanquam hæretici damnati sunt, quod particulares revelationes prætenderent contra Ecclesiæ consuetudinem tum traditione, tum successionem antiquitus ab Apostolorum temporibus eo usque derivatam.

3. Dicendum 2. licet privatæ revelationes valde dubiæ sint, & suspectæ, si tamen alicui personæ certo innotesceret, revelationem sibi aliquam a Deo esse factam, illa ei posset sufficere ad credendum.

Hoc constat 1. ex eo, quod in sacris Literis recensentur privatæ quædam revelationes a Deo factæ, quibus Fides habita est, ut Gen. c. 15. refertur, Abraham, tanquam privatæ personæ, factam fuisse revelationem a Deo, quod filius ipsi nasciturus esset, quod ipse credidit. Unde dicitur de illo: *Credidit Abraham Deo, & reputatum est illi ad justitiam*.

Constat 2. ex Conc. Trid. sess. 6. cap. 12. & can. 16. ubi docet, & definit, neminem posse esse certum certitudine fidei de sua Gratia, & finali perseverantia, nisi per specialem Dei revelationem. Quibus verbis supponit, assensum supernaturalem Fidei posse sufficienter inniti revelationi factæ a Deo alicui, tanquam privatæ personæ.

Diximus in assertione, *si revelatio privata tanquam divinitus facta certo innotescat*: & in eo præcipua versatur difficultas, qua ratione scilicet possit certo innotescere, revelationem illam privatam esse a Deo. De qua proinde Sectione sequenti nobis agendum est.

Porro notandum est, nos in hac Sectione locutos esse tantum de iis, quæ requiruntur ex parte objecti ad aliquid credendum supernaturaliter. Certum est enim, præter publicam revelationem, & externam Evangelii prædicationem, necessariam quoque esse in subjecto Fidei, seu



seu in persona credente internam Gratiā excitantem, & adjuvantem, ut supponimus ex tractatu de Gratiā.

## S E C T I O IV.

*Unde possit dignosci, an revelatio privata sit a Deo, ac proinde sufficiens pro eliciendo actu Fidei.*

1. **S**icut nemini dubium esse debet, quin aliquando Deus privatis quibusdam personis res aliquas olim revelaverit, & nunc etiam pro suo beneplacito revelare possit: sic experientia nimis crebra compertum est, plurimas revelationes, quas privatæ personæ sibi factas prætendunt, variis illusionibus, & erroribus esse referræ. Unde Synesius Epist. 54. ante duodecim sæcula conquestus est, multos tunc temporis privatos homines, & etiam Sacerdotes, finxisse somnia pro revelationibus.

Ut ergo veritas ab errore, & illusionē in hac materia dignosci possit, aliquas observationes ex probatissimis Auctoribus collectas hic breviter proponemus, quæ maximam cuivis hac in re lucem afferre possunt.

2. Observandum igitur 1. qualis sit persona, quæ sibi factam esse revelationem aliquam dicit.

Ac primo, num sit sana in fide. Quamvis enim Deus infidelium lingua ad enunciandas aliquas veritates uti possit, & aliquando etiam usus sit: tamen, cum hoc rarissime fecerit, & e contra dæmon sæpissime talibus illuserit, & revelationes falsas, aut blasphemias, & aliis impietatibus immixtas ipsis suggererit, ut testantur Annales sacri in Manete, Montano, & aliis pluribus Hæresiarchis, merito defectus veræ, & sanæ Fidei in ea persona, cui sunt revelationes, maximam præbet rationem non solum dubitandi, an tales revelationes a Deo sint, sed etiam illas penitus repudiandi, tanquam a Spiritu erroris, & mendacii suggestas.

Videndum præterea num Fidei sinceritatem vitæ, ac morum integritas, virtutesque commendent, & præsertim humilitas; an e contra vitia, & imperfectiones notabiles illam dehonestent. Ideo non credendum superbis, ambitiosis, carnalibus, impatientibus, odia exercentibus, alios diffamantibus, vel pecunias hinc inde corradentibus: nec etiam hypocritis, qui singularia quædam affectatæ pietatis, aut poenitentię signa per Superiores minime approbata ostentant. Hoc argumento usus est olim unus ex antiquis Patribus, Apollonius nomine (ut refert Euseb. l. 5. Hist. Eccl. c. 17.) ad convincendum falsitatis revelationes, & Prophetias Maxillæ, & Quintillæ mulierum, quæ in secta Montanistarum primas partes tenebant, eo quod (ut refert hic Auctor) essent pecuniæ cupidæ, fœnus exercentes, tesseris, & tabulis ludentes, deditæ choreis, & cultui corporis, & sumptuoso luxui vestimentorum. Certe Christus Dominus loquens de falsis Prophetis, & docens, qua

qua ratione a veris discerni possent, nihil aliud dixit Matth. 7. nisi, *A fructibus eorum cognoscetis eos.*

Consideranda est præterea corporis, & animi constitutio in tali persona, an sit v. gr. parum firma valetudo, quæ præferat redundantiam bilis atræ, an habitus corporis inedia, vel insomniis plus æquo sit deformatus, an cerebrum læsum sit, an imaginatio turbida, &c. Ejusmodi enim personis dæmon facillime illudere, & imponere potest, ut experientia satis constat.

Non est etiam negligenda ætatis, & sexus differentia. Si enim ætas caduca sit, delirii periculum est; si puerilis, levitatis, & morbi imaginosi; quia (ut Medici testantur) pueri sunt cerebro humidiori, & pleni vaporibus, ac proinde facili negotio commoventur.

Quod spectat ad sexum, certum est, mulieres esse imbecilliores, & abundare passionibus admodum acribus, & vehementibus. Quare quod a passione natum est, id sæpe a veritate profectum putant. Sunt etiam naturæ humidioris, humidum vero facilius commovetur, & varias impressiones recipit. Ideo citius imaginantur. Cumque minus ratione polleant, & minus habeant prudentiæ, facilius est dæmonem eas similitudine falsa, & apparente deludere. Ea de causa notatur a quibusdam, paucas admodum in sacris Paginis reperiri mulieres, quæ Prophetiæ dono præditæ fuerint. Et in Hist. Ecclesiastica refertur, plures mulieres imaginationibus suis, tanquam revelationibus a Deo immixtis, adhærentes, non solum se ipsas, sed & plures alios, & etiam viros quosdam eruditos in errorem induxisse. Testis est sui temporis doctissimus Tertull. qui dum visionibus, & revelationibus muliercularum confidit, in Hæresim, & varias absurditates turpissime delapsus est.

Observandum 2. qualis sit ipsa revelatio.

3. Ac primo, an conformis sit Sapientiæ illi, quæ de cœlo est. Talis autem erit, si (ut ait Gerson in tract. de probatione spirituum) qualitates a S. Jacobo cap. 3. enumeratas habuerit, si nimirum sit *pu-dica, modesta, suavisibilis, bonis consentiens, plena misericordia, & fructibus bonis.* Videndum est igitur, an in ea revelatione reperiat-ur aliquid oppositum veritati, & doctrinæ Christi Domini, an ali-quid modestiæ, humilitati, charitati, aut aliis virtutibus repugnans, an aliquid curiosum, inutile, aut lucrum aliquod, & commodum temporale tantummodo spectans; an reddat personam proprio judi-cio, vel propriæ voluntati magis addictam, quæ Superiorum censu-ram aut refugiat, aut etiam contemnat. Hæc enim indicia, & alia similia satis evincunt, talem revelationem a Deo esse non posse.

Præterea, quando in ejusmodi revelatione suadentur aliqua, quæ bona, & pia videntur, diligenter perpendendum est, num simul alia etiam suadeantur, quæ sint vana, inutilia, improba, aut pietati ad-versa. Hæc est enim ars, qua frequenter dæmon plures decipit. Un-de

De S. Arsenius ( ut refert Metaphrastes in ejus vita ) monebat , ut ca-  
veremus , ne boni alicujus prætextu dæmon in mala nos impelleret .

Frequentia item nimia revelationum merito illas suspectas red-  
dere debet . Neque enim Deus , nisi maximis , & gravissimis de cau-  
sis , aliquid revelare solet . Et quamvis ante Christi adventum es-  
sent crebriores revelationes , eo quod mundo tenebris errorum o-  
perto tunc essent necessariæ , ut illis quasi quibusdam faculis , &  
luminaribus , in illa nocte cæcitas hominum juvaretur : at nunc  
exorto Sole veritatis , & diffusa undequaque Evangelii luce , cum  
minus necessariæ sint , rarius a Deo fieri solent .

Videndi sunt super hac materia præfatus Joannes Gerson in dicto  
tractatu de probatione spirituum , S. Vincentius Ferrerius tractatu  
de vita spirituali c. 11. & 12. Martinus Delrio lib. 4. Disquisitionum  
Magicarum c. 1. q. 3. & alii plures , qui de hac re fusius egerunt .

## S E C T I O V.

*An Fidei Divine possit subesse falsum .*

1. **H**Ujus quæstionis , quæ a S. Th. & aliis Theologis communiter  
proponitur , resolutio lucem dabit variis difficultatibus , quæ  
in materia Fidei occurrere possunt , ideoque a nobis prætermitti  
non debuit . Duplex autem sensus illius esse potest . 1. an possit Fi-  
dei subesse falsum ex parte primæ veritatis revelantis , hoc est , an  
possit fieri , ut aliquid falsum reveletur a Deo . 2. an possit Fidei  
subesse falsum ex parte ejus , qui credit , hoc est , an fieri possit ,  
ut quis per actum Fidei supernaturalis aliquid bona Fide credat ,  
tanquam verum , quod tamen falsum sit .

Pro cujus resolutione in priori sensu dicendum est , impossibile es-  
se Deum , sive per se , sive per alios , aliquid tanquam verum affir-  
mare , credendumque proponere , quod non sit reipsa verum .

Hoc constat ex variis Script. locis . Num. 23. *Non est Deus , quasi  
homo , ut mentiatur .* Ps. 144. *Fidelis Dominus in omnibus verbis suis .* S.  
Luc. 21. *Cælum , & Terra transibunt , verba autem mea non transibunt .*

Et certe si revelationi Divinæ posset subesse falsum , nulla amplius  
esset Fidei certitudo , & tota Scripturarum auctoritas corrueret , ac  
proinde totius Christianæ Religionis fundamenta everterentur ,  
quia semper incertum esset , an id , quod credendum proponeretur ,  
foret verum , quod est , contra omnem rationem , & dici nullatenus  
debet . Unde Apostolus in Epist. ad Heb. c. 6. *Abundantius , inquit ,  
volens Deus ostendere pollicitationis hæredibus immobilitatem consilii  
sui , interposuit jusjurandum , ut per duas res immobiles , quibus  
impossibile est mentiri Deum , fortissimum solatium habeamus .*

2. Objicies 1. in Scripturis sacris reperiri aliquas propositiones  
contradictorias , quarum est conditio , ut si una vera est , altera  
sit falsa : unde sequi videtur , Deum in uno Scripturæ loco vere  
locutum esse , & in altero veritati contradixisse . Re-



Respondetur, nullam in Scripturis sacris reperiri contradictionem, ut recte probat S. Aug. in lib. de consensu Evangelistarum. Si enim aliquid negatur in uno loco, quod in altero affirmetur, hoc fit juxta varios sensus. E. g. apud S. Joann. cap. 14. dixit Christus, *Pater major me est*, & cap. 10. dixerat: *Ego, & Pater unum sumus*. Quæ verba licet primo aspectu sibi repugnare, & contradicere videantur, optime tamen inter se cohærent, & verissima sunt. Prior enim locus intelligendus est de Christo, ut homine, secundus de eodem, ut Dei Filio, & ejusdem cum Patre substantiæ, & naturæ.

Objicies 2. Deum in Scripturis multa per se, vel per Prophetas prædixisse, tanquam eventura, quæ tamen postea non evenerunt.

Respondetur cum S. Tho. 1. p. q. 19. a. 7. ad 2. & 2. 2. q. 171. a. 6. ad 2. tales Prophetias fuisse tantum vel comminatorias, vel conditionales. Interdum enim (ut ait S. Doctor) Deus prædixit aliquid, non quod absolute, & simpliciter futurum erat, sed tantum sub certa conditione; quam tamen ob aliquas rationes sibi notas reticebat, nec cognosci volebat.

Objicies 3. Deum aliquando in Scripturis movere, & inducere alios, ut decipiant, & falsum aliquid dicant, & denuntient, aut immittere spiritum erroris, & causam esse, cur alii decipiantur.

Respondetur, iis omnibus Scripturæ locis, in quibus hæc, & similia dicuntur, significari tantum permissivam Dei voluntatem, qua Deus finit ista evenire. Quæ tamen permissiva voluntas aliquando in sacris Literis explicatur terminis importantibus vel imperium, vel etiam causalitatem, seu influxum in effectum, ut recte observat S. Damasc. l. 4. de Fide c. 20. *Moris est*, inquit, *Divinæ Scripturæ permissionem Dei vocare ejus actionem*. Unde S. Aug. l. 13. de Trin. c. 2. *Modus*, inquit, *quod traditus est homo in diaboli potestatem, non ita intelligendus est, quasi hoc Deus fecerit, aut fieri jusserit; sed quod tantum permiserit*.

3. Quod si quæstio proposita in 2. sensu intelligatur, pro illius resolutione dicendum est, assensum illum, quo quis crederet aliquid falsum, existimans illud esse verum, non esse Fidei supernaturalis.

Hoc constat ex eo, quod Concil. Trid. sess. 6. dicit, *quod nullus scire valet certitudine Fidei, cui non potest subesse falsum, se Gratiam esse consecutum*. Quibus verbis aperte declarat, Fidei supernaturalis assensum ita certum esse, ut illi nullo modo falsum subesse possit. Unde sequitur, assensum illum, cui falsum subest, aut subesse potest, non esse Fidei supernaturalis.

Objicies, assensum illum, quem quilibet Fidelium elicit, v. g. circa hanc, aut illam Hostiam consecratam in particulari, quod scilicet Corpus Christi realiter sub illius speciebus sit, esse verum assensum Fidei supernaturalis: fieri autem posse, ut ibi non sit Corpus Christi, vel defectu intentionis Ministri, vel defectu materiæ, ac proinde in illo casu posse Fidei supernaturali subesse falsum.

Re-

**Respond.** cum S. Th. 2. 2. q. 1. a. 3. ad 4. duplicem hic distinguendum esse assensum, priorem, quo quis in genere credit, Corpus Christi esse vere, & realiter sub speciebus panis rite consecratis, posteriorem, quo credit, has panis species esse rite consecratas, ac proinde Corpus Christi sub illis realiter contineri. Prior ille assensus est Fidei supernaturalis, & Divinæ, cum revelatione Divina innitatur. Posterior vero non item. Neque enim ex revelatione Divina scimus, hunc hominem esse Sacerdotem, aut intentionem debitam in consecratione habuisse, sed tantum habemus moralem quandam certitudinem, & probabilitatem de his omnibus in particulari.

Neque hinc sequitur, species illas panis consecratas non posse absolute, & simpliciter adorari, sed tantum sub conditione, quod rite consecratae sint. Nam in praxi virtutum moralium (de quarum numero est ipsa Religio, per quam cultus patriæ redditur Sacramento Eucharistiæ) sufficit, ut qui illarum actus exercet, id faciat juxta rectam rationem, & prudens judicium. Unde, cum in præsentī casu judicemus prudenter, species illas in particulari esse rite consecratas, nec ulla subfit causa rationalis dubitandi de consecratione illarum; hinc fit, ut pure, & simpliciter, ac etiam cum merito illas adorare possimus. Neque in eo plus est difficultatis, vel dubitationis, quam in reddenda obedientia iis, quos secundum prudens judicium, & rectam rationem cognoscimus esse nostros Parentes, vel Principes, quos tamen non tales agnoscimus ea certitudine, cui non possit subesse falsum. Ergo, sicut sufficit moralis illa certitudo, quod illi tales sint, ad hoc non tantum ut possimus, sed etiam ut teneamur illis debitam observantiam reddere, quam illis denegare sine peccato non possumus: sic etiam similis certitudo moralis prudenti judicio innixa sufficit, ut non tantum licite possimus; sed etiam ut obligemur ad reddendum patriæ cultum huic Hostiæ consecratae, sub cujus speciebus Corpus Christi esse prudenter, & secundum rectam rationem judicamus, quem cultum haud dubie, tanquam minime debitum, omittere sine gravi peccato non possumus.

## S E C T I O VI.

*An sit aliqua evidentia credibilitatis in iis veritatibus, quæ Fide supernaturali credi debent.*

1. **C**Um supra dixerimus, objecta Fidei esse obscura, obscureque a Deo revelata, & nihilominus illa esse firmissime, ac seclusa omni dubitatione credenda: inde oritur quaestio, an saltem in iis sit aliqua sufficiens ratio credibilitatis, per quam possit quis agnoscere, & prudenter judicare, se obligari ad assensum illis dandum.

Est autem observandum, hæc duo (*esse verum, & esse credibile*) valde inter se distingui: prius enim affirmat simpliciter, rem ita se habere,

re,

re, posterius vero asserit tantum, dari aliquod sufficiens argumentum, propter quod res illa prudenter credi possit. His prænotatis, pro quæstionis propositæ resolutione

Dicendum est, veritates nostræ Fidei, licet obscuræ sint, & *inevidentes*, esse tamen evidenter credibiles.

Probatur 1. ex his verbis Psal. 92. *Testimonia tua credibilia facta sunt nimis.*

Probatur 2. ex S. Aug. l. de utilitate credendi, cap. 15. & 16. ubi fuisse agens de hac evidentia credibilitatis, dicit pertinuisse ad providentiam Dei constituere aliquam auctoritatem, *Qua velut gradu certo innitentes attollamur in Deum, & possimus credere sine temeritate, & periculo errandi.* Et paulo post addit nos duobus modis moveri ad credendum, scilicet miraculis, quæ in confirmationem Fidei facta sunt, & multitudine populorum illam profitentium: quæ etiam repetit, & confirmat in l. cont. Epist. Fundamenti c. 4. his verbis. *Multa sunt, quæ me iustissime tenent in Ecclesiæ catholicæ gremio: tenet consensus populorum, & gentium, tenet auctoritas miraculis inchoata, spe nutrita, charitate aucta, vetustate firmata, tenet ab ipsa Sede Petri Apostoli usque ad præsentem Episcopatum successio Sacerdotum.*

Probatur 3. hac ratione. Veritates nostræ Fidei sunt a Deo revelatæ, & ad credendum propositæ cum talibus circumstantiis, ut assensus Fidei supernaturalis possit circa illas prudenter, & absque ullo levitatis peccato elici; alias, si leviter, & imprudenter eliceretur, non esset actus virtutis; atqui talis assensus elici prudenter non potest circa illas, nisi evidentiam aliquam habeant credibilitatis. Neque enim ille prudens esse censeretur, qui temere, & inconsiderate quidvis sibi propositum crederet, nihil in se perpendens, an dignum sit, quod credatur.

## S E C T I O VII.

*Quibus argumentis, seu motivis veritates Fidei nostræ sint evidenter credibiles.*

**V**aria sunt argumenta, quibus SS. Patres usi sunt ad illam credibilitatis mysteriorum nostræ Fidei evidentiam demonstrandam. Nos ex plurimis illustriora hic seligemus.

Primum ducit S. Augustinus l. de utilitate credendi, c. 14. & contra Epist. Fundam. c. 4. a multitudine, conditione, & auctoritate eorum, qui Fidem Christianam omnibus sæculis amplexi, & professi sunt. Illud enim procul dubio dignum est credi, quod omnes pene Gentium nationes, & in his innumerabiles viri summa auctoritate, summo ingenio, & eximia doctrina præditi firmiter, & seclusa omni dubitatione, crediderunt.

2. Secundum argumentum duci potest ex consideratione Martyrum



tum prope innumerabilium, omnis conditionis, & sexus, & ætatis, qui pro asserenda Fidei veritate mortem oppetere non dubitaverunt, & tormenta atrocissima non solum forti, sed etiam alacri animo pertulerunt. Hoc argumento S. Justinus & ipse martyr Apolog. 1. ad Senat. Rom. testatur, se maxime fuisse permotum ad Fidem Christianam amplectendam.

3. Tertium ducit S. Chrysost. hom. 4. & 5. in 1. ad Cor. a modo, quo Fides, & Religio Christiana propagata est. Quis enim non obstupescat, si attente consideret, qua ratione id factum sit a paucissimis hominibus, nulla eruditione humana, aut eloquentia instructis, nulla vi, aut potentia armatis, nulla nobilitate claris, nulla opulentia præstantibus, & præterea ejusmodi res docentibus, quæ naturali hominum propensione essent maxime repugnantes; his tamen non obstantibus, totum ab illis orbem Christo subjugatum esse, & in eo plurimos sapientissimos, eloquentissimos, potentissimos homines ita esse persuasos, ut ultro desertis patriis Religionibus, & abdicatis omnibus naturæ desideriis, Christianæ Religionis jugum subjerint, & illam Fidem, quæ docet abnegare seipsum, crucem ferre, &c. summo studio, & affectu professi fuerint: quis, inquam, hoc considerans non exclamet cum Propheta Psal. 76. *Hæc mutatio dexteræ Excelsi?*

4. Quartum idem S. Chryl. hom. 3. in 2. ad Corinth. ducit a miraculis fere innumeris, quæ in confirmationem Fidei nostræ, variis temporibus, & occasionibus sunt divinitus facta, ut testantur vel ipsi Ethnici. Et hoc argumentum ipsemet Christus Dominus suggessit, cum Apostolis, & Discipulis patratorum miraculorum in confirmationem Fidei dedit potestatem, apud S. Matth. c. 10. dicens illis, *Infirmos curate, mortuos suscite, leprosos mundate, demones ejicite, &c.*

5. Quintum duci potest a Prophetiis, quæ multis sæculis ante Christi adventum editæ sunt, vel ipsis Judæis testibus, qui etiam nunc illas esse veras Prophetias agnoscunt, & testantur, in quibus tamen videmus, omnia vitæ, ac mortis Christi mysteria tam distincte fuisse prædicta, & tam fideliter suo tempore adimpleta, ut ab alio Spiritu procedere non potuerint, nisi ab illo, cui soli omnia nota sunt, & aperta, æque futura, atque præsentia: Ad illas Prophetias mittebat Christus Judæos Jo. 5. ut ex illarum adimplerione moverentur ad credendum in se, *Scrutamini Scripturas; illæ sunt, quæ testimonium perhibent de me.* Hoc argumento usus est Tertullianus in Apolog. cap. 20. & S. Augustinus lib. 17. de Civ. cap. 15.

6. Sextum argumentum, quo tanquam efficacissimo, & fortissimo usus est S. Justinus martyr in Apolog. 2. ad Antoninum Pium, & Tertull. in Apolog. c. 39. ducitur a rectitudine, & sanctitudine ipsius Doctrinæ Christianæ. Illa enim Doctrina, quæ ex omni parte sanctissima est, merito, & cum summa ratione credenda est nisi fundamento veritatis, cum veritas, & sanctitas maxime inter se cohæreant. Atqui

talis est Doctrina Christiana. Nihil enim in ea, nisi rectum, & sanctum, nihil nisi veræ justitiæ, pietati, charitati, aliisque virtutibus omni ex parte consentaneum. Unde merito Propheta dixit Psal. 18. *Lex Domini immaculata, convertens animas, &c.* Ubi e contra omnes aliæ Sæctæ a Christiana Religione alienæ variis non solum erroribus, & absurditatibus, sed etiam vitiis, vanitatibus, obscœnitatibus, &c. corruptæ, & fœdatæ semper extiterunt, ut vel ex ipsorum Ethnicorum historiis constat.

Denique ipsa Christi Domini Persona, tot mirabilibus coruscans, tanta innocentia, & sanctitate conspicua, tam præclaris virtutibus insignis, tanta humilitate, benignitate, mansuetudine, charitate erga omnes, & etiam acerbissimos hostes prædita, efficacissimum argumentum suggerit ( ut recte monet S. Bonaventura in stimulo Divini Amoris part. 1. c. 6. ) quo convincantur animi, illius Doctrinam dignissimam esse, cui credatur, *neque aliud Nomen sub Cælo datum esse hominibus, in quo oporteat nos salvos fieri. Act. 4.*

### S E C T I O VIII.

*Quodnam sit illud, in quod ultimo Fides resolvatur.*

**S**ensus quæstionis est, in quid Fidei assensus ex parte objecti debeat ultimo resolvi, seu ad quod principium revocari debeat, ultra quod non progrediatur, sed in eo quiescat.

Antequam autem ad propositam quæstionem respondeatur, unum est hic nobis præsupponendum, scilicet ad assensum Fidei supernaturalis, præter revelationem Dei, requiri, ut veritas credenda proponatur ab ipsa Ecclesia, tanquam a Deo revelata. Quamvis enim hæc propositio Ecclesiæ non sit de formali ratione ipsius objecti Fidei, est tamen veluti conditio quædam requisita, sine qua Fidei Christianæ assensus secundum legem ordinariam elici non debet.

Hoc constat ex iis Scripturæ locis, in quibus dicitur ea, quæ Fidei sunt, ab Ecclesiæ Pastoribus, & Doctoribus esse discenda. Jerem. 3. *Dabo vobis Pastores juxta cor meum, & pascunt vos scientia, & doctrina.* Malach. 2. *Labia Sacerdotis custodient scientiam, & legem requirent ex ore ejus.* Ad Ephes. 4. ubi dicitur, quod Christus dedit Pastores, & Doctores ad consummationem Sanctorum, &c. ut non simus sicut parvuli fluctuantes, & non circumferamur omni vento doctrinæ.

Sancti etiam Patres idem docent. Sanctus Augustinus lib. 1. de moribus Ecclesiæ Catholicæ cap. 13. ait, *Ecclesiam esse Magistratum totius sapientiæ Christianorum.* Et contr. Epist. Fundamenti cap. 3. *Evangelio non crederem, nisi me Ecclesiæ Catholicæ commoveret auctoritas.* Et Sanctus Cyrillus Hierosolymit. Catech. 9. *Fidem, inquit, si didiceris, promissionem possidebis, & observa, illam a sola Ecclesia esse traditam, & ex omni Scriptura munitam.*

Dixi-

Diximus *secundum legem ordinariam*. Nisi enim Deus ita voluisset, illa Ecclesiae propositio necessaria non fuisset. Sed pro sua infinita sapientia, & bonitate ita disposuit ad maiorem Fidei nostrae securitatem, & firmitatem, ut ad ea credenda tantum obligaremur, quae nobis ab Ecclesia (cujus auctoritas Deo assistente falli non potest) proponerentur: quae ideo vocatur ab Apostolo 1. Timoth. 3. *Columna, & firmamentum veritatis*: quam qui audire noluerit, esse nobis debet, sicut *Ethnicus, & Publicanus*. Matth. 18.

Hoc praesupposito, difficile non erit explicare, quomodo resolutio Fidei nostrae fieri debeat.

Si enim ex. gr. quaerat aliquis, quare credas in una essentia Divina Personarum Trinitatem, vel alium quemlibet Fidei articulum, distinguere debes, utrum inquisitio fiat de causa Fidei secundum se, cur scilicet firmiter, & indubitanter id credas, vel de causa, seu ratione, ob quam illam Fidem amplexus fueris, & illam profitearis.

Si de primo fiat inquisitio, scilicet cur firmiter, & indubitanter id credas, respondebis, te id credere, quia Deus revelavit.

Si instet, unde scias, Deum revelasse, respondebis, quia id habetur ex Scripturis, vel ex Divina Traditione.

Si urgeat, cur credas huic Scripturae, vel Traditioni, ultimo loco respondebis, quia Ecclesia talem Scripturam, vel Traditionem ut Divinam agnovit, nobisq; ut sic credendam proposuit. Et in ea Ecclesiae definitione, & propositione Fides nostra fitti debet, nec ultra progredi.

Quod si ulterius adhuc quaerat, quare credas Ecclesiae, & unde cognoscas illam in propositionibus suis falli non posse, respondebis, te id Scripturae sanctae testimonio cognoscere. Neque propterea ullus erit circulus vitiosus in eo, quod Scriptura per Ecclesiam, & Ecclesia per Scripturam probetur. Non enim eadem, sed diversa ratione fit haec probatio reciproca. Sicut Legatus a Rege missus exhibet primo literas Principis, & declarat, esse veras, sicque earum stabilit auctoritatem, postea vero eadem literae jam receptae vicissim Legati missionem, potestatemque ipsi a Rege concessam probant, sed diversa, ut dictum est, ratione. Aliter siquidem auctoritas est in Legato, & aliter in Regis literis. In illis enim literis est tanquam in signo autentico, quo voluntas Regis declaratur, in Legato vero, tanquam in subiecto, in quo auctoritas illa recipitur. Sic Ecclesia ostendit, & profert Scripturas Canonicas, per quas nobis Divina veritas, & voluntas innotescit, & vicissim ab ipsis Scripturis auctoritatem suam accipit.

Quod si ista non plene satisfaciunt, minime mirum videri debet, cum (ut supra dictum est) obscuritas, & inevidentia sit conditio absolute necessaria in rebus credendis, Fidesque nostra sustentari, & roborari debeat potius a Gratia interna, quae nemini deest, & per quam Deus lucem, & vires ad credendum subministrat, quam ab ulla demonstratione externa.



3. Si fiat inquisitio de secundo, scilicet de ratione, & causa movente ad credendum, & rogetur quis ( cum & Divina revelatio, & Ecclesiæ propositio obscuritatem, & inevidentiam secum semper junctam habeant ) quid ipsum impulerit, ut hunc quasi labyrinthum rerum obscurissimarum ingrederetur, & hanc Fidem amplecti, & profiteri vellet: tunc declarabit, & exponet rationes, & argumenta credibilitatis, quibus ipse inductus fuerit, & quivis prudens induci merito possit ad amplectendam, & profitendam hujusmodi Fidem.

## S E C T I O IX.

*Quomodo actus Fidei sit in praxim redigendus .*

1. **C**Um ( ut ait S. Th. 1.2.q.55.ar.2. ) virtus sit habitus operativus, cujus perfectio in actione consistit; ut nihil hic desit eorum, quæ ad Fidei perfectionem requiruntur, restat adhuc videndum, quæ ratione Fides actus suos exercere possit. Pro cujus rei explicatione

Observandum est 1. quod, quamvis Fides ad potentiam cognoscitivam pertineat: ad illius tamen actum (ut initio hujus tractatus dictum est) non solum intellectus, sed etiam voluntas debet concurrere; quia cum actus Fidei sit actus virtutis, ac proinde meritorius, debet esse liber, ita ut qui credit, possit, si velit, non credere, & qui non credit, possit etiam, Divina Gratia adjutus, si velit, credere.

Observandum est 2. concursum illum voluntatis ad actum Fidei in eo consistere, quod ipsa voluntas non tantum applicet intellectum ad consideranda motiva credibilitatis, quæ illum ad credendum inducere possunt, sed etiam, quod efficaciter velit, & imperet, intellectum ea, quæ ab Ecclesia proponuntur, credere propter auctoritatem primæ veritatis; Dei scilicet illa revelantis, & attestantis, ac per Ecclesiam proponentis: & sic captivet ipsum intellectum, quamvis aliquando reluctantem, in obsequium Fidei. His observatis, si quærat, quid sit actum aliquem Fidei supernaturalis elicere,

Dicendum est, nihil esse aliud, quam libere intellectum applicare ad firmiter assentiendum alicui veritati a Deo revelatæ, & per Ecclesiam nobis propositæ; quia veritas illa est a Deo revelata, & ut talis ab Ecclesia proponitur.

Unde patet, ad actum Fidei supernaturalis quinque requiri condiciones, quarum si vel una deficiat, deficit etiam Fides. Quod est valde notandum iis, quorum est Populum Christianum ad Fidem erudire, ut virtutem adeo necessariam vere, & perfecte in praxim redigere sciat.

Prima est, ut actus sit deliberatus, & a libera voluntatis electione procedat, quod est illi cum aliarum virtutum actibus commune.

Secunda, ut habeat pro objecto veritatem aliquam a Deo revelatam, sive per Scripturam sacram, sive per Divinam Traditionem.

*Alia*

Aliæ enim veritates, quæ a Deo revelatæ non sunt, quantumcunque ad pietatis sensum excitandum aptæ videantur, ad objectum tamen Fidei non pertinent; ac proinde actus, qui circa illas versaretur, Fidei supernaturalis dici non posset.

Tertia, ut intellectus assentiatur veritati a Deo revelatæ propter auctoritatem Dei revelantis. Si enim id faciat solummodo ob aliquam rationem credibilitatis, non amplius actum Fidei elicit, cum Fides sola Dei revelantis auctoritate, non vero ulla ratione innitatur.

Quarta, ut firmiter, & seclusa omni dubitatione assentiatur. Alias, si aliquam dubitationem deliberate admittat, assensus ille non amplius innitetur revelatione Divina; vel si innitatur, gravissimam injuriam Deo inferet, cujus veritatem, & infallibilitatem hoc pacto in dubium revocabit.

Quinta denique conditio est, ut veritas a Deo revelata per Ecclesiam credenda proponatur. Cujus conditionis defectu fides Hæreticorum non est vera fides supernaturalis, quia veritates, quas credunt, non ab Ecclesia, sed a sensu proprio, & particulari iudicio credentes accipiunt. Et non tantum ex hoc capite deficit illorum fides; sed etiam ex eo, quod (ut docet S. Th. 2. 2. q. 5. a. 3.) qui vel in uno articulo a fide deficit, totam fidem amittit; & S. Aug. q. 1. in Matth. asserit, illum omnino deficere a fide, qui falsa de Deo, vel de aliqua parte Christianæ doctrinæ credit. Unde inferendum est, quantumcunque Hæretici plurima Christianæ Religionis mysteria credere videantur, illos tamen non fide supernaturali, & Divina; sed fide tantum, & opinione humana credere.

3. Addunt aliqui & sextam conditionem, scilicet ut assensus Fidei referatur in Deum, tanquam finem ultimum. Et hoc quidem verum est, si de fide viva, & per charitatem formata sermo sit, cujus omnes actus, saltem virtualiter, ab ipsa charitate informante in Deum referuntur. Verum, proprie loquendo, tales actus potius actus charitatis, quam fidei vocari debent. Unde S. August. ser. 181. de verb. Dom. loquens de Fide illa per charitatem formata, dicit, quod credere in Deum, est Deum diligere: & ser. 6. hanc inter peccatorem, & justum ponit differentiam, quod peccator quidem credat Christo, & credat Christum, sed non credat in Christum. Hoc enim sine charitate, qua privatus est, facere non potest. Ac proinde credere in Christum solius iusti proprium est.

## C A P U T IV.

### *De vitiis Fidei oppositis.*

\* **D**E illis fufe agit S. Doctor 2. 2. q. 10. & seqq. ac præsertim de Infidelitate in genere, & Hæresi. Nos circa utranque præcipuas

C 3

solum.

solummodo difficultates attingemus, quarum resolutio veritatibus quibusdam practicis scitu necessariis lucem afferre potest.

## S E C T I O I.

*An infidelitas sit peccatum.*

1. **D**Uplex est Infidelitas in genere, ut docet S. Th. sup. q. 10. art. 1. Alia secundum contrarietatem, quæ est eorum, qui aperte repugnant Fidei, vel eam contemnunt. Et certum est, ejusmodi Infidelitatem esse peccatum, idque gravissimum, ut ostendit S. Augustinus tr. 89. in Joan. & post illum S. Th. art. 3.

Alia, quæ ab eodem S. Doctore dicitur secundum negationem, estque illorum, qui carent Fide, non quia ipsi Fidei repugnent, sed quia nihil unquam de illa audiverint. Est autem difficultas inter Theologos, an ejusmodi Infidelitas negativa sit peccatum, ita ut omnes Infideles eo ipso, quo non credunt, peccent. Pro cujus resolutione.

2. Dicendum, infidelitatem illam negativam, eorum scilicet, qui nihil unquam de Fide audiverunt, & per quos non stetit, quominus audirent, nullo modo esse peccatum.

Probatur 1. ex his Christi Domini verbis Jo. 15. *Si non venissem, & locutus eis non fuisset, peccatum non haberent.* Quo in loco, cum Christus (ut explicat S. Aug. sup. & post illum S. Thomas) loquatur de peccato illo, quod Judæi ejus verbis non credentes commiserunt, dicatque, quod peccatum illud non commisissent, si locutus eis non fuisset, sive per se, sive per Prophetas, & Apostolos, ac proinde si de illo nihil unquam audivissent; hinc sequitur, illos, qui Fide carent, eo quod nihil unquam de Fide audiverunt, nec audire potuerunt, peccato Infidelitatis non peccare.

Probatur 2. auctoritate S. August. supra cit. tract. 89. in Joannem, ubi explicans eadem illa Christi Domini verba dicit, *Infideles illos, ad quos Christus non venit, & quibus non est loquutus, habere excusationem, non quidem de omni peccato suo, sed de hoc, quod in Christum non crediderunt.*

Probatur 3. hac ratione. Nullus peccat in eo, quod vitare non potest; sed non est in potestate hominis Infidelitatem negativam vitare, quia illam vitare non potest, nisi credendo in Christum. Quomodo autem credent (ut loquitur Apostolus Rom. 10.) in eum, quem non audierunt? quomodo autem audient sine predicante? quomodo vero predicabunt, nisi mittantur? ex quo sequitur, cum non sit in potestate hominis Infidelitatem illam negativam vitare, ut explicatum est, illam proinde in eo peccatum non esse.

Observat autem recte idem S. Doctor cit. art. 1., quamvis infidelitas illa negativa non sit peccatum, nec illi, qui eo tantum modo sunt



sunt Infideles, id est, qui nihil unquam de Fide audierunt, nec audire potuerunt, damnentur ob ejusmodi Infidelitatem; eos tamen juste damnari ob alia peccata, quæ committunt, quæ sine Fide nunquam remittuntur; quæ tamen si non commisissent, sed potius secundum legem naturæ recte vixissent, haud dubie Deus illi succurrisset, & auxilia necessaria ad Fidem consequendam tribuisset, sive per se immediata aliqua revelatione, sive per alium hominem, vel Angelum veritates Fidei ipsis declarando, & Gratiam ad assensum illis dandum necessariam elargiendo.

3. Quæres, quid de illius Infidelitate sentiendum sit, qui quidem non repugnat Fidei, nec aliquid contra Fidem sentit, sed tamen per negligentiam omittit audire, & addiscere ea, quæ sunt Fidei, quæ proinde non credit, cum Fides sit ex auditu, vel si audivit, negligit attendere ad obligationem credendi, & sic etiam per negligentiam non credit. Respondetur, Infidelitatem illam non esse secundum negationem eo sensu, quo supra dictum est, sed secundum contrarietatem; quia scilicet is, qui eo modo non credit, posset credere; si vellet, ac proinde censetur saltem interpretative contemnere Fidem, cum negligentia illa, quam committit, non nisi ex vili æstimatione ipsius Fidei; ac proinde ex interpretativo aliquo ejus contemptu oriri possit: & ex consequenti talis Infidelitas est peccatum, quia per illam, licet non repugnet Fidei, tamen contemnit Fidem, quod juxta mentem sancti Doctoris pertinet ad Infidelitatem secundum contrarietatem, quam asserit esse peccatum, & quidem ex genere suo gravissimum.

## S E C T I O II.

### *Quot sint species Infidelitatis.*

1. **C**UM ea, quæ Sectione præcedenti dicta sunt, non modo de Infidelitate in genere, sed de unaquaque Infidelitatis specie in particulari intelligenda sint, necessarium videtur hic inquirere, quot illius sint species. Pro cujus resolutione

Dicendum 1. si spectetur diversitas errorum particularium cum Fide pugnantium, determinari non posse, quot sint species Infidelitatis: si vero diversa solummodo ratio, qua Infidelitas potest adversari Fidei, tres illius species a S. Thoma, & communiter ab aliis Doctoribus distingui, nempe Paganismum, Judaismum, & Hæresim.

Prior pars hujus assertionis constat ex eo, quod errores, qui cum Fide pugnant, infiniti esse possint, ut indicat S. Aug. lib. de Hæresibus.

Posterior probatur, quia si vitium consideretur, quatenus adversatur virtuti, tot ex hac parte assignari possunt species illius, quot modis contingit, illud virtuti repugnare; sed Infidelitas tribus præsertim modis repugnare potest Fidei, ut docet S. Th. cit. qu. 10. ar. 5. quia aut repugnat

gnat Fidei Christianæ nondum susceptæ, & talis Infidelitas est Paganorum, seu Ethnicorum; aut repugnat Fidei Christianæ susceptæ in figura, & hæc est infidelitas Judæorum; vel denique repugnat Fidei Christianæ susceptæ in ipsa manifestatione veritatis, & hæc est Infidelitas Hæreticorum; unde patet, tres prædictas species Infidelitatis recte distingui.

2. Dicendum 2. ex his tribus Infidelitatis speciebus, simpliciter loquendo, Infidelitatem Hæreticorum esse omnium deterrimam, & Judæorum deteriore, quam Gentilium, ut docet S. Th. ar. 6. quia scilicet pessimum est adversari Fidei susceptæ in manifestatione veritatis, quod faciunt Hæretici, pejus est adversari Fidei susceptæ in figura, quod faciunt Judæi, quam Fidei nullo modo susceptæ, ut Paganus, & Ethnici. Unde S. Petrus ep. 2. cap. 2. (de Judæis, & Hæreticis loquens) *Melius, inquit, erat eis non agnoscere viam justitiæ, quam post agnitionem retrorsum converti.* Qua de re videndus S. Chrysostomus hom. 50. ad populum Antioch. ubi multis exaggerat Infidelitatem Judæorum, & S. Hieronymus in cap. 18. Isa. ubi asserit, Hæreticos impietate superare quoscunque alios Infideles.

### S E C T I O I I I.

#### *Quid sit Hæresis.*

1. **N**omen Hæresis a verbo Græco *αἵρεσις*, quod eligere significat, derivatum est, ac secundum communem SS. Patrum, & Doctorum usum sumitur pro prava, & perversa electione alicujus dogmatis, quod non modo falsum, & erroneum est, sed etiam fidei Christianæ oppositum. In materia siquidem fidei (ut recte dixit Tertull. lib. de præscript.) *nobis nihil ex nostro arbitrio inducere licet, sed nec eligere, quod aliquis alius de arbitrio suo induxerit. Apostolos Domini habemus auctores, qui nec ipsi quidquam, quod ex arbitrio suo inducerent, elegerunt, sed acceptam a Christo disciplinam fideliter nationibus assignaverunt.*

Nullum sane Christiana Religio dogma continet, quod humana electione inventum sit, nec humano beneplacito subest illius Fides, sed soli Divinæ revelationi per Ecclesiam propositæ innititur, illiusque veritates omnes ab ipso Deo assertæ, & ab eodem illarum credendarum obligatio hominibus imposita. Quod optime explicavit S. Bernardus ep. 190. his verbis: *Fides (ut docet Apostolus) est substantia rerum sperandarum, non inanum phantasiæ conjecturarum. Audis substantiam, non licet tibi in Fide putare, vel disputare pro libito, non hac, illacque vagari per incerta opinionum, per devia errorum: substantiæ nomine tibi aliquid certum, fixumque præfigitur, certis clauderis finibus, certis limitibus arctaris.*

2. Ex

2. Ex quibus facile est ad quaestionem propositam respondere. Dicendum enim, Hæresim esse vitium fidei oppositum, quo quis fidem in Baptismo professus, singulare aliquid, & a communi Ecclesiæ Catholicæ fide, ac sententia alienum sibi tenendum eligit, eique pertinaciter adhæret.

Dicitur 1. *vitium Fidei oppositum*, quod Hæresi commune est cum aliis speciebus infidelitatis, ut ex antedictis patet.

Dicitur 2. *quo quis Fidem in Baptismo professus*, quia secundum communem Theologorum, & Canonistarum sententiam, ille dicitur Hæreticus, qui fidem in Baptismo professus ab illa avertitur, & ejus veritati contradicit: alias si non esset baptizatus, tunc non Hæreticus, sed simpliciter Infidelis diceretur. De qua re fusius agunt Alphonsus a Castro l. 1. de punitione Hæreticor. c. 2. Melchior Canus l. 12. de locis Theologicis cap. 8. & alii.

Dicitur 3. *quod aliquid singulare, & a communi Ecclesiæ Catholica Fide, & sententia alienum sibi tenendum eligit*, quia hoc est Hæreticorum peculiare, proprio ingenio, ac judicio sibi eligere, quod credant. Unde S. Doct. q. 11. a. 1. dicit, quod *Hæreticus intendit quidem Christo assentire* (in quo differt ab Ethnico, & Judæo) *sed deficit in eligendo ea, quibus Christo assentias: quia non eligit ea, quæ vere a Christo sunt tradita, sed ea, quæ sibi propria mens suggerit.*

Dicitur 4. *eique pertinaciter adhæret*, quia (ut loquitur S. Augustin. ep. 162.) *Si qui falsam, & perversam sententiam nulla pertinaci animositate defendant, & parati sint corrigi, & tota sollicitudine querant veritatem, non sunt inter Hæreticos deputandi: e contra (ut idem S. Pater effatur l. 18. de Civ. c. 5.) Illi, qui in Ecclesia prævum aliquid, morbidumque sentiunt, si correpti, ut sanum, rectumque sapiant, resistunt contumaciter, suæque pestifera, & mortifera dogmata emendare nolunt, sed defensare persistunt, sunt Hæretici.*

Est autem hic observandum, pertinaciam illam, quæ Hæreticum facit, tam temporis diuturnitate, quam prava voluntatis dispositione esse æstimandam, ut recte probat Melchior Canus sup. c. 9. Nam si quis sciens, ac volens errori alicui ab Ecclesiâ damnato, tanquam fidei Catholicæ contrario, una solummodo hora, aut etiam minori adhuc temporis spatio adhæreret, haud dubie Hæreticus censendus esset.

Porro non modo ille dici debet Hæreticus, qui articulum aliquem fidei impugnat, aut errorem illi contrarium propugnat, sed etiam qui scienter, ac deliberate aliquam fidei veritatem in dubium revocat; quia præterquamquod juxta regulam juris, quæ habetur c. 1. de Hæret. *Dubius in Fide Infidelis est*, qui scienter, ac deliberate de hujusmodi veritate dubitat, censetur affirmative supponere, auctoritatem Ecclesiæ talem veritatem profitentis, ac docentis non esse certam, & infallibilem, cui suppositioni pertinaciter adhæreere nullus nisi Hæreticus potest.



## S E C T I O I V.

*Quanam ratione dignosci possit, an doctrina aliqua, seu propositio sit Hæretica.*

1. **H**Ujus questionis resolutio non modo utilis, sed & necessaria visa est ad præcavendas Hæreses, quæ, cum primum exoriri incipiunt sub falso, & ementito vel eruditionis, vel pietatis obtentu, plurimorum animos decipere, ac tandem inficere solent, aut saltem implexos, aut ancipites reddere, ita ut vix apud se statuere audeant, quid tanquam certum, & orthodoxum tenere, quidve tanquam falsum, & heterodoxum debeant respuere: cum tamen maxime ad Theologum pertineat ista dignoscere, facemque aliis ad devitandos quoscunque errorum anfractus, ac certum veritatis tramitem sectandum præferre. In quo tamen sicut nihil temere apud se definire, aut alios docere debet; sic ipsi necessarium est sedulo investigare, qua via, & ratione id, quod sui muneris est, exequi possit.

Ut tamen ea, quæ dicturi sumus, clarius, ac facilius percipiantur, observanda est differentia, quæ reperitur inter varias propositiones in materia Fidei, ac Religionis nocivas, & perniciosas, quibus Ecclesiæ censura inuri solet. Siquidem ex plurimis ipsius Ecclesiæ Decretis, ac Pontificum Diplomatum constat, alias propositiones damnari absolute, ut Hæreticas, alias vero, ut erroneas, alias item, ut suspectas, alias, ut schismaticas, aut scandalosas, aut piarum aurium offensivas, aut denique, ut injurias, & contumeliosas.

2. *Propositio Hæretica* ( ut ex antedictis patet ) ea censetur, quæ alicui propositioni Fidei contradictoria est, ita ut Hæretica neget, quod illa, quæ est de Fide, affirmat; aut e contra illa affirmet id, quod illa negat.

*Propositio erronea* ea dicitur, quæ opposita est communi Theologorum doctrinæ, quæ licet non fuerit determinata ab Ecclesia tanquam de fide, per evidentem tamen consequentiam inferitur ex ipsius fidei principiis, unde & ad fidem proxime accedit. Ac proinde propositio illi contraria, quæ dicitur erronea, ad Hæresim proxime accedere censetur.

*Propositio suspecta* ea est, quæ ab Hæreticis ad occultandam Hæresim usurpatur, aut usurpari potest, vel quæ ex circumstantia personæ loquentis, seu scribentis, aut temporis, vel loci, censetur habere adiunctam alicujus Hæresis suspicionem.

*Schismatica propositio* est ea, quæ continet aliquid, quod unitati, & paci Ecclesiæ, aut obedientiæ Superioribus Ecclesiasticis debitæ adversatur.

*Temeraria* est, quæ nullo Auctore fide digno, nulla probabili ratio.

tatione innixa, extra communem Theologorum sensum vagatur.

Scandalosa, quæ inducit occasionem scandali, ac ruinæ, hominesque vel a recto fidei tramite, vel a debitis Christianarum virtutum officiis abducere potest.

Piarum aurium offensiva, quæ licet a doctis in aliquo sensu vero, & recto intelligi possit, illos tamen, qui timoratam habent conscientiam, offendit in eo sensu, quem præ se ferre videtur.

Injuriosa denique, seu contumeliosa propositio ea est; quæ alicui statui, aut personæ injuriam, aut contumeliam facit.

Sunt & aliæ quædam censurarum notæ propositionibus quibusdam pravis inuri solitæ, ut quod sint blasphemæ, impiæ, seditiosæ, & similes, quæ satis ex ipsis terminis intelligi possunt.

Quamvis autem omnes, & quæcunque propositiones, quæ ab Ecclesia quovis modo ut prævæ, & nocivæ damnantur, ab omnibus fidelibus abjici, & repudiari debeant; tamen cum propositiones illæ, quæ, ut Hæreticæ, proscribuntur, sint omnium perniciosissimæ, ideo ad illas dignoscendas peculiare studium a Theologo adhiberi debet, & nos ea, quæ ad id maxime opportuna, & apta visa sunt, in Paragraphis sequentibus proponemus.

#### §. I.

*Ad dignoscendum, an Doctrina aliqua, seu propositio sit Fidei contraria, seu Hæretica, certissimam regulam esse auctoritatem Sacrae Scripturae, ac Divinae Traditionis.*

1. **C**UM juxta doctrinam Conc. Trid. sess. 4. Veritates fide Divinae credendæ contineantur *partim in sacris Scripturae Libris, partim in Traditionibus non scriptis, quæ ipsius Christi ore ab Apostolis acceptæ, aut ab ipsis Apostolis, Spiritu Sancto dictante, quasi per manus tradita, ad nos usque pervenerunt*: hinc recte sequitur, dogmata quæcunque, de quibus dubitatur, an Catholicæ fidei consona, vel dissona sint, secundum illam Divinam auctoritatem esse dijudicanda: & si quidem aliquid continere deprehendantur, quod vel Scripturae sacrae eo sensu intellectæ, quo ab Ecclesia intelligitur, vel Divinae Traditioni, quam eadem Ecclesia agnoscit, & profitetur, sit contrarium, ea haud dubie tanquam heterodoxa, & Hæretica penitus esse repudianda. Et hæc quidem regula, tanquam certissima, & omnino infallibilis semper habita est. Unde illa vox Sanctorum Patrum in Conciliis Œcumenicis frequenter usurpata, quoties vel aliquis error, tanquam fidei adversus, anathemate feriendus, vel aliqua fidei veritas declaranda, aut definienda fuit, κατὰ τὴν ἀρχαίαν παράδοσιν, idest, *secundum antiquam traditionem*, & sæpius iterata anathemate in eos, qui aliter sentire auderent, quam sacra Scriptura, vel Traditio Divina contineat.

2. Et

2. Et apposite Vincentius Lirinensis lib. advers. Hæreses ; c. 1. de seipso loquens, *Sæpe*, inquit, *magno studio*, & *summa attentione* perquirens a *quamplurimis sanctitate*, & *doctrina prestantibus viris*, quonam modo possem certa quadam, & quasi generali, & regulari via, *Catholicæ Fidei veritatem* ab *Hæreticæ pravitatis falsitate* discernere, *hujusmodi semper responsum* ab omnibus fere retuli. Quod si ve ego, si ve quis alius vellet exurgentium Hæreticorum fraudes deprehendere, laqueosque vitare, & in Fide sana sanus, atque integer permanere, duplici modo munire Fidem suam, Domino adjuvante, deberet, primo scilicet *Divinæ Legis auctoritate*, tum deinde *Ecclesiæ Catholicæ traditione*.

Verum quoniam graves plerunque difficultates occurrere possunt, tum in dijudicando vero, ac legitimo Scripturæ sensu, tum etiam in Divinis Traditionibus dignoscendis; ideo alia adhuc auctoritas, præter auctoritatem Scripturæ, ac Traditionis, inquirenda, & auscultanda est ad dignoscendos errores fidei Catholicæ adversos. Et hæc est auctoritas Ecclesiæ, de qua in sequenti Paragrapho agetur.

## §. I I.

*Auctoritatem Ecclesiæ necessariam esse, ut certo, ac infallibiliter de quavis doctrina, seu propositione dijudicari possit, an Fidei contraria sit, ac proinde Hæretica.*

1. **C**UM in dignoscendis fidei veritatibus nemo ( ut loquitur Concil. Trid. sess. 4. ) *prudentiæ suæ inniti debeat*, neque ( ut monet Spiritus Sanctus Jerem. c. 23. ) *Prophetæ illi audiendi sint, qui loquuntur de corde suo*, hoc est, qui solo spiritu particulari, ac judicio proprio, tanquam certo duce, utuntur in iis, quæ, fidem spectant, tuncque ( ut dixit S. August. lib. contra Cresconium Grammat. c. 33. ) *Scripturarum a nobis teneatur veritas, cum id facimus, quod universæ placuit Ecclesiæ, quam ipsa Scripturarum commendat auctoritas*: ideo quotiescunque difficultas, & controversia aliqua occurrit circa ea, quæ fidem spectant, agiturque de dijudicando vero Scripturæ sensu, aut Traditione aliqua Divina dignoscenda, tunc si certam, & infallibilem regulam sequi volumus, non est consulendus proprius, aut cuiusvis alterius particularis sensus, sed inquirendum, quid Ecclesiæ semper hac re teneat, quid tanquam verum, ac certum agnoscat, & profiteatur, quidve tanquam erroneum, & a fide alienum repudiet. Ad ipsam quippe Ecclesiam ( ut edixit Conc. Trid. sup. ) pertinet *judicare de vero sensu & interpretatione Scripturarum*: ipsa est, quæ Traditionis Divinæ a Spiritu Sancto creditum sibi depositum custodit. Cumque ab ejus assistentia nunquam desitura obtinuerit, ut sit *columna, & firmamentum veritatis*; hinc fit, ut in iis, quæ tanquam credenda proponit, vel tanquam non credenda proscribit, neque falli, neque fallere unquam possit. Unde ipse Augustinus, licet omnimoda eruditio-



ditione instructissimus, & ingenio perspicacissimo præditus, dicere tamen non dubitavit lib. cont. Epist. Fundamenti cap. 5. *Evangelio non crederem, nisi me Ecclesiæ Catholicæ commoveret auctoritas.*

2. Cum vero ipsa Ecclesia duobus modis nos alloquatur, & instruat, scilicet vel per Concilia Œcumenica: quæ ipsam universalem Ecclesiam repræsentant, vel per proprium Caput visibile, Romanum scilicet Pontificem, cui Christus in persona Petri vices suas demandavit, ideo in sequentibus Paragraphis videbimus, qua ratione Decreta Conciliorum Œcumenicorum, aut Romanorum Pontificum sint certissimum, ac tutissimum medium ad dignoscendos errores quoscunque fidei oppositos.

### §. I I I.

*Conciliorum Universalium Decreta esse medium certissimum ad dignoscendos errores quoscunque Fidei oppositos.*

1. **S**upponimus ex dicendis in tractatu de Legibus, quod etiam satis constat ex perpetuo Ecclesiæ usu, Concilia Generalia legitime congregata plenissimam habere potestatem condendi leges, & sancienti Decreta pro totius Ecclesiæ regimine, sive in iis, quæ ad fidem, sive in aliis, quæ ad morum disciplinam spectant, ipsamque Ecclesiam auctoritate, ac decretis ejusmodi Conciliorum, tanquam medio certissimo, & maxime efficaci, variis temporibus usam esse, tum ad hæreses validius profligandas, tum ad instaurandam Ecclesiasticam disciplinam, moresque Christianorum reformandos. Nullus equidem Catholicus hætenus in dubium revocavit, quin omnes ubique terrarum fideles Conciliorum Universalium decreta circa fidem sincere, ac humiliter recipere, veritatesque in ipsis definitas firmiter credere, ac errores proscriptos, tanquam fidei contrarios, constanter repudiare teneantur.

Sic impia doctrina Arii in Concilio primo Nicæno, tanquam hæretica damnata est, & ut talis ab omnibus deinceps ubique terrarum fidelibus proscripta: sic aliæ plurimæ Hæreses variis in Conciliis Œcumenicis anathemate percussæ, ut Macedonii in Constantinopolitano I. Nestorii in Ephesino, Eutychetis in Chalcedonensi, & aliorum in aliis.

Cum vero Conciliorum Œcumenicorum in Ecclesia cogendorum causæ non ita frequentes sint, imo ( ut censet S. August. l. 4. contra duas Epistolas Pelagianorum cap. ult. ) rarissimæ inveniantur Hæreses, ob quas damnandas necessitas existat cogendi ejusmodi Concilia; nec tamen inimicus homo desistat unquam superfeminare zizania in agro Patris familias, quæ facillime, & quavis data occasione in medio tritici succrescant: ideo medium aliud a nobis adhuc inquirendum est,

est, quo zizania illa a tritico sejungere, & veritatem ab errore discernere possimus. Et de hoc in paragrapho sequenti agetur.

## §. I V.

*Pontificis Romani auctoritatem in iis, quæ Fidem spectant, esse quoque medium certissimum ad doctrinam orthodoxam dignoscendam, eamque ab heterodoxa, & hæretica secernendam.*

1. **C**oncilium Florentinum sess. 25. in decreto Fidei definivit, Romanum Pontificem successorem esse B. Petri Principis Apostolorum, & verum Christi Vicarium, totiusque Ecclesiæ caput, & omnium Christianorum Patrem, & Doctorem existere; & ipsi in B. Petro pascendi, regendi, & gubernandi universalem Ecclesiam a Domino nostro Jesu Christo plenam potestatem traditam esse. Ex quo sequitur, ad illum pertinere de rebus ad Fidem, & Religionem spectantibus juridice cognoscere, majoresque causas, quales sunt Fidei, ac Religionis, dijudicare, Hæreses emergentes damnare, veritates Fidei Divina credendas definire, ipsique omnes ubique terrarum Fideles in his, quæ Fidem, & Religionem spectant, subesse debere, ac vocem illius, tanquam supremi Pastoris, auscultare.

Hanc de Romani Pontificis auctoritate doctrinam (quæ aliquanto fusius in Secunda hujus Operis Parte, tract. de Legibus explicabitur) optime expressit S. Bernardus epist. 190. ad Innocentium, ubi Pontificem illum sic alloquitur:

Oportet, inquit, ad vestrum referri Apostolatum pericula quæque, & scandala emergentia in Regno Dei, & præsertim quæ de Fide contingunt. Dignum namque arbitror, ibi potissimum resarciri damna Fidei, ubi non possit Fides sentire defectum. Hæc quippe hujus prerogativa Sedis. Cui enim aliquando dictum est: Ego rogavi pro te, ut non deficiat Fides tua? Ergo, quod sequitur, a Petri Successore exigitur, Et tu aliquando conversus confirma fratres tuos. Id quidem modo necessarium. Tempus enim est, ut vestrum agnoscatis, Pater amantissime, principatum, probetis zelum, ministerium honoretis. In eo plane Petri impletis vicem, cujus tenetis & Sedem, si vestra admonitione corda in Fide fluctuantia confirmatis; si vestra auctoritate conteritis Fidei corruptores.

Ex qua S. Bernardi doctrina, quæ totius Ecclesiæ communis est, sequitur 1. quoties aliqua controversia in materia Fidei exoritur, quoties aliquod novum dogma exurgit, de quo dubitatur, an Fidei adversetur, certissimum medium ad veritatem dignoscendam, eamque a quovis errore secernendam esse ad Sedem Apostolicam recurrere, & inde responsa petere, ubi Fides non possit sentire defectum. Ita fecit Sanctus Hieronymus in controversiis quibusdam circa Fidem Antiochiæ exortis, super quibus judicium A-

posto-

postolicæ Sedis exquirat, ut videre est in Epistola, quam super hac re scripsit ad Damasum Papam.

Idem etiam fecerunt Sancti Episcopi Victricius, & Exuperius, ille Rothomagensis, hic Tolosanus, cum primum nefariam Vigilantii doctrinam in Galliis emergere conspicati sunt, super qua Innocentium Primum consuluerunt, ut videre est apud Baronium tom. 5. ad annum 406. num. 47.

Eodem modo se gessit Alcimus Avitus Episcopus Viennensis, dum Hormisdam Papam super erroribus Græcorum consuluit, ut ex ejus Epistola ad illum Pontificem constat.

Simili ratione Possessor Episcopus Africanus eundem Hormisdam consuluit super doctrina cujusdam libri a Fausto Regiensi Episcopo editi.

Innumera prope exempla aliorum Sanctorum Episcoporum, & Doctorum ex Historia Ecclesiastica afferri possent, qui similibus in casibus, in quibus de Fide agebatur, ad Petri Sedem recurrerunt, ut veritatem ab errore certo dignoscerent.

Sequitur 2. ex eadem doctrina supra allata, quoties aliquid in materia Fidei definitum est a Romano Pontifice ex Cathedra loquente, hoc est quando loquitur, non ut Doctor particularis, sed ut Christi Vicarius, totiusque Ecclesiæ caput, & servata legitimi judicii forma, quoties inquam ab illo ut sic doctrina aliqua, seu propositio declarata est hæretica, & ut talis damnata, vel e contra, quoties veritas aliqua tanquam Fide credenda definita est, teneri Christianos omnes illius judicio assentiri, ac decretis obtemperare, proindeque damnare, quod Sedes illa Apostolica damnat, approbare, quod approbat, & ut loquitur S. Hieronymus citata Epistola ad Damasum, Cathedræ Petri Fidei communione consociari.

Ita semper in Ecclesia servatum est, quod innumeris prope exemplis probari posset, quæ passim in Annalibus Ecclesiasticis occurrunt. Instat omnium erit illud, quod in Galliis contigit tempore Sancti Leonis Papæ, qui cum Epistolæ decretalis, qua Eutychetis Hæresim damnaverat, simulque veritatem illi oppositam Fide credendam definiverat, exemplar ad Arelatensem Episcopum, & per illius manus ad alios omnes Galliæ Episcopos transmisisset, hoc Judicium Apostolicum ab Episcopis illis tanta reverentia, & animi submissione receptum est, ut ad præfatum S. Leonem gratulatoriam epistolam miserint, in qua profitentur, Se Apostolica illa scripta tanquam Symbolum Fidei suscepisse, tabulisque cordis ascripsisse, ac tenaci memoriæ commendasse, quo paratiores essent ad confundendos Hæreticorum errores, &c. Addunt præterea, Illi Doctrinæ Apostolicæ debere unumquemque Fidelem, quod constanter teneat, quod credebat, debere etiam Infidelem, quod a perfidia sua, agnita veritate, discedere, & Apostolicæ institutionis luce perfusus erroris sui tenebras derelinquere valeat.

Huic-



Huic Epistolæ, quæ reperitur inter Epistolas S. Leonis post quinquagesimam primam, Episcopi Galli numero quadraginta quatuor subscripserunt.

Sequitur 3. ex eadem doctrina, eos, qui Apostolicæ Sedis judicio in materia Fidei damnati sunt, pro Hæreticis habendos esse. S. Epiphanius Quartadecimanos a Victore Papa damnatos catalogo Hæreticorum ascripsit.

Sic Vincentius Lirinensis rebaptizantes, seu Agrippinianos, quorum doctrina a S. Stephano Papa damnata fuerat, Hæreticis adnumerat.

Sic S. Hieronymus in Jovinianum, Vigilantium, aliosque a solo Pontifice Romano damnatos, ut Hæreticos invehitur.

Sic S. Augustinus post damnatam ab Innocentio Primo Pelagii doctrinam, ipsum Pelagium, ejusque affectas ejusmodi doctrinam pertinaciter propugnantes, Hæreticos passim in libris adversus eos editis appellat.

Et Possidius in vita illius Sancti Patris c. 18. refert, post Pelagii errores a Sede Apostolica damnatos, Honorium Imperatorem suis Legibus constituisse, ipsum Pelagium, aliosque illi adhærentes pro Hæreticis habendos esse.

Ex quibus patet, quam vere Ivo Carnotensis Episcopus epist. 8. ad Richerium Senonensem Archiepiscopum dixerit, quod *Sedis Apostolicæ* judiciis, & constitutionibus ( *in materia Fidei* ) contraire, plane sit *Hæreticæ pravitatis notam incurrere*.

#### §. V.

*Quomodo juxta ea, quæ precedentibus paragraphis dicta sunt, quivis Theologus de doctrina aliqua, seu propositione in materia Fidei judicium ferre possit.*

1. **UT** in re tanti momenti Theologus eo. quo convenit, modo procedere noverit, & in ferendo judicio neque temeritatis notam, neque deceptionis periculum incurrat, quoties doctrina aliqua, aut propositio occurrit, de qua dubium ipsi suboritur, an aliquid quavis ratione Fidei Catholicæ adversum, aut repugnans contineat;

In primis perspicere debet, an doctrina illa, seu propositio contraria sit iis, quæ habentur in Sacra Scriptura eo sensu intellecta, quo Ecclesia illam intelligit.

2. Si nihil manifeste contrarium in Sacra Scriptura occurrat, tunc investigare debet, an Traditioni Divinæ, seu Apostolicæ ejusdem doctrina, aut propositio adversetur, hoc est iis dogmatibus, quæ tanquam Fide certa per Traditionem Divinam, seu Apostolicam Ecclesia accepit, & credenda proposuit.

3. Ut vero ea, quæ Traditione illa continentur, ipsi innotescant, videat, quis sit communis, & universalis super hac re totius Ecclesiæ sen-

ſenſus, vel quid Concilia Generalia, aut Summi Pontifices ſuper eadem re decreverint, an ſcilicet doctrina illa, ſeu propositio definitione aliqua, ſeu Conſtitutione Conciliorum, aut Pontificum, tanquam Fidei contraria, damnata ſit; & ſi id ita factum eſſe comperit, tunc ejuſmodi doctrinam, ſeu proſiſitionem, tanquam falſam, & Hæreticam ſine ulla hæſitatione debet abjicere, illoſque haud dubie pro Hæreticis habere, qui animo contumaci ea, quæ Eccleſia in materia Fidei damnat, propugnare, aut ea, quæ proſiſtetur, & credenda proponit, impugnare auſi fuerint.

Quod ſi doctrina illa, ſeu proſiſitio non quidem ut Fidei contraria, ſed ut erronea, impia, blaſphema, aut ut ſuſpecta, ſcandalofa, vel quavis alia ratione proſcripta ſit, tunc illam, ut talem, repudiare, eoſque, qui pettinaciter ejuſmodi doctrinæ adhærent, non quidem ut Hæreticos, ſed ut Eccleſiæ inobedientes, & in inobedientia perſicaces tenere, ab iſſque ſibi cavere debet.

Neque vero timere debet, ne in tali iudicio ſerendo tam de doctrina, quam de perſonis, ullum ſubſit periculum aut temere iudicandi, aut quovis alio modo peccandi contra charitatem. Imo ſi quis, neſcio quo vano conſcientiæ ſcrupulo, aut fortâſſis humano aliquo reſpectu recuſaret, aut ſubterfugeret damnare ea, quæ Sedes Apoſtolica damnafſet; aut pro Catholicis, & Orthodoxis habere vellet eoſ, qui adverſus ejuſdem Sedis auctoritatem contumaces illius decretis in materia Fidei humiliter, ac ſincere ſubefſe recuſarent: tunc procul dubio longe gravius delinqueret, tum in eo, quod iudicium proprium, & particulare Sedis Apoſtolicæ iudicio anteferret, quod quidem eſt iudicii temerarii genus longe damnabilius; tum etiam, quia ſic recuſando, aut ſubterfugiendo peccaret contra obedientiam Eccleſiæ debitam, & ſimul etiam exponeret ſe periculo peccandi contra Fidem, & fortâſſe contra charitatem ratione ſcandali, quo alioſ ad ſimilem aliquam pravam diſpoſitionem ſuo exemplo induceret.

Quæres, quomodo ſe gerere debeat Theologus in eo caſu, in quo nova aliqua doctrina exoriretur, quæ ipſi ſuſpecta foret, & de qua tamen nullum adhuc iudicium Eccleſia protuliſſet. Reſpondetur, in eo caſu nihil melius ab eo fieri poſſe, quam auſcultare monitum Apoſtoli dicentis: *Nolite omni ſpiritu credere, ſed probate ſpiritus, ſi ex Deo ſunt, quia multi Pſeudoprophætæ exierunt in mundum;* & alio in loco: *Videte, ne quiſ voſ decipiat per fallaciam,* &c. Ac proinde ſicut neque leviter credere, neque temere iudicare, aut condemnare licet, ſic etiam oportet probare, & quantum ſpiritus, & prudentia ſuggeſſerit, perpendere, qualia ſint, quæ in ejuſmodi nova doctrina proponuntur, & ancum iſſ, quæ habentur ex ſacra Scriptura, aut ex decretis Conciliorum, ſeu Pontificum, aut ex communi Patrum, & Doctorem Eccleſiæ conſenſu concordent: & ſi quidem ratio aliqua dubitandi ſubſit, tutiſſimum erit ſibi a tali doctrina cavere, & novitatem quamcunque

in materia Fidei, & Religionis semper suspectam habere, donec Ecclesia iudicio suo definierit, quid de ejusmodi doctrina tenendum sit. Atque hactenus de Fide; nunc de primario ejus objecto, nempe Deo.

## TRACTATUS II.

### D E D E O.

**P**ost tractatum de Fide sequitur, ut de illius primario, & principali objecto, nempe Deo, loquamur. Cum vero duplici modo spectari possit a nobis Deus, 1. quatenus est unus, & indivisus in Essentia. 2. quatenus est trinus in Personis, nos hic illum priori modo considerabimus; de eodem, ut in Personis trino, in sequenti Tractatu acturi.

Quamvis autem quæ de Deo, utpote infinito in omni genere entis, & perfectionis, dicenda forent, nullis possint terminis circumscribi: nos ex innumeris veritatibus, quæ in illius infinitæ Essentiæ cognitione continentur, paucas tantum, easque nostro captui magis accommodatas, & Fidei nostræ illustrandæ magis necessarias excerpemus; eoque ordine proponemus, quem S. Doctor in prol. 2. qu. par. 1. præscripsit, cum dixit, tria de Deo quæri posse: 1. an sit, 2. qualis sit, 3. qualiter operetur. Nos igitur illius vestigiis inhærentes, agemus in 1. capite de existentia Dei, in 2. de illius proprietatibus, seu attributis, in 3. 4. & 5. de ejusdem operationibus, in 6. demum videbimus, qua ratione Divina Essentia clare, & perfecte a nobis cognosci possit.

#### C A P U I.

##### *De existentia Dei.*

#### S E C T I O I.

##### *Quibus rationibus probari possit, Deum esse.*

1. **Q**uamvis hujus quæstionis propositionem pietas interdicere videatur, refugiatque animus vel solum cogitare, quod Dei existentia in dubium revocari possit: nihilominus, cum non desint impii, qui (ut testatur Propheta Ps. 52) dicant in corde suo, *non est Deus*, & cum aliquando etiam pii tentationibus importunis circa ipsam Dei existentiam exagitentur, ideo non erit inutile breviter hic rationes præcipuas adnotare, quibus Theologi Dei existentiam, non quidem a priori, hoc est, per causam (quod impossibile est) sed a posteriorio.



teriori, hoc est per effectus, probare solent. Ut enim recte dicit Sapiens c. 13. *A magnitudine speciei, & creatura poterit cognoscibiliter Creator horum videri.* Et Apostolus ex creaturarum consideratione Deum ita evidenter cognosci posse dicit, ut plane asserat, esse inexcusabiles eos, qui Deum per illas non cognoverunt, vel cognitum non glorificaverunt.

Sunt autem quinque præcipuæ rationes; quibus Sanctus Doctor, & cum illo communiter Theologi existentiam Dei probant.

Prima ducitur ex motu, seu mutatione rerum creatarum. Nam sensu patet, aliqua moveri, seu mutari. Omne autem, quod movetur, ab alio movetur. Nihil enim movetur, nisi prout est in potentia ad id, ad quod movetur; sicut nihil movet aliquid, nisi secundum quod est in actu, educendo illud de potentia in actum. Et quia non est possibile, idem simul esse in potentia, & in actu secundum idem, hinc sequitur necessario, quod oportet aliud esse movens, aliud motum. Cum autem non procedatur in infinitum ( hoc enim impossibile est, & nulla ratione concipi potest ) necesse est devenire ad aliquem primum Motorem, quia nullo moveatur, & a quo motus omnis aliorum incipiat. Et hunc dicimus Deum.

Secunda ratio ducitur ex consideratione causæ efficientis. In istis enim sensibilibus invenitur ordo causarum efficientium. Nihil enim potest esse causa sui ipsius, alioquin esset prius se ipso: Nec etiam admitti potest progressus in infinitum, ut supra dictum est. Quare necesse est devenire ad aliquam primam causam efficientem, quæ a nulla alia superiori oriatur, & a qua alii omnes effectus procedant. Et hæc prima causa est Deus.

Tertia ratio ducitur ex possibili, & necessario. Cum enim ea omnia, quæ videmus in rerum natura, possint non esse, si omnia, quæ sunt, hujus conditionis essent, potuissent omnia non existere, & sic aliquando potuisset nihil esse, & ex consequenti neque modo aliquid esset, cum illud, quod potest non esse, non potuerit a se ipso incipere esse, neque etiam ab alio, si totum quod est, tale est, ut possit non esse. Quare, ne illud absurdum sequatur, admittendum est aliquod ens necessarium per se, quod semper, & necessario sit, & quod aliter se habere non possit, a quo alia omnia possible suum esse accipiant. Et hoc est, quod vocamus Deum.

Quarta ratio desumitur, ex variis gradibus, qui in rebus inveniuntur. In illis enim invenitur aliquid magis & minus bonum, verum, perfectum, &c. sed magis, & minus dicuntur de diversis, secundum quod diversimode appropinquant ad aliquid, quod maxime est, ac proinde, quod est optimum, verissimum, perfectissimum, & ex consequenti, quod est maxime ens. Quod autem dicitur maxime tale in aliquo genere, est causa omnium, quæ sunt illius generis. Unde sequitur, esse aliquid quod maxime, optime, verissime, & perfectis-

sime sit, quodque proinde in omnibus entibus sit causa ipsius esse, ac totius bonitatis, veritatis, & perfectionis, quæ ipsis inest. Et hoc dicimus Deum.

4. Quinta denique ratio ducitur ex gubernatione rerum. Videmus enim, quod aliqua, quæ cognitione carent, nempe corpora naturalia, operantur propter finem aliquem; quod apparet ex hoc, quia semper, aut frequentius eodem modo operantur. Unde patet, quod non casu, sed ex intentione perveniunt ad finem. Ea vero, quæ cognitione carent, non tendunt in finem, nisi directæ ab aliquo cognoscente, & intelligente. Est igitur in rerum natura aliquod perfectissimum intelligens, a quo res omnes naturales in suos fines diriguntur. Et hoc dicimus Deum.

5. His rationibus ex S. Doct. desumptis, duas alias magis populares addere possumus. Prima est, qua utitur S. Athanasius libro contra Gentiles, ubi Deum esse probat ex conflictu perpetuo elementorum inter se ob contrarias qualitates, quibus constant. Quo quidem conflictu, licet se perpetuo infellent, & ad mutuam destructionem continuo tendant, tamen, illo non obstante, conservantur, & perseverant in omnem temporum longinquitatem. *Atqui fieri non posset, inquit ille S. Pater, ut ista omnia invicem confligant, & contraria durarent, & conservarentur, nisi summus aliquis esset moderator, ac Dominus, qui ea sociaret, cui & elementa ipsa, velut vero famuli, ad nutum obtemperarent.*

Ratione diversa S. Gregorius Nazianzenus or. 4. ex pulchritudine, ordine, situ, dispositione, proportionem, &c. rerum omnium hujus Universi, ac præsertim, ut cætera taceantur, ex tam constanti, tamque mirabili Coelorum motu, Solisque accessu, & recessu demonstrari posse existimat, esse aliquem summum Creatorem, & Conservatorem, qui hæc omnia tam diversa regat, ac moderetur. Et S. Chrysostomus homilia nona ad Populum Antiochenum ait, creaturas tam clare suum Conditorum prædicare, ut neque Scythia, neque Barbarus, neque Indus, neque ulla alia gens sit, quæ hanc vocem omnituba clariorem intelligere non possit.

## S E C T I O II.

*Quibus rationibus demonstrari possit, unum esse Deum, & non plures.*

1. **H**Ujus veritatis de unitate Dei demonstratio ex præcedenti de ejusdem Dei existentia necessario sequitur. Ut enim dixit Tertullianus lib. 1. contra Marcion. cap. 5. *Deus si non unus est, non est.* & S. Athanas. in lib. cont. Gentiles ait, *Deos esse multos proinde esse, ac nullos dicere.*

Ut tamen hæc veritas adhuc clarius innotescat, variae suppetunt rationes.

tiones, quas SS. Patres scriptis suis inseruerunt; ex quibus aliquot seligemus.

Primam ducere possumus ex ipso naturali instinctu hominum, qui vel in mediis Gentilitatis erroribus, tamen communi sermone Deum unicum semper agnoverunt. *Nam & cum jurant ( ut ait Laet. l. 2. institut. Christ. c. 1. ) & cum gratias agunt, non Jovem, aut Deos multos, sed Deum nominant. Adeo ipsa veritas, cogente natura, etiam ab invitis pectoribus erumpit.*

Secundam rationem desumit S. Athanasius sup. ex ordine, & administratione hujus mundi. *Non enim, inquit, si plures essent rerum creaturarum Principes, servari posset ejusmodi universitatis ordo, sed omnia confusa, & perturbata forent, cum unusquisque omnia ad suum arbitrium traheret.*

Tertiam adhuc rationem nobis suggerit Boetius l. 4. de consol. prof. 10. ex eo, quod Deus est summe bonus, & summe perfectus, adeoque summum creaturæ bonum. Si enim hæc illi summa bonitas, & perfectio deesset, jam non esset Deus. Omnes enim in eo conveniunt, ut Deum esse sentiant illud, quod optimum, & perfectissimum est, & quo nihil melius, & perfectius excogitari potest. Atqui si essent e. g. duo Dii, totidemque summa bonæ, unum alterum non esset; atque adeo mancum, & defectuosum esset, quia deesset illi summum bonum, quod esset alter Deus, a quo diversus esset. Unde sequitur, esse tantum unum Deum, nec plures esse ullo modo posse.

### S E C T I O I I I.

*An possit a nobis aliquod nomen Deo imponi, & qualiter nominari debeat.*

1. **A**D priorem quæstionis propositæ partem cum distinctione respondendum est.

Si enim sermo sit de nomine, quod Essentiam Divinam perfecte, & distincte, sicut est, significet; certum est ( ut docet S. Thomas 1. p. q. 23. art. 1. ) nullum tale nomen a nobis, quandiu viatores sumus, posse vel exprimi, vel concipi. Cum enim nomina sint signa, & expressiones conceptuum, quos de rebus formamus, eo tantum modo possumus res aliquas per nomina exprimere, quo eas concipimus, & cognoscimus. Atqui Divina essentia non potest a nobis, quandiu viatores sumus, perfecte, ut in se est, percipi, & cognosci. Ergo nec ullo nomine perfecte, ut in se est, exprimi, aut explicari. Unde communiter SS. Patres vocant Deum innominabilem, ineffabilem, &c. Et S. August. in Psal. 85. *Facilius, inquit, dicimus, quid Deus non sit, quam quid sit. Terram cogitas, non est hoc Deus, omnia cogitas, quæ sunt in terra, in mari, in cælo; non est hoc Deus. Hoc solum possum dicere, quid non sit Deus, non quid sit.*



2. Si quæstio intelligatur de nomine, quo, licet imperfecte, exprimamus naturam Divinam, aut ejus aliquam perfectionem, prout a nobis in hac vita concipi potest, certum est eo modo posse a nobis Deum nominari. Hinc videmus in Scripturis tot illi nomina tribui, illumque vocari Dominum Deum, Omnipotentem, Æternum, &c. Unde S. Aug. tract. 13. in Joan. *Omnia, inquit, possunt dici de Deo, nihil digne dicitur de Deo. Nihil latius hac inopia. Quæris congruum, non invenis: quæris quoquo modo dicere, omnia invenis.*

Ad secundam quæstionis propositæ partem ut respondeatur, multiplici distinctione opus est.

Eorum enim nominum, quæ Deo tribui possunt, alia sunt negativa, per quæ profiteamur, nihil in Deo defectuositatis, aut imperfectionis reperiri, ut quando dicimus, illum esse increatum, immutabilem, immensum, &c. alia vero sunt affirmativa, per quæ aliquam illius perfectionem, prout a nobis concipitur, exprimimus; ut quando dicimus, Deum esse sapientem, justum, &c. In quibus nominibus duo debent considerari, ut recte monet S. Doctor sup. ar. 3. scilicet id, quod illis nominibus significatur, & modus quo significatur. Quantum ad id, quod significatur, nomina illa Deo proprie competunt, & magis, quam creaturis. Quantum vero ad modum significandi, non proprie dicuntur de Deo, cum habeant modum significandi, qui creaturis magis, quam Deo competit.

Rursus nomina affirmativa, quæ de Deo dicuntur, alia sunt absoluta, ut quando Deus dicitur sapiens, bonus, &c. Quæ quidem nomina (ut recte notat S. Thomas art. 2.) Deum significant, non prout in se est, sed prout a nobis intelligitur in hac vita. Cum enim intellectus noster ex creaturis Deum cognoscat, sic eum cognoscit, sicut illum creaturæ repræsentant, per illas nempe perfectiones, quas ab eo participant. Unde, ait S. Doctor, cum dicimus, *Deus est bonus*, sensus est, id, quod bonitatem dicimus in creaturis, præexistere in Deo, sed secundum alium longe, imo infinite excellentiorem modum: & sic de aliis. Alia vero nomina sunt relativa, qualia sunt illa, quæ aliquam Dei perfectionem significant cum relatione ad creaturas, vel potius creaturarum ad Deum (creaturæ siquidem realem ad Deum, habent relationem, non Deus ad illas) ut quando vocamus illum Creatorem, Redemptorem, Justificatorem, &c.

Alia denique sunt nomina, quæ solius Dei sunt propria, ut quando vocatur æternus, infinitus, immensus, &c. Hæc enim nomina soli Deo competunt, nec ullis creaturis possunt communicari. Alia vero, quæ aliquo modo sunt ipsi cum creaturis communia, ut cum dicitur justus, sapiens, fortis, &c. Hæc enim nomina etiam de creaturis suo modo dici possunt.

Observandum est autem, unum esse illi præ cæteris maxime proprium, scilicet hoc nomen Deus, Quod licet ab aliqua ejus operatione deri-

derivetur, nimirum a contemplatione (ex verbo enim Græco θεω-  
 ῶν, quod significat considerare, seu contemplari, formatum est  
 nomen Θεός, a quo vox Latina Deus) tamen communiter pro ipsa  
 Dei natura significanda usurpatur. Unde dicit Tertullianus contra  
 Hermog. c. 3. *Deus substantiæ ipsius nomen est, idest Divinitatis, Do-*  
*minus vero non substantiæ, sed potestatis.* Et eo sensu dicit S. Doct.  
 art. 9. nomen illud esse incommunicabile creaturis, cum natura Divi-  
 na illis communicari non possit. Unde, quando in Scripturis aliquibus  
 creaturis tribuitur, ut Psal. 81. *Ego dixi, Dii estis*, hoc tantum improp-  
 rie, & secundum quandam imperfectam similitudinem, non autem  
 secundum propriam, & formalem ipsius nominis significationem, intel-  
 ligendum est.

## C A P U T II.

*De Attributis Divinis.*

## S E C T I O I.

*An, & quomodo Attributa Dei inter se, & ab ejus  
 Essentia distinguantur.*

1. **P**ER Attributa Dei nihil aliud intelligimus, quam id, quod per  
 nomina Dei significari supra declaravimus, scilicet prædicata  
 aliqua, quibus vel Divina natura, vel illius perfectiones secundum  
 nostrum concipiendi modum exprimuntur. Unde quæstiones eadem,  
 quæ fiunt de Attributis, etiam de nominibus Dei fieri possunt. Uti-  
 mur tamen voce Attributorum, tum apud Theologos magis usita-  
 ta, tum etiam ut magis apta ad illa declaranda, quæ de Divinis perfe-  
 ctionibus dicenda sunt. Sicut enim nomen Dei naturam ejus præser-  
 tim designat, sic Attributa ipsius naturæ perfectiones, & propieta-  
 tes, tanquam ipsi adjunctas, prout a nobis imperfecte concipiuntur,  
 expressius significant.

Hoc igitur supposito, ad quæstionem propositam respondendum est  
 cum distinctione.

Si enim sermo sit de Attributis Divinis, prout sunt reipsa in Deo,  
 dicendum est, illa nec ab Essentia Divina, nec etiam inter se ullo mo-  
 de esse distincta.

Si vero de iisdem loquamur, prout a nobis in hac vita concipi pos-  
 sunt, dicendum est, illa distincta esse tam ab Essentia Divina, quam  
 inter se, non quidem realiter, sed per rationem.

Ut hæc assertio intelligatur, notandum est, quod, quamvis Deus in  
 se sit maxime simplex, ut Sectione sequenti dicetur, quia tamen in  
 unica illa sua, & simplici Essentia omnes perfectiones, & excellentias  
 possibles continet, nec possumus secundum nostrum imperfectum

concupiendi modum tantam perfectionum varietatem in uno simplici ente concipere; ideo noster intellectus indiget variis, & distinctis conceptibus, quibus illarum Divinarum perfectionum species aliquas in se exprimat, ad instar illarum, quas in rebus creatis inesse cognoscit. Et sic illas Divinas perfectiones per conceptus varios distinguit (quod Theologi vocant distinguere ratione) licet in se nullo modo distinguantur, sed sint unica, & simplicissima ipsius Dei perfectio.

2. Hæc assertio sic explicata continet veritatem, quæ medium locum tenet inter duos errores oppositos.

Primus est Gilberti Porretani, qui (ut refert S. Bern. ser. 8. in Cant.) dicebat, sapientiam, iustitiam, & reliqua Divina Attributa ab ipso Deo esse realiter distincta, ac proinde sapientiam, qua Deus est sapiens, iustitiam, qua iustus est, imo & Divinitatem, qua Deus est, non esse Deum, sed quid ab eo realiter distinctum.

Alius error huic oppositus fuit Aetii, Eunomii, & aliorum, qui (ut refert S. Epiphanius hæc. 76. & S. Basil. lib. cont. Eunom.) nullam distinctionem conceptus, & rationis inter Attributa Divina recipere volebant, sed permiscebant, & confundeabant omnia, quæ de Perfectionibus Divinis dici, aut cogitari poterant, asserentes omnem illam distinctionem in sola nominum prolatione consistere, & cum vocibus dissolvi, & evanescere.

Jam probatur assertio, & simul errores illi refelluntur. 1. ex eo, quod in Scripturis sacris Spiritus Sanctus diversos nobis de Divinis perfectionibus conceptus suggerit. Aliter enim de misericordia, aliter de iustitia loquitur, aliter de omnipotentia, aliter item de sapientia, & sic de aliis: Unde qui istos conceptus Scripturæ verbis expressos confunderet, & unum pro altero promiscue acciperet, sensum omnem Scripturarum everteret. Ex quo sequitur, nos recte posse variis, & distinctis conceptibus Divinas perfectiones exprimere, & enunciare (neque enim aliter nobis de Deo loquendum est, ut ait S. Hilarius l. 5. de Trinit., quam sicut ipse ad intelligentiam nostram de se loquutus est) proindeque Attributa illa Dei secundum nostrum concipiendi modum esse aliquo pacto inter se distincta. Atqui non sunt distincta realiter. Hic enim fuit error Porretani, qui in Concilio Rhemenfi ab Eugenio Papa damnatus est. Ergo distincta sunt tantummodo per rationem.

Probatur 2. ex S. Basilio l. c. ubi dicit, nullum esse nomen, quod totam Dei naturam comprehendat, & quantum satis est, explicet, quare multa esse, ac diversa, quæ singula propriam habent significationem. Et ex S. Greg. Nysseno, qui l. 1. adversus eundem Eunomium asserit, uniuscujusque nominis, quod de Deo dicitur, propriam, ac singularem esse notionem. Et apposite S. Cyrillus Thesi 31. contra Eunomianos: *Non potest, inquit, humana natura majus aliquid, quam ipsa sit, de Deo dicere. Nostro enim proprio modo intelligimus, ex his que in*



*nobis sunt, majorum exemplis sumentes, ut qui in parva tabula caelestem describunt circulum.*

An autem præter illam distinctionem rationis inter Attributa Divina aliqua alia distinctio formalis admittenda sit, an item distinctio illa, sive formalis, sive quæcunque alia, fieri debeat cum respectu ad proprietates creaturarum realiter inter se distinctas, non est nostri instituti curiosius inquirere. Sufficit nobis, ut in illorum Dei Attributorum notione sciamus Fide Divina credendum esse, aliquam inter illam reperiri distinctionem, illamque non esse realem: liberum relinquimus cuique illam, sive ut formalem, sive quocumque alio modo concipere, dummodo intra veritatis limites suos conceptus coercere velit.

## S E C T I O II.

*An Divina Essentia sit omnino simplex.*

1. **S**upponimus, perfectam simplicitatem consistere in exclusionem cujuscunque compositionis, divisionis, & potentialitatis, ac proinde dicere summam actualitatem. Hoc breviter supposito

Dicendum est, Essentiam Divinam esse cujuscunque compositionis, divisionis, & potentialitatis prorsus expertem, ac proinde omnino simplicem.

Probatur 1. ex Scriptura, Exod. 3. *Qui est, misit me ad vos, &c.* Quibus verbis Scriptura de Deo, tanquam de Ente maxime simplici, loquitur.

Probatur 2. ex Concil. Lateran. sub Innoc. III. c. 1. ubi definitum est, Deum esse unam substantiam, seu naturam omnino simplicem.

Probatur 3. ex S. August. lib. 11. de Civ. c. 28. ubi dicit, *solam naturam Divinam esse simplicem, quia nihil habet, quod possit amittere, nec in ea aliud est habens, aliud quod habetur.* Et S. Greg. l. 16. Mor. c. 21. *Natura Dei est simplex, nec aliud ipse, aliud dies ejus sunt; Deus enim hoc est, quod habet.*

Probatur 4. ratione, quia cum Deus sit primum Ens in genere perfectionis, omne id, quod perfectius est, debet Deo inesse; atqui, cæteris paribus, perfectius est habere omnem, & quamlibet perfectionem consistentem in una tantum simplici entitate, quam in aliqua entitate composita, consurgente ex conjunctione plurium inter se; ergo, &c.

2. Ex hac veritate sic probata refellitur error Antropomorphitarum, qui (ut refert S. Epiph. hæ. 70.) asseriebant, Deum habere aliquod corpus. Cujus erroris falsitas præter ea, quæ supra dicta sunt, manifeste convincitur ex his Christi verbis S. Joan. 4. *Spiritus est Deus:* quorum verborum auctoritate utitur S. Epiph. supra, & alii SS. Patres ad illam Hæresim refellendam.

Cum igitur, ut ex dictis patet, Deus sit omnino simplex, hinc sequitur (ut recte docet S. Th. 1. p. q. 3.) illum nullo modo esse compositum,

litum, five ex essentia, & existentia, five ex genere, & differentia, five ex potentia, & actu, five ex substantia, & accidentibus, cum omnes isti compositionis modi ejus perfectissimæ simplicitati supra assertæ, & probatæ repugnent, ac proinde illum esse actum purissimum, & simplicissimum.

## S E C T I O III.

*An, & qua ratione Divina Essentia in sua simplicitate contineat omnes rerum omnium perfectiones.*

1. **D**icendum primo, omnes rerum omnium perfectiones in Deo contineri. Ita S. Th. 1. p. q. 4. a. 2.

Probatur 1. ex Scriptura, Exod. 3. ubi Deus Moyfi ejus conspectum desideranti dicit, *Ostendam tibi omne bonum*. Psal. 49. *Pulchritudo agri mecum est*. Prov. 8. *Mecum sunt divitiæ, & gloria, & opes*.

Probatur 2. ex S. Dionys. l. de Div. Nom. c. 5. *Cuncta continet Deus secundum superextensam simplicem infinitatem suam*. Et S. August. l. 4. de Trin. c. 1. *Unum est Dei Verbum, per quod facta sunt omnia, quod est incommutabilis veritas, ubi principaliter, & incommutabiliter sunt omnia simul, non solum quæ nunc sunt in hac universa creatura, verum etiam quæ fuerunt, & quæ futura sunt, ubi nec fuerunt, nec futura sunt, sed tantummodo sunt, & omnia vita sunt, & omnia unum sunt*.

Probatur 3. hac ratione, qua utitur S. Th. loc. cit. Quidquid perfectionis est in effectu, oportet inveniri in causa effectiva. Quidquid enim habet effectus, illud habet a sua causa efficiente, & nemo dat, quod non habet. Cur ergo Deus sit prima causa effectiva rerum omnium, oportet, omnium rerum perfectiones in illo præexistere.

2. Dicendum 2. rerum creatarum perfectiones, licet omnes in Deo sint, non uno tamen, eodemque modo esse, sed quasdam esse in ipso formaliter, alias vero solum eminenter.

Quod ut melius intelligatur, notandum est, perfectiones, quæ in rebus creatis reperiuntur, duplicis esse generis.

Quædam enim (ut observat S. Anselm. in Monol. c. 14. & ex eo Theologi) dicuntur perfectiones simpliciter simplices, quæ scilicet tales sunt, ut nullam secum imperfectionem habeant adjunctam, nec cum ulla alia perfectione majori, vel æquali sint in eodem ente incompatibiles, quales sunt sapientia, justitia, &c. Et hæ perfectiones sunt formaliter in Deo.

Aliæ vero dicuntur perfectiones secundum quid, quæ, licet sint quædam entis perfectiones, aliquam tamen imperfectionem habent sibi admixtam, vel repugnantiam, & incompatibilitatem in eodem ente cum alia majori, vel æquali perfectione, ut sunt qualitates, & perfectiones rerum corporearum. Hæ autem perfectiones, cum vere in Deo sint, ut supra probatum est, & formaliter, hoc est secundum

dum propriam rationem, in eo esse non possint, ut per se patet; sequitur, ut sint eminenter, hoc est, modo quodam infinite meliori, & excellentiori, quam sint in ipsis creaturis.

Quamvis vero totius entis creati perfectio in Deo sit alterutro ex his duobus modis; non tamen propterea creatura quælibet potest dici Deus. Ipsa enim semper in se remanet infinite a Deo distans, ac proinde omnino distincta. Quod hic observamus contra quoddam Vvicleffi delirium, qui, ut notat Thomas Valdensis l. 1. doct. Fid. c. 1. assererat, propter illud esse, quod habent creaturæ in Deo, quamlibet creaturam esse, & posse dici Deum. Quod ipse ibidem refellit, tanquam non solum a veritate nostræ Fidei, sed etiam a ratione naturali prorsus alienum.

Hinc etiam similiter refellitur Servetus, qui eo usque insaniam progressus est, ut in Ep. 6. ad Calvin. diceret, Deum in lapide vere, & proprie esse lapidem, in trunco truncum, & sic in aliis, oblitus nimirum, *Quanto his Dominator eorum speciosior est*. Sap. 13.

## S E C T I O IV.

*An Deus sit immutabilis.*

1. **C**atholica Fide tenendum est, Deum esse omnino immutabilem, id est omnis mutationis omnino expertem.

Probatur 1. ex Scriptura. Num. 23. *Non est Deus, sicut filius hominis, ut mutetur*. Malach. 3. *Ego Dominus, & non mutor*. S. Jac. 1. *Apud quem non est transmutatio, nec vicissitudinis obumbratio*.

Probatur 2. ex S. Aug. in illa verba Psal. 89. *A sæculo, & usque in sæculum tu es Deus*, ubi sic loquitur: *Non dicit Propheta, a sæculo tu fuisti, & usque in sæculum tu eris, sed præsentis significationis verbum posuit, insinuans Dei substantiam omni modo incommutabilem, ubi non est (Fuit, aut Erit) sed tantummodo (Est)*. Ad quæ verba apposite S. Bernardus ser. 31. in Cant. *Tolle (Fuit, & Erit, ) unde jam transmutatio, aut vicissitudinis obumbratio?*

Probatur 3. ratione, quia (ut ait August.) omnis mutatio aut in pejus, aut in melius; atqui Deus neque in pejus, neque in melius mutari potest; ergo omnino mutari non potest.

2. Objicies, multa reperiri in Scripturis, quæ mutationem aliquam in Deo significare videntur. Gen. 6. dicit Deus: *Pœnitet me fecisse hominem*. Jerem. 18. *Si pœnitentiam egerit gens illa a malo suo, & ego pœnitentiam super malo, quod cogitavi*.

Respondetur, omnes istas, & similes locutiones debere accipi figurate, & metaphorice, in hisque Deum se nostro imperfecto concipiendi modo accommodare, ut significet, ita se exterius gerere, ac si vere sententiam mutaret, cum tamen revera in se immutabilis perseveret, ac semper eodem modo se habeat. Et hæc facilius intelli-



telligi poterunt, fientque evidentiora ex iis, quæ dicentur; cum de operationibus ad intellectum, & voluntatem Dei pertinentibus agetur.

## S E C T I O V.

*An Deus sit æternus.*

**Æ**ternitas communiter a Theologis definitur, interminabilis vitæ tota simul, & perfecta possessio: quæ definitio desumitur ex Boetio lib. 5. de consol. Prof. 6. & ante Boetium hanc attigit S. August. in Ps. 101. ubi dicit, quod in æternitate nihil est præteritum, quasi jam non sit, nihil futurum, quasi nondum sit, sed non est ibi, nisi (Est) Et l. 11. Conf. c. 11. Quis tenebit illud, (cor scilicet hominis) & affiget illud, ut paululum stet, & paululum rapiat splendorem semper stantis æternitatis, & videat esse incomparabilem: & videat, longum tempus nonnisi ex multis prætereuntibus motibus, qui simul extendi non possunt, longum fieri, non tamen præterire quidquam in æterno, sed totum esse præsens?

Ex quibus colligitur differentia duplex inter æternitatem, & tempus. Prima, quod tempus principio, & fine clauditur, æternitas vero nec principium, nec finem habet. Secunda, quod tempus est in perpetuo fluxu, æternitas autem tota simul est, nec ullam patitur successionem. Hoc breviter prænotato, ad quæstionem propositam

Dicendum est, Deum esse æternum, æternitatemque solius Dei esse propriam. Ita S. Thom. 1. p. q. 20. a. 2. & 3.

Hæc veritas, quæ de Fide est, constat 1. ex Scripturis. Deuter. 32. *Vivo ego in æternum, dicit Dominus.* Dan. 6. *Ipse est Deus vivens æternus in sæcula.* 1. Tim. 6. *Solus habet immortalitatem.*

Constat 2. ex Conc. Lateran. sub. Innoc. III. c. 1. ubi statuitur, firma Fide credendum esse, quod solus Deus sit æternus.

Eadem veritas a SS. Patribus asseritur, inter quos Isidorus Pelusiota l. 2. ep. 149. hanc optime explicat his verbis: *Æternitas velut sempiterna vitalitas est. Ideo, de sola ea natura, quæ initii est experta, & eodem modo se habet, usurpari consuevit. Etenim Immortale de eo quoque, quod cum ortum habuerit, minime tamen morietur, hoc est, Angelo, & anima, pronunciari potest: atque item Incorruptibile de iis, quæ facta sunt, sed corruptione sunt omni potiora. At Æternum proprie Divinæ soli Essentiæ convenit.*

Ex dictis colligitur, non tantum Deum esse æternum, æternitatemque illius solius esse propriam, sed etiam omnia illi in æternitate sua esse præsentia. Quod melius explicare non possumus, quam verbis Petri Damiani Opusc. 36. c. 8. ubi sic loquitur: *Omnipotenti itaque Deo non est beri, vel cras, sed hodie sempiternum, cui nihil defuit, nihil accidit, cui nihil est varium, nihil a se diversum. Illud hodie æternitas est incommutabilis, indefectiva, inaccessibilis, cui videlicet nihil*

*Est addi, nihil valet imminui. Et omnia, quæ apud nos elabendo discurrunt, aut per temporum vicissitudines se variant, apud illud hodie stant, & immobiliter perseverant. In illo scilicet hodie dies ille adhuc immobilis est, in quo mundus iste sumpsit originem: in illo etiam ille nibilo minus est, quo judicaturus est per æterni iudicii æquitatem.*

## S E C T I O VI.

*An, & qua ratione Deus sit ubique præsens.*

1. **C**Um duo sint, quæ rem quamlibet existentem necessario consequantur, scilicet duratio, & locus, & quidquid est, aliquando, & alicubi esse oporteat, illudque nihil esse dicatur, quod nunquam, & nusquam existit: ideo post considerationem æternitatis, quam ad instar durationis in Deo concipimus, agendum est de perfectione illa, per quam ipse rebus creatis præsens esse concipitur, quæ quidam a Theologis immensitas vocatur.

Dicendum est igitur, Deum per illam suam immensitatem ubique realiter præsentem esse. Est de Fide.

Et probatur 1. ex Scripturis. Jerem. 23. *Cælum, & terram ego impleo.* Ps. 138. *Si ascendero in Cælum, tu illic es, si descendero in Infernum, ades.* Act. 17. *Non longe est ab unoquoque nostrum; in ipso enim vivimus, movemur, & sumus.*

Probatur 2. ex S. Athan. in Symb. *Immensus Pater, immensus Filius, immensus Spiritus Sanctus,* & S. Augustino lib. 5. de Trinit. c. 1. *Deus ubique est, sine ullo situ præsens, sine habitu omnia continens; sine loco ubique totus.*

Probatur 3. quia si Deus realiter ubique non esset, sed ab aliquibus locis abesset (ut quidam Hæretici dixerunt) sequeretur, eum non esse in omni genere perfectionis infinitum. Deesset enim illi præsentia in aliquo loco, quæ est quædam perfectio. Sequeretur præterea, eum moveri posse de loco in locum, quod est absurdum, & ejus immutabilitati repugnans.

2. Jam quod spectat ad modum, quo Deus ubique esse concipitur, cum res creatæ duobus tantum modis dici possint esse alicubi, vel circumscriptive, cum scilicet totum toti loco, & partes totius loci partibus respondent; vel definitive, cum totum in toto loco est, & totum in qualibet parte loci; sicut in corpore hominis inest anima; Deus neutro ex his duobus modis dici potest rebus creatis esse præsens.

Non circumscriptive, cum non constet partibus, quæ dividi, aut extendi possint. Unde S. August. Epist. 57. ad Dardanum, *In ipso, inquit, quod dicitur Deus ubique diffusus, carnali resistendum est cogitationi, ac mens a corporis sensibus avocanda, ne quasi spatiose magnitudine opinemur Deum per cuncta diffundi.*

Nec

Nec etiam definitive, cum ejus præsentia nullo definiatur loco, ita ut dicendum potius sit (ut notat Boetius lib. de Trinit.) quod Deo locus omnis sit præsens, quam quod Deus sit in ullo loco.

Cum igitur neutro ex his duobus modis Deus præsens sit, & tamen vere, ac realiter ubique sit, restat, ut alio quodam longe perfectiori modo, licet inexplicabili, illum ubique esse concipiamus.

De illo autem Divinae immensitatis inexplicabili modo varie loquuntur SS. Patres. S. Gregor. l. 16. Moral. c. 5. dicit, quod *incircumscriptus Dei Spiritus omnia intra semetipsum habet; quæ tamen & implendo circumdat, & circumdando implet, & sustinendo transcendit, & transcendendo sustinet*. S. Joann. Damasc. l. 1. de Fide c. 8. vocat Divinitatem, *Implentem omnia, & a nullo comprehensam, sed potius amplectentem omnia, & continentem, & supraeminentem, & sine ulla iniquatione substantiis omnibus insistentem, & ultra omnia*. Petrus Damianus Opusc. 36. *Ipse Deus, inquit, manet super omnia, ipse intra omnia, ipse infra omnia, ipse extra omnia, superior per potentiam, inferior per sustentationem, interior per subtilitatem, exterior per magnitudinem*.

Quærunt hic aliqui, an Deus sit extra hujus mundi ambitum in spatiis imaginariis, quæ illic esse concipiuntur.

Respondetur breviter, Deum non esse in illis spatiis, tanquam in locis realibus, cum ibi nulla sit substantia, nullum accidens, sed merum inane, nec etiam hujus mundi terminis ejus immensitatem definiri. Ac proinde concipere debemus, Deum extra mundum eodem modo esse, quo fuit, antequam ipsum e nihilo crearet mundum. *Ubi erat Deus* (inquit S. Bernardus l. 5. de confid. c. 6.) *antequam Mundus fieret? ubi nunc est. Non est, quod quæras ultra, ubi erat; præter ipsum nihil erat, ergo in seipso erat*.

## S E C T I O VII.

*An Deus sit in omni genere perfectionis infinitus.*

1. **Q**Uoniam Divinarum perfectionum nec numerus, nec finis est, omnia, quæ de illis dici possunt, uno verbo concludemus, si dixerimus, Deum esse in omni genere entis, & perfectionis infinitum.

Est de Fide, & ut sic definitum est in Concilio Lateranensi sub Innocentio III. cap. I.

Præterea probari potest ex Scripturis. Psal. 144. *Magnus Dominus, & laudabilis nimis, & magnitudinis ejus non est finis*. Baruc. 3. *Magnus est, & non habet finem, excelsus, & immensus*.

Probatur 3. ex S. Dionysio lib. de Div. Nom. cap. 6. *Magnus est Deus, supra omnem magnitudinem, & omnem transiliens infinitatem*. Et S. Damasceno l. 1. de Fide cap. 4. *Deus infinitus est, & incomprehen-*



*prehensibilis, & hoc unum potest de illo comprehendere, quod sit incomprehensibilis, & infinitus.*

Illud præterea constat ex eo, quod Deus omnes, & quascumque perfectiones habet a se, & independenter a quovis alio, unde sequitur, quod nullam in illis limitationem habeat, cum limitatio effectuum a voluntate, aut impotentia causarum, a quibus procedunt, oriatur.

Confirmari etiam potest ex eo, quod, cum Deus sit essentialiter ens primum non modo in essendo, sed etiam in causando; hinc sequitur, debere in illo contineri omnes, & quascumque perfectiones, illarumque omnes, & quoscumque gradus, qui in infinitum multiplicari possunt.

## C A P U T III.

*De Scientia Dei.*

## S E C T I O I.

*An sit in Deo Scientia, & qualis illa sit.*

1. **N**omine Scientiæ hic non intelligimus illam, quæ vulgo a Philosophis definitur cognitio rei per causas, sed in genere perfectam, certam, & claram cognitionem cujuslibet veritatis, seu cujuslibet rei cognoscibilis. Et eo sensu de Fide est, in Deo esse Scientiam.

Hoc manifeste pluribus in locis Scriptura testatur. Esther 14. *Domine, qui habes omnem scientiam.* Ad Rom. 11. *O altitudo divitiarum sapientiæ, & scientiæ Dei!*

Non hic opus plura Scripturæ, vel Sanctorum Patrum proferre testimonia, in asserenda tam clara, & perspicua veritate, cum nulli dubium sit, quin Deus maxima, & perfectissima intelligentia, & scientia præditus sit.

Restat igitur videndum, qualis sit illa Dei Scientia. Quod ut a nobis utcumque intelligatur, observandum est, Scientiam illam Divinam ab humana longe diversam esse. Unde per Isaiam c. 55. dixit Deus, *Non sunt cogitationes meæ cogitationes vestræ, &c.* Et S. Augustinus l. 2. ad Simplicianum, c. 2. *Cum dēmpsero, inquit, ab humana scientia mutabilitatem, & transitus quosdam a cognitione in cognitionem, &c. Cum hæc cuncta detraxero, & reliquero solam vivacitatem certæ, atque inconcussæ veritatis, una atque æterna contemplatione cuncta collustrantis, imo non reliquero (non enim hoc habet humana scientia) sed pro viribus cogitavero: insinuatur mihi utcumque Scientia Dei.*

2. Cum autem in humana scientia tres præsertim defectus reperiuntur. 1. quod sit accidentalis. 2. quod ab objecto suo pendeat, & a rebus ipsis hauriatur. 3. quod varia sit, & multiplex, cum multis rationibus, demonstrationibus & argumentis constet, ac præ-

præterea pro varietate objectorum cognitorum etiam inter se varietur; dicendum est nullum horum defectuum in Scientia Dei reperiri, imo perfectiones oppositas illi inesse.

Primo enim Scientia Dei non est accidentalis, sed est ipsa Dei substantia. Cum enim (ut ex antedictis constat) nulla in Deo compositio esse possit, nihilque in eo sit, nisi simplicissima, & perfectissima substantia, & aliunde certum sit, in illo scientiam, & intelligentiam reperiri; inde sequitur scientiam, & intelligentiam Dei non esse aliud, quam ipsam Dei substantiam. Unde Synesius lib. de insomniis, Deo, inquit, *sola ad cognoscendum natura satis est.*

Secundo Scientia Dei non hauritur a rebus, quas cognoscit, sed ipse Deus omnia in sese, & in natura sua cognoscit. Unde S. Ambros. tr. in Symbolum cap. 1. *Licet, inquit, omnia cœlestia, & terrestria, ac minima quæque perspiciat Deus, nihil tamen extra se intelligere, sed singula in se intueri dicitur.* Et S. Dionysius, lib. de Divinis Nom. c. 7. *Non ex iis, quæ sunt, inquit, ea, quæ sunt, addiscens novit Divina Mens, sed seipsa, & in seipsa secundum eam scientiam, quæ omnium causa, &c. non secundum exemplar intenta singulis, sed secundum unicam causæ præstantiam omnia cognoscens.* Unde S. Thom. 1. p. q. 14. art. 6. ex eo, quod Deus perfecte comprehendit suam Essentiam, tanquam primam, & necessariam omnium rerum creatarum causam, concludit, Deum in ea sic cognita cognoscere omnes creaturas, cum ad perfectam comprehensionem alicujus causæ requiratur, ut in ea sic cognita omnes ejus effectus cognoscantur.

Tertio denique Scientia Dei non est multiplex, nec varia, aut mutabilis, sed una, & simplicissima, Deusque unico, & simplicissimo intuitu omnia ab æterno cognoscit, & eodem semper, ac invariabili modo cognoscit. Cum enim scientia Dei (ut dictum est) sit ejus substantia, & illa sit unica, & simplicissima, ac in se omnino immutabilis; sequitur, ut & de scientia ejus idem omnino dici debeat. Unde S. Aug. l. 11. de Civ. c. 10. explicans, quo sensu in Scriptura Spiritus Divinæ intelligentiæ dicatur multiplex, *Cæterum, inquit, dictus est in Scripturis sanctis Spiritus Sapientiæ multiplex, eo quod multa in se habeat. Sed quæ habet, hæc & est, & ea omnia unus est. Neque enim multa, sed una sapientiæ est, in qua immensi quidem sunt, atque infiniti rerum intelligibilium thesauri.* Et Petrus Damianus Opusc. 36. c. 7. Deo, inquit, *nec novum aliquid ab eo per temporis momenta recedit. Sed nec diversis obtutibus diversa considerat, ut cum intendit præteritis, uscet a præsentibus, vel futuris, vel rursus cum præsentia, sive futura considerat, oculos a præteritis avertat; sed uno duntaxat, ac simplici præsentissimæ majestatis intuitu simul omnia comprebendit, neque hoc confuse, atque inexplicite, sed omnia discernit, ac juxta proprietatem suam quæque distinguit.*

## S E C T I O I I.

*Quodnam sit objectum Scientiæ Divinæ, seu quasnam res  
Deus cognoscat.*

1. **C**ertum est 1. Deum se per suam Essentiam perfectissime intel-  
ligere, & cognoscere.

*Quæ sunt Dei* ( inquit Apost. 1. Cor. 2. ) *nemo novit, nisi Spiritus Dei, qui in ipso est.* Et certe, si Deus aliquid intelligit, & cognoscit, ut certissimum est; nullum excellentius, nec dignius habere potest objectum intelligentiæ, ac cognitionis suæ, quam seipsum, ut per se patet.

Certum est 2. Deum se non solum perfectissime intelligere, sed etiam comprehendere.

Id patet ex citato Apostoli loco, ubi dicitur, quod *Spiritus Dei scrutatur omnia etiam profunda Dei.* Id etiam probat S. Th. 1. p. q. 14. a. 3. ex eo, quod Deus tam perfecte cognoscit seipsum, quam est in se cognoscibilis; quia tanta est virtus Dei in cognoscendo, quanta est ejus actualitas in existendo. Unde sequitur, quod se comprehendit. Rem enim aliquam comprehendere nihil est aliud, quam illam tam perfecte cognoscere, quam est cognoscibilis.

2. Certum est 3. Deum cognoscere omnes alias res a se distinctas, non tantum universim, & in genere, sed etiam singillatim, & in particulari.

Hoc evidenter constat ex Scriptura. Job 28. *Ipsæ fines mundi in-  
tuetur, & omnia, quæ sub cælo sunt respicit.* Psal. 49. *Meæ sunt  
omnes fere sylvæ, jumenta in montibus, & boves; cognovi omnia  
volatilia cæli.* Præsertim vero testantur Scripturæ, Deum distincte  
cognoscere actiones, verba, & cogitationes uniuscujusque hominum.  
Pl. 138. *Domine, probasti me, & cognovisti me, &c. Intellexisti co-  
gitationes meas de longe.* Job 31. *Nonne ipse considerat vias meas, &  
cunctos gressus meos dinumerat?* Hebr. 4. *Pertingens usque ad divisi-  
onem animæ, & Spiritus, &c. Et non est ulla creatura invisibilis in  
conspectu ejus, &c.*

Prob. insuper eadem veritas ex eo, quod nihil est omnino in rebus  
creatis, ad cujus productionem, & conservationem Deus, ut causa  
prima, concurrere non debeat. Unde sequitur, nihil esse omnino,  
quod Deus perfecte non cognoscat. Ut enim ait S. Aug. l. 5. de Gen.  
ad lit. c. 15. *Sufficere debet, ut quisque noverit, vel inconcussè credat,  
quod Deus hæc omnia fecerit. Non enim opinor, eum esse tam excordem,  
ut Deum, quæ non noverat, fecisse arbitretur.*

Et quamvis ea ratio non probet, Deum cognoscere peccata, cum  
sint privationes potius, quam entia, nec ad ea, ut formaliter peccata  
sunt, Deus ullo modo concurrat, constat tamen ex variis Scripturæ  
locis, illa distincte a Deo cognosci, quocunque tandem modo illa



cognoscat. Ps. 68. *Delicta mea a te non sunt abscondita*. Et Psal. 50. *Malum coram te feci*. Ps. 138. *Imperfectum meum viderunt oculi tui*.

3. Certum est 4. Deum res omnes cognoscere, non tantum, cum sunt actu existentes, sed etiam antequam existant: Daniel. 13. *Deus æterne, qui nosti omnia, antequam fiant*. Eccli. 42. *Deus novit omnem scientiam, annuntians quæ præterierunt; & quæ super ventura sunt*. Unde S. August. optime dixit lib. 5. de Civ. cap. 9. *Confiteri esse Deum, & negare præscium futurorum, apertissima insania est*.

Certum est 5. cognitionem Dei extendere se ad illas etiam res, quæ nunquam existent, & quæ sunt pure possibiles.

Cum enim se perfecte comprehendat, ut dictum est, nec possit causa aliqua perfecte comprehendi, quin cognoscantur effectus omnes ab illa producibiles, hinc sequitur Deum cognoscere omnia, quæ ab omnipotentia sua, tanquam a causa effectrice, dimanare possunt. Unde dicitur Rom. 8. *quod vocat ea, quæ non sunt, tanquam ea, quæ sunt*.

Cum igitur hæc certa sint, & indubitata Fide tenenda, duo sunt, quæ aliquam difficultatem pariunt. Primum est, quomodo Deus cognoscat futura contingentia: Secundum, an etiam cognoscat futura conditionata. Et de his in sequentibus Sectionibus agetur.

### S E C T I O III.

#### *Quomodo Deus cognoscat futura contingentia.*

1. **Q**uæstio præsertim intelligenda est de actionibus liberis creaturarum rationabilium, quæ ideo dicuntur futuræ contingentes, quod non pendeant a causis necessariis, sed liberis, & indeterminatis, & pro illarum libito possint esse, vel non esse.

Hujus autem quæstionis difficultas in duobus consistit. Primum est, quomodo infallibilitas, & certitudo Divinæ cognitionis cum illarum rerum contingentia subsistere valeat: Secundum, quomodo libertas, & indifferentia creaturarum rationabilium, a quibus pendent ejusmodi effectus contingentes, cum infallibilitate, & certitudine Divinæ præscientiæ possit concordari. Pro quorum resolutione

Dicendum 1. Deum cognoscere omnia futura contingentia libera. Hæc veritas de Fide est.

Et plurimis Scripturæ testimoniis probari potest; ut ex iis, in quibus Christus Dominus dicitur præscivisse, & prædixisse multa, quæ futura erant, & quæ tamen a causis liberis, & indeterminatis pendeant, qualis est trina Petri negatio, Judæ proditio, &c. item ex iis, in quibus res ejusmodi futuræ contingentes a Prophetis divinitus inspiratis prædictæ referuntur. Ut enim recte dixit Tertull. lib. 2. contra Marcionem, cap. 5. *Divina præscientia tot habet testes, quot fecit Prophetas*.

Dicendum 2. cognitionem illam, quam Deus habet de futuris con-

tin-

tingentibus liberis, esse certissimam, & omnino infallibilem.

Hoc probari potest 1. ex illis omnibus Scripturæ locis, in quibus veritas, tanquam perfectio quædam essentialis, Deo tribuitur, in eo & ipse veritas appellatur. Hæc enim Divina perfectio talis est, ut prorsus impossibile sit, Deum vel falli posse in cognoscendo, vel fallere in dicendo. Unde sequitur, omnem cognitionem, quam habet de quocunque objecto cognoscibili, esse verissimam, certissimam, & omnimode infallibilem.

Probari 2. potest ex eo, quod (ut superius dictum est) Sancti Patres communiter docent, Deo futura omnia esse ab æterno præsentia, ac proinde illum æque certo ea cognoscere, licet futura, & contingentia, atque cognoscit ea, quæ actu existunt. Unde S. Greg. l. 20. Moral. c. 23. *Ante Dei oculos, inquit, præterita nulla sunt, præsentia non transeunt, futura non veniunt, quippe quia omne, quod nobis fuit, & erit, in Dei prospectu præsto est.* Et S. August. l. 15. de Trin. c. 7. *Quis hominum, inquit, potest istam capere sapientiam, qua Deus novit omnia, ita ut nec ea, quæ dicuntur futura, quasi desint, expectentur, ut veniant, sed & præterita, & futura cum præsentibus sint cuncta præsentia?*

3. Dicendum 3. præscientiam illam futurorum contingentium liberorum nullo modo libertati humanæ repugnare.

Huic veritati, quæ de Fide est, oppositus est error Vvicleffi qui dicebat, quæ a Deo præscita sunt, ex absoluta necessitate evenire.

Refellitur hic error (qui cum plurimis aliis in Concil. Constantiensi sess. 8. damnatus est) & veritas assertionis nostræ probatur 1. ex eo, quod in Scripturis ex una habetur, Deum præscire certissime omnia, quæ libere ab hominibus fiunt, antequam fiant, ut ex antedictis constat: ex altera vero etiam habetur, ea, quæ ab hominibus fiunt, ab eorum libera electione pendere, esse in eorum libera potestate, & ab illis ita libere fieri, ut possint, si velint, ea non facere. Quod ex plurimis Scripturæ locis probari potest, ut Gen. 4. ubi Deus sic alloquitur, & admonet Cain, cum fratris sui cædem meditaretur: *Nonne si bene egeris, mercedem recipies, sin autem male, statim in foribus peccatum tuum aderit? sed sub te erit appetitus tuus, & tu dominaberis illius.* Et Eccl. 15. dicitur, quod Deus reliquit hominem in manu consilii sui, &c. *Ante hominem vita, & mors, bonum, & malum: quod placuerit ei, dabitur illi.* 1. Cor. 7. *Nam qui statuit in corde suo firmus, non habens necessitatem, potestatem autem habens suæ voluntatis, &c.*

Probatur 2. ex S. Hieron. in cap. 26. Jerem. ubi explicans hæc verba Prophetæ, *Noli subtrahere verbum, si forte audiant, sic loquitur. Nostro Dominus loquitur affectu, ut liberum homini servetur arbitrium, nec ex præscientia ejus, quasi ex necessitate, vel facere quid, vel non facere cogatur. Non enim ex eo, quod Deus scit futurum ali-*

quid, ideo futurum est, sed quia futurum est, Deus novit, quasi præscius futurorum. Et S. August. l. 5. de Civ. c. 10. Quocirca nullo modo cogimur aut retenta præscientia Dei tollere voluntatis arbitrium, aut retento voluntatis arbitrio, Deum (quod nefas est) negare præscium futurorum, sed utrumque amplectimur, utrumque fideliter, & veraciter confitemur. Et lib. 3. de lib. arb. c. 4. Sicut, inquit, tu memoria tua non cogis facta esse, quæ præterierunt, sic Deus præsentia sua non cogit facienda, quæ futura sunt.

Probatur 3. ratione, qua utitur S. Aug. lib. cit. cap. 3. quæ sic proponi potest. Futura contingentia illa eodem modo reipsa futura sunt, quo a Deo per præscientiam futura cognoscuntur; atqui cognoscuntur futura libere; neque enim præscientia Dei destruit voluntatis nostræ naturam, quæ (ut ait S. ille Doct.) voluntas non esset, nisi esset in nostra potestate; ergo libere futura sunt. Non igitur, inquit ille, per Dei præscientiam mihi potestas adimitur, quæ præterea mihi certior aderit, quia ille, cujus præscientia non fallitur, adfuturam mihi esse præscivit.

Confirmatur ex eo, quod (ut ait S. Chrysost. hom. 60. in Matth. explicans illud: *Necesse est, ut veniant scandala*) non ideo futura eveniunt, quia Deus eventura præscivit, sed quia eventura erant, ideo illa præscivit.

4. Neque dicas, hinc sequi cognitionem Dei suam ab objecto certitudinem accipere. Hæc enim cognitionis Divinæ certitudo non ab objecto, sed ab infinita vi, & perfectione intellectus Divini derivatur, quamvis veritas objecti ab illo cogniti sit conditio, sine qua ab illa non cognosceretur.

Objicies. Quidquid Deus præscivit faciendum, illud necessario fiet, alias præscientia Dei certa non esset: atqui præscivit Deus, v. g. Antichristum peccaturum, ergo necessario peccabit Antichristus.

Ad hujus objectionis solutionem duplex distinguenda est necessitas. Alia enim est antecedens, alia consequens. Antecedens est illa, quæ oritur ex causa antecedente, & necessario operante. Posita enim tali causa, necessario sequitur effectus. Consequens vero necessitas est illa, quæ oritur ex sola positione effectus, etsi a causa libera proveniat.

Hoc posito, ad majorem objectionis declarationem respondetur cum distinctione. Cum enim in ea dicitur, illud, quod Deus præscivit faciendum a causa libera, fieri necessario debere; si de necessitate antecedente sermo sit, negatur, si de consequente, conceditur. Verum hæc necessitas (ut per se patet) nullo modo libertati præjudicat, cum ideo tantum aliquid faciendum necessario dicatur, quia revera fiet, licet libere fiat, sicut de eo, quod jam factum est, potest dici, quod necessario factum est, hoc est, quod fieri non potest, quin factum sit, quamvis libere factum sit.

S E-



## S E C T I O I V.

*An Deus cognoscat futura conditionata.*

1. **I**lla dicuntur conditionata, quæ reipsa nunquam existent, sed tamen libere existerent, idest ab aliqua causa libera fierent, si certa aliqua conditio poneretur. Et, de talibus quæritur, an Deus futura illa conditionata cognoscat.

Ut autem ea, quæ dicenda sunt, clarius intelligantur, supponendum est, quod licet scientia Dei sit in se simplicissima, & maxime una; nihilominus secundum diversam habitudinem, quam concipimus habere ad sua objecta, communiter a Theologis dividi solet in eam, quæ dicitur scientia simplicis intelligentiæ, & eam, quæ scientia visionis appellatur.

Scientia visionis dicitur ea, qua Deus cognoscit res, quæ in aliqua differentia temporis existentiam habent, vel habuerunt, aut habituræ sunt.

Scientia vero simplicis intelligentiæ est, qua cognoscit res omnes, quoquo modo esse possint, sive reipsa aliquando futuræ sint, sive non.

Hæc utraque scientia aliis nominibus aliquando appellatur. Scientia enim simplicis intelligentiæ dicitur scientia necessaria, quia fieri non potest, quin creaturæ omnes respectu Divinæ omnipotentiae sint possibiles, proinde necessarium est, illas a Deo ut tales cognosci. Scientia vero visionis vocatur scientia libera, eo quod supponit in Deo decretum liberum producendi creaturas, & ad illarum existentiam, & operationes concurrendi.

2. Præter hanc duplicem scientiam Dei, alteram adhuc Theologi plerique assignant, quam vocant mediam, qua Deus cognoscit res illas contingentes, & liberas, quæ quidem nunquam futuræ sunt; sed tamen, si certa aliqua conditio poneretur, essent futuræ. Et de hoc quidem tertio genere scientiæ maxima est inter Theologos controversia, aliis pro parte affirmativa magno ardore certantibus, aliis non minori conatu eam oppugnantibus. Nos hic, prout propositum nobis est, & ratio compendii postulat, ea tantum proponemus, quæ tanquam certa, & indubitata tenenda sunt, reliquis omnibus, quæ inter Theologos controvertuntur, cujusque judicio, & arbitrio permissis.

Dicendum est igitur, Deum certo, & infallibiliter cognoscere omnia illa futura contingentia conditionata, seu (quod idem est) Deum ab æterno prævidisse, quid Angeli, vel homines libere facturi essent, si in tali, vel in tali rerum ordine, cum his, aut illis circumstantiis, collocarentur.

Prob. 1. ex auctoritate Scripturæ, quæ variis in locis testatur, Deum prædixisse res quasdam eventuras esse, si aliqua conditio poneretur,

tur, quæ tamen cum posita non fuerit, res illæ non evenerunt. Unde sequitur, Deum certo, & infallibiliter cognovisse ejusmodi res, quæ non extiterunt, vere futuras fuisse, si talis conditio posita fuisset. Ita habetur in lib. 1. Reg. cap. 23. ubi duo futura conditionata fuerunt divinitus Davidi revelata, nempe quod, si maneret in urbe Ceila Saul Rex descensurus esset ad obsidendam Urbem, & quod, si Saul Urbem illam obsideret, incolæ illius tradituri essent ipsum Davidem in manus Saulis. Quorum tamen neutrum evenit, quia conditio defuit. David enim ibi non remansit, sed accepto Divino illo Oraculo inde sine mora discessit. Idem patet ex S. Matth. c. 11. ubi Christus testatur, Tyrios, & Sidonios poenitentiam fuisse acturos, si apud eos ea miracula edidisset, quæ in Judæa patraverat.

Probatur 2. ex S. Aug. lib. de corrept. & gratia, c. 8. ubi ex his verbis Sap. 4. *Placens Deo factus est dilectus; & vivens inter peccatores translatus est, raptus est, ne malitia mutaret intellectum ejus*, &c. colligit prædestinatos singulari Dei beneficio ex hac vita morte immatura subtrahi, quos, si diutius viverent, in peccatum lapsuros, & exinde gratia, & salute privandos fore præscivit. Unde sequitur, Deo notum fuisse id, quod revera non contigit, contigisset autem certissime, si vita illorum longius producta fuisset. S. item Gregorius Nissenus in orat. de infantibus qui præmatura morte rapiuntur, sic loquitur. *Consentaneum est, ab illo, qui peræque futurum novit, ac præteritum, prohiberi parvuli progressionem ad perfectam ætatem, ne malum illud, quod præsciens illa vis, & facultas cognoverit, in eo, qui victurus esset, ita perficiatur, eique materia nequitie vita fiat.*

Probat 3. ratione. Nam scientia Dei non esset undequaque perfecta, nisi omne verum attingeret; at non attingeret omne verum, nisi futura conditionata cognosceret; cum hæc non minus vera sint, quam quæ absolute futura sunt, imo prius secundum rationem futurum contingens sit verum conditionate, quam absolute. Nam si verum est, quod Petrus positus in talibus circumstantiis peccat, certe, antequam in his positus esset verum erat, quod si in iis poneretur, peccaret.

3. Quod autem spectat ad id, quod aliqui Theologi dicunt, nihil esse futurum sive absolute sive sub conditione, nisi dependenter a decreto aliquo ipsius Dei, quo efficaciter vult prædeterminare creaturam quamcunque etiam liberam, ad agendum, & per quod proinde cognoscit futura sub conditione, atque ita hanc cognitionem non spectare ad scientiam illam conditionatam, seu mediam, sed potius ad scientiam liberam, certe magnam id recipere videtur difficultatem. Si enim hoc verum esset, sequeretur Deum fore causam peccati, v. g. in illa prædictione supra ex l. 1. Reg. relata, sensus illius esset, Deum efficaciter decrevisse, aut decreturum fuisse, ut Saul contra jus, fasque ad necem Davidem quæreret, & eo animo urbem, in quam confugerat, obsideret. Præterea exprobratio Christi supra relata contra Judæos per compa-

ra-

rationem Tyrriorum, & Sidoniorum cum ipsis, videretur parum rationi consentanea. Potuissent siquidem Judæi respondere, non mirum esse, quod Tyrii in occasione ibi declarata essent convertendi, quia vi decreti alicujus Divini auxilia quædam efficacia, & ineluctabilia erant accepturi, quibus ipsi carere debebant, & sine quibus poenitentiam agere non poterant. Quæ omnia, & plura alia similia, quæ hic in utramque partem dicenda forent ex iis, quæ in tractatu de Gratia explicanda sunt, planius intelligentur.

## S E C T I O V.

*An aliquæ rerum creaturarum Ideæ in Deo sint.*

1. **S**upponendum est nomen Ideæ nihil aliud significare, quam formam illam, seu speciem intelligibilem existentem in intellectu artificis, ad quam ille respiciens operatur. Unde & derivatur a verbo *εἰδέναι*, quod est videre, quia scilicet idea est veluti exemplar, quod artifex in agendo respicit, & intuetur, ut similem ei effectum exprimat. Hoc supposito,

Dicendum est 1. in Mente Divina esse ideas omnium creaturarum.

Probatur 1. ex Scriptura ad Hebr. 11. *Fide intelligimus aptata esse sæcula Verbo Dei, ut ex invisibilibus visibilia fierent*, hoc est, ut juxta invisibile exemplar, quod est in mente Dei, fierent hæc visibilia. Ita hunc locum explicat Hugo Card. & alii. S. Jo. c. 1. *Quod factum est, in ipso vita erat*, hoc est, ut explicat S. Aug. tract. 1. in S. Jo. quod factum est extra Deum, erat vivens in Deo, secundum rationem, & ideam ipsius in Divina Mente ab æterno existentem.

Probatur 2. ex eodem S. Aug. l. 12. de Civit. c. 20. ubi postquam dixit, in sapientia Divina esse invisibiles, atque incommutabiles rationes rerum, etiam visibilium, & mutabilium, quæ per illam factæ sunt, hanc affert dicti sui rationem, *Quoniam Deus non aliquid nesciens fecit, quod nec de qualibet homine artifice recte dici potest. Porro, si sciens fecit omnia, ea utique, quæ fecit, noverat, &c.*

2. Dicendum 2. ideas Divinas non esse aliquid distinctum ab Essentia Dei, sed esse ipsammet Essentiam Divinam, ut cognitam ab ipso Deo, tanquam eminenter in se rerum omnium perfectiones continentem, ac proinde tanquam id, ad cujus imitationem res omnes ab ipso produci possunt. Ita S. Thomas 1. par. q. 15. art. 2.

Ratio est, quia, cum ex antedictis constet, Essentiam Divinam esse simplicissimam, & nihilominus in ea rerum omnium perfectiones eminenter contineri, hinc sequitur, ideas non esse aliquid distinctum ab essentia Divina, illamque Essentiam posse optime, & perfectissime tenere rationem ideæ in Mente Divina ad productionem cujuslibet creaturæ quantuncunque perfectæ; cum in ea cujuslibet perfectionis exemplar absolutissimum reperiatur.



## S E C T I O I.

*An sit in Deo voluntas, & qualis.*

1. **D**icendum 1. in Deo vere, & proprie esse voluntatem. Hoc evidenter constat ex Scriptura, S. Matth. 6. *Fiat voluntas tua.* Rom. 9. *Voluntati ejus quis resistit?*

Dicendum 2. Voluntatem in Deo non esse, sicut in nobis, per modum potentiae, sed actum purissimum, & simplicissimum, seu ipsam actualem volitionem Divinam.

Hoc evidenter constat ex iis, quæ supra dicta sunt de simplicitate Dei, ubi probatum est, in Deo nullam dari posse compositionem, daretur autem, si voluntas in eo esset per modum potentiae.

Dicendum 3. voluntatem Dei, quamvis in se unica, & simplicissima sit, esse tamen virtute, & secundum nostrum concipiendi modum multiplicem secundum varios respectus ad creaturas, & diversa circa illas decreta.

Hinc est, quod aliquando Scriptura in plurali numero de voluntatibus Divinis loquatur, ut Ps. 102. *Notas fecit filiis Israel voluntates suas.* Eo sensu multiplex apud Doctores reperitur Divinæ voluntatis divisio.

Primo enim dividitur in voluntatem signi, & voluntatem beneplaciti. Voluntas beneplaciti est ea, qua Deus vult aliquid, quia ita placet ipsi. Voluntas vero signi est ipsius Divinæ voluntatis declaratio per aliqua signa externa, quæ communiter a Theologis quinque numerantur, scilicet præceptum, prohibitio, consilium, permissio, & operatio. Quando enim Deus aliquid jubet, signum est, quod velit illud fieri, & e contra, quando prohibet, quod nolit: simili modo, cum aliquod consilium dat, signum est, id quod consulitur, illi placere; quando vero aliquid permittit, signum est, nolle impedire, cum posset, si vellet: denique quando operatur, sive per se solum, sive cum causa secunda, signum est, velle id, quod ipse agit, alias si nollet, non ageret. Unde S. Anselmus dixit in libello de voluntate Dei, *Appellari Dei voluntatem, quidquid in nobis ipse misericorditer operatur.* Et S. Aug. in Ench. c. 9. *Nihil fit, quod Omnipotens non velit, vel sinendo ut fiat, vel faciendo.*

Secundo dividitur in voluntatem antecedentem, & consequentem, quæ divisio desumitur ex Sancto Damasceno lib. 2. de Fide c. 29. ubi per voluntatem antecedentem intelligit eam, qua Deus vult ex se aliquid, nulla ad id volendum ratione inductus ex parte creaturæ, & de hac voluntate intelligit illud dictum Ap. 1. Tim. 2. *Deus vult*

*vult omnes homines salvos fieri*: per consequentem vero intelligit eam voluntatem, qua Deus vult aliquid aliqua ratione ad id volendum inductus ex parte creaturæ. Et hac voluntate dicit Deum velle punire peccatores propter ipsorum peccata.

Tertio dividitur in voluntatem absolutam, & conditionatam. Voluntas absoluta est ea, quæ semper impletur, ideo vocatur etiam efficax. De ea intelligitur illud Esther 13. *Non est, qui possit tuæ resistere voluntati*. Conditionata vero est, quæ ad hoc ut impleatur, aliquam conditionem adjunctam habet: unde non semper est efficax, cum non semper ponatur ea conditio. Talis est ea voluntas v. g. qua Deus vult peccatores ad poenitentiam reverti, cum hac conditione tamen, si & ipsi Gratia suæ cooperari velint. Quo sensu dixit Christus Dominus Matth. 23. *Quoties volui congregare filios tuos, &c. & noluiisti*.

4. Dices, inde sequi, aliquam voluntatem otiosam, & imperfectam in Deo reperiri, hanc v. g. qua vult, omnes homines salvos fieri, cum hac conditione scilicet si & ipsi velint, & media convenientia ad salutem amplectantur. Illa enim voluntas respectu reproborum otiosa est, cum effectum suum nunquam habitura sit. Est etiam imperfecta, quia sic potius dicenda esset velleitas, quam voluntas: hæc autem velleitas dicit impotentiam, & defectum in voluntate.

Respondetur, voluntatem conditionatam, illam v. g. qua Deus vult, omnes homines salvos fieri, nec otiosam, nec imperfectam dici posse: non otiosam, cum ex ea sequatur præparatio mediorum, & auxiliorum, quæ dantur omnibus hominibus, ut salvi fiant, quod supponimus ex tractatu de Gratia: neque etiam imperfectam, cum non sit velleitas, sed vera voluntas. Non enim dicit Apostolus, quod Deus vellet, sed quod vult omnes homines salvos fieri. Et in eo vera esse ostenditur, quod per eam vere Deus movetur ad illorum mediorum, & auxiliorum præparationem.

## S E C T I O I I.

*Quenam sint objecta Divinae voluntatis.*

1. **N**on hic agimus de primario, & præcipuo Divinae voluntatis objecto, quod est ipse Deus. Certum est enim, naturaliter, & necessario Deum velle, & amare seipsum, cum sit sui ipsius summum bonum, nec ullam hæc veritas difficultatem recipit. Questio est igitur de objectis externis, & secundariis Divinae voluntatis. De quibus

Dicendum 1. Deum amare omnes creaturas, quæ existunt in aliqua differentia temporis.

Hoc manifeste constat ex Script. Sap. 11. *Diligis omnia, quæ sunt, & nihil odisti eorum, quæ fecisti*. Deinde, quia, sicut se habet intellectus Divinus ad verum, ita voluntas Divina ad bonum; sed Divinus intel-

intellectus fertur in omne verum, non solum increatum, sed etiam creatum, ut supra ostensum est, ergo & voluntas Divina in omne bonum, non tantum increatum, sed etiam creatum, quale est omne ens a Deo productum, juxta illud Gen. 1. *Vidit Deus cuncta, quæ fecerat, & erant valde bona.*

Dicendum 2. Deum velle, & amare omnes creaturas in ordine ad se propter seipsum.

Hæc veritas constat ex Script. Prov. 16. *Universa propter semetipsum operatus est Dominus.* Isa. 43. *Omnes, qui invocant nomen meum, in gloriam meam creavi eum.* Deinde ex eo, quod, cum Deus sit omnium rerum ultimus finis, hinc sequitur, res omnes naturaliter in illum referri, & ordinari debere; alioquin esset ordo inversus, & præposterus.

Quando autem dicitur, Deum creavisse omnia propter se, hoc intelligi non debet, quod Deus iis indigeat; vere enim Psaltes Regius Psal. 15. *Dixi Domino, Deus meus es tu, quoniam bonorum meorum non eges;* sed ut in iis sapientiæ, bonitatis, ac potentiæ suæ opes ostendat; gloriamque suam clariorem, & illustriorem reddat.

Dicendum 3. Deum velle malum poenæ, non præcise, ut malum est: *Nemo enim*, ut ait S. Dionys. de Div. Nom. c. 4. *intendens malum operatur*, sed quatenus bonum aliquod adjunctum habet.

Hoc constat ex Scriptura. Il. 45. *Ego Deus faciens pacem, & creans malum.* Jerem. 26. *Adducam super eos omne malum, quod locutus sum.* Denique certum est, & experientia nimis compertum, Deum velle omnes poenalitates hujus vitæ, & mortem ipsam, ratione peccati originalis, & etiam aliorum peccatorum actualium, tum quia ipsius justitiæ Divinæ ordo id exigit, tum etiam, quia aliquando ipsius hominis bonum spirituale id requirit.

3. Dicendum 4. Deum nullo modo velle malum culpæ, neque per se, neque per accidens.

Hæc veritas est de Fide, cui oppositus est error Hæreticorum nostri temporis, qui eo impietatis devenerunt, ut dicerent, Deum non modo permittere, sed positive velle peccatum, ut in eo puniendo justitiam suam ostendat, & prodicionem Judæ æque fuisse opus Dei, ac S. Pauli conversionem. Ita etiam olim senserunt Hæretici, ut testatur Vincentius Lirinensis lib. 1. adversus Hæreses c. 34. & Eusebius lib. 5. Histor. c. 20.

Refellitur hic error, & veritas assertionis nostræ probatur, 1. ex Scriptura. Psal. 5. *Non Deus volens iniquitatem tu es.* S. Jac. cap. 1. *Deus intentator malorum est.*

Probatur 2. ex S. Ambr. l. de Cain, & Abel c. 9. *Quanto gravius, inquit, peccato ipso ad Deum referre, quod feceris, & reatus tui invidiam transfundere in Auctorem non criminis, sed innocentiam.* Et S. August. Epist. 105. ad Sixtum, *iniquitatem, quam rectissima veritas improbat, damnare movit Deus, non facere.* S. Fulgent. l. 1. ad Monimum cap. 13.



*In Sanctis coronat Deus justitiam, quam eis gratis ipse tribuit, gratis servavit, gratisque perfecit: iniquos autem condemnabit, pro impietate, vel injustitia, quam in eis ipse non fecit.*

Probatur 3. ratione, qua utitur S. Anselm. in lib. de lib. arb. c. 8. quia justa voluntas hominis est ea, qua vult id, quod Deus vult eam velle; injusta vero e contrario est ea, qua vult id, quod non vult Deus eam velle. Unde sequitur, quod si Deus vellet hominem peccare, & homo peccando non peccaret, simulque voluntas ejus justa, re injusta foret: justa, inquantum conformis esset Divinæ voluntati, qua Deus vellet illum peccare, injusta, inquantum eidem voluntati repugnaret, quæ prohibet peccare.

Confirmatur ex eo, quod (ut dicit S. Ambr. l. 1. Examer. c. 8.) non alium ob finem Filius Dei in mundum venit, nisi ut tollat peccata mundi, & dissolvat opera diaboli; qua ratione igitur fieri potest, ut opera illa diaboli velit astruere, & ad peccata impellere, & incitare?

4. Multa ex Scriptura solent objicere Hæretici, v. g. quod in ea dicatur, Deum velle, ut fiant aliqua mala opera, & ad ea impellere, hominesque excæcare, & eorum corda indurare, ut nec possint bene agere.

Respondetur, iis omnibus, & similibus aliis loquendi modis, qui in Scriptura occurrunt, significari tantum, vel Deum velle permittere peccata, quod sapientissime, & cum summis rationibus facere potest, vel justo judicio suo velle subtrahere interdum hominibus peculiarem Gratiæ suæ protectionem, unde sequitur eorum lapsus in peccata.

Plura super hac re videri possunt apud Bellarm. tom. 4. t. 2. de amissione Gratiæ, & statu peccati c. 11. & seqq. Et universim ad has, & similes dissolvendas objectiones e Scripturis petitas recurrendum est ad illud principium, de quo supra in Tract. de Fide, nempe veram, & certam Scripturæ interpretationem non a sensu particulari, sed ab auctoritate ipsius Ecclesiæ, & unanimi Patrum consensu esse petendam: & sic, cum objicitur aliquis Scripturæ locus, videndum est, non quid illius verba præ se ferre videantur, sed quo sensu a SS. Patribus, & ab universa Ecclesia intelligantur.

### S E C T I O III.

#### *An voluntas Dei sit libera.*

1. **A**D clariorem hujus quæstionis resolutionem explicandum est breviter, quid sit libertas, & in quo vere, & proprie consistat. Id autem melius, & certius discere non possumus, quam a S. Bern. in lib. de gratia, & lib. arb. ubi dicit, triplicem esse libertatem, de qua promiscue mentio fit tum in Scripturis, tum apud SS. Patres: 1. est, quam vocat libertatem naturæ, 2. gratiæ, 3. denique gloriæ. Per primam dicit, nos liberari a coactione, & necessitate, per secundam a pecca-

peccato, per tertiam denique a morte, & aliis hujus vitæ miseriis. In eo autem præsertim differunt, quod secunda, & tertia libertatis species statum quendam, & conditionem hominis proprie respiciunt; prima vero respicit actiones ab ejus voluntate elicitas. Per secundam, & tertiam ideo liberi sumus, quia liberati a statu subjectionis tum peccati, tum mortis: per primam vero ideo sumus liberi, quia in eliciendis voluntatis nostræ actibus minime sumus coacti, aut necessitate adacti.

De hoc igitur primo genere libertatis, seu de libertate naturæ quærimus hic, in quo illa consistat, ut evidentius fiat, qua ratione Divina voluntas proprie libera dici possit. Certum est enim, ac per se evidens, non ideo dici liberam, quod sit liberata a peccato, vel a morte, sed quia est ex se, & natura sua libera; & jam vidimus, secundum mentem S. Bernardi, in eo consistere libertatem naturæ, quod voluntatis in actibus suis eliciendis non solum a coactione, sed etiam a necessitate libera sit. Si enim eo modo libera non esset, *jam, inquit, voluntas non esset. Ubi quippe necessitas, ibi non est voluntas.*

2. Dicendum est igitur (secundum illius S. Patris sententiam, quam fusius ibidem explicat, & probat) libertatem naturæ, seu liberum voluntatis arbitrium vere, & proprie in eo consistere, quod voluntati nulla neque coactio, neque necessitas inferatur, sed quod relinquatur libera, & indifferens ad agendum, vel non agendum, & ad hoc, vel illud agendum, seu tam quoad exercitium, quam quoad specificationem actuum suorum.

Et hæc est etiam communis aliorum SS. Patrum sententia, ut S. Hieron. l. 2. cont. Jovin. ubi sic loquitur: *Liberi arbitrii nos Deus condidit: nec ad virtutes, nec ad vitia necessitate trahimur: alioquin ubi necessitas est, nec damnatio, nec corona est.* S. Ambr. l. 2. in Luc. *Non potes dicere, quia noluit te bonum facere, ante quem posuit bonum, & malum, ut non ex necessitate bonum tuum esset, sed voluntarium.* S. August. denique, qui pluribus in locis agens de libero voluntatis arbit. dicit, in eo consistere, quod homo possit agere vel non agere, & hoc, vel illud agere, ut in hom. 12. ex quinquaginta: *Rogo, inquit, vos, fratres charissimi, quare Satanas seducit ad peccandum, cum Deus posuerit hominem in potestate non consentire Satanae? &c. Dat quidem Diabolus consilium, sed, Deo auxiliante, nostrum est eligere, vel repudiare, quod suggerit.* Et lib. de spiritu, & litera c. 24. *In omnibus misericordia ejus prævenit nos, consentire autem vocationi Dei, vel ab ea dissentire, propriæ voluntatis est.* Et lib. 22. contra Faustum Manichæum c. 77. expresse dicit, ex illa indifferencia voluntatis, & potestate ejus ad agendum, vel non agendum oriri rationem meriti, vel demeriti.

His breviter circa propriam, & veram libertatis notitiam delibatis, ad quæstionem initio Sectionis propositam

3. Dicendum est 1. Deum non libere, sed necessario suam ipsius boni-

nita-

nitatem velle, & amare, tam quoad specificationem, quam quoad exercitium actus. Ita S.Th. 2. p.q. 19. a. 3. Hoc constat ex antedictis.

Quod enim Deus necessario suam bonitatem velit, & amet quoad specificationem actus, patet, quia Deus illam odisse non potest, cum in ea nulla vel minima mali umbra esse possit, imo cum in ea omnes boni rationes tam in genere entis, quam in genere moris reperiantur.

Quod autem eandem bonitatem suam necessario velit, & amet quoad exercitium actus, patet, tum quia Deus non potest non esse perfecte beatus; ad perfectam autem beatitudinem requiritur actualis amor summi boni, tum etiam, quia actus ille Divinae voluntatis, quo Deus bonitatem suam vult, & amat, est actus immanens, & essentialis, imo est ipse Deus, ac proinde qui desinere non potest. Sicut autem Deus necessario suam bonitatem vult, & amat: ita e contrario peccatum, quod est illi oppositum, ex necessitate non vult, & odio prosequitur. Et hanc S. August. vocat l. 1. cont. Julianum, *Beatam necessitatem, quae Deus injustus esse non potest.*

Dicendum 2. Deum quidquid extra se vult, & amat, libere, & sine ulla necessitate velle, & amare.

Probatur 1. ex Scriptura. Psal. 134. *Omnia, quaecumque voluit, Dominus fecit in caelo, & in terra.* Ad Ephes. 1. *Operatur omnia secundum consilium voluntatis suae.*

Probatur 2. ex S. Ambr. l. 2. Exameron, c. 2. ubi contra quosdam Philosophos, qui Deum omnia fato quodam, & necessitate fecisse dicebant, expresse asserit, Deum multa potuisse facere, quae tamen facere noluit, ac proinde voluntate sua elegisse ex illis omnibus, quae facere potuit, ea, quae reipsa fecit. Et l. 2. de Fide c. 3. *Omnia, inquit, operatur unus, atque idem Spiritus, dividens singulis, prout vult, hoc est, pro liberae voluntatis arbitrio, non pro necessitatis obsequio.* Et ex S. Bern. lib. cit. de gratia, & lib. arbit. ubi sic loquitur: *Verum libertas a necessitate aequae, & indifferenter Deo, universaeque tam malae, quam bonae rationali convenit creaturae; nec peccato, nec miseria amittitur, vel minuitur, nec major in iusto est, quam in peccatore, nec plenior in Angelo, quam in homine, &c.*

Probatur 3. hac ratione. Illud agens censetur liberum, quod positis omnibus ad agendum praerequisitis, potest adhuc ex se agere, vel non agere, & a nulla re sibi extrinseca determinatur necessario ad agendum, vel non agendum; atqui Deus eo modo se habet respectu eorum, quae extra se operatur: posita enim cognitione eorum omnium, quae sunt possibilia, potest ex illis producere aliqua, vel non producere, & nihil est, quod eum ad id agendum, vel non agendum necessitet; ergo Deus habet voluntatem plene, & perfecte liberam, respectu eorum omnium, quae extra se operatur.

Superest hic una difficultas explicanda, in quo scilicet consistat illud velle liberum Dei, & qua ratione in eo sit aliquis actus liber, quo possit



possit velle, aut nolle, sine ulla sui mutatione. Pro cuius resolutione

5. Dicendum 3. liberam Dei volitionem non esse denominationem extrinsecam, aut respectum rationis, aut perfectionem aliquam realiter ab ipsa Essentia Divina distinctam, sed esse ipsammet volitionem necessariam, qua Deus seipsum vult, & amat, quatenus tamen hæc extenditur, seu terminatur ad creaturas, ad quas posset non extendi, & terminari, seu prout efficacitate sua illas infert, & efficit, cum posset non inferre, & efficere, seu denique quatenus indifferens est, ut sine ulla sui mutatione eas efficiat, aut non efficiat.

Quod non sit denominatio extrinseca, patet, quia Dei volitio libera est in Deo ab æterno, denominatio vero extrinseca oritur a productione creaturarum, quæ est temporalis.

Quod non sit respectus rationis, patet, quia cum sit ab æterno in Deo, est ante omnem operationem intellectus, qui possit talem respectum rationis fingere. Quod etiam non sit aliquid distinctum realiter ab Essentia Divina, constat, quia id ejus omnimodæ simplicitati repugnat.

Restat igitur, ut dicamus, aut nullum actum liberum in Deo esse admittendum, quod esset contra Fidem, aut si quis admittendus est, non alium admittendum esse, quam ipsum actum immanentem Divinæ volitionis sub ea ratione, quam supra explicavimus.

#### S E C T I O IV.

*Quenam sit Divinæ voluntatis efficacia.*

1. **D**icendum 1. talem esse Divinæ voluntatis efficacitatem, seu vim ad efficiendum, ut per illam solam Deus immediate efficiat, quidquid extra se in ratione primæ causæ efficit.

Ita communiter docent SS. Patres. S. Cyril. l. 3. cont. Julianum dicit, *Deum sola voluntate esse perfectorem operum*. Et Clemens Alex. in Protreptico, *Sola, inquit, Deus voluntate molitur, & solum ejus velle factum esse consequitur*. Et eo sensu S. Aug. l. 3. de Trinit. c. 4. docet, voluntatem Dei esse primam, & summam causam omnium corporaliū species, atque motionum. Huc etiam spectat dictum Psalmistæ Psal. 148. *Dixit, & facta sunt, mandavit, & creata sunt*.

Dicendum 2. efficacitatem illam, & vim effectricem Divinæ voluntatis extendere se ad omnia possibilia, seu (quod idem est) Divinam voluntatem esse omnipotentem, Deumque posse, quidquid voluerit efficere.

Hoc constat manifeste ex innumeris Scripturæ locis. Job 42. *Scio, Domine, quia omnia potes*. S. Matth. 19. *Apud Deum omnia possibilia sunt*. Et hanc veritatem adeo manifestam existimavit S. Aug. ut ser. 139. de Tempore sic loquatur. *Non dico, da mihi Christianum, da mihi Judæum, sed da mihi Paganum, idolorum cultorem, Demonum*

*num servum , qui non dicat , Deum esse omnipotentem . Negare Christum potest , negare Deum omnipotentem non potest .*

2. Quæres , an sit defectus potestatis in Deo non posse mori , non posse peccare , non posse rem factam infectam reddere .

Respondetur , nullam esse in Deo impotentiam , sed potius maximam omnipotentiae suae perfectionem .

Posse enim mori , aut aliquid pati , non est potentia , sed defectus potentiae . Unde recte dicit S. Aug. l. 5. de Civ. c. 10. *Omnipotens est Deus faciendo , quidquid vult , non patiando , quod non vult .*

Posse item peccare non est argumentum potentiae , sed potius infirmitatis . Recte enim Petrus Damian. Opusc. 36. de Omnipotentia Dei cap. 10. *Quod malum est , inquit , potius nihil debet dici , quam aliquid , atque ideo nihil præjudicat , si dicamus , Deum omnia posse , licet mala non possit , cum mala non intra omnia , sed potius extra omnia debeant supputari .*

Denique quod Deus non possit id , quod semel factum est , infectum reddere , non ex imbecillitate provenit , sed potius ex Divinae veritatis perfectione . Ut enim recte dixit S. Aug. l. 26. contra Faust. Manich. c. 5. *Quisquis dicit , Si omnipotens est Deus , faciat , ut quæ facta sunt , facta non fuerint , non videt hoc se dicere , si omnipotens est , faciat , ut ea , quæ vera sunt , eo ipso , quo vera sunt , falsa sint .* Inde patet , cur communiter Theologi dicant , Deum illa non posse , quæ involvunt contradictionem .

## S E C T I O V.

*An , & quæ ratione in Divina voluntate amor , & odium , misericordia , & justitia , & similes affectus reperiantur .*

1. **C**ertum est , hos & similes affectus , si considerentur , prout secum inferunt aliquam mutationem , sive corporalem , sive spirituales , nullo modo in Divina voluntate reperiri , cum sit omnis prorsus mutationis expers , ut ex ante dictis constat . Quæstio igitur proposita de iis intelligenda est , prout habent simpliciter rationem actus , sine ulla imperfectione adjuncta . Et in hoc sensu

Dicendum est 1. in Divina voluntate esse verum amorem , non tantum erga se , sed etiam erga creaturas .

Hoc patet ex iis , quæ dicta sunt Sectione secunda . Et confirmari potest , quantum spectat ad amorem , quem Deus habet erga creaturas , ex eo quod quidquid entitatis , & bonitatis habent creaturæ , id totum habent , quia Deus vult eas habere . Amare enim aliquem nihil est aliud , quam ei bonum velle . Ita S. Th. 1. p. q. 20. a. 2. ubi recte observat differentiam amoris Divini , & humani . Homo enim supponit in objecto amato bonitatem , at vero Deus amando infundit bonitatem , atque ideo facit id , quod amat , bonum , ac proinde amabile .

2. Di-

2. Dicendum 2. Deum non æqualiter omnes creaturas diligere. Certum est enim, ut docet S. Th. sup. art. 4. meliores semper magis amari a Deo, quatenus meliores. Eo enim meliores sunt, quo majus bonum a Divina voluntate accipiunt; majus autem bonum a Deo accipere est magis ab eo amari. Est autem notanda doctrina S. Doctoris in responsione ad tertium, ubi docet præsumptuosum esse velle dijudicare, an aliquis Sanctorum sit altero sanctior, & Deo charior. Nam (ut dicitur Prov. 16.) *Spirituum ponderator est Dominus.*

Sicut autem amor, sic etiam contrariam ob causam in Divina voluntate reperitur odium, tam respectu peccati, quam peccatoris, quatenus peccator est. Sap. 14. *Similiter odio sunt Deo impius, & impietas ejus.* Et hoc satis manifeste constat ex eo, quod Deus peccatoribus vult malum vindictæ, ac poenæ æternæ. Est autem proprius odii actus velle malum, sicut amoris velle bonum.

3. Dicendum 3. in Deo esse justitiam.

Patet ex innumeris Scripturæ locis. Ps. 118. *Justitia tua justitia in æternum.* Rom. 1. *Justitia Dei in eo revelabitur ex Fide.* Cum autem duplex sit justitia, nempe commutativa, & distributiva,

Prior, quæ consistit in eo, ut tantum reddatur, quantum acceptum fuerit, non est proprie in Deo, ut recte docet S. Th. q. 21. a. 1. juxta illud ad Rom. 11. *Quis prior dedit illi, & retribuetur ei?* Nihil enim a nobis Deus accipere potest, quin prius illud ipse nobis dederit. Unde cum maxima ratione Concil. Trid. sess. 6. c. 16. sic loquitur. *Absit, ut Christianus homo in seipso vel confidat, vel gloriatur, & non in Domino, cujus tanta est erga omnes homines bonitas, ut eorum velit esse merita, quæ sunt ipsius dona.*

Posterior vero justitia, quæ consistit in distributione bonorum communium juxta proportionem meritorum cujusque, si stricte sumatur, non est etiam proprie in Deo, quia nullum creaturæ meritum omnia Dei dona præcedere potest, cum omne meritum ab aliquo gratuito Dei dono, hoc est ab ejus Gratia initiumumat, ut supponimus ex tract. de Gratia; deinde quia Deus erga creaturas nullius rei debitor est.

Quare dicere debemus, justitiam in Deo reperiri modo longe perfectiori, & eminentiori, considerando illam, prout abstrahit ab omnibus humanæ justitiæ conditionibus, quæ Deo minime conveniunt, & dicit aliquam in Deo perfectionem, quæ secundum nostrum concipiendi modum voluntatem ejus dirigit tum in distributione præmiorum, supposito creaturæ per ipsius Dei Gratiam merito, tum in inflictione penarum, supposito ejusdem creature per propriam voluntatem peccato.

4. Dicendum 4. in Deo esse misericordiam.

Hoc patet similiter ex Scripturis, quæ ubique Divinam prædicant misericordiam. Psal. 88. *Misericordias Domini in æternum cantabo.* Thren. 3. *Misericordia Domini, quia non sumus consumpti.* Et hæc proprie in Deo invenitur, ut docet S. Th. sup. a. 3. non quidem secundum  
pal-



passionis affectum, sed secundum effectū. Unde S. Ansel. in Prosol. c. 10. *Misericors es, non quia tu sentis affectum, sed quia nos sentimus effectum.*

Observat autem recte Sanctus Doctor sup. art. 4. in omnibus Dei operibus misericordiam ejus, & justitiam simul inveniri. Unde dicit in resp. ad 1. etiam in damnatis reperiri aliquam Dei misericordiam, non quidem totaliter relaxantem, sed aliquam sublevantem, hoc est, quod cum Deus juste possit acerbioribus adhuc poenis eos affligere, id tamen ex misericordia non facit, sed eos semper citra condignum punit.

## S E C T I O VI.

*An sit in Deo providentia, & ad quæ se extendat.*

1. **N**omine providentiæ intelligimus hic actum aliquem tum intellectus, tum voluntatis Dei, quo ipse ordinat, & dirigit res creatas in suos fines particulares, ac præsertim in finem omnium ultimum, qui est ipse Deus. Hoc supposito

Dicendum est 1. in Deo esse providentiam respectu omnium rerum creatarum. Est de Fide.

Prob. 1. ex pluribus Scripturæ locis. Sap. 8. *Attingit a fine usque ad finem fortiter, & disponit omnia suaviter.* Et cap. 14. *Tua, Pater, providentia cuncta gubernat.* S. Matth. 6. *Respicite volatilia cæli, quoniam non serunt, neque metunt, neque congregant in horrea, & Pater vester cælestis pascit illa. Considerate lilia agri, &c.*

Prob. 2. ex S. Cypriano lib. de Idolorum vanitate, *Mundi unus est Rector, qui universa, quæcunque sunt, verbo jubet, ratione dispensat, virtute consummat.* Et ex S. Damasc. lib. 1. de Fide c. 2. *Quod Deus bonus sit justus rerum omnium conditarum architectus, quod vim omnem, imperiumque habeat, omnia inspecet, omnibus prospiciat, omnia in potestate habeat, hæc, inquam, omnia scimus, & confitemur.*

Probatur 3. ratione, qua utitur S. Th. 1. p. q. 21. a. 2. quia, cum Deus sit causa efficiens prima, & perfectissima omnium rerum, quæ ab illa pendent, non tantum in fieri, sed etiam in conservari, hoc est, quod creaturæ omnes indigeant, non tantum ut initium sui esse a Deo accipiant, sed etiam ejusmodi conservationem, & perfectionem; hinc sequitur, ad illum etiam pertinere res omnes, quas creavit, in suos fines dirigere, cum inde potissimum earum & conservatio, & perfectio pendeat.

Tertullianus in libello de animæ testimonio hanc veritatem manifestam esse dicit ex communi consensu omnium Gentium, & Nationum, inter quas nulla fuit adeo barbara, quæ non senserit, esse aliquod Numen supremum, quod res humanas cognoscat, & gubernet, & ad quod in periculis, & afflictionibus sit confugiendum, & a quo præmia pro recte factis, supplicia pro sceleribus sint expectanda.

2. Dicendum 2. providentiam Divinam ad omnes prorsus res creatas, etiam minimas, se extendere. Est de Fide.

Probatur 1. ex Scriptura. Sap. 6. *Pusillum, & magnum ipse fecit, & equaliter est illi cura de omnibus.* S. Luc. 12. *Nonne quinque passeris veneunt dipondio, & unus ex illis non est in oblivione coram Deo? sed & capilli capitis vestri omnes numerati sunt.*

Probatur 2. ex S. Iren. lib. 2. cap. 4. *Nihil omnino eorum, quæ facta sunt, & fiunt vel fient, Deum fugit: sed per illius providentiam unumquodque & habitum, & ordinem, & numerum, & quantitatem accipit propriam.* Et S. Hier. Ep. 3. *Creatorem non tantum in Cælo miramur, & Terra, & Sole, & Oceano, elephantibus, camelis, &c. sed & in minutis quoque animalibus, formica, culice, muscis, vermiculis, & istiusmodi, quorum magis scimus corpora, quam nomina, eandemque in cunctis veneramur solertiam.* Videndus S. Ambros. lib. 1. de offic. cap. 14. & 15. S. Greg. lib. 4. moral. c. 16. S. August. lib. 12. de Gen. ad lit. c. 21. & alii.

3. Verum contra hanc de providentia doctrinam duæ potissimum fieri solent objectiones.

Prima est, quod non videatur decere Dei majestatem, ut ejus providentia minimis rebus se immisceat, juxta illud Apost. 1. Cor. c. 9. *Nunquid de bobus cura est Deo?*

Secunda, quod si Deus humanas res regeret, & gubernaret, multi in ejus gubernatione, & regimine defectus reperirentur, cum boni, & justi variis plerunque conflissentur adversis, mali contra, & peccatores bonis, ac voluptatibus affluant.

Ad primam respondetur cum S. Ambros. lib. 1. de offic. *Si non est injuria, & probrum Dei minutissimas quasque res fecisse, multo minus probrum illius esse eas factas regere.* Apostolus autem loco citato non omnino negat, Deo curam esse de animantibus rationis expertibus, sed non talem, nec tam specialem, quam de hominibus, ac præsertim de iis, qui se totos ejus obsequio, & cultui mancipant, de quibus illic loquitur.

Ad secundam vero dicendum est, Deum cum summa sapientia permittere, imo velle, ut in hac vita interdum justis affligantur, mali vero prospere agant. Cum enim nulli adeo mali sint, quin aliquando boni aliquid agant, Deus illos in peccatis morituros, ob idque damnandos prævidens, illorum opera utcunque bona prosperitate aliqua temporali præmiatur; justos autem afflictionibus variis exerceri vult, tum ad probandam eorum fidem, tum ad pleniorum pro peccatis satisfactionem, tum etiam ad meritum cumulum augendum. Quare optime S. Aug. in Enchir. c. 11. *Deus cum summe bonus sit, nullo modo sineret, mali aliquid esse in operibus suis, nisi usque adeo esset omnipotens, & bonus, ut etiam de malo bene faceret.*

## C A P U T V.

*De Prædestinatione.*

**Q**UOD olim Ezechieli Prophetæ, hoc cuilibet Catholico in omnibus Fidei mysteriis, sed, præsertim in illis, quæ Divinæ prædestinationis arcana spectant, humiliter profitendum est, hujus torrentis aquas ita profundas, & altas esse, ut transvadari omnino non possint. Unde merito exclamat Apost. Rom. 11. *O altitudo divitiarum sapientie, & scientiæ Dei, quam incomprehensibilia sunt judicia ejus!* &c. Ideo juxta consilium ejusdem Apost. 1. Cor. 10. nosmetipsos nobis ipsis metientes, in hoc prædestinationis negotio procedemus secundum mensuram regulæ, qua mensus est nobis Deus, idest earum præsertim veritatum notitiam hic inquiremus, quas Deus ipse revelare, & per Ecclesiam proponere voluit, cætera omnia ejus inscrutabili sapientiæ, & incomprehensibilibus judiciis relinquentes, memores illius effati a Salomone Prov. 25. prolati: *Quoniam qui scrutator est majestatis, opprimetur a gloria.*

## S E C T I O I.

*Quid prædestinationis, quid item reprobationis nomine debeat intelligi.*

1. **P**RÆDESTINATIO, si vim nominis spectes, idem est ac præcedens destinatio. Destinare autem est vel aliquid omnino apud se statuere, vel (ut dicit S. Thom. 1. p. q. 23. art. 1.) aliquid in finem designare, aut transmittere.

Hujus autem vocis sic intellectæ apud SS. Patres duplex acceptio invenitur. Una lata, & minus propria, pro ordinatione rationalis creature facta a Deo in quemlibet finem, sive in beatitudinem, sive in damnationem. Quo sensu dicit S. August. lib. 15. de Civ. cap. 1. Civitatem Dei esse prædestinatam ad gloriam, civitatem vero diaboli ad ignem æternum esse prædestinatam. Altera stricta, & propria pro sola ordinatione rationalis creature ad beatitudinem, & vitam æternam. Et eo sensu communiter tum in Scripturis, tum apud SS. Patres sumi solet, ut ex dicendis patebit.

Cum autem hæc Divina ordinatio sit ab æterno, ac proinde omne tempus præcedat, ideo præordinatio, & prædestinatio dicitur, ita ut particula (præ) nihil aliud significet, quam antecessorem durationis, seu eternitatis ad tempus, ut docet Alensis 1. p. q. 23. mem. 8. Gamacheus 1. p. q. 25. c. 1. Isambert. ad eandem qu. disp. 1. & alii communiter. Unde dicit eo sensu Apost. Eph. 1. *Elegit nos in ipso ante mundi*



*constitutionem*, & Rom. 8. *Quos præscivit, & prædestinavit*, ubi simul jungit, & in eodem sensu accipit præscientiam, & prædestinationem. Est autem evidens, particulam ( præ ) in verbo ( præscivit ) significare tantum antecessionem ipsius scientiæ Divinæ secundum durationem, id est, Deum scire res, antequam existant. Unde sequitur, illam particulam in voce prædestinationis eodem modo esse accipiendam.

Et sic dicendum est, quod prædestinatio nihil aliud est, quam æterna, & omne tempus præcedens destinatio, qua Deus ante mundi constitutionem creaturas aliquas ad gloriam, & beatitudinem coelestem elegit, & destinavit.

Quæres, an prædestinatio sit proprie actus intellectus, an voluntatis Dei:

Respondetur, esse utriusque, intellectus quidem, cum in Scriptura explicetur terminis significantibus actum intellectus, ut Rom. 11. *Non repulit Deus plebem suam, quam præscivit*, id est, quam prædestinavit; ut explicat S. August. lib. de bono persever. voluntatis autem, cum in eadem Scriptura sæpe vocetur electio, propositum, beneplacitum, &c. ut Rom. 8. Ephes. 1. & aliis in locis. Et hunc utrumque actum conjungit S. Aug. lib. de bono persever. cum dicit, quod prædestinatio est *præscientia & præparatio beneficiorum Dei, quibus certissime liberantur, quicumque liberantur*. Præscientia liquidem ad intellectum Divinum proprie spectat, præparatio vero beneficiorum ad voluntatem, cum sit actus amoris, & benevolentiae.

2. Ex his autem verbis S. Augustini colligitur, ad completam rationem prædestinationis, prout ab illo, & aliis SS. Patribus sumitur, debere per eam intelligi non tantum electionem, & destinationem ad gloriam, & beatitudinem, sed etiam præparationem omnium mediorum ad illam consequendam, propositumque, ac voluntatem media illa tribuendi, ita ut prædestinatio non tantum respiciat gloriam conferendam, sed etiam simul omnia Gratiae dona, quibus ad illam gloriam homines perducuntur.

Quod autem spectat ad Reprobationem, dicendum est, per illam nihil aliud intelligi, quam actum illum tum intellectus, tum voluntatis Dei, quo ab æterno præscivit, aliquos Gratiae suæ donis male usuros, & in peccata mortalia lapsuros, in iisque morituros, & propterea decrevit eos a gloria excludere, ac illis secundum peccatorum meritum damnationis æternæ poenas infligere.

3. Quomodo autem ista debeant intelligi, & qua ratione prædestinatio, ac reprobatio inter se differant, evidens fiet ex dicendis.

## S E C T I O II.

*Quid Fides Catholica de prædestinatione, & reprobatione credendum proponat.*

1. **P**Ræcipuas hic veritates circa prædestinationem, & reprobationem Fide Catholica credendas, cum erroribus oppositis ab Ecclesia proscriptis, & damnatis, breviter proponemus, reliqua vero, quæ ad eandem materiam spectant, in sequentibus Sectionibus explicabimus.

Dicendum igitur 1. Fide Catholica credendum esse, in Deo prædestinationem, ac reprobationem vere reperiri, seu Deum aliquos de facto prædestinasse, alios vero reprobasse.

Hæc veritas expresse habetur in Scripturis. Ephes. 1. *Prædestinavit nos in adoptionem filiorum per Jesum Christum.* In eodem cap. *In quo sumus prædestinati, secundum propositum ejus, qui operatur omnia secundum consilium voluntatis suæ.* Sap. 9. *Noli me reprobare a pueris tuis.* Hebr. 12. *Esau reprobatus est; non enim invenit pœnitentiæ locum.*

Eadem veritas etiam asseritur a SS. Patribus, præsertimque a S. Aug. in toto lib. de prædestin. Sanctorum, & alibi passim.

Ratio etiam suffragatur, quia cum Fide Divina certum sit, quosdam homines æternam salutem per Christi Gratiam consequi, certum etiam esse debet, Deum iis gratiam, & gloriam illam ab æterno præparasse, cum Deus nihil in tempore faciat, quod ab æterno facere non decreverit. E contra cum certum sit, multos huic Gratiæ deesse, idcirco gloriam illam non consequi, certum est etiam, Deum ob peccata illorum prævisa decrevisse ab æterno eos a gloria excludere.

2. Dicendum 2. Fide Catholica credendum esse, ex parte prædestinati nullam omnino dari causam prædestinationis, si sumatur prædestinatio, prout comprehendit non tantum electionem ad gloriam, sed etiam præparationem omnium gratiarum, seu decretum conferendi omnia gratiæ auxilia, ac proinde etiam primam gratiam, qua Deus ipsum prædestinatum prævenire, & excitare decrevit.

Huic veritati oppositi sunt varii errores.

Primus fuit Origenis, qui asserit lib. 1. Periarchon, cap. 8. Deum ad prædestinationis Gratiam homini conferendam moveri propter bona opera, quæ anima, antequam ejus corpori uniretur, exercuit. Existimabat enim, animas omnes ante hunc mundum corporeum simul fuisse creatas

Hunc errorem refellit S. Th. q. 23. a. 5. auctoritate Apost. ad Rom. 9. ubi Jacob electum, & Esau reprobatum dicit: *Cum nondum nati essent, aut quidquam boni, vel mali egissent.* Quod autem dicit, animas ante mundum corporeum fuisse creatas, hoc ab Ecclesia damnatum fuit in Concilio Lateranensi sub Innocentio III. sess. 8.

3. Secundus error fuit Pelagianorum qui asseriebant, hominē operibus

bonis per solas naturales arbitrii sui vires factis Gratiam prædestinationis posse promereri. Hanc illorum Hæreticorum sententiam explicat S. Aug. de prædest. Sanct. c. 18. his verbis: *Præsciebat Deus (ait Pelagianus) qui futuri essent sancti, & immaculati per liberæ voluntatis arbitrium, & ideo eos omnes ante mundi constitutionem in ipsa sua præscientia, qua tales futuros esse præscivit, elegit. Et quamvis interdum Pelagius, ut veritati fucum faceret, & Ecclesiæ damnationem effugeret, verbis magnificis Gratiam commendaverit, nunquam tamen ex animo pristinum errorem retractavit, sed illum variis verborum involucris obtegere semper conatus est, ut patet ex S. Aug. toto fere l. de Gratia Christi, ac præsertim ex c. 3. 4. 6. 9. 41. & 42. Quod in tractatu de Gratia fusius explicabitur, ubi ostenderetur, hunc errorem a Summis Pontificibus Innocentio, Zosimo, Cælestino, & a Conciliis Milevitano, Carthaginensi, & aliis damnatum fuisse.*

Ejus certe falsitas manifeste revincitur ab eodem S. August. lib. cit. de prædest. Sanct. cap. 18. ex illis Apostoli verbis ad Ephes. 1. *Elegit nos in ipso ante mundi constitutionem, ut essemus sancti, & immaculati. Ex quibus concludit. Non ergo, quia futuri eramus, sed ut essemus sancti, ideo quippe tales eramus futuri, quia elegit ipse prædestinans, ut tales per Gratiam ejus essemus.*

Errori Pelagianorum affinis fuit error Semipelagianorum, & Massiliensium, qui licet faterentur, nos sine Gratia Christi non posse salutem æternam consequi (in quo a Pelagianis diffidebant) existimabant tamen, Deum hanc nobis conferre Gratiam ab æterno decrevisse, intuitu & occasione alicujus boni operis, vel saltem alicujus boni desiderii, seu conatus nostræ voluntatis per naturæ vires elicitæ. Unde Cassianus hujus sententiæ præcipuus assertor lib. 2. de institutis renunciantium cap. 14. dicebat: *Dei misericordiam præsto esse, occasione tantummodo bonæ voluntatis a nobis oblata. Et collatione 3. c. 13. Ob id solum Deum exigere, vel expectare ad suam Gratiam tribuendam quosdam bonæ voluntatis conatus, ne penitus dormientibus, aut inertis otio dissolutis sua videatur dona conferre.*

Refelluntur hi errores, & simul nostræ Fidei veritas probatur 1. auctoritate Scripturæ 2. ad Tim. c. 1. *Vocavit nos vocatione sua sancta, non secundum opera, sed secundum propositum suum. 1. Cor. 4. Quis te discernit? quid habes quod non accepisti; 2. ad Cor. 3. Non sumus sufficientes cogitare aliquid ex nobis, tamquam ex nobis, sed sufficientia nostra ex Deo est.*

Prob. 2. auctoritate Concilli Arausici II. can. 2. in quo anathema profertur in eos, qui dixerint, *Deum expectare nostram voluntatem, qua velimus a peccato purgari, non autem per Spiritus Sancti inspirationem fieri, ut etiam purgari velimus. Et can. 25. Hoc etiā profiteamur, quod in omni opere bono nos non incipimus, & postea per misericordiam Dei adjuvamus, sed ipse nobis, nullis præcedentibus meritis fidem, & amorem sui*



*fui inspirat*. Ex quibus Concilii, & Scripturæ verbis, cum constet, nos primam Gratiam promereri non posse, constat etiam, prædestinationem, prout illam primam Gratiam complectitur, ex nostris meritis nunquam provenire.

Confirmatur 1. ab exemplo prædestinationis parvulorum, qui ab hac vita statim post susceptum Baptismum rapiuntur. Sicut enim nulla ex parte illorum datur causa illius prædestinationis, quia nulla dantur merita, quibus se disponere potuerint ad percipiendam Baptismi Gratiam, quæ ex sola gratuita Dei misericordia ipsis confertur: sic etiam de aliorum adultorum prædestinatione dicendum est, nullam dari illius causam ex parte ipsorum, quia nulla dantur merita, quibus se disponere potuerint ad primam Gratiam accipiendam, ut fusius infra suo loco probabitur.

Quod autem aliqui ex illis Hæreticis dicebant, parvulos illos a Deo prædestinatos esse propter bona opera, quæ facturos illos, si diutius vixissent, ipse præviderat, repugnat veritati Catholicæ, & refellitur a S. Augustino libro de prædest. SS. c. 12. ubi recte docet, omnes homines judicandos *secundum propria corporis* (ut loquitur Apostolus 2. ad Cor. 5.) id est prout in hac vita corporali se de facto gesserint, non autem, prout se gessissent, si diutius vixissent, vel in aliis occasionibus bene, vel male acturi fuissent.

Confirmatur 2. ab exemplo Christi, qui sicut est caput, ita etiam est omnium prædestinatorum exemplar, quos (ut ait Apostolus) ipse Deus *prædestinavit conformes fieri imagini Filii sui*. Sicut enim Christus ut homo prædestinatus est, nullis præcedentibus meritis, ut per unionem hypostaticam cum Verbo esset Filius Dei naturalis: ita etiam nos sine ullis præcedentibus meritis prædestinamur, ut simus Filii Dei adoptivi per Gratiam. Hanc rationem eleganter tractat S. Aug. de bono persever. c. ultimo, & aliis in locis.

Dicendum 3. Fide Catholica credendum esse, neminem a Deo reprobari, & ad poenam æternam damnationis deputari, nisi ratione prævisorum demeritorum.

Huic veritati oppositus est error Calvinii, qui lib. 3. Inst. cap. 21. paragr. 5. post antiquiores quosdam Hæreticos (quos refert, & refutat Valdensis lib. 1. doctrinalis Fidei) asserit, Deum ante prævisionem cujuscunque peccati non tantum exclusisse aliquos a coelesti Gratia, sed etiam efficaci voluntate eos ad poenam deputasse. Unde capite 23. par. 9. ait, Deum, ut ipsi reprobis efficaciter ad hunc finem a se intentum perveniant, non tantum eos Gratiis ad salutem necessariis privare, sed etiam injicere iis peccandi necessitatem, quam evadere non possint.

Hæc blasphemia refellitur, & veritas nostræ Fidei probatur 1. auctoritate Scripturæ variis in locis, in quibus testatur Deus, se nolle, ut ullus pereat, sed ut omnes peccatores ad penitentiam convertantur;

& sic vitam æternam consequantur. Ezech. 18. *Nunquid voluntatis mea est mors impii, dicit Dominus Deus, & non ut convertatur a viis suis, & vivat?* Et c. 33. *Vivo ego, dicit Dominus Deus, nolo mortem impii, sed ut convertatur impius a via sua, & vivat.* S. Matth. 28. *Non est voluntas ante Patrem vestrum, ut pereat unus de pusillis istis.* 2. S. Petri 3. *Deus patienter agit propter vos, nolens aliquos perire, sed omnes ad pœnitentiam reverti.*

Prob. 2. ex Conciliis Arausicano can. 25. & Trid. sess. 6. can. 17. in quibus anathema dicitur iis, qui asseruerint, aliquos Divina potestate ad malum esse prædestinatos. Item ex Concil. Valen. c. 3. ubi dicitur, *In electione salvandorum misericordiam prævenire, in damnatione autem periturorum meritum malum præcedere justum judicium.*

Probatur 3. auctoritate S. August. lib. 3. cont. Julianum cap. 18. *Bonus est Deus, inquit, justus est Deus: potest aliquos sine bonis meritis liberare, quia bonus est, non potest quemquam sine malis meritis damnare, quia justus est.* Et S. Prosp. lib. 1. respons. ad capitula Galorum, ad capitulum 7. ubi sic loquitur. *Gratia Dei non prius eos (reprobos scilicet) deseruit, quam ab iis desereretur, & quia hoc ipso voluntaria defectione facturos prævidit, ideo in prædestinationis electione illos non habuit.*

Probatur 4. ratione, quia sicut poena necessario peccatum præsupponit, cum sit illius punitio, ita destinatio ad poenam præsupponit etiam peccatum in eo, qui ad illam destinatur, & peccati cognitionem in eo, qui destinatur. Alias judicium ejus nec justum, nec determinatum esse posset, cum nec causam legitimam puniendi haberet, ubi nullum esset peccatum, nec rationem ullam determinandi poenam ad certum gradum intensiōis, vel extensiōis, cum hoc ex cognitione gravitatis, aut levitatis peccati pendeat. Pro mensura enim delicti debet esse plagarum modus.

### S E C T I O III.

*An solum peccatum originale sit causa reprobationis positiva tam adultorum, quam infantium.*

**S**ensus quæstionis est, an illi, qui reprobatii sunt, fuerint a Deo reprobatii, & æternis suppliciis addicti ante prævisionem cujuscunque peccati actualis, & ob solum peccatum originale prævisum. Pro cujus resolutione

Dicendum primo, falsum esse dicere, Deum ob solum peccatum originale ab æterno reprobasse positive, & poenis æternis addixisse omnes, & quoscunque homines, qui ab ipso reprobatii sunt.

Probatur 1. ex his Apostoli verbis ad Rom. 8. *Nihil damnationis est iis, qui renati sunt in Christo Jesu, quæ quidem verba Concil. Tridentin. sess. 5. can. 5. intelligit de omnibus, qui Baptismum susceperunt, & per*

& per illius Gratiam justificati sunt, ac inter membra Christi connumerati, ipsique tanquam capiti inserti; inter quos tamen certum est, quamplurimos reperiri reprobos, qui si ob solum peccatum originale reprobati essent, dici non posset, *nihil damnationis in illis reperiri* post Baptismum, cum semper in eis remaneret causa damnationis, nempe quod in peccato originali fuissent concepti.

Probatur 2. auctoritate ejusdem Concilii l. c. ubi hæc habentur. *Si quis per Jesu Christi Gratiam, quæ in Baptismo confertur, reatum originalis peccati remitti negat, aut etiam asserit, non tolli totum id, quod veram & propriam peccati rationem habet, &c. anathema sit. In renatis enim nihil odit Deus, &c.*

Hæc autem Concilii doctrina vera non esset, si illi, qui inter baptizatos reprobati sunt, ante prævisionem cujuscunque peccati actualis, ob solum peccatum originale prævisum, essent a Deo reprobati; quia dici non posset, reatum originalis peccati per Gratiam in Baptismo collatam vere ipsis remissum fuisse, aut sublatum fuisse id totum, quod veram, & propriam peccati rationem habet; cum ob ipsummet peccatum originale damnandi, & æternis cruciatibus plectendi forent. Deus enim neminem damnat, aut æternis cruciatibus plectit ob peccatum, quod vere, & proprie remissum est. Falsum præterea esset dicere, quod in iis, qui per Baptismum renati essent, nihil odisset Deus; quia semper in illis odio haberet id, ob quod eos a se reprobos, & damnatos conspiceret.

Probatur 3. ex pluribus aliis falsis, & absurdis, quæ sequerentur ex sententia illa, quam impugnamus. Si enim Deus ob solum originale peccatum reprobat, hinc sequitur, verum non esse, quod dixit Apostolus 1. ad Tim. 2. *Deum velle, omnes homines salvos fieri, & ad agnitionem veritatis venire.* Nam e contrario dicendum esset, Deum velle longe majorem partem hominum positive a salute excludere, & æternis poenis plectere.

Sequitur etiam, falsum esse id, quod similiter dixit Apost. Princeps Ep. 2. c. 3. *Deum nolle aliquos perire, sed omnes ad pœnitentiam reverti.* Nam posita illa sententia, vult e contrario voluntate antecedenti, omnes illos perire, quos positive ob peccatum originale reprobavit, nec proinde vult, ut agant pœnitentiam, & in statu Gratiæ decedant, cum ad ejus decreto antecedenti, & voluntati efficaci e diametro repugnet.

Sequitur insuper ex eadem sententia, falsum esse, quod definitum est in Conc. Arausicano II. can. 25. his verbis: *Hoc etiam secundum Fidem Catholicam credimus, quod accepta per Baptismum Gratia, omnes baptizati, Christo auxiliante & cooperante, quæ ad salutem pertinent, possint, & debeant, si fideliter laborare voluerint, adimplere.*

Et quod dicitur in Conc. Trid. sess. 6. c. 13. *Omnes justificatos in Dei auxilio spem firmissimam collocare, & reponere debere, Deumque nisi ipsi ejus Gratiæ defuerint, sicut cepit opus bonum, ita & illud perfecturum esse:*

se:



*Se*: Sequitur, inquam, Conciliorum illorum doctrinam falsam esse, quia posita illa sententia, quicumque inter baptizatos reprobati sunt, quamvis per Baptismum gratiam acceperint, tamen neque auxilium Dei ad perseverandum in Gratia unquam accipient, neque auxilio illo destituri poterunt unquam, quantumcunque laboraverint, ea, quæ ad salutem consequendam necessaria sunt, adimplere. Cum vero hæc omnia, quæ ex illa sententia sequuntur, absurda sint, & absona ab omni veritate, hinc concludere oportet, eam tanquam falsam penitus repudiandam, & abjiciendam esse.

Dicendum 2. Nullum adultum positive a Deo reprobatum esse, & æternæ damnationis suppliciis addictum, nisi ob aliquod peccatum mortale actuale, & finalem in eo impenitentiam ab æterno prævisam.

Hæc assertio sequitur manifeste ex probatione præcedentis. Si enim nullus eorum, qui baptizati sunt, ob solum originale peccatum positive reprobatus est, consequens est, quod quisquis inter baptizatos reprobatus est, ob aliquod actuale peccatum ab æterno prævisum reprobatus sit. Idem vero dici debet etiam de reprobatis adultis non baptizatis, cum quoad reprobationem par sit utrorumque ratio, & argumenta, ac rationes, quibus utuntur assertores sententiæ, quam impugnamus, æque probent de his, atque de illis, ut ex solutione objectionum constabit, nullamque inter reprobos adultos constituent differentiam, sed omnes sive baptizatos, sive non baptizatos in eadem *perditionis massa*, ut loquuntur, involutos esse contendant, idque ob solum prævisum peccatum originale.

Probari præterea potest hæc 2. assertio ex his Christi Domini verbis Matth. 25. quibus formam futuri Judicii repræsentat: *Ite maledicti in ignem æternum, &c. Esurivi enim, & non dedistis mihi manducare.* In quibus notanda est particula causalis, *enim*, quæ aperte significat rationem, ob quam igni æterno addicentur, scilicet ob transgressionem Divinæ Legis. Est autem ibi sermo non de executione duntaxat, sed etiam de ipso æterno decreto, quo æternis sunt suppliciis ob prævisa eorum peccata actualia adjudicati, sicut in eadem Divini Judicis sententia exprimitur, Regnum coeleste non modo dandum esse electis ob eorum bona opera, sed etiam ab æterno illis paratum fuisse ob illa eadem opera, de qua re agetur Sectione sequenti.

Dicendum 3. Infantes absque Baptismo decedentes a Regno coelesti exclusos fuisse æterno Dei decreto, idque ob prævisam eorum mortem in peccato originali, nusquam vero ob illud solum peccatum originale poenis, & suppliciis fuisse addictos.

Prima pars hujus assertionis est in confesso apud omnes Catholicos, & manifeste constat ex his Christi Dom. verbis Jo. 3. *Nisi quis renatus fuerit ex aqua, & Spiritu Sancto, non potest introire in Regnum Dei.*

Secunda pars ejusdem assertionis plenius intelligetur ex dicendis Tr. 4. c. de lapsu hominis sect. 5. & interim probatur auctoritate S. Doct.

Doct. variis in locis, ac præsertim q. 5. de malo, ar. 2. & in 2. dist. 33. qu. 2. ar. 1. ubi asserit, & probat, peccato originali non deberi poenam sensus, sed tantum poenam damni, hoc est carentiam visionis beatificæ.

Verum contra ea, quæ assertionem primam dicta sunt, objicitur auctoritas S. Augustini, qui variis in locis loquitur de quadam massa perditionis, & damnationis, in qua omnes homines ob peccatum originale involutos esse censet, & proinde ob solum peccatum originale ab æterno reprobatos, exceptis iis, quos Deus ex illa massa secrevit, & ex mero beneplacito prædestinavit.

Ut non excedamus hic limites compendii, expendendo singula loca, quæ ex D. Augustino allegari solent, duo breviter respondemus.

Primum est, quod, quamvis concederetur, hanc fuisse D. Augustini sententiam, minime tamen teneremur illi adhærere, quia ejusmodi sententia nullius unquam Concilii, vel Pontificis Romani judicio, vel auctoritate firmata est. Imo Coelestinus Papa in Epistola ad Episcopos Galliæ, in qua expresse declaravit, quid in doctrina S. Augustini tenendum esset circa controversias Gratiæ, occasione Semipelagianorum tunc denuo exortas, nullam prorsus illius sententiæ mentionem facit, quamvis illud præsertim caput in doctrina S. Augustini tunc a multis impeteretur. Et in Conciliis Diospolitano, Milevitano, Carthagenensi, Arausicano, & aliis, quæ habita sunt contra errores Pelagianorum, & Semipelagianorum, non modo altum invenitur silentium de illa reprobatione generali ob solum peccatum originale, sed etiam plura in illis reperiuntur, quæ ejusmodi sententiæ omnino repugnant. Unde sequitur, Ecclesiam vel nusquam agnovisse hanc fuisse D. Augustini sententiam, vel si agnovit, illam approbare non fuisse.

Secundum est, D. Augustinum circa ea, quæ mysterium prædestinationis, & reprobationis spectant, mentem suam nusquam aperte declarasse, aut explicasse. Ex quo factum est, ut de illa inter Doctores Catholicos nunquam plane constiterit, cum ab ipsis in diversos, & contrarios sensus accipiatur. Quam ob causam Petrus Lombardus Episcopus Parisiensis non dubitavit dicere lib. 1. sent. dist. 41. *B. Augustinum tam varie, & obscure de prædestinatione locutum fuisse, ut, quid intelligere voluerit, ignoretur.* Eandemque ob causam Claudius de Xaintes Episcopus Ebroicensis in libro Atheismorum Calvinii, tract. 7. asseruit, D. Augustinum non eandem semper sententiam, sed plures, ac plane diversas circa mysterium prædestinationis tenuisse, nec unquam satis mentem suam aperuisse, quod ibi fusius declarat. Quæ cum ita se habeant, non est quod quis corrogatis, & truncatis aliquot D. Augustini testimoniis, & contra illius mentem haud dubie intellectis, stabilire velit, & propugnare sententiam tam aperte Scripturis sacris, & Conciliis repugnantem.

## S E C T I O IV.

*An Prædestinatio ad gloriam sit ante , vel post prævisa merita .*

1. SUMitur hic nomen Prædestinationis, non prout comprehendit præparationem mediorum, seu Gratiarum ad salutem æternam consequendam, sed prout significat tantum electionem ad gloriam. Et in eo sensu quæritur, an Deus omnes salvandos ita prædestinaverit, ut eos absoluta, & efficaci voluntate elegerit ad gloriam, certumque gloriæ gradum, priusquam, secundum nostrum concipiendi modum, ulla eorum merita præviderit, an contra electio illa efficax ad gloriam facta sit propter prævisa bona illorum opera, & finalem in Gratia perseverantiam.

Dux sunt super hac quæstione oppositæ Theologorum sententiæ.

Prima est eorum, qui existimant electionem salvandorum ad gloriam a Deo factam esse absoluta, & efficaci voluntate ante ulla prævisa eorum merita, & virtute illius electionis a Deo præparata, & decreta esse omnia illa gratiæ supernaturalis auxilia, quibus electi ad opera bona illius gloriæ de condigno meritoria efficaciter excitarentur, & adjuvarentur.

Ita Scotus in 1. dist. 41. q. 1. Sot. in c. 9. ep. ad Rom. Bellar. l. 2. de Grat. & lib. arbit. c. 15. Suar. l. 3. de auxil. c. 16. & plures alii.

Probat hęc sententia ab illis, 1. ex Scriptura, quæ aliquibus in locis videtur significare, Deum gratuito ex mera benevolentia prædestinasse ad gloriam, ut S. Luc. 12. *Nolite timere, pusillus grex, quia complacuit Patri vestro dare vobis Regnum.* Rom. 6. *Gratia Dei vita æterna.* Act. 13. *Crediderunt, quotquot erant præordinati ad vitam æternam.* Rom. 8. *Diligentibus Deum omnia cooperantur in bonum iis, qui secundum propositum vocati sunt Sancti.* Nam quos præscivit, & prædestinavit, &c.

Probat 2. auctoritate S. Augustini, quem illi Auctores maxime pro sua sententia stare contendunt, cujus hic citationes ab illis factas recensere (cum in eorum scriptis videri possint) minime necessarium existimavimus.

Probat 3. ratione, quia Deus ordinatissime in suis consiliis, & decretis procedit, ergo prius intendit finem, quam media; atqui gloria se habet per modum finis, merita autem, & bona opera sunt media ad illam; ergo prius intendit absolute illam gloriam electis conferendam, tum iis postea de mediis ad illam consequendam per Gratiæ suæ auxilia providere decernit.

2. Secunda sententia est eorum, qui existimant, electionem absolutam, & efficacem prædestinatorum ad gloriam factam non esse, nisi post prævisionem meritorum, ac finalis in Gratia perseverantiæ.

Huic sententiæ subscribunt Alexander Alensis 1. p. q. 28. n. 3. ar. 3. S. Bo-



Bonav. in 1. dist. 41. q. 2. n. 15. & plurimi alii celeberrimi Doctores tam veteres, quam recentiores, quos citat, & sequitur Lessius in opusc. de prædestin. & reprobat. sect. 2. quibus addere possumus Philipp. Gammachæum in 1. par. S. Th. q. 25. c. 6. & Nicolaum Isambertum ad eandem quæst. disp. 4. art. 2.

Probatur ab illis Auctoribus hæc sententia 1. ex Scriptura. Matth. 20. ubi Christus dicit: *Sedere ad dexteram meam, vel ad sinistram non est meum dare vobis, sed quibus paratum est a Patre meo*, quibus verbis (ut SS. Patres docent) Christus innuit, non favori, & gratiæ, sed laboribus, & meritis paratam esse sessionem in Regno suo. Ita hunc locum explicant S. Epiph. hæres. 69. S. Cyrill. l. 10. thesauri c. 16. & S. Hier. l. contr. Jovin. ubi ait, ideo Christum Dominum ibi dicere, *Non est meum dare vobis*, ut noverit unusquisque mansionem sibi in cælo non ex sola Christi largitate, sed etiam ex propriis operibus esse præparandam. Item S. Matth. 25. *Venite, benedicti, possidere paratum vobis Regnum, &c. esurivi enim, &c.* quibus verbis aperte insinuat, Regnum Coelorum ab æterno esse justis præparatum ob prævisa eorum bona opera, quod patet tum ex particula causali, *Enim*, tum ex eo. quod similiter dicitur reprobis: *Ite maledicti in ignem æternum, qui paratus est diabolo, &c.* Atqui hic ignis non est paratus diabolo, nisi ob prævisa demerita. Ergo nec Regnum est justis præparatum, nisi ob prævisa eorum merita.

Probatur 2. ex S. Hieron. Ep. ad Hedibiam, q. 10. Deus, inquit, *vasa misericordiæ, quæ præparavit in gloriam suam, non irrationabiliter salvat & absque veritate, sed causis præcedentibus, quia alii non susceperunt Filium Dei, alii autem recipere sua sponte voluerunt*. Ex quo ostenditur, non gentes eligi, sed hominum voluntates. S. Ambros. l. 5. de Fide c. 3. *Quorum merita præscivit, eorum præmia prædestinavit*.

\* Honor. Augustodun. in dial. de prædest. to. 19. Bibliot. Pat. postquam dixit, *prædestinationem esse pro meritis cujusque æternam Dei præparationem vel ad gloriam, vel ad pœnam*, hæc addit. Porro qui prævisi sunt in bonis permansuri, ad gloriam sunt prædestinati: qui vero præsciti in malo vitam finituri, ad pœnam sunt utique præordinati. Ergo quos Deus præscivit in Filium suum credituros, & mandata ejus voluntarie servaturos, hoc ante sæcula prædestinavit, &c. quos autem id minime facturos præscivit, hos a Regno gloriæ reprobavit.

Sanctus etiam August. licet contrariæ sententiæ aliquibus in locis favere videatur, in aliis tamen satis aperte asserit, electionem ad gloriam supponere bona opera, & merita electorum, ut l. 1. ad Simplic. q. 2. *Non præcedit electio justificationem, sed electionem justificatio*. Nemo enim *eligitur, nisi jam distans ab illo, qui rejicitur*. Et serm. 7. de ver. Dom. paulo post med. *Quos voluit, hos Deus elegit, elegit autem (sicut dicit Apostolus) & secundum suam gratiam, & secundum illorum justitiam*.

His SS. Patribus merito adjungi potest beatæ memoriæ Franciscus Salesius olim Gebennensium Episcopus, qui in opusculo de Amore Dei

Dei l. 3. c. 5. id expresse docet, & probat ex verbis cujusdam Colletæ, in qua Ecclesia Deum alloquens dicit, *illum misereri omnium, quos suos fide, & opere futuros esse prænoscit*. Quibus verbis ( ut ille dicit ) fatetur Ecclesia gloriam iis esse destinata, quos divina sapientia prævidit Gratiæ suæ vocationis obtemperaturos, & per illam ad Fidem vivam, quæ per charitatem operatur, esse perventuros.

\* Ibidemque ad majorem veritatis illius elucidationem, ordinem Gratiarum, & donorum in Divina, & æterna prædestinatione sic explicat.

*Voluit ab æterno Deus vero, & sincero voluntatis affectu, etiam post prævisum Adæ peccatum, ut omnes homines salvarentur, idque mediis illorum naturæ arbitrio libero præditæ convenientibus. Hoc est, quod omnium illorum salutem voluit, qui auxiliis, & gratiis, quas ipsis ad hunc finem præpararet, offerret, & conferret, consensum voluntatis suæ præbere vellent.*

*Inter illas autem gratias voluit, vocationem primum locum tenere, talemque illam, & ita nostræ esse libertati contemperatam, ut libere illam vel acceptare, vel abjicere possemus. Iis vero, quos Gratiam illam vocationis acceptaturos prævidit, motus internos pœnitentiæ conferre voluit, & rursus iis, qui internis illis motibus assentirentur, charitatis donum tribuere, & illis, qui charitate præditi essent, auxilia ad perseverandum necessaria conferre, & demum iis, quæ auxiliis illis fideliter cooperarentur, ipsam finalem perseverantiam; ac tandem beatam æterni amoris gloriam largiri decrevit.*

## S E C T I O V.

*Quid super quæstione in Sectione præcedenti proposita sentiendum videatur.*

1. **U**T in quæstione difficili, & obscura lucem aliquam afferamus, neque tamen limites nobis propositos excedamus, tria hic breviter pro illius resolutione dicenda sunt.

Primum est, nihil adhuc ab Ecclesia definitum esse super illa quæstione, ac proinde liberum esse unicuique illud tenere, quod sibi probabilius videbitur.

Et quamvis ( ut sincere loquamur ) verum sit, S. Augustinum magis propendere in eam sententiam, quæ dicit, electionem ad gloriam factam esse ante prævisa merita; ejus tamen auctoritas, licet maximi facienda; nullam secum Fidei obligationem invehit, ut satis evidens est, tum ex eo, quod tot maximi nominis Doctores; & maxime Catholici, qui Sectione præcedenti citati sunt, non solum ab hac, sed & ab aliis plurimis S. Augustini sententiis aperte dissident; tum etiam ex iis, quæ idem S. Augustinus pro singulari sua, & prorsus admirabili modestia, & humilitate de seipso, ac scriptis suis dixit variis in locis, & præsertim epist. 7. ad Marcellinum, & in

& in prologo suarum Retractionum. Quandiu enim super aliqua quaestione nihil ab Ecclesia definitum est, unicuique sine cuiusquam praeiudicio in suo sensu abundare permissum est.

Secundum est, licet utraque sententia non solum sit pietati consentanea, sed plurimis tum rationibus, tum auctoritatibus fulciatur; illam tamen, quae asserit, electionem absolutam, & efficacem ad gloriam, nonnisi ratione praevisorum meritorum, a Deo factam esse, videri longe probabiliorem.

\* Tum ob auctoritates, & rationes Sectione praecedenti allatas, tum maxime, quia sententia illa communis fuit omnium SS. Patrum, qui praecesserunt S. Augustinum, ut fatetur S. Prosper eius discipulus Ep. ad eundem S. Aug. quae ejus l. de praed. Sanct. praefixa est, ubi expresse dicit, quod omnium illorum antiquorum Patrum *par invenitur, & una sententia, qua propositum, & praedestinationem Dei secundum praescientiam receperunt, ut ob hoc Deus alios vasa honoris, alios contumeliae fecerit, quia finem uniuscujusque praeviderit, & sub ipso gratiae adiutorio, in qua futurus esset voluntate, & actione, praesciverit.*

3. Eadem etiam sententia communis fuit quamplurimorum SS. Patrum, & Doctorum Graecorum, & Latinorum, qui post S. Augustinum scripserunt, ut videre est apud Less. Opusc. de praedest. & reprob. sect. 2. Communis autem ille Patrum, & Doctorum consensus maximi ponderis apud quemcunque Theologum esse debet ad probandam alicujus sententiae veritatem.

Quae autem pro sententia opposita allata sunt, facile dissolvi possunt.

Ad primum enim locum Scripturae respondendum est, Christum Dominum loqui de complacentia dandi Regnum, non absoluta, sed conditionata, sicut & promissio dandi ejusdem Regni non absoluta, sed conditionata est, ut expresse definivit Conc. Trid. sess. 6. can. 20. Ad secundum, vitam aeternam dici ab Apostolo Gratiam Dei, non quia gratis absolute decreta sit, sed quia per Gratiam Dei obtinenda sit: & praeterea, quia cum talis, & tanta sit, tamen pro valde exiguis operibus ex gratuito Dei beneplacito sit tanquam merces constituta.

Ad tertium dicendum est, praedestinationem illam intelligendam esse non ad gloriam, sed ad Fidem. *Justus enim*, ut ait Apost. Rom. 1. *ex Fide vivit*; & (ut loquitur Christus) *Haec est vita aeterna, ut cognoscant te Deum verum, & quem misisti, Jesum Christum*, id est, haec est quaedam inchoatio vitae aeternae, ut cognoscant Deum per Fidem, quem cognituri sunt postea per visionem beatificam.

Vel respondendum est, illos dici praedeterminatos ad vitam aeternam, qui in illa Apostolorum concione (de qua eo in loco mentio fit) donum Fidei acceperunt, ut ostendatur, donum illud Fidei, quod tunc illis collatum fuit, & per quod Deus illos ad vitam aeternam ordinavit, ac disposuit, omnia illorum merita praecessisse, sicque illos praedeterminatos, hoc est, ante ulla merita ordinatos fuisse,



seu aptos, & idoneos redditos per Fidem gratis acceptam ad vitam æternam per bona opera promerendam.

\* Certe si locus iste Actorum intelligi deberet secundum mentem illorum, qui ex eo probare volunt, prædestinationem efficacem ad gloriam præcedere prævisionem meritorum; ex illo similiter probaretur, vocationem ad Fidem supponere præordinationem ad vitam æternam. Unde sequeretur, nullos, nisi prædestinatos, Fidem habere, & proinde omnes, & quoscunque Fidem habentes esse prædestinatos; quod tamen manifeste repugnat Scripturæ, & damnatur a Conc. Trident. sess. 6. can. 9. Et e contra sequeretur, eos, qui præordinati, seu prædestinati non sunt ad gloriam, nunquam credere, aut Fidem habere, quod æque falsum est.

Ad quartum, verum esse, eos, qui a Deo per gratiam vocantur, ut ex peccatoribus fiant iusti, & sancti, vocari ad illam gratiam, non ex meritis, sed ex gratuito Dei proposito, ut ex antedictis patet; verba autem, quæ sequuntur (*quos præscivit, & prædestinavit*) sic intelligenda esse, *quos præscivit, per vocationem gratiæ suæ fidem, & charitatem habituros, eos prædestinavit, ut essent conformes Filio suo; itaque sicut Filio tribulationes cooperatæ sunt in bonum, ita & illis cooperabuntur*. Ita S. Cyril. apud Oecumenium in hunc locum, S. Ambr. l. 5. de Fide, c. 3. S. Chrysost. hom. 15. in Ep. ad Rom. & alii.

Ad rationem denique respondetur, eum intendere gloriæ collationem, non simpliciter, nec tanquam purum, & gratuitum donum, sed tanquam mercedem, & præmium bonorum operum, & meritorum ut manifeste testatur Scriptura, quæ variis in locis sub nomine mercedis gloriam æternam designat. Unde sequitur, quod Deus nullum ad eam ab æterno efficaciter elegerit, nisi quem bonis operibus, & finali perseverantia illam promeriturum esse prævidit.

4. Tertium denique est, hanc secundam sententiam, quam probabiliorē esse diximus, nullo modo derogare (quod aliqui sine ratione inficiantur) summæ, & omnimodæ illi dependentiæ, quam homo in se agnoscere, & profiteri debet, respectu Divinæ potentiæ, & misericordiæ, in negotio salutis.

Cum illa siquidem stat semper inconcussa veritas illa, quam ut basim, & fundamentum totius Christianæ pietatis sæpius ingerit S. Aug. nimirum nihil in se habere hominem, unde coram Deo gloriari possit, nihil ex se posse in salute sibi procuranda, quod acceptum Deo referre non debeat, nullum ex se meritum proferre, quod Gratia Christi adscribere non teneatur. Decrevit quidem Deus ab æterno gloriam homini ob merita conferre, sed quid ex se mereri potest, qui ne aliquid quidem boni cogitare ex se sufficiens est? Unde cum sine Gratia Divinæ auxilio nihil omnino possit, Gratia autem illa sit ei prorsus indebita, & ex pura tantum Dei misericordia concedatur, sequitur, ut & merita omnia, & gloriæ ipsius præmia tanquam Gratia mune-

munera, & Divinae misericordiae dona debeat agnoscere. Cum autem Gratiā illam Deus non æqualiter, & uniformiter omnibus, sed unicuique, prout vult, largiatur, & uni quidem majorem, alteri minorem, huic efficacem tribuat, illi non item, istum modo speciali ad se trahat, alium simili auxilio non juvet: vere, ac merito cum Apostolo dicere semper debemus: *O altitudo divitiarum sapientiae Dei, quam incomprehensibilia sunt judicia ejus, & investigabiles viae ejus!* ( & ) *Nunquid dicit figmentum ei, qui se finxit: Quid me fecisti sic? an non habet potestatem figulus luti ex eadem massa facere aliud quidem vas in honorem, aliud vero in contumeliam?*

## S E C T I O VI.

*Quinam sint effectus praedestinationis, & reprobationis.*

1. **Q**UAMVIS ( ut recte docet S. Tho. 1. p. q. 23. a. 2. ) praedestinationatio formaliter non sit in praedestinato, sed in Deo praedestinante; nihilominus, in quantum executioni mandatur, aliquos effectus producit in ipso praedestinato: de quibus quaestio proposita intelligenda est. Pro cuius resolutione

Dicendum 1. duos esse in genere effectus praedestinationis, Gratiā scilicet, & Gloriam. Porro, quia Gratia duplex est, una actualis, quae dicitur Gratia vocationis, altera habitualis, quae vocatur Gratia justificationis: hinc factum est, ut primus ille effectus nomine Gratiae comprehensus in duos subdividatur, & sic tres praecipui effectus praedestinationis numerentur, nempe vocatio, justificatio, & glorificatio, juxta Apost. Rom. 8. *Quos praedestinavit, hos & vocavit, & quos vocavit, hos & justificavit, quos autem justificavit, illos & glorificavit.*

Est autem observandum, ad Gratiā vocationis reduci omnia auxilia, & adjumenta non solum interna, sed etiam externa, quae ad justificationem suo modo simul cum internis concurrunt, ut sunt externa Evangelii praedicatio, a parentibus Christianis ortus, & educatio, occasionum peccandi remotio, cum piis, & bonis conversatio, fraterna correctio, & alia similia: ad Gratiā quoque justificationis pertinere omnes alios habitus supernaturales, qui simul cum ipsa Gratia habituali infunduntur, ut habitus Fidei, Spei, Charitatis, & aliarum virtutum supernaturalium, item dona Spiritus Sancti, Gratiās Sacramentales, ac donum finalis perseverantiae: ad glorificationem denique pertinere non solum ipsam visionem beatificam, & amorem beatificum, sed etiam alia dona gloriae accidentalis, quae animam, vel corpus respiciunt. Quae omnia, & similia inter effectus praedestinationis computari debent, tanquam ab illa benevolentia, & charitate provenientia, qua Deus ab aeterno praedestinatos ob Christi merita dilexit, & per quam illis tot, & tanta suae largitatis dona preparavit.

2. Dicendum 1. duos esse tantum effectus reprobationis. Primus est permissio peccati. Unde dicit Apost. Rom. 9. *Quod Deus volens ostendere iram, & notam facere potentiam suam, sustinuit in multa patientia vasa iræ apta in interitum.* Et ad hunc effectum reducitur obduratio, seu excæcatio reprobi, cum nihil aliud sit, quam ipsa peccandi permissio, quatenus Deus permittendo peccatum, simul justa aliqua ex causa subtrahit reprobo peculiare aliquod Gratiæ suæ auxilium, quo ejus cor emolliretur, vel illuminaretur intellectus. Secundus vero effectus reprobationis est æterna ipsius reprobi punitio. Patet ex illis Christi verbis, Matth. 25. *Discedite a me maledicti in ignem æternum.*

Quæres, an etiam peccata ipsius reprobi dici debeant effectus reprobationis?

Respondetur negative, quia effectus reprobationis sunt a Deo reprobante ut a causa; atqui Deus peccatorum causa nec est, nec dici debet, ut jam alia occasione probatum est; & fusius probabitur in Tractatu de Peccatis.

## S E C T I O VII.

*An prædestinatio sit certa, & an a prædestinato cognosci possit.*

1. **Q**uæstionis propositæ, quoad primam illius partem, sensus est, an prædestinatio certo, & infallibiliter effectum suum consequutura sit. Cum autem duplex certitudo distingui possit, una cognitionis, qua Deus certo cognoscit, effectum illius futurum; altera medii, & causalitatis, quatenus medium illius prædestinationis exequendæ tale est, ut eo posito, effectus certo, & infallibiliter futurus sit;

Dicendum 1. prædestinationem electorum ad gloriam esse Deo certissimam certitudine cognitionis.

Probatur ex Apost. 2. ad Timoth. cap. 1. *Firmum fundamentum stat, habens signaculum hoc, Cognovit Dominus, qui sunt ejus.* Id etiam præterea constat ex iis, quæ supra dicta sunt de certitudine, & infallibilitate scientiæ Dei.

Dicendum 2. prædestinationem electorum ad gloriam esse etiam certissimam certitudine medii, & causalitatis. Ita S. Tho. in quæstionibus disputatis de veritate, q. 6. a. 3.

Prob. 1. ex c. 10. S. Joan. ubi Christus de prædestinatis sic loquitur: *Non peribunt in æternum, & nemo rapiet eos de manu mea.*

Prob. 2. ex S. Aug. l. 5. cont. Jul. c. 5. ubi loquens de prædestinatis, *Ex his, inquit, nemo perit, quacunque ætate moriatur. Absit enim, ut prædestinatis ad vitam sine Sacramento Mediatoris finire permittatur hæc vitam.* Et l. de bono persever. c. 14. dicit, quod prædestinatio est præparatio beneficiorum, quibus certissime liberantur quicumque liberantur.

Quoad secundam quæstionis partem,

2. Di-



2. Dicendum 3. neminem posse certo scire, se esse de numero prædestinatorum absque speciali aliqua Dei revelatione.

Hæc propositio est de Fide contra Calvinum lib. 3. Instit. c. 24. §. 8. asserentem, unumquemque Fidelem certa Fide credere debere, se esse prædestinatum.

Refellitur hic error, & veritas nostræ Fidei probatur 1. ex illis verbis Eccl. 9. *Nescis homo, utrum amore, an odio dignus sit, sed omnia in futurum reservantur dubia, & incerta.* Unde merito admonet Apost. 1. Cor. c. 10. *Qui se existimat stare, videat, ne cadat.* Et ad Philipp. 2. *Cum metu, & tremore vestram salutem operamini.*

Probatur 2. ex Conc. Trid. sess. 6. can. 15. & 16. ubi anathema profertur in eum, qui citra specialem revelationem absoluta, & infallibili certitudine crediderit, aut dixerit, se esse de numero prædestinatorum, vel se donum finalis perseverantiæ habiturum.

Probatur 3. ex S. August. lib. de corrept. & Gratia cap. 13. *Quis ex multitudine Fidelium, quandiu in hac mortalitate vivitur, in numero prædestinatorum se esse præsumat?*

Probatur 4. ratione, quia cum prædestinatio ad gloriâ pendeat a finali perseverantia, & ab eo statu, in quo quis futurus est in exitu vitæ, evidens est, neminem certo scire posse, qualis tunc futurus sit, cum ea, quæ futura sunt contingenter, quale est illud, de quo loquimur, nullus naturaliter certo præscire possit.

Quærunt hic aliqui, quomodo certitudo illa, & infallibilitas prædestinationis cum humani arbitrii libertate concordare possit.

Respondetur breviter, cum in prædestinatione duo considerari possint, scilicet præscientia Dei, & decretum conferendi Gratiæ auxilia ad gloriâ promerendam; certum esse, decretum illud non magis arbitrii libertatem lædere, quam ipsam Gratiâ, quæ illius vi confertur, & qua liberum arbitrium non cogitur, nec necessitatur, sed tantum excitatur, & adjuvatur, ut supponimus ex tractatu de Gratia. Quod autem spectat ad præscientiam Divinam, jam supra ostendimus, cum ageremus de scientia Dei, quomodo nullum libertati humanæ afferat præjudicium, sed illam intactam, & illibatam omnino relinquat. Quare diutius non est in hac questione immorandum.

## C A P U T VI.

*De cognoscibilitate Dei, seu de modo, quo ab intellectu creato Deus clare cognosci potest.*

**H**Actenus de Deo egimus, prout a nobis in statu viæ secundum nostrum imperfectum concipiendi modum per Fidem cognosci potest; superest nunc, ut eundem consideremus, prout a Beatis in statu gloriæ clare cernitur.

*An clara Dei cognitio sit intellectui creato possibilis.*

1. **Q**uæstio intelligenda est non de potentia naturali. Certum est enim, nullum intellectum humanum posse naturaliter ad illam claram Essentiæ Divinæ cognitionem pertingere. Unde merito ab Ecclesia proscripti sunt Ætius, & Eunomius, & illorum discipuli Anomæi, qui (ut refert S. Epiphanius hæc. 76.) non minus impie, quam stolide, & perfecte, & clare Dei Essentiam in hac vita se videre, & cognoscere jactabant.

Proposita igitur quæstio intelligi debet de potentia obedientiali, seu an intellectus creatus auxilio aliquo, & lumine supernaturali possit ita confortari, & elevari, ut ad claram, & intuitivam Essentiæ Divinæ cognitionem pertingere queat. Pro cuius resolutione

Dicendum est, claram, & intuitivam Divinæ Essentiæ cognitionem intellectui creato esse possibilem, modo supra explicato.

2. Huic veritati, quæ de Fide est, oppositus est error cujusdam Gregorii Palamæ (de quo frequens mentio est in historia Joannis Cantacuzeni, præsertim l. 2. c. 40.) & aliorum illius asseclarum, nec non & Armenorum quorundam, de quibus agit Richardus Radulphus Archiepiscopus Armacanus lib. 14. de quæst. Armenorum cap. 1. qui omnes tam Græci, quam Armeni negabant, ab ullo intellectu creato Divinam Essentiam, prout in se est, clare cognosci posse.

Refellitur hic error, & veritas nostræ Fidei probatur 1. auctoritate Scripturæ. S. Matth. cap. 5. *Beati mundo corde, quoniam ipsi Deum videbunt.* & cap. 18. *Angeli eorum semper vident faciem Patris mei, qui in cælis est.* S. Joan. cap. 3. *Similes ei erimus, quoniam videbimus eum, sicuti est.* 1. Cor. 13. *Videmus nunc per speculum in ænigmate, tunc autem facie ad faciem; nunc cognosco ex parte, tunc autem cognoscam, sicut & cognitus sum.*

Probatur 2. auctoritate Concilii Florentini in decreto unionis, in quo definitum est, animas iustorum in cælo clara Dei trini, & unius visione & fruitione esse beatas.

Probatur 3. ex S. Gregor. Papa lib. 18. moral. cap. 28. ubi sic loquitur: *Sciendum vero est, quod fuerunt nonnulli, qui Deum dicerent, etiam in illa regione beatitudinis in claritate quidem sua conspici, sed in natura minime videri;* postea Sanctus ille Pater varia Scripturæ loca citat, quibus hunc errorem refellit, & Deum in sua Essentia videri a Beatis probat. Ex S. Iren. lib. 4. cap. 27. *Deus incomprehensibilis visibilem se, & comprehensibilem, & capacem hominibus præstat, ut vivificet percipientes, & videntes se.* & paulo post. *Homines igitur videbunt Deum, & vivent per visionem immortales facti, & pertingentes usque ad Deum.* Ex S. Bern. ser. 4. in festo omnium Sanctorum.

In

*In hoc erit vita æterna, ut cognoscamus Patrem, & Filium, cum Spiritu Sancto, & videamus Deum, sicuti est, non modo sicuti est, id est, non modo sicut inest, nobis videlicet, aut ceteris creaturis, sed sicut est in semetipso.*

Prob. 4. duplici ratione, qua utitur S. Th. 1. p. q. 12. a. 1. Prima, quod vel dicendum est, in Deo repositam non esse beatitudinem nostram, quod falsum est, & Fidei repugnat, vel si in Deo reposita est, debet esse in actu perfectissimo circa Deum ut objectum, qui actus alius esse non potest, quam clara ejus visio. Secunda ratio est, quod naturale desiderium clare Deum videndi nobis inditum sit; cum enim homo intuetur effectum, naturaliter appetit videre causam; at si clara Dei visio non esset possibilis, sequeretur, Deum frustra, & sine ratione desiderium illud naturæ nostræ indidisse, quod omnino dici non debet.

Obiciebant Armeni 1. Apostolum dixisse 1. ad Timoth. c. 1. Deum esse invisibilem; & cap. 6. habitare lucem inaccessibilem, nullumque hominem eum videre posse.

Respondetur (ex mente S. Augustini epist. 12. ad Paulinam, ubi hæc Apostoli verba fuse explicat) illa esse intelligenda de statu Viatorum, non vero Beatorum, hoc est, Deum ab hominibus, quamdiu in hac mortali vita degunt, secundum legem ordinariam, per solas naturæ viresclare videri non posse, juxta illud Exodi 33. *Non videbit me homo, & vivet.*

3. Obiciebant 2. auctoritatem multorum SS. Patrum, præsertim S. Joannis Chrysostomi, Theodoret, Theophylacti, Euthimii, quorum verba refert Sixtus Senensis lib. 5. Biblioth. sanctæ ann. 183. qui denegare videntur, Deum ab ullo intellectu creato clare, ut in se est, videri posse.

Respondetur cum eodem Sixto Senensi, verba illorum Patrum intelligenda esse vel de visione Dei per oculum corporeum, quam fatemur esse impossibilem, vel de clara Dei visione ex solis naturæ viribus, & secundum legem ordinariam, in hac vita, vel de eadem clara Dei visione, etiam in altera vita, quatenus ipsius Essentiæ Divinæ comprehensionem significat, quæ haud dubie cuicunque intellectui creato est omnino impossibilis.

Obiciebant 3. nullam esse proportionem inter Deum, ut clare videndum, & potentiam creatam intellectivam, cum hæc sit finita, ille vero infinitus; unde sequitur, Deum ab intellectu creato clare videri non posse.

Respondetur ex mente S. Doctoris supra, resp. ad 6. verum esse, nullam inter finitum, & infinitum reperiri proportionem, si proportionis nomine intelligatur habitudo certa quantitatis unius ad alteram: at posse aliquam esse proportionem, si per illam quælibet unius ad alterum habitudo intelligatur, qualis est effectus ad causam, potentiæ ad objectum. Et sic potest esse proportio creaturæ ad Deum, in quantum



se habet ad illum, ut effectus ad causam suam, velut potentia ad ob-  
jectum suum. Si enim inter potentiam, & objectum finita aliqua,  
& determinata proportio esse deberet, sequeretur, ne voluntatem  
quidem creatam posse ferri in Deum per actum charitatis supernatura-  
lis, quod tamen evidenter falsum est.

## S E C T I O I I.

*An de facto nunc Beati Essentiam Dei clare videant.*

**S**ensus quæstionis est, an Sanctorum animæ, quæ hinc discedunt ab  
omni peccati rum macula, tum poena perfecte purgatæ, statim at-  
que a corporibus solutæ sunt, clara Dei visione fruuntur, an vero hec  
visio post corporum resurrectionem, aut in aliud tempus differatur.

Partem negantem secuti sunt Millenarii, sic dicti, quod prave in-  
telligentes aliqua verba libri Apocalypseos assererent, Christum Domi-  
num post communem resurrectionem cum Sanctis regnaturum super  
terram mille annis, antequam ad coelestem beatitudinem, ac Divine  
Essentiæ fruitionem illos deducat. Videri potest Lactant. l. 7. Insti-  
tutionum Divin. cap. 29. & S. Hieron. lib. de Scriptor. Eccles. cap.  
28. ubi etiam Tertullianum in eo errore fuisse dicit necnon & Vigi-  
lantium, in eo libro, quem contra eum edidit. Calvinus etiam non  
nisi post communem resurrectionem Beatos in cœlo Dei visione frui-  
turos existimat, lib. 4. Instit. c. 20.

2. Pars vero affirmans, quæ Sanctorum animas nunc in cœlo cla-  
ra Dei visione frui asserit, de Fide est.

Et probatur, ac simul error oppositus refellitur. 1. ex Scriptura S.  
Luc. 23. ubi Christus dixit Latroni secum crucifixo: *Hodie mecum eris  
in Paradiso*, in quibus verbis nomine Paradisi SS. Patres ipsam glo-  
riam, & visionem beatificam intelligunt. Ita S. Ambros. super hunc  
locum, S. Hieron. in c. 9. Zach. & S. August. ep. 57. ubi verba illa eo  
sensu intelligenda esse existimat, ut a Christo dicta sint, non in quan-  
tum homo erat, sed in quantum Deus, cum quo futurus erat latro per  
visionem claram ipsius, quod est esse in Paradiso, id est Paradisi gloria  
& beatitudine frui. Item ex 2. ad Corinth. c. 5. ubi Apostolus sic lo-  
quitur: *Audemus, & bonam voluntatem habemus magis peregrinari a  
corpore, & presentes esse ad Dominum*, hoc est, ut Deum ipsum in-  
tuitive, & facie ad faciem videamus, quo in sensu hæc Apostoli ver-  
ba intelligit S. August. lib. 15. de Trin. cap. 2.

Probatur 2. auctoritate Concilii Florentini in decreto supra citato,  
ubi id expresse definitum habetur.

Probatur 3. ex S. Cypr. l. de exhortatione ad martyrium, ubi sic lo-  
quitur. *Quanta est dignitas, & quanta securitas exire hinc latum, exire  
inter angustias, & pressuras gloriosum, claudere in momento oculos, qui-*  
bus

*bus homines videbantur, & mundus, & aperire eosdem statim, ut Deus videatur, & Christus. S. Aug. l. 12. de Genesi c. 34. ubi dicit, animas Sanctorum esse in Paradiso, five in tertio Coelo, quo raptus fuit S. Paulus, easque in illo Coelo Dei substantiam, Verbumque Deum, per quod facta sunt omnia, infallibiliter videre. Et in l. Medit. c. 22. Felix anima, inquit, quæ terreno resoluta corpore libera cælum petit; secura est, & tranquilla, non timet hostem, neque mortem. Habet enim præsentem, cernitque desinenter pulcherrimum Dominum, cui servivit, quem dilexit, & ad quem tandem lata, & gloriosa pervenit.*

Probatur 4. ratione, Deus, cujus natura bonitas, cujus opus misericordia est, pronior est haud dubie ad remunerandum, quam ad puniendum. Atqui animabus impiorum, statim atque decedunt e corporibus, poenam æternam tam damni, quam sensus infligit, ut patet de divite Epulone S. Luc. 16. cujus anima statim atque a corpore soluta est, in infernum est delata, ibique poenis, & cruciatibus affecta. Ergo multo magis credendum est, illam beatitudinem æternam, quæ in clara Essentiæ suæ visione consistit, animabus Sanctorum, & justorum concedere statim atque ex hac vita perfecte a peccatis purgata migraverint.

Objicies. S. Matth. c. 20. & 25. in parabola operariorum, mercedem nonnisi in fine diei omnibus simul operariis solvi; & Apocal. 6. animas Sanctorum visas esse sub altari, Divinumque responsum accepisse, ut expectarent adhuc modicum tempus, donec compleretur numerus fratrum suorum. Ex quibus locis videtur sequi, visionis beatificæ fruitionem simul omnibus electis concedendam usque in diem Judicii differri.

Respondetur, hæc, & similia Scripturæ loca intelligenda esse de beatitudine totali, & completa, quæ non animæ solum, sed etiam corporis gloriam requirit, quæ quidem ut sic, post corporum resurrectionem in ultimum Judicium secundum legem ordinariam reservatur.

### S E C T I O I I I.

*\* An intellectus creatus indigeat specie aliqua intelligibili ad videndum Deum.*

**S**upponimus de duplici specie quæstionem intelligi posse, de expressa scilicet, aut de impressa. Species expressa est ipsamet conceptio intellectus, per quam sibi ipsi exprimit id quod intelligit, & dicitur etiam verbum mentis, quia per illam speciem expressam intellectus veluti sibi ipsi loquitur. Species impressa est, quæ objectum intellectui repræsentat, ut ab eo cognosci possit. Hoc præsupposito

Dicendum est primo, in cognitione intuitiva, seu visione beatifica Divinæ Essentiæ necessariam esse speciem expressam, seu verbum men-

ris Essentiam Divinam, prout in se est, intellectui creato repræsentans.

Probatur ex eo, quod (ut docet S. Th. 1. p. q. 27. a. 1.) *quicumque intelligit, ex hoc ipso, quod intelligit, producit aliquid intra seipsum, quod est conceptio rei intellectæ ex vi intellectiva proveniens, quæ conceptio dicitur verbum cordis.* Cum igitur cognitio, seu visio Dei fiat per intellectionem, sequitur ex mente S. Doct. quod intellectio illa non aliter formari possit, quam per verbum internum, seu speciem expressam.

Dicendum 2. in visione beatifica Divinæ Essentiæ non dari speciem impressam, seu Beatos ad videndum Deum non indigere ulla specie impressa, quæ ipsis Divinam Essentiam repræsentet.

Probatur hac ratione Non est necessaria species impressa ad repræsentandum objectum, quando ipsummet objectum per se ipsum potest se instar speciei intellectui repræsentare: atqui essentia divina potest instar speciei se repræsentare intellectui Beatorum; ergo &c.

Probatur major, quia quoties admittuntur impressæ species toties, & ideo admittuntur, quia objecta non possunt seipsa instar speciei repræsentare, vel ob defectum proportionis cum facultate cognoscente, quomodo se habent res materiales cum intellectu comparatæ, vel ob defectum unionis cum facultate cognoscente, quando v. g. ab illa facultate sunt distantia, unde in Angelis nullæ a Theologis admittuntur species impressæ ad cognoscendam propriam substantiam, quia hæc seipsam sufficienter repræsentare potest, utpote eorum intellectui maxime proportionata, & intime præsens.

Minor probatur, nimirum, quod Essentia Divina potest se instar speciei repræsentare intellectui Beatorum, quia ipsi tribui possunt ea, quæ necessaria videntur, ut aliquod objectum instar speciei ad sui cognitionem concurrat. Est enim intime præsens ipsi intellectui Beatorum, & præterea est objectum maxime accommodatum, & proportionatum eidem intellectui, non quidem quoad virtutem naturalem ipsius, sed quoad obedientialem, ratione cuius fit, ut quo objectum illud est præstantius, eo magis sit ipsi intellectui accommodatum, & proportionatum, utpote quod eo aptius sit ad ejus supplendam insufficientiam, & infirmitatem adjuvandam.

Dicendum 3. quamvis non detur de facto species intelligibilis impressa in visione beatifica, quæ Divinam Essentiam, prout in se est, repræsentet, possibilem tamen esse ejusmodi speciem.

Probatur, quia in visione beatifica datur de facto species expressa (ut supra dictum est) quæ est actualis repræsentatio Divinæ Essentiæ; ergo etiam dari potest species impressa, quæ eandem Essentiam repræsentet. Quamvis enim hæ duæ species in multis differant, in eo tamen conveniunt, quod utraque repræsentet rem intellectam; unde quoad hoc par est ratio utriusque. Quare si species expressa possibilis est, erit etiam impressa.

Dices. Essentia Divina est infinita; ergo non potest, prout in se est, re-



repræsentari per speciem finitam, cum finiti ad infinitum nulla sit proportio. Respondetur negando consequentiam, quia si Essentia Divina potest, ut in se est, repræsentari per speciem expressam, quæ finita est, poterit etiam per speciem impressam finitam. Est enim par utriusque ratio. Quamvis autem Essentia Divina infinita sit, potest tamen finito modo repræsentari per speciem finitam sicut eadem Essentia, licet in se infinita sit, finito tamen modo cognoscitur per visionem beatificam.

## S E C T I O I V.

*An ad Deum clare videndum intellectus creatus lumine aliquo supernaturali indigeat.*

1. **D**icendum 1. intellectum creatum auxilio aliquo supernaturali indigere, quo confortetur, & elevetur ad claram Dei visionem eliciendam, quod quidem auxilium supernaturale communiter a Theologis Lumen Gloriæ vocatur.

Probatur 1. ex Psal. 35. *Apud te est fons vitæ, & in lumine tuo videbimus lumen.* Apoc. 21. *Claritas Dei illuminabit eam*, scilicet societatem Beatorum videntium Deum, ut explicat S. Thom. q. 12. a. 5. ubi ex his duobus Scripturæ locis probat necessitatem Luminis gloriæ.

Probatur 2. ex Concilio Viennensi sub Clemente V. in quo inter alios errores Begardorum, & Beguinarum, iste quinto loco recensetur, quod *anima non indiget lumine gloriæ elevante illam ad Deum videndum, & eo beate fruendum*: & hoc ibidem tanquam hæreticum damnatur, ut etiam refertur Clementina *Ad nostrum*. tit. de Hæret.

Probatur 3. ex S. August. lib. 1. de peccatorum meritis, & remissione, c. 19. ubi loquitur: *Veruntamen, si percepto Baptismate ex hac vita emigraverit soluto veatu, cui originaliter erat obnoxius, perficietur in illo lumine veritatis, quod incommutabiliter manens in æternum iustificatos præsentis Creatoris illuminat.*

Probatur 4. hac ratione. Si intellectus ad eliciendum actum Fidei supernaturalis in hac vita indiget auxilio aliquo supernaturali, multo magis indigebit ad eliciendum actum visionis beatificæ, cum longe sit perfectior, ac multo magis superemineat naturali facultate ipsius intellectus; atqui certum est, intellectum non posse sine auxilio aliquo supernaturali actum Fidei elicere, ut definitum est in Conc. Trid. sess. 6. can. 2. & 3. & antea definitum fuit in Conciliis contra Pelagium congregatis, ergo a fortiori idem intellectus ad eliciendum actum visionis beatificæ indigebit auxilio aliquo supernaturali. Et illud est, quod a Theologis vocatur Lumen gloriæ.

2. Dicendum 2. Lumen illud gloriæ esse qualitatem habituales intellectui creato ab ipso Deo infusam, illique inhærentem. Ita communiter Theologi, aliquibus exceptis, qui aliter illius Luminis naturam explicant.

Pro-

Probat<sup>ur</sup> assertio hac ratione, quia scilicet per Lumen gloriæ intelligitur donum aliquod, quo intellectus creatus elevatur permanent<sup>er</sup>, & modo sibi connaturali ad Deum clare videndum. Cum enim status beatitudinis sit permanens, debet etiam habere modum sibi convenientissimum, quo intellectus perficiatur permanent<sup>er</sup>, ac reddatur capax per aliquid sibi inhærens ad visionem illam eliciendam, in qua essentialis ejus beatitudo consistit.

Confirmatur ex eo, quod ad actum Fidei eliciendum ipsa Fides habitualis, tanquam lux aliqua subobscura intellectui infunditur, illique inhæret eo fine, ut compleat, & perficiat ejus vim ex se insufficientem ad credendum in Deum. Ergo a pari, imo a fortiori dicendum est, Lumen gloriæ habitualiter inhære<sup>re</sup> intellectui creato, ut compleat, & perficiat ejus vim debilem, & insufficientem ad clare videndum Deum.

Observandum est autem hic, quod quamvis de Fide sit, intellectum creatum indigere aliquo auxilio, seu Lumine supernaturali ad claram Dei visionem eliciendam; ut patet ex Concilio Viennensi supra relato; non est tamen expresse definitum, quid proprie sit illud Lumen, an sit qualitas habitualis inhærens, vel aliquid aliud, quamvis longe probabilius sit id, quod diximus; & oppositum, licet non sit hæreticum, videatur tamen aliquibus Theologis erroneum, ut docet Isambertus ad qu. 12. disp. 2. art. 3.

3. \* Quæres 1. in quem usum necessarium sit Lumen illud gloriæ, quod Beatis datur.

Respondetur, ad hoc esse necessarium, & in eum finem dari, ut compleat, & perficiat inchoatam, & debilem vim intellectus ad videndum Deum, & cum eodem intellectu effective concurrat ad visionem beatificam.

Hæc enim visio duo habet, nimirum quod sit actio quædam vitalis, & quod sit supernaturalis. Ad primum necessarius est intellectus, qui est talis facultas: ad secundum aliqua est in eo necessaria potentia major naturali, quæ ad sola naturalia se extendit, ac proinde virtus aliqua supernaturalis, quæ ipsius intellectus naturali potentiæ superaddita compleat, & perficiat ejus insufficientiam; & hæc est, quæ a Theologis vocatur Lumen gloriæ.

4. Quæres 2. an Lumen illud gloriæ tale sit, vel esse possit, ut non tantum creatum intellectum, sed etiam oculum corporeum elevare queat ad visionem claram Divinæ Essentiæ, seu an oculus corporeus lumine aliquo elevari possit ad Essentiam ipsius Dei videndam.

Respondetur, id fieri omnino non posse. Ita S. August. Ep. 111. & 112. ubi ex professo illud variis tum Scripturæ, tum SS. Patrum Athanasii, Greg. Nazianz. Ambros. & Hieron. auctoritatibus probat. Ratio ejus rei est, quia nulla potentia sua vitali actione extra limites objecti sui versari potest; unde si impossibile est per facultatem corpoream visivam percipere saporem, vel sonum, multo magis percipere rem

rem pure spiritualementem, qualis est Deus. Deinde, si Deus visu corporeo, prout in se est, videri posset, magis adhuc posset sensu interno; unde sequeretur, ipsa bruta animalia capacia fore beatitudinis, quæ in visione Dei consistit, quod absurdum est, & dici non debet.

5. Objicies, Job dixisse cap. 19. *In carne mea videbo Deum Salvatorem meum.* & alio in loco: *Auditus auris audivi te, nunc autem oculus meus videt te.*

Ad primum locum respondetur cum S. August. lib. 22. de Civ. c. 19. Job non dicere, se carne, aut per carnem, id est, oculis carneis visurum Deum, sed in carne, hoc est, post resurrectionem resumpto corpore. Quod autem addit postea, *Quem visurus sum ego ipse, & oculi mei conspecturi sunt*, vel de oculis mentis accipiendum est, vel de visione humanitatis Christi, quem in spiritu tunc prævidebat, & Redemptorem vocabat. Ad secundum locum respondetur cum S. Thom. art. 3. de oculo mentis intelligendum esse, vel potius (ut alii interpretantur) de effectu Divinæ providentiæ erga homines, quem tunc ait se fuisse expertum evidenter, & quasi ad oculum cognovisse, cum antea non nisi auditu, & ex aliorum relatione agnovisset.

## S E C T I O V.

*Quid intellectus Lumine gloriæ illustratus in Divina Essentia videat.*

1. **D**icendum 1. intellectum Lumine gloriæ illustratum videre Dei Essentiam, & simul tres Personas Divinas, ac omnes perfectiones formaliter in Deo existentes.

Probatur 1. ex Scriptura. 1. S. Jo. 3. *Videbimus eum, sicuti est*, quæ verba unanimiter SS. Patres intelligunt de visione beatifica; quæ videtur Deus, sicuti est in seipso. Atqui Deus in seipso est unus in Essentia, trinus in Personis, habetque formaliter in se omnes perfectiones: ergo, &c.

Probatur 2. ex Concilio Florentino in decreto unionis, ubi definitum est, animas justorum recipi in Cœlum, & intueri clare Deum unum, & trinum, sicuti est; unde sequitur, secundum mentem Concilii omnes etiam Divinas perfectiones a Beatis videri, cum non minus Deo conveniat esse, v. g. sapientem, justum, &c. quam esse unum in Essentia, & trinum in Personis.

Probatur 3. hac ratione. Impossibile est aliquid, quod est omnino simplex, & indivisibile, clare, & perfecte videri, quin simul videantur omnia, quæ illi insunt, & cum quibus realiter idem est; atqui Essentia Divina est simplicissima, & omnino indivisibilis, & præterea est idem realiter cum Personis Divinis, & cum omnibus perfectionibus formaliter in Deo existentibus; ergo visa Essentia Divina necessario videntur etiam & Personæ Divinæ, & omnes perfectiones formaliter in Deo existentes.

Di-



Dices, inde consequens fore, Deum a Beatis comprehendí.

Respondetur, id non sequi. Ad comprehensionem enim Dei, præter cognitionem omnium perfectionum, quæ formaliter in eo existunt, requiritur præterea, ut cognoscantur ea omnia, quæ in illo sunt eminenter, seu quæ ab illo extra se produci possunt, atque insuper, ut ipsa Divina Essentia cum illis omnibus, quæ formaliter, vel eminenter in se continet, tam perfecte cognoscatur, quam in se cognoscibilis est. Quod cum solius Dei proprium sit, sequitur illam a nullo intellectu creato posse comprehendí.

2. Dicendum 2. intellectum Lumine gloriæ illustratum, vidento clare Divinam Essentiam videre simul etiam in ea multas alias res præter ipsum Deum. Ita S. Th. 1. p. q. 12. art. 9. & q. 58. art. 6. & cum illo communiter omnes Theologi.

Ad hujus autem assertionis clariorem intelligentiam, notandum est ex S. Doct. Animas beatas duplicem in coelo habere creaturarum rerum cognitionem, unam per proprias illarum species, quas initio beatitudinis a Deo acceperunt, vel per aliquas revelationes, quas de novo accipiunt; alteram vero in Essentia Divina, seu in Verbo Divino. Hæc doctrina sic explicata probatur ex S. Aug. l. 11. de Civ. Dei c. 7. ubi sic loquitur. *Cognitio creaturæ in seipsa (ut ita dicam) decoloratior est, quam cum in Dei sapientia cognoscitur, velut in arte, per quam facta est. Et c. 29. Illi (Beati scilicet) non per verba sonantia Deum discunt, sed per ipsam præsentiam immutabilis veritatis, &c. Ipsam quoque creaturam melius ibi, hoc est, in sapientia Dei, tanquam in arte, qua facta est, quam in ea ipsa, sciunt. Et paulo post enumeratis variis creaturarum coelestium, & terrestrium speciebus adjungit. Omnia hæc aliter in Verbo Dei cognoscuntur a Beatis, ubi habent causas, rationesque suas, secundum quas facta sunt, incommutabiliter permanentes, aliter in seipsis, illic clariore, hic obscuriore cognitione. Sic etiam Bernardus paucis verbis id optime explicat l. 5. de consid. c. 1. Vident (Beati scilicet) Verbum, & in Verbo facta per Verbum, &c. Optimum videndi genus, si nullius egueris ad omne, quod nosse libuerit.*

Probatur etiam hac ratione. Visio beatifica Sanctorum est quædam participatio visionis illius increatæ, qua Deus in essentia sua videt creaturas secundum esse proprium, quod habent, aut habere possunt in seipsis; ergo & Sanctos eodem modo creaturas aliquas in Essentia Divina videre posse censendum est.

3. \* Objicies. Si aliquæ creaturæ videntur in Deo, omnes necessario videbuntur, quia non potior ratio unius, quam alterius, cum omnes æque in Essentia Divina eminenter contineantur, & hæc æque omnes in actu primo repræsentet.

Respondetur, istud consequens non esse; fierique posse, ut vi beatificæ visionis videantur aliquæ tantum creaturæ in Essentia Divina, imo fieri posse, ut ipsa Essentia Divina clare ab aliquo Beato videretur,

tur, absque eo, quod ulla particularis creatura in ea videretur. Unde autem hæc visionis beatificæ differentia proveniat, varie explicant Theologi. Quidam enim asserunt, id provenire ex ipsa Essentia Divina, quæ est speculum voluntarium has, aut illas creaturas, prout ipsi Deo placuerit, unicuique Beatorum repræsentans: alii ex voluntate ipsius Dei ad has potius, quam alias videndas speciali influxu concurrere volentis, prout status, vel meritum cujusque Beati exigit: alii denique ex differentia sive specifica, sive individuali ipsius Luminis Gloriæ, ratione cujus Deus intellectui beato repræsentatur, ut auctor aliquarum creaturarum, & harum potius, quam aliarum.

## S E C T I O VI.

*Quasnam res, præter Deum, in statu gloriæ Beati cognoscant.*

1. **C**Um certum sit ( ut in Sectione præcedenti dictum est ) Beatos non tantum Deum, sed etiam alia multa præter ipsum, sive in ejus Essentia, sive per speciales revelationes, aut alio quovis modo cognoscere; quæritur, quænam sint illæ res, quorum cognitio illis in statu gloriæ competat. Pro cujus resolutione

Dicendum 1. Beatos non cognoscere omnia futura contingentia, nec omnes aliorum liberas cogitationes.

Ita communiter Theologi, estque sententia S. Dionysii, & aliorum SS. Patrum asserentium, Angelos inferiores a superioribus illuminari, & aliquarum rerum nescientia purgari. Et colligitur ex capite 10. Danielis, ubi refertur, unum Angelum beatum per tres hebdomadas restitisse alteri item beato, utroque illorum pro utilitate populi sibi commissi contendente, & quid Deus fieri vellet, nesciente. Et S. Matth. 24. ubi Christus dicit, beatos Angelos judicii extremi neque diem, neque horam scire.

2. Dicendum 2. quemlibet Beatum perfecte, & clare cognoscere omnia Fidei nostræ mysteria.

Probatur ex Apostolo 1. Cor. c. 13. ubi loquens de Fidei mysteriis dicit. *Videmus nunc per speculum in enigmate, tunc autem facie ad faciem.*

Probatur 2. ex S. Greg. l. 18. Moral. c. ult. in fine. *Hæc visio nunc Fide inchoatur, sed tunc in specie perficietur, quando coeternam Dei sapientiam, quam modo per ora prædicantium quasi per decurrentia flumina sumimus, in ipso suo fonte bibemus.* Et S. Aug. l. 20. de Civit. c. 1. *Quid videbimus, nisi Deum, & omnia illa, quæ nunc non videmus credentes? &c. hic credimus, illic videbimus.*

Probatur 3. ex eo, quod præmium debet respondere merito; atqui Fidei meritum in eo præsertim consistit, quod firmiter propter auctoritatem Dei revelantis credantur illa, quæ obscura sunt, & inevi-

inevidentia; ergo Fidei præmium in eo consistere debet, ut eadem illa evidenter, & clare cognoscenda proponantur.

3. Dicendum 3. quemlibet Beatum omnes rerum species, & genera, omniaque scientiarum naturalium objecta cognoscere, seu ea omnia perfecte scire, quæ ab homine, vel Angelo naturaliter sciri possunt. Ita S. Thomas art. 8. in resp. ad 4.

Hoc constat tum ex eo, quod non minus credibile sit, cuilibet Beatorum Deum perfectam rerum omnium scientiam communicaturum, quam communicaverat Adamo in statu innocentiae, ut docet S. Th. q. 94. art. 3. cum status gloriæ longe sublimior, & perfectior sit: tum etiam ex eo, quod cum beatitudo sit status omnium bonorum aggregatione perfectus, requirit, ut intellectus Beati ea omnia cognoscat, quæ requiri possunt ad naturalem sui perfectionem, & ad explendum appetitum sciendi rectæ rationi consentaneum, qui ipsi naturaliter inest. Atqui talis est rerum omnium naturalium cognitio. Ergo, &c.

4. Dicendum 4. quemlibet Beatum ea omnia cognoscere, quæ ad illum speciali modo spectant, v. gr. Angelos hominum custodes scire perfecte ea omnia, quæ ad eorum gubernationem conducere quocunque modo possunt; item quemlibet Sanctum cognoscere omnes orationes, quæ ad illum diriguntur, & omnia, quæ ab hominibus viatoribus in ejusdem honorem fiunt:

Probatur ex illis S. Petri verbis Ep. 2. c. 1. *Dabo operam & frequenter habere vos post obitum meum, ut horum memoriam faciatis*, quibus significat curam, & sollicitudinem, quam servaturum se dicit in statu gloriæ pro salute Fidelium. Unde sequitur, eum in illo statu cognoscere omnia, quæ ad eorum salutem spectare possunt. Hæc enim cognitio ipsi, utpote primo, & summo totius Ecclesiæ post Christum Pastori maxime competit.

Probatur 2. ex Concilio Senonensi in decretis Fidei cap. 13. ubi damnantur Hæretici, qui dicunt, nostras orationes a Sanctis non cognosci, eosque proinde a nobis non debere orari, diciturque, *eum facile intellecturum, quam id falsum sit, qui non ignorat, Sanctis pervium esse omniforme Divinitatis speculum, in quo, quidquid eorum interfit, illucescat.*

Hinc sequitur (quod notandum est) fieri posse, ut aliquis Beatus, qui meritis, ac proinde gloria minor est, plura in statu beatitudinis sciat, & cognoscat, quam alius, qui gradum sanctitatis, & gloriæ superiorem obtinet, quia scilicet illius specialis conditio hanc cognitionem exigit, hujus vero minime. Nec propterea quidquam hujus gloriæ, & felicitati detrahitur: siquidem, ut recte dixit S. Augustinus lib. 5. de Confess. cap. 4. Deum alloquens. *Beatus est, qui te novit, etsi alia nesciat; qui verote, & alia novit, non propter illa beatior, sed propter te solum.*

SE.



## S E C T I O VII.

*An omnes Beati æqualiter Deum videant.*

1. **C**Um (ut ait S. Aug. l. 1. de Trin. c. 9. & 15.) in visione clara Dei sit tota merces, visioque illa sit summum nostrum bonum, unde communiter Theologi essentialem hominis beatitudinem in ipsa Dei visione constituunt, hinc intelligi potest, cum quaeritur, an Beati æqualiter Deum videant, idem esse, ac si quaeratur, an omnes Beati æqualem gloriæ gradum obtineant.

Dicendum est igitur 1. Sanctos in coelo non æquali modo videre Deum, nec æqualiter esse beatos.

Huic veritati, quæ de Fide est, oppositus est error Joviniani, qui (ut testatur S. Hier. l. 2. cont. Jovin.) assererat, nullam esse inter Beatos, sive in ratione meriti, sive in statu gloriæ, inæqualitatem.

Refellitur hic error, & veritas nostræ Fidei probatur. 1. ex Scriptura S. Joan. 14. *In domo Patris mei mansiones multe sunt.* 1. ad Cor. c. 15. *Stella enim a stella differt in claritate, sic & resurrectio mortuorum.* Et c. 3. *Unusquisque propriam mercedem accipiet secundum suum laborem.* Et 2. ad Cor. 9. *Qui parce seminat, parce & metet.*

Probatur 2. ex communi consensu totius Ecclesiæ, quæ sanctissimam Dei Matrem super omnes choros Angelorum in cœlestibus Regnis exaltatam esse prædicat.

Probatur 3. ex S. Greg. l. 4. Moral. c. 31. *Quia in hac vita discretio est operum, erit in illa procul dubio discretio dignitatum.*

2. Objiciebat Jovinianus parabolam operariorum S. Matth. 10. quibus licet inæquali tempore, & labore operantibus, æqualis merces unius denarii reddita est.

Respondetur cum S. Aug. ser. 59. de verb. Dom. c. 4. per æqualitatem denarii cuique operariorum soluti intelligendam esse æqualitatem durationis in beatitudine; hæc enim in omnibus æterna futura est; vel cum S. Th. 1. 2. q. 5. a. 2. per denarium intelligi objectum beatitudinis, quod in se unum, idemque est pro unoquoque Beatorum, scilicet Essentia Divina, quæ eadem ab omnibus clare videbitur. Quæ tamen equalitas durationis, vel objecti non impedit equalitatem visionis, & fruitionis ipsius objecti pro ratione inæqualium meritorum cujuslibet Beati. Etenim, ut recte docet S. Th. 1. p. q. 12. a. 6. ille, qui plus habuerit de charitate, plus participabit de Lumine gloriæ, ex cujus proinde majori, vel minori intensione secundum mentem S. Doctoris provenit major, vel minor perfectio visionis beatificæ.

\* 3. Dicendum 2. licet aliqui Beati Deum perfectius, quam alii videant, nullum tamen illorum altio rem gloriæ gradum desiderare, sed omnes gradu sibi concesso esse contentos.

Id

Id constat tum ex eo, quod Propheta dixit, Psalm. 16. *Satiabor, cum apparuerit gloria tua*, tum etiam ex ratione ipsius beatitudinis, quæ cum in unoquoque Beato, licet inæqualis, sit tamen suo modo perfecta, requirit, ut ipse Beatus sit contentus, & satiatus; alias non esset vere, & perfecte beatus, si aliquod bonum ipsi deesset, quod assequi optaret.

Unde autem proveniat, ut unusquisque Beatus, licet minori gloria donatus, majorem non requirat, nec desideret, licet varieg rationes ab aliquibus Theologis afferantur, probabilissime nobis loqui videntur ii, qui id potissimum provenire asserunt ab ipso amore beatifico, quo cum ipsi Beati longe plus diligant Deum, quam seipsos, & sua propria bona, & commoda, hinc fit, ut magis optent id, quod Deo gratum, & acceptum esse sciunt, quam quod sibi; cum vero concordes sint Dei voluntati, ut premium respondeat merito, hinc fit, ut nihil amplius optent, quam id, quod meritis suis Deus attribuere voluit.

Quæres, quænam præter Divinam voluntatem, & merita cujusque sit proxima causa inæqualitatis, qua Beatorum alii perfectius Deum vident?

Respondetur, causam illam proximam aliam non esse, quam majorem, vel minorem intensiorem Luminis gloriæ. Ratio est, quia licet intellectus concurrat active ad visionem Dei, nihil tamen ex se potest, nisi quatenus, & quantum elevatur per Lumen gloriæ; unde sequitur ex illo solo Lumine inæqualitatem beatificæ visionis esse petendam. Actus enim in sua entitate, & substantia supernaturales excedere non possunt virtutem supernaturalem, a qua producuntur.

## TRACTATUS III.

DE

## SANCTISSIMÆ TRINITATIS

## MYSTERIO.

**C**UM ex omnibus Christianæ Fidei mysteriis nullum sit, quod aut violentius demon jam ab initio nascentis Ecclesiæ impugnaverit, mysterio Sanctissimæ Trinitatis, aut in cujus impugnatione pertinacius perseveraverit, ut satis evincunt Arianorum, Sabellianorum, Patropassianorum, Macedonianorum hæreses, & aliæ similes pestes ex abyssi puteo emissæ, quæ tot in Ecclesia strages edi-

de-

derunt; ideo maximi interest Fidem sanam, & perfectam de tam sublimi, & ineffabili mysterio concipere, & servare, ita ut illius face prælucente verum a falso, certum ab incerto in re tanti momenti discernere valeamus, præsertim cum, ut recte dixit S. August. lib. 1. de Trin. cap. 3. *Nec ullibi periculosius erretur, nec aliquid laboriosius quærat, nec quidquam fructuosius inveniat.*

Et quoniam non humanæ solum, sed etiam Angelicæ mentis captum longe superat, idcirco ad explicandas tam ardui mysterii difficultates non tam humana ratione, quam Fidei auctoritate utendum est.

Atque ut ordine aliquo procedamus, omnia, quæ de adorando illo mysterio dicenda sunt, ad duo capita revocabimus, in quorum 1. agatur de iis, quæ mysterium illud spectant in genere, in 2. de iis, quæ ad singulas Divinas Personas pertinent in particulari.

## CAP. I.

*De iis, quæ spectant ad mysterium Sanctissimæ Trinitatis in genere.*

## SECTIO I.

*An mysterium Sanctissimæ Trinitatis naturali ratione cognosci possit.*

1. **Q**UAMVIS mysterium Trinitatis sit supra rationem naturalem, certum est tamen non esse contra illam. Etenim verum vero repugnare non potest ( ut dicitur in Concilio Lateranensi V. sess. 8. ) nullumque argumentum a ratione naturali contra illius veritatem peti potest, quod non sit solubile. Cum igitur hoc mysterium contra rationem non sit, quæritur, an etiam aliqua ratione naturali cognosci possit. Pro cuius resolutione

Dicendum est, Personarum Trinitatem in unitate Divinæ Essentiæ nulla ratione naturali posse demonstrari.

Huic veritati, quæ de Fide est, opponitur error Raymundi Lulli, qui ( ut refert Nicolaus Emericus in directorio Inquisitorum p. 2. qu. 9. art. 96. ) assererat, omnes articulos Fidei, proindeque Sanctissimæ Trinitatis mysterium, probari posse per rationes necessarias, demonstrativas, & evidentes.

2. Refellitur hic error, & veritas nostræ assertionis probatur 1. ex Scriptura, S. Matth. 11. ubi Christus dicit, quod *nemo novit Patrem, nisi Filius, & cui voluerit Filius revelare.* Et cap. 16. cum S. Petrus Christum alloquens dixisset, *Tu es Christus Filius Dei vivi,* respondit ipse Christus, *Beatus es Simon Bar-ionæ, quia caro, & sanguis non revelavit tibi, sed Pater meus, &c.*

Probatur 2. auctoritate Gregorii undecimi Summi Pontificis, qui supradicti Lulli opinionem damnavit, ut refertur in Præfato Directorio loco citato.

Med. Theol. Pars I.

¶

Prob.



Prob. 3. ex S. Hilario lib. 1. de Trinit. ubi sic loquitur. *Non putet homo, sua intelligentia se consequi posse mysterium Divine generationis.* Et S. August. lib. 8. de Trinit. c. 5. ubi de hoc mysterio loquens; *Prius, inquit, credere debemus, quam intelligere.*

Prob. 4. hac ratione. Omnis cognitio naturalis, quam de Deo habemus, aut habere possumus, ducitur solum ex creaturis a posteriori, & per effectus; atqui nullus est effectus, qui referat nobis, Deum esse unum in Essentia, & trinum in Personis, siquidem omnia opera Dei ad extra tribus personis Divinis communia sunt, & omnino indivisa, nec Deus ad extra operatur ut trinus, sed quatenus unus; ergo Dei opera ad extra nos ad trium Divinarum Personarum notitiam perducere nequeunt, nec ulla proinde ratio ex iis peti potest, quæ Deum esse unum in Essentia, & simul trinum in Personis, demonstret.

Objicies 1. Philosophos quosdam Ethnicos, ut Trismegistum, Platonem, Plotinum, & alios ita locutos fuisse in libris, quos ediderunt, ut videantur aliquam hujus mysterii notitiam habuisse.

Respondetur, Philosophos illos vel tantum locutos fuisse de diversis Essentie Divine proprietatibus, & perfectionibus, non vero de distinctis in una Essentia Divina Personis, vel si aliquam Personarum Divinarum notitiam habuerunt, illam non ex naturali luce, aut proprii ingenii viribus obtinuisse, sed ex libris Mosaicis accepisse, sicut de Platone asserit S. August. lib. 8. de Civit. Dei cap. 12.

Objicies 2. hominem creatum esse ad imaginem Dei, ut dicitur Gen. 1. & in omnibus creaturis reperiri vestigium aliquod SS. Trinitatis, ut docet S. Aug. lib. 7. de Trin. cap. 10. Atqui ex imagine cognosci naturaliter potest prototypus, sicut animal ex vestigio.

Respondetur 1. hanc imaginem in eo consistere, quod homo sit nature intelligentis, sicut Deus; unde ex hoc nihil potest colligi, nec demonstrative concludi de Trinitate Personarum in Deo, ac multo minus ex aliis creaturis, in quibus nihil invenitur, quod ad hujus mysterii notitiam eos ducat, qui illud ignorant.

Respondetur 2. nos ne scire quidem posse, vel in nobis imaginem Dei, vel in aliis creaturis vestigium Trinitatis inveniri, nisi Fides Divina illud revelaret, cum Deus non cernatur in creaturis ut trinus, sed solum ut unus, sicut ex antedictis constat.

## SECTION II.

*An sint plures in Deo Personæ.*

1. **A**D clariorem intelligentiam eorum, quæ tum in hac Sectione, tum in sequentibus de mysterio Trinitatis dicenda sunt; observandum est, nos hic sumere nomen Personæ in ea significatione, in qua communiter a sanctis Patribus sumitur, scilicet (ut loquitur Boe-

Boetius lib. de duabus naturis, & post illum S. Th. 1. p. q. 29. ar. 1. ) pro rationalis, seu intellectualis naturæ individua, & incommuni- cabili substantia, quo etiam in sensu sumitur nomen Hypostasis. Quamvis enim pluries in Ecclesia olim disceptatum fuerit de propria significatione harum vocum, *hypostasis*, & *substantia*, utrum idem essent cum persona, & essentia, ut constat ex S. Greg. Nazianz. orat. 21. & S. Hieron. Epist. 37. ad Damas. aliquibus affirmantibus, in Deo tres esse hypostases, & unam essentiam, aliis id admittere re- nuentibus; nihilominus tamen eo res hæc tandem devenit, ut ex communi Ecclesiæ consensu nomen essentia, & substantia in Divinis pro ipsa natura, & Deitate tribus Personis communi sumeretur, nomen vero hypostasis significaret Personam, seu id, quod unicuique Perso- næ est proprium. Unde in pluribus Conciliis, Chalced. act. 5. & Constant. II. coll. 8. can. 4. quando de unione Verbi Divini cum hu- manitate agitur, illa unio dicitur facta esse secundum hypostasim, hoc est in Persona Verbi, & negatur in Christo esse duas hypostases, hoc est Personas. Hac observatione præmissa, pro quæstionis propo- sitæ resolutione

2. Dicendum 1. plures esse in Deo Personas realiter a se invicem di- stinctas.

Huic veritati, quæ de Fide est, variæ Hæreses olim oppositæ fue- runt, ut Sabellianorum, & aliorum, qui Personas Divinas solis nomi- nibus distingui voluerunt, & unam esse in Deitate Personam, quæ pro diversis officiis diversa nomina sortiretur, sicque Patrem revera pro nobis in Cruce passum, unde & dicti sunt Patropassiani, ut fufius re- fert S. Epiph. Hæres. 62. & S. August. in lib. de Hær. cap. 41.

Hæc Hæresis refellitur, & Fidei nostræ veritas probatur. 1. ex Scri- ptura, in qua fit variis in locis mentio plurium Divinarum Persona- rum, ut Gen. 1. *Dixit, Faciamus hominem ad imaginem, & simili- tudinem nostram*, ubi sermo fit in plurali numero, & ab ipso loquen- te ordinatur ad Personas distinctas, quæ simul cum illo ad creationem hominis operentur. Atqui non possunt aliæ Personæ, quæ ibi collo- quantur, intelligi, quam Divinæ, cum agatur de creatione, quæ solius Dei propria est. Atque ita hunc locum intellexerunt S. Hilar. lib. 5. de Trinit. S. Athanas. orat. contra idola, S. Basil. hom. 10. in Exameron. S. Aug. lib. 12. de Trinit. cap. 6. & alii plures.

3. Dicendum 2. tres esse in Deo Personas, nec plures, nec paucio- res, scilicet Patrem, Filium, & Spiritum sanctum. Hæc propo- sitio de Fide est.

Probat 1. ex his Christi verbis S. Joann. 14. *Ego rogabo Patrem, & alium Paraclitum dabit vobis*, quem locum S. Athanasius orat. contra gregales Sabellii pulchre urget: Cum, inquit, Christus de se lo- quitur, dicit, Ego: cum de Patre dicit, Ille: Cum de Spiritu Sancto, sub- jungit, Alium. Nonne igitur manifesta pertinacia est negare tres? Item

Ep. 1. S. Jo. c. 5. *Tres sunt, qui testimonium dant in Cælo Pater, Verbum, & Spiritus Sanctus, & hi tres unum sunt.* Tres sunt (inquit Apostolus) non Dii, qui plures esse non possunt, non Angeli, aut aliæ creaturæ; ibi enim loquitur de Deo, seu de ipsius Dei testimonio, ut ex verbis sequentibus patet; ergo de tribus Personis intelligi debent, quæ licet inter se distinctæ sint, tamen unum sunt, hoc est, unam naturam, & essentiam habent. Denique S. Matth. cap. 28. apertissime dixit Christus Dominus, baptizandos esse Fideles *in nomine Patris, & Filii, & Spiritus Sancti.*

Prob. 2. ex Concilio Lateranensi sub Innocentio III. in decreto Fidei cap. 1. ubi hæc verba habentur. *Firmiter credimus, & simpliciter confitemur, quod unus solus, & verus Deus, & Pater, & Filius, & Spiritus Sanctus, tres quidem Personæ, sed una essentia, & substantia, seu natura omnino simplex.*

Probatur 3. ex S. Ambros. l. 2. de Fide ad Gratianum c. 4. ubi explicat trisagium ex Isa. cap. 6. *Quid sibi vult, inquit, sub uno nomine trina sanctitatis repetitio? &c. Non dixit semel, ne Filium sequestraret, non bis, ne Spiritum Sanctum præteriret, non quater, ne creaturas adjungeret. Et, ut ostenderet, unam esse Trinitatis Deitatem, cum tertio dixisset (Sanctus, Sanctus, Sanctus) addit singulariter (Dominus Deus Sabaoth.)* Et S. Aug. lib. 1. de Trinit. cap. 4. *Omnes, inquit, quos legere potui, qui ante me de Trinitate scripserunt, hoc intenderunt secundum Scripturas docere, quod Pater, Filius, & Spiritus Sanctus unus, ejusdemque substantiæ inseparabili aqualitate divinam insinuent unitatem, ideoque non sunt tres Dii, sed unus Deus, quamvis Pater Filium genuerit, & ideo Filius non sit, qui Pater est, Filiusque a Patre sit genitus, & ideo non sit Pater, qui Filius est, Spiritusque Sanctus nec Pater sit, nec Filius, sed Patris, & Filii Spiritus, Patri & Filio etiam ipse coequalis.*

Prob. 4. hac ratione, qua S. Athanas. supra, & Tertull. lib. contra Praxeam utuntur. Qui accipit esse ab alio, realiter ab eo distinguitur, quia nihil seipsum producere potest; atqui ex variis Scripturæ testimoniis infra citandis constat, in una Divinitatis substantia esse tres Personas; quarum secunda producitur a prima, & tertia, nempe Spiritus sanctus, a Patre, & Filio; igitur Pater, & Filius, & Spiritus sanctus in una, eademque Divinitatis substantia realiter a se invicem distinguuntur, sicque tres dantur in Deo Personæ.

4. Objicies. Si plures essent in Deo Personæ, quæ realiter essent inter se distinctæ, sequeretur quamlibet illarum non continere omnem perfectionem, proindeque non esse infinite perfectam.

Respondetur, distinctionem illam realem Divinarum Personarum se tenere tantum ex parte relationum, ut postea dicetur, non vero ex parte naturæ, & essentiæ. Unde, etiam si Persona una relative non sit altera, est tamen idem prorsus cum illa essentialiter.

Et



Et hoc modo quidquid est perfectionis in una, est etiam in altera, propter summam, ac simplicissimam Essentiæ Divinæ unitatem. Unde S. Greg. Nazianz. optime dixit Orat. 37. n. 21. *Quamvis Pater non sit Filius, tamen est id, quod Filius.*

Cæterum cum hoc Sanctissimæ Trinitatis Mysterium adeo sublime sit, ut vix ab humano ingenio concipi possit; merito S. Aug. l. 3. cont. Maxim. Arianum, postquam illud explicasset, subjunxit, quod & nos hic apponere possumus: *Qui potest capere, capiat, qui autem non potest, credat, & oret, ut quod credit, intelligat.*

## S E C T I O I V.

*An sint aliquę processiones in Personis Divinis, & quot.*

1. Sensus quæstionis est (supposita illa veritate, quæ sectione præcedenti probata est, nempe tres esse in Deo Personas) an inter illas aliquis ordo processionis reperiatur, seu an una procedat ab altera. Pro cuius resolutione

Dicendum 1. in Personis Divinis reperiri veram aliquam, & proprie dictam processionem. Hęc propositio est de Fide.

Prob. 1. ex Scriptura. S. Joan. 16. ubi Christus Dominus de se loquens dicit: *Exivi a Patre, & veni in mundum*, quo loco prior pars denotat ejus æternam emanationem a Patre. Si enim de sola Incarnatione locutus fuisset (ut recte observat S. August. tr. 42. in S. Joan.) satis fuisset dicere, *Veni in mundum*. Item Mich. c. 5. *Egressus ejus ab initio, a diebus æternitatis*. Item S. Joan. c. 15 dicitur de Spiritu Sancto, *qui a Patre procedit*.

Probatur 2. ex Symbolo Nicæno, quo utitur Sancta Romana Ecclesia, in quo dicitur, *Filium ex Patre natum esse ante omnia sæcula, & Spiritum sanctum ex Patre, Filioque procedere*, item ex Symbolo S. Athanasii, ubi dicitur *Filius a Patre genitus, & Spiritus sanctus a Patre, & Filio procedens*.

Probatur 3. ex SS. Patribus infra citandis, cum in particulari de secundæ, ac tercię Personæ Divinæ processione agetur.

2. Dicendum 2. duas esse in Divinis processionem, nec plures, nec pauciores, scilicet Filii a Patre, & Spiritus sancti a Patre, & Filio. Est de Fide, &

Probatur 1. quia in Scriptura duarum illarum processionum solum mentio fit, ut constat ex dictis, & plenius constabit ex dicendis.

Probatur 2. hac ratione, qua utitur S. Th. q. 27. ar. 5. quia Divinę processionem non accipiuntur, nisi secundum operationes immanentes; atqui in natura intellectuali, qualis est Divina, sunt duę tantum operationes immanentes, nempe intelligere, & velle; ergo sunt duę tantum processionem.

Objic. Processionem quamcunque Divine Personę minime con-

venire, tum quia Persona procedens necessario est ab alio, & non a se, cum tamen repugnet Deum esse, & a se non esse: tum quia quod procedit, producit, produci autem dicit imperfectionem.

Respondetur, non repugnare Deum esse ab alio, qui sit idem numero Deus. Tunc enim Natura Divina, cum sit eadem in producente, & in producto, non producit, sed solum communicatur per productionem Personę. Et hoc nullam dicit imperfectionem, imo summam, & infinitam indicat ipsius Divine Nature in se ipsa fecunditatem.

3. Querunt hic Doctores, an principium immediatum Divinarum illarum processionum sit Nature Divine fecunditas, an vero ejus intellectus, & voluntas.

Durandus existimat, principium illud esse ipsam Naturam Divinam, quatenus infinite fecunda est, non vero quatenus intelligens, & volens. Verum hanc sententiam communiter Doctores rejiciunt, non solum ut minus probabilem, sed etiam ut errori proximam, ac in Fide periculosa, asseruntque unanimiter, Divinas processiones esse per intellectum, & voluntatem. Ita S. Tho. q. 27. art. 1: & S. Bonav. 1. sent. &c

Et constat ex iis Scripture locis, in quibus secunda Persona dicitur Verbum ut S. Jo. 1. Ap. 16. &c. Verbum enim in natura spiritali nihil est aliud, quam completa notitia intellectus. Item ex iis, in quibus vocatur Sapientia, ut Prov. 8. Ezech. 24. Sapientia enim ad solum intellectum pertinet. Item Hebr. 1. ubi vocatur Imago Patris. Ratio enim imaginis proprie intellectui competit, quia cognitio intellectus fit per assimilationem cognoscentis cum objecto, & speciem vitalem expressam. Constat etiam ex aliis Scripture locis, in quibus Spiritus sanctus vocatur Amor, & Charitas Dei, quę quidem spectant ad voluntatem.

Pręterea, nisi dicamus, Filium produci per intellectum, & Spiritum sanctum per voluntatem, non posset explicari, cur productio Filii esset vera generatio, Spiritus sancti non item, ut ex infra dicendis plenius constabit.

## SECTIO V.

*An sint aliquę relationes inter Personas Divinas, quot, & quales.*

**D**icendum 1. aliquas esse relationes reales inter Personas Divinas. Hęc propositio est de Fide.

Probat 1. ex Scriptura, quę pluribus in locis Personas Divinas nominibus relativis Patris, & Filii, & Spiritus sancti exprimit, & appellat, ut constat ex ante dictis. Pater enim, & Filius sunt correlativa, quia Pater est alicujus Filii Pater, & Filius alicujus Patris Filius, similiter Spiritus sanctus est ab aliquo spirante, cumque (sicut dictum est)

est) per modum amoris procedat, relationem necessario dicit ad principium, quia omnis amor est alicujus amantis.

Probatur 2. ex Concilio Toletano undecimo in confessione Fidei, ubi expresse dicitur, Personas Divinas referri relationibus: & Concilio Florentino sess. 18. ubi Joannes Theologus agens partes Latinorum ait, apud omnes Doctores constare, solam in Divinis relationem multiplicare personas.

Probatur 3. ex S. Aug. lib. 5. de Trin. c. 5. ubi dicit, Patrem, & Filium non appellari secundum substantiam, id est, secundum esse absolutum, sed secundum esse relativum, nec Patrem dici ad se, sed ad Filium, nec Filium ad se, sed ad Patrem.

Probatur 4. hac ratione. Divinae Personae distinguuntur inter se realiter, ut de Fide esse supra dictum est; atqui non distinguuntur per Essentiam, cum hæc una, eademque sit in tribus Personis; ergo per reales relationes, cum nullum aliud distinctionis fundamentum in illis reperiri possit.

1. Dicendum 2. esse quatuor relationes reales in Divinis, nec plures, nec pauciores, scilicet Paternitatem, & Filiationem, Spirationem activam, & spirationem passivam. Ita S. Tho. qu. 28. ar. 4. & communiter omnes cum eo Theologi.

Probatur hac ratione, qua utitur S. Thom. Omnis origo, & processio realis unius ab altero exigit necessario duos respectus oppositos, quorum unus sit procedentis ad principium, a quo procedit, alter ipsius principii ad id, quod ab illo procedit; ergo, cum in Divinis duæ sint processiones (ut Sectione præcedenti dictum est) sequitur, esse quoque quatuor relationes reales, unam, quæ est Patris ad Filium, & vocatur Paternitas, alteram, quæ est Filii ad Patrem, & vocatur Filiatio, tertiam, quæ est Patris, & Filii, tanquam unius principii ad Spiritum sanctum, & vocatur spiratio activa, quartam denique, quæ est Spiritus sancti ad Patrem, & Filium, & vocatur spiratio passiva.

3. Dicendum 3. relationes in Divinis distingui inter se realiter. Ita S. Th. ar. 3.

Probatur 1. ex Concilio Toletano undecimo in confessione Fidei, ubi dicitur, in relatione cerni numerum Personarum, hoc est, ideo tres personas in Divinis realiter inter se distingui, quia inter ipsas relationes aliquæ reales inveniuntur. Unde inferitur, etiam relationes ipsas realiter inter se distingui, cum quidquid realiter distinguit unum ab alio, debeat esse realiter distinctum a reali distinctivo illius.

Probatur 2. ex eo, quod dicit Boetius lib. de Trin. quod substantia in Divinis continet unitatem, relatio vero multiplicat Trinitatem; unde sequitur, quod si relationes illæ non distinguerentur ab invicem realiter, non esset in Divinis Trinitas realis, sed rationis tan-



tum, seu per solam mentis operationem, quod Sabellianam Hæresim redoleret.

Probatur insuper ex eo, quod dicit S. Thom. l. c. Ea distinguuntur inter se realiter, inter quæ realis oppositio invenitur: atqui inter relationes Divinas talis oppositio invenitur, cum de ratione relationis cujuslibet sit, ut inter terminos relativos sit oppositio relativa, alioquin nec esset relatio; ergo relationes Divinæ inter se realiter distinguuntur.

Observandum est tamen, spirationem activam, quamvis realiter a spiratione passiva distinguatur, nullo modo distingui a paternitate, aut filiatione, tum quia secundum axioma commune Theologorum, in Divinis omnia unum sunt, nisi ubi obviat oppositio relativa, tum etiam, quia (ut definitum est in Concilio Lateranensi, c. *Damnatus*, sub Innocentio III.) in Divinis non est quaternitas rerum; esset autem, si activa spiratio a Paternitate, & Filiatione realiter distingueretur.

Dicendum 4. relationes Divinas non distingui realiter ab Essentia Divina.

4. Huic veritati, quæ de Fide est, oppositus fuit error Gilberti Porretani, qui, (ut constat ex Concilio Rhemeni sub Eugenio III. & ex S. Bernardo ser. 80. in Cant.) assererat, relationes Divinas ab Essentia Divina distingui realiter, esseque illi velut assistentes, & affixas, quod etiam testatur S. Thom. sup. ar. 2.

Refellitur hic error, & veritas nostræ Fidei probatur 1. auctoritate ipsius Concilii Rhemeni, in quo ut refert Baronius to. 12. ad annum 1148. præfatus error, præsentem, & præsentem ipso Eugenio Summo Pontifice, damnatus est, & in confessione Fidei art. 3. expresse definitum est, nullas in Deo esse relationes, quæ non sint ipse Deus.

Probatur 2. auctoritate SS. Patrum, quos Magister sententiarum fufe citat. l. 1. dist. 8. ar. 31. & præsertim S. Bernardi, qui ex professo in loco supra citato veritatem hujus assertionis, tanquam Fide Divina credendam, contra præfati Gilberti errorem propugnat.

Probatur 3. hac ratione. Si aliqua esset inter Essentiam Divinam, & relationes distinctio, sequeretur, aliquam esse in Deo compositionem, cum in eo plures inter se realiter distinctæ res reperirentur, quod omnimodæ ejus simplicitati absolute repugnat.

5. Dices, inde sequi relationes illas inter se realiter non distingui. Quæ enim sunt eadem uni tertio, sunt eadem & inter se, ut refert axioma Philosophorum; atqui relationes illæ sunt idem realiter cum Essentia Divina, ergo etiam inter se.

Responderetur, dictum axioma verum esse in rebus creatis, & finitis, falsum in præfati mysterio, quod nec Aristoteles novit, nec ullus Ethnicorum Philosophorum cognoscere naturaliter potuit; proindeque illo non obstante, verum esse id, quod Fides docet, Deum esse  
vere

vere unum in Essentia, trinum in Personis, Divinamque Essentiam ob infinitatem suam identificare sibi omnia, cum quibus nullam habet oppositionem, ac proinde omnes Divinas relationes, cum tamen hæ sibi mutuo identificari nequeant ob realem, quam ad invicem habent, oppositionem.

## S E C T I O V.

*An sint admittendæ aliquæ notiones in Personis Divinis, & quæ.*

1. **P**ER notiones hic intelligimus proprietates quasdam Personales, & veluti notas, quibus Personæ Divinæ inter se distinguuntur in ordine ad nostrum intellectum. Circa quæstionem igitur propositam

Dicendum 1. aliquas notiones in Divinis esse admittendas. Ita S. Thom. q. 23. ar. 2. & post illum communiter omnes Theologi.

Constat 1. ex S. August. l. 7. de Trin. c. 6. ubi ait, aliam esse notionem, qua Pater æternus intelligitur ut genitor, aliam, qua dicitur ingenuitus, prioremque ei competere relative ad Filium, posteriorem vero absolute in ordine ad seipsum. Et ex S. Basil. ep. 43. ubi vocat notionem, propriam Personæ formam, & notam, vel characterem, seu signum distinctivum, & dicit, illas notiones esse necessarias, ut de Trinitatis mysterio inconfusa cognitio habeatur.

Const. 2. ex eo quod (ut recte observat S. Doct. supra) necessarium fuit notiones illas excogitare, & admittere ad juvandam intellectus nostri imbecillitatem, ut scilicet pro nostro captu, ac modula per inadæquatos conceptus de Personis Divinis loqui, mysteriumque Trinitatis apte, & distincte explicare possemus, ut ex sequentibus patebit.

2. Dicendum 2. quinque tantum notiones admittendas esse in Divinis, scilicet Innascibilitatem, Paternitatem, Filiationem, Spirationem activam, & Spirationem passivam.

Ita S. Thomas supra art. 3. & communiter omnes Theologi, qui sic illas probant simul, & explicant. Tot dantur notiones in Divinis, quot haberi possunt ex his duobus respectibus (*a quo alius, & qui ab alio*) quia penes eos est omnis distinctio Divinarum Personarum; atqui hi duo respectus solummodo nobis suggerunt quinque notiones nunc enumeratas, quod constat inductione facta per modos, quibus personæ Divinæ innotescunt.

Pater enim tripliciter innotescit. 1. ex eo, quod a nullo est, cum sit ipse principium sine principio, unde existit Innascibilitas. 2. ex eo, quod alius est ab eo per generationem, unde existit Paternitas. 3. ex eo, quod alius est ab eo per spirationem, unde existit communis spiratio activa.

Similiter Filius dupliciter innotescit. 1. ex eo, quod ipse est ab alio per generationem, unde existit Filiatio. 2. ex eo, quod ab ipso est alius per

per spirationem, unde existit activa spiratio, quæ illi communis est, imo formaliter eadem, ac in Patre. Ac proinde supra numeratæ notiones sunt tantum quatuor.

Restat Spiritus sanctus, qui non innotescit per hoc, quod alius sit ab ipso, cum nullam producat Personam, sed tantum per hoc, quod ipse, est ab alio, idque per spirationem, unde existit propria ipsius notio, nempe Spiratio passiva: Ex quibus facile est colligere supradictas quinque notiones.

3. Observandum est autem, ex illis quinque notionibus quatuor esse relationes, scilicet Paternitatem, Filiationem, Spirationem activam, & Processionem, seu spirationem passivam: nam Innascibilitas non est relatio, sed potius negatio relationis, seu productionis passivæ ab altero: eandem vero rem posse simul dici & relationem, & notionem; relationem, quatenus est ratio referendi unam personam ad aliam; notionem, quatenus est ratio dignoscendi unam personam ab alia.

Quæres, cur non ponatur sexta notio, qua designetur, nullam Personam a Spiritu sancto produci, sicut in Patre ponitur Innascibilitas, ut ostendatur, illum ab alia Persona non produci.

Respondetur, talem notionem non esse in Spiritu sancto necessariam. Non enim quælibet negatio debet inter notiones numerari, sed ea solum, quæ aliquam perfectionem, vel dignitatem exhibeat, cuiusmodi est innascibilitas in Patre, quatenus significat, Patrem esse principium totius Deitatis, nec ab alio ullo produci. Ex qua tamen Patris notione non sequitur, quod Pater sit aliis Personis excellentior. Summe enim in omnibus ac perfectissime æqualis est, propter simplicitatem Essentiæ Divinæ, quæ tribus Personis communis est, secumque illas prorsus identificat. Plura super hac re videri possunt apud Magistrum sententiarum l. 1. dist. 27. & 28. ubi & varias sanctorum Patrum sententias fusius refert.

## SECTIO VI.

*\* Quot in Divinis Substantiæ; quot Existentiæ, quot item Subsistentiæ, seu Hypostases admittendæ sint.*

**D**E his nominibus variæ inter Sanctos Patres controversiæ olim fuerunt ob varias illorum acceptiones, de quibus non conveniebant; quamvis de eadem veritate Fidei inter se convenirent, Nunc vero, cum post priscarum illarum controversiarum elucidationem in diversis Conciliis factam, de propria nominum illorum significatione inter Doctores Catholicos certo constet, non erit difficile ad questionem propositam respondere.

Atque in primis, quod spectat ad nomen Substantiæ, cum tripliciter sumi possit, vel pro essentia cuiusque rei, vel pro eo, quod substat ac-

ci.



identibus, vel denique pro eo, quod per se, & non in alio tanquam in subiecto existit:

Dicendum est, si nomen substantiæ sumatur primo modo pro essentia, dici non debere in Deo esse tres substantias, sed unam. Unde Sanctus Hieron. Epist. ad Damasum dicendum asserit, *in Deo tres Personas esse, & unam substantiam.*

Si secundo modo sumatur pro eo, quod substat accidentibus, cum in Deo nulla sint accidentia, sic etiam eo sensu dici non debere, in Deo esse substantiam, seu aliquid, quod substat accidentibus.

Si denique tertio modo sumatur pro eo, quod per se existit, & non in alio tanquam in subiecto, eo sensu dici posse tres Personas Divinas esse tres substantias, ut etiam admittit S. Augustinus lib. 7. de Trin. cap. 6. cum unaquæque Persona per se existat, & non in alio tanquam in subiecto. Quamvis hic loquendi modus, cum sit minime usitatus, usurpari non debeat, præsertim in Catechismis, & instructionibus publicis, ne locus aliquis errori detur.

Quod spectat denique ad nomen Existentiæ, cum existere nihil aliud sit, quam esse actu in rerum natura, dicendum est, admittendam esse unam Existentiæ absolutam communem tribus Divinis Personis, qua ipsa Divinitas existit, nullas vero Existentiæ relativas admitti debere. Quod admittenda sit Existentiæ absoluta in Deo manifestum est, cum Existentiæ actualis sit de conceptu essentiali Divinæ Naturæ. Quod autem præter Existentiæ absolutam nullæ aliæ Existentiæ relativæ in Deo admittendæ sint, quamvis aliqui Theologi contrarium sentiant, probari nihilominus potest 1. auctoritate Sancti Doctoris, qui 3. par. qu. 17. ar. 2. ait, tres Personas Divinas habere *unum esse, seu existere*, & q. 8. de potentia a. 2. ad 11. aperte docet, *Deo non convenire nisi esse absolutum, quo etiam relationes existunt, neque illis convenire aliquod esse, seu existere relativum.*

Probatur 2. hac ratione, quod si in Deo præter Existentiæ unam absolutam essent præterea tres Existentiæ relativæ, essent quoque præter æternitatem unam absolutam tres quoque æternitates relativæ, similiter præter immensitatem unam absolutam tres quoque immensitates relativæ, & sic de aliis similibus attributis; quod tamen a communi SS. Patrum, & Doctorum Catholicorum loquendi modo abhorret.

Quod spectat denique ad Subsistentiam, seu Hypostasim, observandum est, secundum communem sentiendi, & loquendi modum Conciliorum, & Patrum, idem esse subsistentiam Latine, quod est Hypostasis Græce, & proinde non Essentiam, aut substantiam, sed suppositum, seu Personam significare, cum hac tamen differentia, quod secundum usitatam nunc Theologorum acceptionem nomen Hypostasis sumatur pro supposito, seu Persona in concreto, nomen vero subsistentiæ pro forma illa, a qua suppositum denominatur.

Hac observatione supposita, dicendum est, tres esse in Divinis Hy-

postales, tres item Subsistentias relativas, nullam vero Subsistentiam absolutam, quæ tribus Personis communis sit.

Quod sint tres in Divinis Hypostases, manifestum est, cum sint tres Personæ, & nomina Hypostasis, & Personæ pro eodem sumantur.

Quod sint tres Subsistentiæ relativæ, non vero una absoluta, hinc patet, quod Subsistentia est ultimus terminus naturæ constituens Personam; sed in Deo non datur una Persona absoluta, sed tres relativæ; ergo nec dari debet una Subsistentia absoluta, sed tres Subsistentiæ relativæ.

Dicet aliquis. Essentia Divina etiam ut præcisa a Personis, cum sit infinite perfecta, debet habere omnem perfectionem; ergo & Subsistentiam. Respondetur, Essentiam Divinam, ut Essentia est, quamvis in omni genere perfectionis infinita sit, non requirere aliam perfectionem infinitam, quam in ratione Essentiæ, quam etiam habet eo ipso, quo identificat sibi realiter omnia attributa, & omnes perfectiones tam absolutas, quam relativas, non vero requirere, ut in conceptu suo formali includat Subsistentiam, quæ Personæ convenit, & non Essentiæ.

## C A P U T II.

*De Personis Divinis in particulari.*

### S E C T I O I.

*Quanam nomina primæ in Divinis Personæ proprie conveniant.*

1. **E**X variis nominibus, quæ primæ in Divinis Personæ convenire possunt, tria sunt præcipua, de quibus hic nobis agendum est.

Primum est nomen Ingeniti. Cum enim propria primæ Personæ notio (ut ex ante dictis constat) sit Innascibilitas, ex illa derivatum est nomen Innascibilis, sive Ingeniti, quod apud Sanctos Patres ad primam Sanctissimæ Trinitatis Personam designandam adhibetur. Quo quidem nomine non aliud significare voluerunt, quam primam illam Personam a nullo alio principio esse productam; in quo distinguitur a duabus aliis, quæ aliquod suæ productionis principium agnoscunt. Unde S. Basilus lib. 4. contra Eunomium ex hac appellatione Ingeniti argumentum ducit ad probandum, secundam Trinitatis Personam non esse factam, aut creatam, sed esse genitam, quia scilicet frustra alioquin Pater ingenitus appellaretur, si nulla esset Persona genita, cum qua comparatus dici posset Ingenitus; ac potius Increatus, quam Ingenitus dici deberet.

2. Secundum est nomen Patris, quod quidem Patris nomen, Si sumatur in ordine ad creaturas, non est Personæ nomen, sed Essentiæ; proindeque non solum primæ, sed etiam aliis duabus Personis convenit. Eo namque sensu Paternitas in Deo significat ejus bonitatem,

tatem, & providentiam erga creaturas, præsertim rationales, quatenus illas creat, conservat, gubernat, &c. quæ actiones creandi, conservandi, gubernandi, &c. communes sunt toti Trinitati; cum sint actiones ad extra. Deus autem ad extra non operatur ut trinus, sed quatenus unus est. Unde Christus Dominus S. Matth. 23. dicit, *Unus est Pater vester, qui in cælis est*. Et c. 6. jubet nos ita orare, *Pater noster, qui es in Cælis*, ubi nimirum dictio, *Pater*, ex communiori Theologorum sententia sumitur essentialiter, simulque refertur ad tres Personas, non autem ad solum Patrem.

Si vero nomen Patris sumatur in ordine ad internam generationem, tunc soli primæ Personæ competit. Quod patet ex variis Scripturæ locis supra citatis, & adhuc infra citandis, & ex omnibus Fidei Symbolis, in quibus Ecclesia profitetur, primam in Divinis Personam vere, & proprie esse, & dici Patrem, nullique alteri Personæ hoc nomen eo sensu acceptum competere. Unde S. Athanasius in Symbolo suo dicit, *Unus ergo Pater, non tres Patres*. Et S. Cyrill. Alexandr. l. 11. in Jo. explicans illa verba S. Jo. c. 17. *Pater, manifestavi nomen tuum hominibus*, sic loquitur: *Manifestavit nomen Patris Filius, quatenus in eam notionem, ac sinceram contemplationem nos induxit, ut intelligeremus, non solum Deum illum esse revera; ( id enim & ante Christi adventum vulgo prædicabatur per Scripturam Divinam ) sed hoc insuper, præterquam quod Deus est, eundem quoque esse non ementita appellatione Patrem, qui in seipso proprium habet Fætum cum natura sua concurrentem, atque æternum*. Et paulo post subjungit, nomen Patris magis illi convenire, quam nomen Dei. *Hoc enim dignitatis, inquit, illud substantiæ proprietatis notionem continet*.

3. Tertium est nomen Principii, quod quidem duplici modo potest similiter considerari, vel ad extra, & secundum respectum ad creaturas, vel ad intra, & secundum actiones immanentes. Priori modo est nomen essentialiter tribus Personis conveniens eodem modo, quo supra de nomine Patris dictum est. Posteriori vero est notionale, quod primæ, & secundæ Personæ convenit, sed præsertim primæ. Et quidem, quod Patri, & Filio conveniat, patet ex Concilio Florentino sess. ult. & ex Concilio Lugdunensi sub Gregorio X. cap. unico de summa Trinitate, ubi vocabulum Principii dicitur commune Patri, & Filio ad intra, quatenus ambo simul producant Spiritum Sanctum. Quod autem præsertim, ac potissimum Personæ Patris hoc nomen Principii conveniat, ex eo patet, quod solus Pater sit principium sine principio, solus simul producens, & improductus, & a S. Aug. l. 4. de Trinitate c. 20. & S. Athan. orat. contr. Gregales Sabellii, vocatur *Principium totius Deitatis*, non quod ipsa Deitas ab ipso procedat, hoc enim dicere est hæreticum, & damnatum in Concilio Lateranensi sub Innocent. III. cap. 2. sed quia est principium aliarum Personarum, in quibus est tota Dei-



Deitas, & quibus totam Deitatem ipse communicat.

4. Quæres, an sicut Pater dicitur principium, sic etiam possit dici causa Filii, & Spiritus Sancti: item, an possit dici auctor ipsius Filii, & Spiritus Sancti.

Respondetur, quod spectat ad nomen causæ, apud Latinos usum illius nominis non esse admittendum, quamvis apud Græcos Patres nonnunquam nomen causæ, & principii in Divinis indifferenter sumptum reperiatur.

Ratio est, quia hoc nomen causæ secundum communem acceptionem importat diversitatem substantiæ, & dependentiam unius ab altero, ac proinde quandam prioritatem, & posterioritatem naturæ, præsertim si sermo sit de causa efficiente, qualis esset Pater respectu aliarum Personarum, cum nec causæ materialis, nec formalis, nec finalis rationem habere possit.

Quod autem spectat ad nomen auctoris, respondet S. Aug. l. 3. cont. Maximin. cap. 4. *Si propterea Deum Patrem Deo Filio dicis auctorem, quia ille genuit, iste genitus est, quia iste de illo est, non ille de isto, fateor, & concedo: si autem per nomen auctoris minorem vis facere Filium, Patremque majorem, nec ejusdem substantiæ Filium, cujus est Pater, detestabor, & respuam.*

## SECTIO II.

*Quid Fides Catholica de secunda Sanctissimæ Trinitatis Persona credendum proponat.*

1. **L**oquimur hic tantum de iis, quæ ad rectam, & veram Sanctissimæ Trinitatis notitiam pertinent, de Mysterio Incarnationis suo postea loco acturi.

De secunda igitur Sanctissimæ Trinitatis Persona Catholica Fides quinque præsertim veritates docet credendas. Prima est, esse verum, & naturalem Dei Patris Filium, secunda, esse Patri consubstantialem, tertia, esse Patri cœternum, quarta, esse Patri per omnia æqualem, quinta, esse vere, ac proprie unum cum Patre Deum.

His quinque veritatibus opposita fuit olim Hæresis Arii, qui (ut constat ex S. Athanasio variis in locis, ac præsertim in libro de Synodis, & ex quodam opusculo, quod ipse Arius edidit, inscriptoque *Tbalis*) dicebat, Filium Dei nec Deum esse, nec genitum ex substantia Patris, nec proinde ipsi consubstantialem, sed esse creaturam non ab æterno, sed in tempore, ante alias tamen creaturas productam.

2. Hi errores, seu potius blasphemie refutantur, & veritates nostræ Fidei probantur singillatim eo ordine, quo supra propositæ sunt.

Prima quidem, quod scilicet secunda Persona sit verus & naturalis Dei Filius, probatur manifeste ex Scriptura, Psal. 2. ubi Deus Pater Filium alloquens, *Filius meus es tu*, inquit, *ego hodie genui te.*

S. Matth.

S. Matth. 3. *Hic est Filius meus dilectus, in quo mihi bene complacui*; quæ verba sic explicat S. Leo Papa hom. de Transfiguratione: *Hic est Filius meus non adoptivus, sed proprius, non aliunde creatus, sed ex me genitus*. S. Jo. 3. *Sic Deus dilexit mundum, ut Filium suum unigenitum daret*. Quod si non esset naturalis, sed adoptivus, Unigenitus dici non posset, cum plurimi alii sint per adoptionem Filii.

3. Secunda veritas, nempe quod sit Patri consubstantialis, hoc est, ejusdem naturæ, & substantiæ cum ipso, probatur ex his Christi Domini verbis, S. Jo. 10. *Ego, & Pater unum sumus*. Quo quidem testimonio (ut recte dixit S. Aug. tract. 36. in S. Jo.) simul liberamur ab erroribus Arii, & Sabellii, tanquam a Scylla, & Charybdi. Quod enim dicit, *unum*, significat unitatem essentiae, & naturæ, ac proinde consubstantialitatem, quam negabat Arius. Quod autem addit, *sumus*, distinctionem indicat Personarum, quam Sabellius inficiabatur. Hoc eodem testimonio usus est S. Athanasius serm. 4. contra Arianos, & S. Hilarius l. 7. de Trinit.

Eadem veritas expresse definita est in Concil. Nicæno primo adversus Arium, ubi ex decreto Concilii vox *consubstantialis* in Symbolo apposita est; quod quidem Symbolum in aliis postea Conciliis unanimi Patrum consensu receptum est.

4. Tertia veritas, quod sit Patri coæternus, probatur Mich. 5. *Egressus ejus ab initio a diebus æternitatis*: quæ verba S. Hieron. in illum locum, & communiter alii Sancti Patres de generatione Filii Dei interpretantur. Item S. Joan. 1. *In principio erat Verbum*, quo testimonio S. Aug. in illum locum, & alii Sancti Patres usi sunt ad probandam contra Arianos Verbi Divini æternitatem.

5. Quarta veritas, scilicet quod sit Patri per omnia æqualis, probatur ex Apostolo ad Philipp. 2. ubi de Filio Dei loquens dicit, quod *cum in forma Dei esset, non rapinam arbitratus esse se æqualem Deo*, hoc est (ut explicant S. Chrys. & S. Ambr. in hunc locum) cum esset ejusdem naturæ, & substantiæ cum Deo Patre, nihil sibi arrogavit indebitum, cum se existimavit ipsi Deo Patri per omnia æqualem; Unde recte S. Aug. in Ps. 126. c. 14. *Quare, inquit, non est rapina? quia est natura*. Et lib. cont. Maximinum Arianum, occurrens objectioni Arianorum dicentium, Filium esse minorem Patre, quia totum, quod erat, a Patre acceperat: *Non potest, inquit, is, qui accepit, ei, qui dedit, esse inæqualis, quia & hoc accepit, ut esset æqualis*. Nihil enim Patre minus habet ille, qui dicit, *Omnia, quæ habet Pater, mea sunt*.

6. Quinta denique veritas, nimirum quod Filius Dei sit vere, & proprie unus cum Patre Deus, præterquam quod ex ante dictis evidenter sequitur, probari insuper potest ex variis Scripturæ locis, in quibus Filius Dei vere, & proprie Deus vocatur. Isa. 35. *Denu ipse veniet, & salvabit vos, tunc aperientur oculi cecorum, &c.* S. Jo. 20. *Respondit Thomas, & dixit, Dominus meus, & Deus meus*. Ad Rom.

Rom. 9. *Ex quibus est Christus secundum carnem, qui est super omnia Deus benedictus in secula.* 1. S. Jo. 5. *Ut simus in vero Filio eius; hic est verus Deus.* Ex quibus locis, & aliis similibus, cum constet, Filium Dei esse verum Deum; sequitur, ut sit unus, & idem cum Patre Deus, cum plures Dii nec sint, nec esse possint.

Objiciebant Ariani. Quando Filius genitus est, vel erat, vel non erat, si erat, quare genitus est? si non erat, ergo aliquando non fuit; ac proinde nec æternus, nec Deus est.

Respondetur cum S. Basilio, non erat, antequam gigneretur, sed erat, cum gigneretur, semper autem genitus, semper igitur fuit. Unde S. Aug. ep. 34. ad Pascentium, *Semper gignit Pater, & semper nascitur Filius.* Ratio est, quia Filius gignitur in æternitate, quæ est indivisibilis, immutabilis, infinita, coexistens omnibus partibus nostri temporis; cum ergo non possimus illam explicare, nisi per respectum ad nostrum tempus, coexistat autem toti nostro tempori, sit, ut recte dicamus, Filium semper genitum esse, & semper gigni: Quamvis (ut recte observat S. Aug. l. 83. qq. q. 37.) aptius dicatur, semper genitum esse, quam semper gigni. Nam licet semper duret Divinæ generationis actus, tamen semper etiam perfectus est, & consummatus. Et hæc est ratio, quare Christus Dominus Divinam suam generationem explicat per verbum præteriti temporis. S. Joan. 8. *Ego ex Deo processi, & nos in Symbolo credimus genitum, non factum.*

### S E C T I O III.

*Ob quam rationem Filii processio dicatur, & vere sit generatio, Spiritus Sancti vero nec sit, nec dici possit.*

1. **C**UM certissimum sit ex ante dictis, Filii processionem esse veram, & proprie dictam generationem, siquidem ipse procedens est verus, & proprie dictus Dei Filius ex Deo Patre vere genitus, ut pluribus in locis sacræ Scripturæ dicitur, Spiritus Sancti vero processionem nec esse, nec dici posse generationem, cum Filius Dei nec sit, nec dici possit; quærent Theologi, quæ sit hujus differentię ratio.

Communis responsio ea est, quam affert S. Th. 1. p. q. 27. a. 2. & l. 4. cont. Gentes, c. 10. scilicet, quod generatio proprie dicta est origo, seu processio viventis a vivente principio conjuncto secundum similitudinem naturę: processio autem Filii talis est.

In primis enim est processio, seu origo viventis, quia Filius non solum est vivens, sed est ipsa vita. Unde 1. S. Jo. c. 1. vocatur *Verbum vitæ, & vita æterna, quæ erat apud Patrem, & apparuit nobis.* Deinde est a principio vivente, quia Pater, qui per intellectionem notionalem est ejus principium, vita intellectuali perfectissima vivit. Unde S. Jo. 5. dicitur, quod *Pater habet vitam in semetipso.* & S. Matth. 16. dicitur *Filius*



*ius Dei vivi*. Est etiam a principio conjuncto. Filius enim produci-  
tur ex substantia Patris, & cum illo unum est, ut ex dictis Sectione  
præcedenti constat. Denique est secundum similitudinem naturæ,  
quia Filius est perfecta, & expressa imago Patris. Unde vocatur ab  
Apostolo Heb. 1. *Splendor gloriæ, & figura substantiæ ejus*, & Co-  
loss. 1. vocatur *Imago Dei invisibilis*.

Verum ista non solvunt difficultatem initio Sectionis propositam.  
Processio enim Spiritus sancti æque, ac Filii, est origo viventis a  
vivente, ut per se patet; est etiam in similitudinem naturæ, quia per  
omnia & Patri, & Filio æqualis est, & cum illis unus Deus.

Multum laboraverunt sancti Patres in hac difficultate solvenda, &  
varias excogitarunt rationes, cur Filii processio sit vera, & proprie  
dicta generatio, Spiritus sancti non sit.

Omnia optima est, quam affert S. August. lib. 9. de Trin. c. 12.  
ubi dicit, ideo Filium Dei vocari, & esse proprie genitum, seu ve-  
re, & proprie generari, quod procedat per intellectionem, Spiritum  
sanctum vero minime, quod procedat per voluntatem. Quæ ratio ut  
intelligatur,

3. Observandum est, quod quando intelligens seipsum intelligit,  
illud, quod procedit per intellectionem, ex vi suæ processionis pro-  
cedit formaliter simile intelligenti, cum intellectio habeat pro ter-  
mino Verbum internum, quod est species, seu similitudo, vel ima-  
go expressa rei intellectæ. Quod autem procedit per volitionem, non  
est formaliter vi suæ processionis simile volenti, etsi volens se ipsum  
velit, cum volitio sit voluntatis actio, quæ per se non exprimit ullam  
similitudinem sed est potius propensio, & inclinatio quædam erga rem  
volitam, & amatam, juxta illud S. August.

*Amor meus, pondus meum, illo feror, quocunque feror.*

Unde fit, ut, cum Filius procedat a Patre per intellectionem qua  
Pater seipsum intelligit, vi processionis illius formaliter sit in natura  
similis Patri, cum sit Verbum, seu species, & imago expressa ipsius  
Patris, ideoque processio ejus sit vera, & proprie dicta generatio.  
Cum autem Spiritus sanctus per volitionem, & amorem procedat,  
inde fit, ut non sit formaliter vi suæ processionis similis in natura prin-  
cipio, a quo procedit, sed tantum materialiter, id est, quatenus  
terminus ille productus per amorem Patris, & Filii, identificatur  
cum Essentia Divina, quæ ob infinitatem suam identificat sibi omnia,  
quæ in Deo sunt.

Cæterum, quamvis ea ratione utcunque explicetur differentia ini-  
tio sectionis proposita, certior tamen distinguendi ratio non aliunde  
petenda est, quam ex eo, quod ipsa Fides nobis aperte declarat, ni-  
nicum, & unigenitum esse in Divinis Filium, illiusque productio-  
nem proinde vere, & proprie dici generationem, Spiritus sancti ve-  
ro productionem nec esse, nec dici posse generationem, cum ex ea-

dem Fide certum sit, illum nec esse, nec dici posse Patris, & Filii Filium, nec ab illis generari, sed procedere. Quod constat tum ex Scripturis ante relatis, tum ex omnibus Fidei Symbolis, quibus Ecclesia Catholica utitur. Quare humiliter profiteri quisque merito potest cum S. Damasc. l. 1. de Fide c. 10. *Generationem a processione differre, compertum habemus, sed quis sit differentiae modus. ignoramus.* Et cum S. August. l. 3. cont. Maximin. c. 14. *Quid intersit inter nasci, & procedere, inter illam generationem, & hanc processionem, distinguere nescio, non valeo, non sufficio; generationem illam quis enarrabit? & processionem hanc quis enarrabit.*

## S E C T I O I V.

*Quo sensu secunda in Divinis Persona vocetur Verbum.*

1. **I**nter plura nomina, quæ præter ipsum nomen Filii, secundæ in Divinis Personæ variis in locis Scripturæ tribuuntur, unum est, quod aliquam explicationem requirere videtur, scilicet nomen Verbi. Circa quod quæri in primis potest, an Verbum in Divinis sit nomen personale proprium Filii. Verum antequam respondeatur,

Observandum est 1. Verbum hic accipi pro conceptu intellectus, de cuius ratione est, quod ab alio procedat.

Observandum est 2. magnum esse discrimen inter intelligere, & dicere in rebus spiritualibus. Intelligere enim importat solam habitudinem intelligentis ad rem intellectam, at vero dicere importat principaliter habitudinem ad Verbum conceptum, seu ad terminum ipsius intellectiois, in quo nulla importatur originis ratio, in isto vero maxime. His observatis

Dicendum est, Verbum in Divinis, proprie, & stricte loquendo, esse nomen personale proprium Filii.

Probatur 1. ex Scriptura. S. J. 1. *Verbum caro factum est, & alijs in locis.*

Probatur 2. ex S. August. lib. 6. de Trin. cap. 2. *Verbum solum Filius accipitur, & lib. de Hæres. cap. 11. Alogianos recenset inter Hæreticos, quod & facit S. Epiphani. Hæres. 5. eo quod negarent, Verbum in Deo esse proprium Filium Dei.*

Probatur 3. quia Verbum in Divinis, proprie, & stricte loquendo, non est ipsum intelligere, sed est aliquid productum intelligendo, tanquam imago, & expressio rei intellectæ; at in Divinis producere, seu produci ab aliquo pertinet ad rationem nominum personalium, cum Personæ Divinæ secundum originem distinguantur. Ideoque, licet tota sanctissima Trinitas vere sit intelligens, & intellecta, una tamen Persona sola est dicens, quæ profert Verbum, nempe Pater, & una sola, ut Verbum, dicta, nempe Filius. Ut autem clarius hoc intelligatur,

2. Notandum est, duplex esse Verbum unum exterius, quod ore profertur, & de illo hic non agimus, alterum interius, quod mente concipitur, estque ipsius rei intellectæ expressa similitudo. Ut enim docet S. Th. 1. p. q. 7. a. 1. *Quicumque intelligit, ex hoc ipso, quod intelligit, producit aliquid intra se ipsum, quod est conceptio rei intellectæ ex vi intellectiva proveniens, & ex ejus notitia procedens, quam quidem conceptionem vox significat, & dicitur Verbum cordis, significatum verbo vocis.* Sicut autem res alias, sic etiam seipsam mens rationalis intelligere potest. Tunc producit in se quandam sui ipsius expressam imaginem ex se natam, & in se immanentem.

Et eo modo, quanto possumus, concipere debemus, Deum Patrem ab æterno seipsum intelligere, & cognoscere, seque intelligendo, & cognoscendo sui ipsius imaginem expressam intra se producere, non quidem accidentalem, ut in nobis fit, sed sibi consubstantialem, quæ imago Verbum ejus est. Sicque secunda in Trinitate Persona vere, & proprie Verbum est, & dici debet.

Quæres, ex quarum rerum cognitione Verbum Divinum procedat. Antequam respondeatur,

Observandum est, unicam numero in Deo esse cognitionem rerum omnium, nempe Divinæ Essentiæ, Divinarum Personarum, & creaturarum spectatarum tam quoad essentiam, quam quoad existentiam actualem, per eamque Verbum Divinum procedere. Sed cum hæc cognitio, ex qua Verbum procedit, ad illa omnia objecta terminetur, quæstio est, utrum ad hoc ut procedat, necesse sit, per se, & formaliter prædictam cognitionem ad illa omnia terminari, an potius sit satis ad aliqua solum terminari, reliquis, ad quæ terminatur, mere per accidens, & pure concomitanter se habentibus. Hac observatione supposita,

Respondetur breviter, ex variis super hac re Doctorum sententiis, illam videri probabiliorem, quæ asserit, Verbum Divinum procedere ex notitia illa, qua Deus Pater seipsum, Essentiamque Divinam omnesque ejus perfectiones, necnon Divinas Personas, ac denique omnes creaturas possibles cognoscit.

Quod constat ex eo, quod Verbum Divinum procedit ex notitia Patris nobilissima, ac perfectissima, qualis est sola comprehensiva notitia Essentiæ Divinæ; atqui comprehensio Essentiæ Divinæ est cognitio eorum omnium, quæ tum formaliter, tum eminenter in ipsa continentur, cujusmodi sunt ea, quæ supra enumeravimus; ergo Verbum Divinum ex præfata illorum omnium cognitione procedit. Unde recte S. August. lib. 15. de Trinit. cap. 14. Deus Pater, inquit, *non integre, perfecteque seipsum dixisset, si aliquid esset minus in Verbo, quam in seipso.*



## SECTIO V.

*Quid Fides Catholica de tertia in Divinis Persona credendum proponat.*

1. **O**bservandum est, hoc nomen, Spiritus sanctus, duobus modis considerari posse. 1. secundum vim suæ significationis, ut est nomen compositum ex duabus dictionibus, & sic est nomen essentialiale, commune omnibus Personis Sanctissimæ Trinitatis, quia Pater est vere Spiritus, & vere Sanctus, similiter & Filius. 2. prout ex communi usu, & accommodatione Ecclesiæ, sanctorumque Patrum, est unicum nomen ex illis duobus conflatum, & tunc est proprium tertiæ Personæ. Quod constat ex communi usu loquendi tum in Scripturis, tum in Conciliis, & apud SS. Patres, ubi cum enumerantur Divinæ Personæ, tertia illarum nomine Spiritus sancti designatur.

Quod si quæras, cur tertia illa Persona sic vocetur, hanc rationem reddit S. August. lib. 15. de Trin. c. 19. *Quia Spiritus sanctus est communis ambobus, Patri scilicet, & Filio, ideo id vocatur ipse proprie, quod ambo communiter.* Accedit, & alia ratio, quia scilicet procedit per actionem voluntatis; atqui sanctitas proprie ad voluntatem spectat. Nec enim dicitur quis Sanctus ab operatione intellectus, sed solum voluntatis. Pari modo spirare, & spiratus sunt voces specialiter ad voluntates pertinentes, quatenus spirare aliquando significat vehementer amare, aut ardentius desiderare, ut cum vulgo dicimus, aliquem spirare vindictam, aut cædes, contra vero sanctos viros spirare charitatem, pietatem, &c. Et sic peculiari jure, ac titulo tertia in Divinis Persona recte nuncupatur Spiritus sanctus, quia per operationem voluntatis procedit.

2. Hac observatione supposita, de tertia illa Persona seu de Spiritu sancto, tres præsertim veritates Fides Catholica credendas proponit: prima est, illum esse verum Deum, Patri, & Filio consubstantialem, & per omnia æqualem, secunda a Patre & Filio procedere, tertia denique, procedere a Patre, & Filio, tanquam ab unico principio.

Primæ veritati oppositus fuit error Macedonii, & ejus asseclarum, qui (ut refert Sozomenus lib. 4. cap. 26.) asseriebant, Spiritum sanctum non esse Deum, sed aliquam substantiam spiritalem, superiorem omnibus Angelis, creatam a Patre per Filium. Qui error fuit etiam Arrii, qui sicut Filium, ita etiam Spiritum sanctum creaturam dicebat, teste S. Epiph. Hær. 69.

Refellitur hic error, & veritas nostræ Fidei probatur, 1. auctoritate Scripturæ. 1. S. Jo. 5. *Tres sunt, qui testimonium dant in Cælo, Pater, Verbum, & Spiritus Sanctus, & hi tres unum sunt.* Quæ verba clarissime indicant unitatem substantiæ, & Divinitatis in Spiritu sancto, & aliis.

aliis Personis Divinis. S. Matth. c. ult. Christus præcipit, credentes, baptizari in nomine Patris & Filii, & Spiritus sancti; Sacramenta autem conferri non debent, nisi nomine, & auctoritate veri Dei qui solus est Auctor, & largitor Gratiae. S. Marc. 3. ubi dicitur cætera peccata hominibus dimitti, peccata autem in Spiritum Sanctum non remitti neque in hoc sæculo, neque in futuro. Denique Act. 5. S. Petrus increpans Ananiam, quod mentitus esset Spiritui sancto, addit postea, illum non esse mentitum hominibus, sed Deo.

Prob. 2. auctoritate universalis Ecclesiae, quæ in Symbolo Apostolorum profitetur, se credere in Spiritum sanctum æque, ac in Patrem, & Filium. Et in Concilio Constantinopolitano, in quo Macedonii Hæresis proscripta fuit, in Symbolo Fidei dicitur, *Credo in Spiritum Sanctum Dominum, qui cum Patre, & Filio simul adoratur, & conglorificatur*. Et in Symbolo S. Athanasii dicitur, *Deus Pater, Deus Filius, Deus Spiritus Sanctus, & Patris, & Filii, & Spiritus Sancti una est Divinitas, æqualis gloria, &c.*

Probatur 3. ex unanimi consensu SS. Patrum, qui libris integris Spiritus sancti Divinitatem contra Hæreticorum blasphemias propugnaverunt, ut Sanctus Basilius, Sanctus Ambrosius, & Sanctus Augustinus passim in libris de Trinitate, præsertim lib. 1. cap. 6. & alii communiter omnes.

3. Secundæ veritati oppositus est error Græcorum asserentium, Spiritum sanctum a solo Patre procedere.

Refellitur, & veritas nostræ Fidei (scil. quod Spiritus sanctus non tantum a Patre, sed etiam a Filio procedat) probatur 1. auctoritate Scripturæ in qua variis in locis dicitur Spiritus sanctus mitti, & dari a Filio, ut S. Jo. 15. *Cum venerit Paraclitus, quem ego mittam vobis a Patre*, atqui missio in Divinis Personis denotat processionem, ut explicant Sancti Patres. S. Greg. hom. 26. in Evang. *Missio inquit, Spiritus Sancti est ejus processio de Patre, & Filio*, & S. Hilar. l. 8. de Trin. *Spiritus Sanctus mittitur a Filio, quia esse ab illo accipit*. Et cap. 16. S. Joan. Christus Dominus loquens de eodem Spiritu sancto, *Ille, inquit, me clarificabit, quia de meo accipiet*; quem locum de Spiritu sancti processione intellexit S. Ambrosius lib. 2. de Spiritu sancto, & S. Augustinus tract. 99. in S. Joan. cap. 12.

Prob. 2. ex Concil. Ephesino, in quo lecta, & recepta fuit Epist. S. Cyrilli ad Nestorium, tom. 1. c. 14. In ea autem Epist. manifeste dicitur, Spiritum sanctum a Patre, & Filio procedere; & ex Conc. Chalced. act. 5. in qua eadem Epist. S. Cyril. recipitur, & confirmatur; ac denique ex Conc. Florent. sess. 7. & 22. in quo eadem veritas simpliciter, & absolute definita fuit, consentientibus simul Latinis, & Græcis, tamen postea infeliciter Græci ab hac Fide defecerint.

Probari potest ex SS. Patribus, ut S. Basil. lib. 3. cont. Eunomium, S. Chrysost. ho. 4. de Symb. S. Greg. Niss. Epist. ad Alabium, & plu-

ribus aliis, qui unanimiter id docent, & quorum doctrina fuisse in præfato Concilio Florentino declaratur.

Tertia denique veritas, scilicet quod Spiritus sanctus a Patre, & Filio, tanquam ab unico principio, procedat,

Probat 1. auctoritate Conc. generalis Lugdunensis c. unico de Summa Trinitate, & Fide Catholica, ubi expresse definitum est, Spiritum sanctum esse a Patre, & Filio, non tanquam duobus principiis, sed tanquam unico principio, nec duabus spirationibus, sed una: item Concilii Florentini sess. ultima in litteris unionis, ubi dicitur, Spiritum sanctum a Patre, & Filio, tanquam uno principio, & unica spiratione procedere.

Probat 2. ex S. Aug. l. 5. de Trin. cap. 14. ubi sic loquitur, *Sicut Pater, & Filius, & Spiritus Sanctus sunt unus Creator, & unus Dominus, ita Pater, & Filius sunt unicum Spiritus Sancti principium, non duo principia*. Eodem etiam modo loquitur S. Hilar. l. 4. de Trinit. & S. Anselmus libro de processione Spiritus sancti c. 10.

Probat 3. ratione, siquidem in Divinis omnia unum sunt, ubi non obstat oppositio relativa, atqui inter Patrem, & Filium, quatenus spirant, nulla est ejusmodi relativa oppositio, ut per se patet; ergo &c.

Observandum est, quod, quamvis recte dici possit, Spiritum sanctum procedere a duobus vim spirandi habentibus, ac proinde esse duos spirantes, quia scilicet procedit a duobus distinctis Personis, Patre scilicet, & Filio non tamen ideo dici potest, esse duos spiratores.

Ratio hujus discriminis est, quod adjectiva nomina plurali numero efferri possunt, quoties diversa sunt supposita, quamvis non sint diversæ formæ, substantiva vero multiplicari non debent, nisi & forma, quam significant, multiplicetur. Itaque recte dicimus duos habentes vim spirandi, vel duos spirantes adjectiva, quia sunt duæ Personæ, sed non dicimus duo principia, nec duos spiratores substantive, quia unica est veluti forma, & una virtus, per quam spirant.

Dices, S. Hilarium l. 1. de Trin. vocare Patrem, & Filium auctores Spiritus sancti, proindeque eodem modo dici posse spiratores.

Respondetur, apud SS. Patres, quibusdam in locis sensum potius illorum attendi debere, quam verba. Quamvis enim nonnunquam nomina substantiva pro adjectivis usurpentur ad hoc mysterium explicandum, nihilominus substantiva illa modo adjectivo intelligi debent, ut de S. Hilario docet S. Th. p. 1. q. 36. art. 4. ad 7.

## SECTIO VI.

*Quo sensu Spiritus Sanctus vocetur amor.*

1. **A** Duberiores cognitionem eorum, quæ de Spiritus sancti processione dicta sunt, conferre potest explicatio hujus nominis; quod



quod passim in Scripturis, & apud SS. Patres reperitur, quo Spiritus sanctus vocatur Amor. Quod ut distinctius intelligatur,

Prænotandum est, hoc nomen *Amor* in Divinis duplici modo sumi posse, 1. essentialiter pro illo amore, quo tres Personæ Divinæ diligunt se. 2. notionaliter, idque vel active, scilicet pro amore notionali productivo, quo Pater, & Filius producant Spiritum sanctum, vel passive pro amore notionali producto, & tunc est nomen personale soli Spiritus sancti proprium.

Quoniam vero ea, quæ ad voluntatem spectant, in Divinis magis adhuc nos latent, quam quæ ad intellectum, ideo juvabit ea, quæ ad amorem illum Divinum productum pertinent, ex analogia productionis Verbi Divini paucis hic explicare.

Sicut igitur, dum Pater seipsum in Essentia contemplatur, Verbum mentis exprimit, & sic Filium generat, ita dum Pater, & Filius se in unitate Essentiæ diligunt, affectus voluntatis, qui est utriusque amor, simul ab utroque exprimitur, sicque Spiritus sanctus produ-  
citur.

Item sicut intelligere convenit Filio non secus, ac Patri, sed conceptum efformare, seu Verbum dicere soli Patri, ita amare Spiritui sancto convenit non secus, ac Patri, & Filio, sed affectum exprimere, & amorem spirare soli Patri, & Filio.

2. Item sicut Verbum Divinum, seu Filius ex cognitione Essentiæ Divinæ, ejusque perfectionum omnium, nec non trium Personarum Divinarum, ac denique creaturarum possibilium procedit, sic Amor Divinus, seu Spiritus sanctus ex ejusdem Essentiæ Divinæ, perfectionum, Personarum, creaturarumque omnium possibilium dilectione procedit. Nec enim minus perfecte debet esse actio amandi, per quam producit Spiritus sanctus, quam actio intelligendi, per quam gignitur Filius. Quare sicut ista (ut superius dictum est) ad omnia intelligenda, sic & illa ad omnia diligibilia extendi debet.

Ex his patet, quo sensu intelligi debeat id, quod docet S. Th. q. 37. a. 2. cum dicit, Patrem, & Filium diligere se Spiritu sancto. Hoc enim vere, & proprie dicitur, si verbum *diligere* sumatur notionaliter, prout significat spirare amorem, quia scilicet Pater, & Filius relative notionaliter diligunt se invicem Spiritu sancto, tanquam dilectionis suæ termino, & amore producto. Unde S. Aug. l. 6. de Trin. c. 51. dicit, quod Spiritus sanctus est, quo *Genitus a Generante diligitur*, *Genitoremque suum diligit*. Et eodem sensu Synesius hymn. 4. vocat Spiritum sanctum, *Centrum Genitoris, & Geniti*. Et apposite S. Bernardus serm. 8. in Cant. super illa verba, *Osculetur me osculo oris sui*, Si, inquit, recte Pater osculans, Filius osculatus accipitur, non erit abs re Spiritum Sanctum osculum intelligi, utpote qui Patris, & Filii imperturbabilis pax sit, gluten firmum, individuus amor, indivisibilis unitas.

*Qua ratione Persona una in Divinis mitti dicatur ab alia.*

1. **C**ertum est ex Scripturis, secundam, & tertiam Sanctissimæ Trinitatis Personam mitti. Et quidem de Filio constat ex S. Mat. c. 15. *Non sum missus, nisi ad oves, quæ perierunt domus Israel, &* S. Jo. 6. *Misit me vivens Pater, &c.*

De Spiritu sancto etiam S. Jo. 14. *Spiritus sanctus, quem mittet Pater in nomine meo, &c.* 15. *Cum venerit Paraclitus, quem ego mittam vobis.*

Cum igitur hoc verum sit, quæritur, qua ratione Persona Divina dici possit mitti ab alia.

Pro cuius resolutione nihil aptius afferri potest, quam id quod docet S. Tho. 1. p. q. 43. ubi Divinæ missionis rationem sic explicat. Duo in ratione missionis importantur, quorum unum est habitudo missi ad principium, a quo mittitur, aliud est habitudo missi ad terminum, ad quem mittitur. Est autem habitudo missi ad eum, a quo mittitur, quædam ab ipso processio, idque vel per imperium, ut cum servus a Domino mittitur, vel per consilium, ut si Rex dicatur mitti a Consiliariis ad ineundum bellum, vel secundum originem, ut cum flos emittitur ab arbore. Habitudo vero missi ad terminum, ad quem mittitur, est, ut aliquo modo ibi esse incipiat, ita ut vel absolute ibi incipiat esse, quia nempe ibi antea omnino non erat, vel incipiat ibi aliquo modo esse, quo prius non erat. Missio igitur Divinæ Personæ convenire potest, tum quatenus importat ex una parte processionem originis a mittente, tum secundum quod importat ex alia parte novum modum existendi in alio. Sic Filius dicitur a Patre missus in mundum, quia ab ipso Patre procedens incepit in mundo esse per carnem assumptam, quamvis antea in mundo esset, juxta illud S. Jo. *In mundo erat, & mundus per ipsum factus est*, non tamen eo modo, quo coepit esse per Incarnationem.

2. Ex dictis intelligi potest, 1. licet inter creaturas missio aliquam importet minorationem in eo, qui mittitur ab alio, proindeque tollat æqualitatem perfectionis inter utrumque, in Divinis tamen nullam inferre inæqualitatem inter Personam missam, & mittentem, quia fit solum secundum processionem originis absque ulla prioritate, aut posterioritate durationis, vel causæ.

Ubi obiter observandum est, quod cum novus ille modus, quo Divina Persona missa dicitur esse, ubi antea non erat, sit secundum aliquam operationem ad extra, qua aliquid efficit in creatura, nihil autem in creatura operetur, nisi per entitatem suæ naturæ, quam accepit a Persona mittente, seu producente; hinc fit, ut habeat ab ipsa, quod aliquid efficiat in creatura; & sic, cum novo modo incipit esse, ubi non erat,

erat, jure, ac merito illuc a Persona producente mitti censeatur.

Intelligi potest 2. quod, quamvis omnes Divinæ Personæ dici possint venire ad nos juxta illud S. Joan. 14. *Ad eum veniemus, & mansionem apud eum faciemus*, non tamen omnes, aut qualibet illarum a qualibet mitti potest.

Cum enim (ut supra dictum est) missio proprie dicta sit indissolubiliter annexa processioni, & eatenus Persona una mitti ab alia dicatur, quatenus ab ipsa procedit, & per processionem accipit virtutem operandi in aliqua creatura, ut sit aliquo modo in ea, quo antea non erat, hinc sequitur, Personam Divinam non posse mitti, nisi ab aliqua procedat, nec ab aliqua posse mitti, nisi ab illa procedat. Unde fit, ut Filius, & Spiritus sanctus solum mitti dicantur; Filius a solo Patre, a quo solo procedit, Spiritus sanctus vero a Patre, & Filio, eo quod ab utroque procedat.

Quæres, ad quosnam effectus Divina Persona mitti dicatur?

Respondetur, primario, & præcipue mitti ad conferendam gratiam sanctificantem: unde quando Scriptura loquitur de missione alicujus Personæ Divinæ, illum effectum communiter adjungit, ut S. Joan. 5. *Ego veni, ut vitam habeant, & abundantius habeant*, & ad Rom. 5. *Charitas Dei diffusa est in cordibus nostris per Spiritum sanctum, qui datus est nobis*: secundario vero ad omnes alios effectus, quos Persona Divina missa potest varie, & multipliciter in creatura operari. Quo fit, ut missio Divinæ Personæ esse possit vel invisibilis, cum fit solum per productionem interioris Gratiae, sive gratum facientis, sive gratis datæ: vel visibilis, cum aliquid præterea exterius in creatura operatur. Observat autem S. Thomas art. 3. nunquam visibiliter mitti Personam Divinam, quin simul etiam mittatur invisibiliter secundum aliquod Gratiae donum.

## SECTIO VIII.

*Quomodo de Sanctissimæ Trinitatis Mystério sit loquendum.*

1. **Q**UOD Apostolus charissimum sibi Discipulum alloquens dixit 2. Tim. 1. *Formam habe sanorum verborum, quæ a me audisti*, hoc merito quisque attendere debet in omnibus Fidei mysteriis, sed præsertim in Sanctissimæ Trinitatis mysterio, quod sicut aliis sublimius, sic etiam difficilius est, proindeque, quoties de illo loquendum est, cautela major adhiberi debet, ne defectu aut scientiæ, aut advertentiæ verbis minus sanis, aut aptis tanti mysterii veritas, vel sanctitas obscuretur. Hac igitur de causa breviter hic aliquot proponemus regulas communiter ab omnibus Theologis receptas, quibus utile, imo necessarium videtur in hac materia attendere.

Cum autem in qualibet enunciatione duo termini reperiantur, prædica-



dicatum scilicet, & subjectum, videndum est, quoties de hoc mysterio loquendum erit, qua ratione uterque propositionis terminus recte Fidei consonus, & conformis esse possit.

Prima regula. Nomina concreta substantiva, essentialia, id est quibus Essentia Divina, vel aliquod ejus attributum absolutum exprimitur, de tribus Personis Divinis in numero singulari prædicari debent. Ita S. Th. 1. p. q. 59. a. 3. Ex. gr. nomen istud, *Deus*, quod est substantivum essentialia, prædicari non debet in plurali de tribus Personis, sed tantum in singulari. Unde S. Athan. in Symb. inquit, *Deus Pater, Deus Filius, Deus Spiritus sanctus, non tamen tres Dii, sed unus est Deus. Ita Dominus Pater, Dominus Filius, Dominus Spiritus sanctus, non tamen tres Domini, sed unus est Dominus.*

Secunda regula. Nomina adjectiva essentialia, quamvis de Personis Divinis in plurali numero prædicari possint, ut docet S. Thom. 1. c. communiter tamen in singulari numero enunciari debent, quia scilicet substantivo potius modo, quam adjectivo solent usurpari. Hinc est, quod licet ad rigorem dici possit, esse in Trinitate tres omnipotentes, tres æternos, tres increatos, tamen, ut in Symbolo S. Athanasii habetur, conveniat magis dicere, quod Pater, & Filius, & Spiritus sanctus, *non sunt tres omnipotentes, sed unus omnipotens, sicut non tres æterni, aut increati, sed unus æternus, & increatus.*

3. Tertia regula. Nomina concreta, substantiva, essentialia (ut plurimum) pro ipsa Divina Essentia, prout per se in tribus Personis subsistit, aliquando etiam pro qualibet illarum Personarum supponere possunt. Ita S. Thom. art. 4. Ex. gr. in illa propositione Gen. 1. *Creavit Deus cælum, & terram*, nomen *Deus* significat ipsam Divinam Essentiam in tribus Personis subsistentem. In hac vero S. Joan. 3. *Misit Deus Filium suum in mundum*, idem nomen *Deus* sumitur pro prima Trinitatis Persona. Rursus in hac alia Ps. 109. *Dixit Dominus Domino meo*, nomen *Dominus* tam pro prima, quam pro secunda in Divinis Persona sumitur.

Quarta regula. Nomina essentialia in abstracto nunquam supponere possunt pro Divinis Personis. Ita S. Tho. art. 5. Unde in Conc. Lateran. sub Innoc. III. c. *Dominus* reprobantur istæ propositiones, tanquam falsæ, *Essentia generat, & Essentia generatur*. Qua ratione similiter dici non debet, quod Divinitas generet, vel quod Pater producat Divinitatem. Quamvis enim *Deus*, & Divinitas, seu Essentia Divina sit idem secundum rem, seu in sensu identico; non tamen est idem modus significandi utrobique, seu non sunt idem in sensu formali. Hoc enim nomen *Deus*, cum significet Divinam Essentiam, ut in habente illam, ex modo suæ significationis potest supponere pro Persona; at vero hoc nomen *Divinitas*, seu *Divina Essentia*, cum significet Essentiam Divinam, ut formam abstractam, ideo ex modo suæ significationis pro Persona supponere non potest. Porro (ut recte notat S. Do-

Doctōr) ad veritatem locutionum considerare oportet non solum res significatas, sed etiam modum significandi.

Observandum est tamen, aliquando apud Sanctos Patres nomina quædam essentialia in abstracto poni pro Divinis Personis, quæ, ut idem S. Th. monet ar. 5. ad 2. intelligi, & exponi debent per concreta, vel per personalia. V. g. cum apud aliquos legitur, in Divinis sapientiam de sapientia procedere, sensus est, Filium, qui est Sapientia Divina, procedere a Patre, cui hæc Divina perfectio æque, ac Filio competit. Aliquando etiam nomina illa essentialia abstracta Personis Divinis tribuuntur per quandam appropriationem, quod fuse explicat idem S. Doct. ar. 8. Et sic v. g. communiter Potentia tribuitur Patri, Sapientia Filio, Bonitas Spiritui sancto, non quod illa, & similia nomina non sint toti Trinitati communia, sed id fit ad juvandam utcumque intellectus humani imbecillitatem, ut sic facilius veram, & realem distinctionem Personarum Divinarum in perfectissima, & simplicissima Essentiæ Divinæ unitate concipere possit.

## TRACTATUS IV.

# DE CREATIONE ANGELI, ET HOMINIS AC UTRIVSQUE LAPSU.

**O**Mnia, quæ in hoc tractatu explicanda sunt, ad quinque capita revocabuntur, in quorum 1. agetur de creatione rerum in genere, in 2. de creatione Angelorum, eorumque natura, in 3. de Angelorum bonorum merito, & beatitudine, maiorumque lapsu, atque damnatione, in 4. de creatione Hominis, ac innocentiae, seu iustitiæ originalis statu, in 5. denique de lapsu hominis, ac peccato originali.

### CAPUT I.

*De Creatione rerum in genere.*

### SECTIO I.

*An Deus sit causa efficiens rerum omnium.*

1. **S**ensus questionis est, an omnes res aliæ ab ipso Deo sint ab illo, tanquam a causa efficiente, sive per creationem, sive aliæ

alio quocunque modo producantur. Pro cuius resolutione

Dicendum 1. Deum esse rerum omnium auctorem, seu primam causam efficientem.

Huic veritati, quæ de Fide est, oppositi fuerunt olim varii Hæreticorum errores. Alii siquidem dixerunt, mundum hunc, non a Deo, sed ab Angelis conditum fuisse, ut Simon Magus, Menander, & alii apud S. Iren. t. 1. c. 21. & seq. advers. Hæres. Marcion, teste Tertull. lib. 5. advers. eund. opinatus est, materiam primam ex se esse proindeque a Deo non esse productam. Manichæi etiam existimaverunt, res omnes corporeas non a Deo bono, sed a Deo malo esse productas, ut refert S. August. Her. 26. quod etiam asseruerunt Hæretici Albigenes, ut testatur S. Antoninus 3. p. hist. tit. 19. ar. 1.

2. Refelluntur hi, & similes errores, & veritas nostræ Fidei probatur 1. ex Scriptura Ps. 145. *Qui fecit cælum, & terram, mare, & omnia, quæ in eis sunt.* S. Jo. 1. *Omnia per ipsum facta sunt, & sine ipso factum est nihil.* Et Rom. 11. *Ex ipso, & per ipsum, & in ipso sunt omnia.*

Prob. 2. ex omnibus Symbolis, quæ in Conciliis generalibus edita sunt, in quibus universalis Ecclesia semper professæ est, se credere in *unum Deum factorem cæli, & terræ, visibilium omnium, & invisibilium.*

Probatur 3. auctoritate SS. Patrum, Irenæi, Epiphânii, Augustini, & aliorum, qui in libris suis ex professo illos errores proscripserunt, & Fidei nostræ veritatem propugnauerunt. Unus instar omnium hic nobis erit Augustinus, qui lib. 1. de Genesi ad literam c. 14. sic alloquitur, *Catholica Fides præscribit, & certissima ratio docet, nullam naturarum materiam esse potuisse, nisi ab omnium rerum non modo formatarum, sed etiam formabilium inchoatore Deo, atque creatore.*

Probatur 4. hac ratione, quæ est S. Doctoris 1. p. q. 44. a. 1. Id omne, quod habet esse per participationem, est ab eo, quod habet esse per essentiam, cum quidquid in aliquo genere per participationem est tale, sit ab eo, quod in eodem genere est maxime, & perfectissime tale; atqui res omnes extra Deum habent esse per participationem, cum ex seipsis non sint, solus autem Deus per essentiam, cum a seipso sit; ergo omnia, quæ sunt extra Deum, sunt ab ipso tanquam a prima causa sui efficiente.

3. Dicendum 2. non tantum id, quod per creationem productum est, sed etiam id omne, quod per causas secundas continue efficitur, immediate a Deo, tanquam causa prima simul concurrente, produci.

Probatur 1. ex Scriptura Ps. 146. *Qui producit in montibus fœnum, & herbam servituti hominum.* Isa. 25. *Omnia opera nostra operatus est nobis Dominus.* 1. Cor. 12. *Operatur omnia in omnibus.*

Probatur 2. ex S. Aug. Epist. 146. ad Consentium, *Quomodo, inquit, negare poterimus Deum etiam nunc operari cuncta, quæ creantur, cum Dominus dicat, Pater meus usque nunc operatur?* Et paucis interjectis, *Si Deus nunc ista format, quomodo legitur, Priusquam te formarem in utero, novi te?*

Pro-



Probatur 3. hac ratione: quia non aliter aliquid immediate a Deo fieri concipitur, nisi quia Deus immediate illud cognoscit, & immediate vult esse; Deus enim, cum sit purissimus spiritus, non aliter agit, quam intellectu, & voluntate; atqui Deus isto modo se habet etiam respectu eorum, quæ nunc sunt interventu causarum secundarum, cum illa sint entia vera, & bona, proindeque non minus immediate ab ipso solo cognita, & volita, quam ea, quæ ab ipso solo in principio mundi creata sunt.

4. Quæres, per quam actionem Deus effectum aliquem cum causa secunda immediate producat, an scilicet id faciat per eandem actionem causæ secundæ, an per distinctam.

Respondetur, si de actione immanente Dei sermo sit, effectum illum produci vi, & efficacia Divinæ volitionis, prout explicatum est in tractatu secundo, cum de voluntate Dei ageretur: si autem quæstio sit de actione Dei transeunte, respondetur actionem Dei, & causæ secundæ eandem esse realiter, sed tamen formaliter distinctam. Est eadem cum illa realiter; utraque enim unum eundemque simplicem terminum habet, nempe effectum productum, qui totus est a causa prima, & totus a causa secunda. Est distincta formaliter, quia actio illa creaturæ, ut sit dependenter a Deo, dicitur concursus, & operatio Dei, seu causæ primæ, ut vero est a creatura dicitur concursus causæ secundæ.

## SECTIO II.

*An solius Dei proprium sit creare.*

1. **N**Otandum est, verbum creandi duobus modis accipi posse, 1. late, prout significat quamcunque rei effectum, seu productionem, 2. stricte, & proprie, prout significat productionem totius alicujus entis ex nihilo, hoc est ex nullo subjecto præsupposito. Et eo sensu intelligi debet quæstio proposita, an scilicet solius Dei proprium sit aliquid ex nihilo producere. Pro cuius resolutione

Dicendum 1. Fide Catholica credendum esse, res omnes, quæ de facto per creationem productæ sunt, aut producuntur, a solo Deo fuisse creatas, aut de novo creati.

Hæc veritas constat tum ex iis, quæ Sectione præcedenti dicta sunt, tum ex eo, quod in Scripturis passim Deus vocatur *Creator omnium*, ut Eccl. 24. & Mach. 1. dicitur, *Creasse omnia*, ut Ephes. 3. Apoc. 4. *fecisse cælum, & terram, mare, & omnia, quæ in eis sunt*, ut Psalm. 145. Et habetur expresse definitum in Concilio Lateranensi sub Innocentio III. c. 1. Idipsum etiam probant Sancti Patres contra Hæreticorum Sectione præcedenti citatos, S. Basil. l. 4. cont. Eunomium, S. Athan. serm. 3. contra Arianos. S. Aug. l. 3. de Trinit. c. 8. & alii.

2. Dicendum 2. solius Dei proprium esse creare, ita ut nulla crea-  
tura

tura id præstare possit, saltem tanquam causa principalis.

Probatur 1. ex Scriptura. Eccl. 1. *Unus est altissimus Creator omnipotens.* Sap. 13. *A magnitudine speciei, & creaturæ cognoscibiliter poterit Creator horum videri.* Jerem. 32. *Domine Deus, ecce tu fecisti cælum, & terram in fortitudine tua magna.*

Probatur 2. ex SS. Patribus, S. Athan. serm. 3. contr. Arianos, *Administrare servorum est, creare autem solius Dei Verbi, & Sapientiae.* S. Aug. l. 9. de Gen. ad lit. *Creare naturam aliquam tantum nullus potest Angelus, quam nec se ipsum.* S. Cyrill. Alexand. l. 2. in Julianum: *Ea sunt naturæ inaccessæ, quæ propria sunt solius summæ substantiæ, quorum unum esse dicimus efficaciter operari posse ut creatorem, & producere res, quæ aliquando non erant.*

Probatur 3. ratione, qua utitur S. Thom. 1. p. q. 45. art. 5. nimirum quod effectus debet esse a causa eo magis universalis, quo ipse est magis universus; atqui totum esse, quod per creationem producit, est effectus universalissimus; ergo non potest esse nisi a causa universalissima, quæ est Deus.

Porro quamvis hæc ratio, sicut & aliæ, quæ communiter afferuntur a Theologis ad id probandum, plane non convincant, junctæ tamen auctoritatibus supra citatis sententiam in assertione positam si non omnino certam, saltem probabilissimam esse ostendunt.

3. Quæres, an saltem creatura, tanquam causa instrumentalis, possit simul cum Deo concurrere ad creationem alicujus rei.

Respondetur, probabile videri hoc fieri posse, tum quia nulla videtur in hoc reperiri contradiçtio, tum quia de facto verba prolata a Sacerdote concurrunt instrumentaliter physice (ut supponimus ex tractatu de Sacramentis) ad consecrationem Hostiæ; seu ad productionem Corporis Christi in Hostia, quæ quidem productio, ut docet Concilium Tridentinum, fit per conversionem totius substantiæ panis in substantiam Corporis Christi, ad quam conversionem non minor potentia requiritur, quam ad creationem.

### S E C T I O III.

*An aliqua creatura fuerint, vel esse potuerint ab æterno.*

1. **Q**UOD spectat ad primam propositæ quæstionis partem, dicendum est, Fide Catholica credendum esse, neque mundum, neque ullam creaturam fuisse ab æterno, sed omnia, quæ sunt, vel fuerunt, durationis suæ initium habuisse.

Probatur 1. ex Scriptura. Gen. 1. *In principio creavit Deus cælum, & terram*, quo loco per hanc vocem *In principio*, S. Ambros. in Examer. l. 1. c. 3. & S. Aug. l. 11. de Civ. c. 6. & alii communiter intelligunt initium temporis Prov. 8. *Dominus possedit me in initio viarum suarum, antequam quidquam faceret.* S. Jo. 19. *Clarifica me, Pater,*  
clari-

*claritate, quam habui apud semetipsum, priusquam mundus fieret.*

Probatur 2. auctoritate Concilii Lateranensis sub Innocent. III. c. 1. ubi expresse definitur, quod *Deus ab initio temporis utramque de nihilo condidit creaturam, spiritalem, & corporalem.*

Porro quamvis hæc veritas certissima sit, nec de illa dubitare ulli Catholico liceat, est tamen id verum (quod recte docuit S. Th. q. 46. a. 2.) nulla ratione naturali probati posse demonstrative, mundum hunc aliquo in tempore habuisse initium, nosque id non nisi ex Divina revelatione cognoscere certo posse.

2. Jam quod spectat ad secundam quæstionis propositæ partem, an scilicet mundus, aut aliqua creatura ab æterno produci potuerit, variæ sunt super hac re Theologorum sententiæ. Quidam enim absolute id negant, alii contra omnino affirmant, alii autem media via incedentes existimant, eas res, quæ habent esse permanens, & fixum, potuisse ab æterno produci, quæ vero successivum, & fluens, non potuisse: alii denique omnium probabilissime opinantur (quod & S. Doctor innuere videtur supra in resp. ad 8.) nullam implicare contradictionem, ac proinde potuisse ab æterno mundum produci quoad res, cum quarum æterna duratione non sit conjunctum infinitum actu, quoad alias vero non potuisse, eo quod infinitum actu in creatis rebus esse non possit, secumque involvat contradictionem.

## CAPUT II.

*De creatione Angelorum, eorumque natura.*

1. **A**ngelos, hoc est, substantias quasdam spirituales existere, non modo Fides Catholica docet, Scripturæque Sacræ innumeris prope in locis testantur, ut infra dicendis patebit, sed etiam ipsa ratio naturalis suggerit.

Siquidem multi ex Philosophis Ethnicis, licet nulla Fidei luce illustrati, solo tamen rationis ductu id agnoverunt. Unde Tertullianus in Apolog. c. 22. & Cyprianus lib. de Idolorum vanitate, Socratem, & Platonem ita existimasse asserunt, quod & S. Aug. l. 2. de Civit. c. 14. de Labeone, & aliis Ethnicis testatur. Certe Aristot. l. 8. Phys. & 12. Metaphys. id ipsum argumentando colligit, præsertim ex orbium coelestium motu, & agitatione, quorum conversionibus ad perpetuitatem concitandis, & gubernandis necessarium existimavit aliquas præesse substantias spirituales ab omni corporum concretionem abstractas, & separatas.

Unde mirum est, Sadducæos, ut Actorum 23. refertur, in illam Hæresim, vel potius cæcitatem incidisse, ut neque Angelum, neque Spiritum esse crederent, præsertim cum aliunde quinque libros Moyse tanquam Canonicos reciperent, in quibus tamen tam crebra, & manifesta sit Angelorum mentio.



2. Ceterum nomen Angeli, quod a Greco verbo ἀγγέλλειν, id est, nunciare, derivatur, communi usu tum Patrum, tum Ecclesie assumitur ad significandas creaturas illas spirituales, quæ idcirco tali nomine nuncupantur, quod sæpissime a Deo mitti dicantur ad mandata Divina hominibus significanda. Quo etiam sensu per quandam similitudinem Sacerdotes in aliquibus Scripturæ locis Angeli appellantur, eo quod illorum officium præsertim sit Dei voluntatem hominibus nunciare, & declarare.

## S E C T I O I.

*Quandonam Angeli creati sint.*

1. **S**upponimus 1. tanquam Fide Catholica certissimum, Angelos a Deo creatos esse.

Id patet ex Scriptura. Ps. 138. ubi, postquam David Angelos, aliasque creaturas ad laudandum Deum invitavit, de illis omnibus pariter subjungit: *Quoniam ipse dixit, & facta sunt, ipse mandavit, & creata sunt*; quo Psalmistæ testimonio hanc veritatem probat S. August. l. 11. de Civ. c. 9. & Coloss. 1. In ipso condita sunt universa in cælo, & in terra, visibilia, & invisibilia sive Throni, sive Dominationes, sive Principatus, sive Potestates, omnia per ipsum, & in ipso creata sunt.

Supponimus 2. eadem Fide certum esse, Angelos non fuisse creatos ab æterno.

Cum nulla omnino creatura fuerit ab æterno, ut supra probatum est, & probari insuper potest ex eo, quod SS. Patres disputantes contra Arianos communiter inferebant, Filium Dei esse verum Deum, quia Scripturæ manifeste dicunt, illum esse ab æterno, supponentes proinde tanquam certum, & indubitatum, solum Deum esse ab æterno.

His præsuppositis, quæritur, quandonam Angeli creati sint?

Respondetur, tres esse diversas super hac re Sanctorum Patrum sententias. Quidam enim ex illis existimaverunt, Angelos ante mundum corporeum fuisse creatos, ut S. Basilus hom. 1. & 2. in Hexameron. S. Hieron. in c. 1. ad Titum, & alii, quos refert Sixtus Senensis l. 5. Biblioth. annot. 5. Quidam vero opinati sunt, illos fuisse creatos post mundum corporeum, sicut anima primi hominis creata fuit post ejus corpus; ita Gennadius, & Acacius, (ut refert Lipomanus in catena sua in Genes. Alii denique asseruerunt, creatos illos fuisse simul cum mundo corporeo, ut S. Epiphanius Hær. 65. S. Aug. l. 11. de Civ. c. 9. S. Greg. l. 32. Moral. c. 10. & communiter omnes Doctores cum Magistro sententiarum in 2. dist. 2. & nominatim S. Th. 1. p. q. 61. art. 4. cum quibus proinde

1. Dicendum, Angelos non ab æterno, sed initio temporis simul cum hoc

hoc mundo corporeo, primos tamen omnium, & ante quamcunque aliam ipsius mundi corporei partem fuisse creatos.

Prima hujus assertionis pars, nempe quod Angeli non ab æterno, sed initio temporis simul cum mundo corporeo creati sint,

Prob. 1. ex Scriptura. Gen. 1. *In principio creavit Deus Cælum, & terram, &c. Et dixit Deus, Fiat lux*, ubi cœli, ac lucis nomine plerique Patres Angelos intelligunt, ut S. Augustinus supra, S. Gregor. l. 27. Moral. cap. 25. Exod. 20. ubi dicitur, quod *Deus sex diebus fecit cælum, & terram, & mare, & omnia, quæ in eis sunt*; Angeli autem in coelis sunt; proindeque inter omnia illa, quæ sex diebus facta esse dicuntur, sunt numerandi.

Prob. 2. ex Concilio Lateranensi sub Innocentio III. cap. 1. ubi dicitur, quod *Deus simul ab initio temporis utramque de nihilo condidit creaturam, spiritalem, & corporalem, Angelicam, & mundanam.*

Secunda assertionis pars, scilicet quod primi omnium, & ante quamcunque aliam ipsius mundi corporei partem creati sint, constat tum ex eo, quod, ut supra dictum est, creatio Angelorum secundum mentem sanctorum Patrum intelligatur in Scriptura per creationem cœli, quod quidem, ut dicitur cap. 1. Genes. in principio, & ante aliam quamcunque mundi corporei partem creatum fuit: tum etiam ex eo, quod id Angelicæ naturæ dignitati maxime congruit, ut sit primum Dei opus ad extra, & *Initium viarum Domini*, ut loquitur Propheta de primo Angelorum loquens.

3. Quæres, an hæc sententia, asserens Angelos simul cum mundo corporeo fuisse creatos, sit de Fide.

Quidam Doctores ita esse existimant, ut Gregorius Ariminensis in 2. sent. dist. 2. & Ferrariensis lib. 2. contra Gentes cap. 83. Melius tamen alii negant cum S. Thom. sup. art. 2. ad 2. & in opusculo, in quo Later. Conc. decretum supra relatam exponit, dicitque, decretum hoc a Conc. Later. editum fuisse contra Origenis errorem, qui spirituales creaturas solas, ac per se ab initio conditas assererat, corporeas vero ex accidenti, ut in iis, velut in quodam carcere Spirituum quorundam delicta plecterentur. Contra quem errorem Concilium definivit, utramque simul, hoc est, pari consilio, conditam fuisse creaturam, spiritalem & corporalem, idque ab initio temporis, hoc est, non ab omni æternitate.

## S E C T I O II.

### *Ubinam creati sint Angeli.*

1. **C**UM super hac questione nihil aperte dicat Scriptura, nec Ecclesia quidquam definierit, ideo variæ sunt Theologorum sententiæ. Quidam enim Angelos in hoc aere creatos fuisse existimant, alii in inferioribus coelis.

*Med. Theol. Pars I.*

K

Omnia

Omnia probabilissime S. Thom. supra art. 4. existimat, in cœlo Empyreo fuisse creatos, idque etiam docuit Strabo in c. 1. Gen. Beda hom. 2. Hexameron, & fere omnes reliqui scriptores post Bedam.

Prob. 1. ex eo, quod Isa. 14. dicitur, *Cecidisse de cœlo Luciferum. & Apoc. 12. Factum est prælium magnum in cœlo, Michael, & Angeli ejus præliabantur cum Dracone, & Draco pugnabat, & Angeli ejus, & non prævaluerunt, neque locus inventus est eorum amplius in cœlo.*

Probatur 2. ex eo, quod (ut dicit Sanctus Thom. supra) Angeli creati sunt, ut præsideant creaturæ corporeæ; unde conveniens fuit, ut in supremo loco corporali producerentur, cujusmodi est illud cœlum Empyreum.

2. Quæres, an de Fide sit, cœlum illud, quod communiter vocatur Empyreum, existere.

Respondetur, quod, quamvis super hac re nihil expresse ab Ecclesia definitum sit, quia tamen plurimi, ex SS. Patribus tale cœlum existere docuerunt, ut S. Basil. ho. 2. in Hexamer. S. Joa. Dam. l. 2. de Fide c. 6. S. Amb. l. 2. Hexameron. c. 3. Beda sup. S. Th. 1. p. q. 66. a. 3. & communiter omnes hodie Doctores docent, ideo valde reinerarium videretur illius cœli Empyrei existentiam negare.

### S E C T I O III.

*An Angeli omnino sint incorporei.*

1. **S**ensus quæstionis est, an Angeli sint substantiæ pure, ac simpliciter spirituales, an vero in sua entitate aliquid corporeum, & materiale habeant.

S. Augustinus lib. 8. de Civit. c. 14. & 15. refert, Platonicos existimasse, Angelos corpora valde subtilia naturaliter sibi unita habere. Ita etiam sensit Origenes l. 2. Periarchon c. 2. & 3. Tertullianus lib. de carne Christi, & aliqui alii veteres, qui quidem Angelis corpora non ejusdem rationis attribuunt. Nam aliis cœlestia, aliis ignea, aliis aerea inesse censebant.

Vera nihilominus sententia, quæ ut certa tenenda est, asserit, Angelos esse omnino corporis expertes, atque adeo esse creaturas pure, & simpliciter spirituales, ac intellectuales. Ita S. Th. q. 51. ar. 1.

Probatur 1. ex iis Scripturæ locis, in quibus Angeli vocantur Spiritus. Ad Hebr. 1. *Omnes sunt administratorii Spiritus.* Apocalips. 1. fit mentio septem Spirituum, qui in conspectu throni Dei sunt. Et in Evangeliiis communiter daemones vocantur immundi spiritus. Nomen autem Spiritus in Scripturis, cum substantiæ intelligenti tribuitur, non nisi rem incorpoream significare solet, quo sensu S. Joan. c. 3. dicitur, *Spiritus est Deus.*

Prob. 2. ex verbis Conc. Lateran. sup. cit. quibus Angeli signifi-

can-



Prob. 3. ex Sanctis Patribus. S. Ignatius in epist. ad Trallianos, Angelos vocat *Incorporeas naturas*. S. Greg. Nissenus lib. 12. contra Eunomium, *Incorporeas creaturas*. S. Greg. Nazianz. orat. 24. *Intelligibiles, & incorporeas substantias*. S. Dionys. de Div. Nomin. c. 4. *Incorporales, intelligibiles, spiritualesque substantias, omni materia carentes*. S. Joannes Damascenus lib. 2. de Fide c. 3. *Substantias intelligentes, materiae, atque corporis expertes*.

2. Objicies, in septima Synodo generali actione 5. recitari, & approbari librum Joannis Episcopi Theſſalonicenſis, in quo dicitur, Angelos eſſe tenui, & aereo corpore præditos.

Porro, quamvis ( ut docet S. Th. q. 16. de malo, ar. 1. ) hæc sententia, quæ affirmat, Angelos esse substantias pure spirituales, talis non sit, ut opposita censeatur debet hæretica; ( etenim Lateranense Concil. sup. cit. hanc quæstionem ex instituto non definivit, ut observat S. Doct. sed hoc unum intendit, ut utriusque naturæ eadem ratione conditorem Deum contra Origenistas, & Manichæos assereret ) est tamen adeo certa, ut contrarium asserere valde temerarium esset, utpote communi omnium Doctorum sensui repugnans.

Aliqui dixerunt ( ut refert S. Th. q. 51. a. 2. ) omnes illas Angelorum apparitiones , quæ in Scriptura memorantur , contigisse tantum secundum imaginationem , nec Angelos unquam corpora ulla , in quibus apparerent , assumpsisse . Nihilominus pro certo tenendum est id , quod docet S. Aug. l. 15. de Civ. c. 23. *apparuisse hominibus Angelos in talibus corporibus , quæ non solum videri , verum etiam tangi possent .* Ibidemque dicit , id in Scripturis tam aperte asseri , totque experienciis esse confirmatum , ut hoc negare inprudens esse videatur .

**K 2**

рога

pora illa assumant, in quibus se præbeant visibiles.

Tertullianus libro de carne Christi sentire videtur, ita corpus ab Angelo assumi, sicut assumptum fuit corpus humanum a Verbo Divino. Sed illius opinio communiter ab omnibus, tanquam absurda rejicitur; sicut & alia, quæ est Aureoli asserentis, Angelum uniri corpori, sicut formam materiæ. Impossibile est enim, ut id, quod est ex se substantia completa, alterius substantiæ compositionem per modum formæ ingrediatur.

4. Vera igitur sententia, quæ est communis Theologorum, asserit, Angelum corpus assumere, ipsique uniri, tanquam motorem mobili. Quod quidem corpus non ex nihilo (ut falso dixit Tertull. sup.) sed ex ære circumstante format, illum ita condensando, & temperando, quantum necesse est ad suscipiendos varios colores, & figuras, sicut patet in nubibus; ita ut aptus sit ad corporis assumendi formationem.

Ex dictis colliges, Angelos, cum sint substantiæ pure spirituales, esse etiam natura sua incorruptibiles, & immortales, ita ut quamvis possint a Deo annihilari, cum eorum existentia a Deo eam libere conservante pendeat, nulla tamen vi ullius agentis creati possint destrui, & annihilari, cum nulla materia consent, quæ est principium corruptionis nihilque in se habeant, aut extra se recipere possint, quo de eorum substantiam pure spiritalem corrumpere, aut destruere possit. Huic veritati, quæ in sexta Synodo gener. act. 11. & in Epist. Sophronii approbata est, subscribunt communiter SS. Patres. S. Dionys. de Div. Nom. S. August. lib. 12. de Civ. c. 15. S. Damasc. l. 2. de Fide c. 3. Et certe, si Concil. Later. sub Leone X. sess. 8. definivit, animam rationalem, quia pure spiritualis est, esse immortalem, & incorruptibilem, a fortiori idem de Angelis sentiendum est, cum sint naturæ, & conditionis longe perfectioris, quam sit ipsa anima rationalis.

#### S E C T I O IV.

*Quid de loco, & motu Angelorum sentiendum sit.*

1. **D**icendum 1. certum esse, Angelos vere esse in loco, quocunque modo in illo sint, & ita esse in uno loco, ut simul alibi, & multo minus ubique esse dici non possint. Ita S. Thom. q. 52.

Et id constat ex variis Scripturæ locis, in quibus Angeli dicuntur esse, aut non esse alicubi. S. Matth. 18. *Angeli eorum in cælis semper vident faciem Patris mei.* Apoc. 12. de Angelis malis dicitur, quod *locus eorum non est amplius inventus in cælo.*

Observandum est autem cum S. Doct. q. 52. ar. 1. Angelos non esse in loco ad instar corporum, quorum partes partibus loci correspondent, quod Theologi vocant esse in loco circumscriptive, sed alio modo, qui substantiarum spiritualium proprius est, quem vocant esse in loco

loco definitive, hoc est esse totum in toto loco, & totum in qualibet parte loci, ita tamen, ut simul extra illum locum naturaliter esse non possint. Quod recte explicat S. Damasc. l. de Fide Orthodox. c. 3. his verbis. *Cum autem Intelligentiæ sint etiam intelligibilibus in locis, sunt non corporum more circumscriptæ: non enim ut corpora secundum naturam figurantur, neque triplici dimensione constant, sed eo ipso in loco, quod intelligibiliter præsentem sint, & agant, ubicumque esse iussi sunt, nec possint eodem momento simul hic esse, & illic.*

Quod si quæras, quænam sit formalis ratio, per quam Angelus in loco aliquo esse dicatur,

Varie sunt super hac re Theologorum sententiæ. Quidam enim existimant, Angelos esse in loco formaliter per suam substantiam, alii per operationem aliquam sive transeuntem, sive immanentem, alii per suæ virtutis applicationem, alii per modum aliquem realem ipsis intrinsicum, alii denique omnibus his modis simul junctis. Nos in re incerta, & obscura, quæ magis ad Philosophiam, quam ad Theologiam pertinere videtur, liberum unicuique relinquimus illud, quod magis arridebit, amplecti.

2. Dicendum 2. certum esse, Angelos moveri localiter. Ita S. Thom. qu. 13. art. 1.

Et constat ex innumeris Scripturæ locis, quæ hic recensere superfluum est, in quibus Angeli sive boni, sive mali dicuntur ire, venire, ingredi, exire, discedere, ascendere, descendere, &c. Et S. Ambrosius lib. 1. de Spiritu sancto cap. 10. dicit, Spiritum sanctum non moveri, quia est infinitus, & ubique existit, at vero alios Spiritus moveri a loco in locum, quia sunt finiti, & creati.

Cum autem dicitur, Angelum posse moveri, illud intelligendum est ( ut docet S. Th. ar. 2. ) tam de motu continuo, quo scilicet locus aliquis deseritur, & alius acquiritur successive, & per partes, quomodo moverunt se Angeli illi, qui corporibus assumptis simul cum hominibus, quibus apparebant, ambulasse in Scripturis referuntur, quam de motu discreto, quo scilicet de loco in locum movere se potest, non transeundo per medium. Quamvis enim corpus eo modo moveri non possit, quia commensuratur, & continetur sub loco, unde ( ut ait S. Doctor ) oportet, quod sequatur leges loci in suo motu; cum tamen Angeli substantia non sit subdita loco, ut contenta, sed superior eo sit, ut aliquo modo continens, inde fit, ut in potestate ejus sit se loco applicare, prout vult, vel per medium, vel sine medio.

3. Quæres, an Angelus possit movere localiter res alias a se. Respondetur posse.

Et quidem, quod possit movere res corporales, constat ex pluribus Scripturæ locis. Exod. 14. dicitur, Angelum, qui in columna nubis per mare rubrum Israelitas educebat, tonitrua, & fulmina in Pharaonis exercitum ejaculasse, & rotas currum subvertisse. Dan. 14. di-



citur, Angelum transtulisse Prophetam Habacuc e Judæa in Babylonem, & Act. 8. Angelum transtulisse S. Philippum e Gaza in Azotum. Ratio etiam id evincit, quia omnis creatura cognitione intellectuali, vel sensibili prædita, quæ seipsam loco movere potest, potest etiam alia suæ potentia motrici inferiora movere, ut patet inductione, ergo a pari Angeli cum se movere possint, poterunt etiam corpora potentia suæ inferiora movere.

Quod autem spectat ad alias substantias spirituales, dicendum est, similiter illas facultati motrici Angelorum subesse, si eorum naturali perfectioni subsint, hoc est, unum Angelum posse alium inferiorem movere, sicut & animam a corpore separatam. Et quidem de anima separata constat ex c. 16. S. Luc. ubi dicitur, animam Lazari in sinum Abrahamæ esse delatam ab Angelis. De Angelo vero patet ex eo, quod dicitur Tob. c. 8. Raphaellem Angelum apprehendisse dæmonem Asmodæum, illumque alligasse in deserto superioris Ægypti.

## S E C T I O V.

*Quomodo Angeli cognoscant se, vel alias res.*

1. **C**Um Angeli sint creaturæ spirituales, & intellectuales, certum est, illos esse etiam maxime capaces intellectiōis, & cognitiōis. Sed difficultas est, qualis sit eorum cognitio, & ad quæ objecta se extendat. Pro cuius resolutione

Dicendum 1. Angelos præditos esse facultate intellectiva ab eorum substantia realiter distincta. Ita S. Thom. q. 54.

Prob. 1. ex S. Dionysio lib. de coelesti Hierar. cap. 11. ubi tria in Angelis distinguit, scilicet *substantiam, virtutem, & operationem*, quod & S. Anselmus docet lib. de Conceptu Virginis.

Prob. 2. ex eo, quod principia, quæ ad diversos actus proprios per se ordinantur, reipsa inter se distinguuntur; sed essentia, & potentia alicujus creaturæ ad diversos actus per se ordinantur, nempe essentia ad existentiam, potentia vero ad operationem, qui sunt plane diversi actus; unde sequitur, in Angelis potentiam cognoscitivam esse ab eorum essentia, seu substantia realiter distinctam.

2. Dicendum 2. Angelum seipsum cognoscere per suammet ipsius substantiam, non vero per ullam aliam speciem intelligibilem. Ita S. Th. quæst. 56. art. 1.

Prob. 1. ex S. Aug. lib. 9. de Trin. cap. 9. ubi dicit, *mentem, dum seipsam intelligit, ipsam solam esse parentem notitiæ suæ*.

Prob. 2. ex eo, quod substantia Angeli sit ejus intellectui maxime proportionata, & intime unita; unde frustra in tali cognitione adhiberetur species, quæ ideo tantum in intellectiōe requiritur, quia objectum quod intelligitur, distans est, vel facultati intellectivæ minime pro-

proportionatum, ut sic illam ejus distantiam, aut disproportionem suppleat.

3. Dicendum 3. Angelos ad res alias a se naturaliter intelligendas aliquibus speciebus impressis indigere.

Probatur 1. ex S. Dion. cap. 4. & 7. de Divin. nom. ubi ait, Angelos plenos esse formis, & rationibus omnium rerum. Et ex S. August. lib. 2. de Gen. ad literam c. 8. ubi dicit, res corporeas prius creatas fuisse in cognitione Angelorum, quam in seipsis. Hæc autem productio rerum in mente Angelica aliter intelligi non potest, quam secundum esse objectivum per quasdam similitudines, & species ipsis Angelis ab initio inditas, & concreatas. Unde & ipse dicit, res illas productas fuisse in intellectu Angelico secundum creatam in illis sapientiam.

Probatur 2. hac ratione, quia necesse est, objectum cognoscibile ita esse unitum, & conjunctum potentie cognoscitivæ, ut illam determinet ad sui cognitionem; atqui res omnes, quas cognoscit Angelus, non sunt ita conjunctæ, & unitæ cum ejus intellectu, ut patet ex eo, quod res cognovit, antequam existerent, sicut ex S. August. supra diximus, ergo necesse est, ut per aliquam sui similitudinem intellectui Angelico uniantur. Illa autem similitudo non est ipsa Angeli substantia, neque enim tam perfecta est, ut possit rerum omnium rationes exprimere, quod soli Essentiæ Divinæ competit; necesse est igitur, ut illa similitudo in intellectu Angelico sit species aliqua intelligibilis.

4. Dicendum 4. species illas, per quas Angeli cognoscunt, non esse ab objectis acceptas, sed ipsis a primo instanti suæ creationis fuisse a Deo infusas, & inditas. Ita S. Thom. q. 55. art. 2.

Probatur 1. ex c. 28. Ezech. ubi primus Angelus dicitur fuisse plenus sapientia, & perfectus ab illo die, in quo conditus est: (ea enim, quæ dicuntur in illo capite, intelligenda esse potius de Lucifero, quam de Rege Tyri censent S. Aug. lib. 11. de Gen. ad lit. c. 24. S. Greg. l. 32. Moral. c. 24. & 25. S. Ambros. lib. 1. de Paradiso c. 2. S. Epiphanius Hæres. 64. & plures alii ex SS. Patribus) ille autem Angelus non fuisset plenus sapientia, & perfectus a primo die, quo creatus est, si species intelligibiles rerum omnium, quarum cognitio illi compete-  
bat, a Deo non accepisset, sed paulatim, ac diverso tempore eas acquirere, & a rebus ipsis haurire opus habuisset.

Probatur 2. ex loco supra citato S. Aug. scilicet 2. de Gen. ad lit. c. 8. & 30. ubi ex iis, quæ supra retulimus, sequitur secundum mentem illius Sancti Patris, Angelos cognovisse res, antequam existerent, ac proinde illarum species non ab ipsis rebus, sed a Deo, in instanti suæ creationis, accepisse.

Probat. 3. hac ratione. Si Angeli paulatim, & successive species acquirerent, easque peterent ab objectis, oporteret, id fieri alterutro ex his duobus modis, scilicet vel quod ipsi Angeli eas producerent ad præsentiam objectorum, vel quod objecta ipsa eas producerent, &

transmitterent ad potentiam Angelorum intellectivam; at neutrum dici potest.

Non primum, quia antequam Angeli species illas in intellectu habeant, ullo modo res externas cognoscunt, nec proinde possunt earum similitudines in se producere. Nec sufficit externa earum rerum præsentia; quia hæc quoque præsentia ab ipsis cognosci non potest, nisi suppositis speciebus, quæ determinant eorum intellectum ad cognoscendum. Non enim hic par est ratio intellectus Angelici, ac humani; siquidem homo, cum sit corporeus, facile moveri, & affici potest ab objectis corporeis præsentibus, quæ cum species suas diffundant per medium usque ad sensus externos, mediantibus illis sensibus externis, necnon internis movent intellectum humanum, ut a phantasmatibus corporeis abstrahat species intellectuales; in Angelis autem, cum sint omnino incorporei, nihil tale fieri potest.

Neque etiam secundum dici potest; quia objecta illa externa sunt ut plurimum materialia, & corporea, quæ nonnisi species materiales, & sensibiles producere possunt, quæ proinde ad usum intellectus Angelici inaptæ sunt, illique inhærere nullatenus valent. Ergo cum Angeli species illas neque producere, neque ab objectis accipere possint, sequitur, ut illas a Deo in instanti suæ creationis acceperint.

Porro ad pleniorẽ Angelicæ cognitionis intelligentiam tres hic quæstiunculæ breviter explicandæ supersunt.

1. Prima est, an omnes Angeli per species æque perfectas intelligant.

Respondetur, Angelos, quo sunt in natura perfectiores, eo etiam perfectiores, ac proinde universaliores a Deo species accepisse. Ita S. Th. sup. a. 3. quod probat tum ex S. Dionys. l. de coel. Hier. c. 12. ubi ait, superiores Angelos habere scientiam magis universalem, & l. de Div. nom. c. 13. ubi dicit omnia magis unita, & collecta esse in superioribus Angelis, prout magis ad Deum accedunt; tum etiam ex eo, quod Angeli, quo perfectiores sunt in natura intellectuali, eo sunt similiores Deo in intelligendo; sed Deus in intelligendo maxime excelsit in eo, quod per unicam, & simplicissimam Essentiam suam res omnes intelligit; unde sequitur, quo Angeli perfectiores sunt, illos per species eo simpliciores, & universaliores, adeoque perfectiores intelligere.

Secunda est, an Angelus semper actu cognoscat ea, quæ cognoscit.

Respondetur, duas esse cognitiones, respectu quarum intellectus Angelicus est semper in actu secundo.

6. Una est cognitio supernaturalis beatifica. Nam Angeli beati semper sunt actualiter beati, ac proinde semper est in illis actualiter beatitudo, quæ in actuali intuitiva cognitione Divinæ Essentiæ consistit.

Altera est cognitio naturalis, qua Angelus seipsum cognoscit. Sicut enim corpora viventia semper sunt in actu secundo respectu cuiusdam operationis vitalis, puta respectu nutritionis, ita consentaneum est existimare, substantias pure spirituales, quales sunt Angeli, semper



per actum habere aliquam operationem vitalem naturaliter; nulla autem videtur esse ipsis magis naturalis, quam sui ipsius cognitio.

Quod autem spectat ad aliarum rerum cognitiones, recte docet S. Thomas qu. 58. art. 1. intellectum Angelicum non semper in actu secundo esse, cum nulla ratio id evincat. Et præterea cum species intelligibiles rerum aliarum in ipsis sint per modum habituum, credibile est, eos posse illis uti, aut non uti, prout ipsis libitum fuerit.

Tertia, an Angeli aliquo discursu utantur.

Respondetur cum S. Doct. Angelos nullo uti discursu in sua cognitione, sed simplici intuitu, & apprehensione ea omnia cognoscere, ad quæ vis eorum cognoscitiva pertingere potest, sicque eodem simplici actu conclusiones in principiis, & effectus in causis inspicere.

Cujus rei ratio est, quia ex imperfectione intellectus humani provenit, quod discursus ipsi necessarius sit, ut in alicujus veritatis notitiam deveniat: cum autem intellectus Angelicus humano longe præstet, ac superemineat, utpote multo perfectiori lumine naturali præditus, hinc fit, ut ipsi modus intelligendi nobilior debeat; est autem eo nobilior, quo simplicior, quia sic propius ad Divinum intelligendi modum accedit, unde sequitur, conveniens esse, ut Angeli uno simplici intuitu, non vero per discursum, id est successive, & quasi per partes ea omnia cognoscant, quæ intra limites potentiae eorum cognoscitivæ continentur.

## S E C T I O VI.

*Quasnam res Angeli cognoscant.*

II. **Q**uatuor hic certa sunt. Certum est 1. Angelum naturaliter cognoscere seipsum, idque per suammet substantiam intellectui suo ad instar speciei impressæ unitam, ut ex supra dictis patet.

Certum est 2. Angelum beatum clare, & intuitive cognoscere Deum per lumen gloriæ, & secluso statu beatitudinis, eundem naturaliter cognoscere posse, non quidem clare, & intuitive, sed eo modo, quo naturaliter causa in effectum, & prototypus in imagine cognoscitur.

Angelus enim eo ipso, quod perfecte substantiam suam agnoscit, eam ut effectum, & ut imaginem Dei cognoscit, proindeque per illam sic cognitam Deum ipsum cognoscere potest.

Certum est 3. Angelos se invicem naturaliter cognoscere per species proprias sibi a Deo inditas.

Hoc enim ex pluribus Scripturæ locis constat, in quibus multa passim de Angelis sive bonis, sive malis dicuntur, unde mutua illorum cognitio necessario infertur, ut Isa. 6. *Duo Seraphim clamabant alter ad alterum.* & Dan. 10. Angelus custos Judæorum dicit, Angelum custodem Persarum viginti, & uno diebus sibi restitisse, Michaellemque Archangelum sibi in adjutorium venisse. Deinde nisi Angeli mutuo

se cognoscerent, nulla inter eos societas, nullus ordo stare posset.

Certum est 4. Angelos res corporeas cognoscere non tantum in universali, sed etiam in particulari.

Hoc similiter patet ex variis Scripturæ locis. Nisi enim Angeli unumquenque hominum in particulari cognoscerent, neque boni illum custodire, neque mali per tentationes illum impugnare possent; quod utrumque tamen fieri ex Fide certum est.

Cum hæc certa sint, tria sunt, de quibus est aliqua difficultas, primum, an cognoscant res futuras, secundum, an occultas cordis cogitationes, tertium, an res etiam supernaturales.

2. Quod ad primum spectat, S. Th. q. 57. art. 3. utitur distinctione. Vel enim quæstio est de futuris, quæ necessario ex causis suis sequuntur, v. g. quod eclipsis Solis tali die, & hora futura sit, & manifestum est, ejusmodi futura naturaliter cognosci ab Angelis, cum etiam ab ipsis hominibus cognosci possint: vel de futuris contingentibus, quæ a libero Dei, vel hominis arbitrio pendent, & de illis dicendum est, non posse naturaliter ab Angelis certo cognosci.

Atque hæc doctrina ex Fide certa est, cum Scriptura sacra manifeste dicat, ejusmodi futurorum cognitionem solius Dei propriam esse. Isa. 41. *Annunciate nobis, quæ ventura sunt in futurum, & sciemus, quia Dii estis vos.* Et S. Pet. Ep. 1. cap. 1. *Non humana voluntate allata est prophetia, sed Spiritu sancto inspirante locuti sunt sancti Dei homines.*

Id etiam constat ex Sanct. Patribus. S. Chrysost. hom. 18. in S. Jo. *Certa, inquit, prædictio futurorum immortalis duntaxat Dei opus est.* Tertul. in apolog. cap. 20. dicit, *Idoneum Divinitatis testimonium esse veritatem divinationis.* Et passim SS. Patres ex eo probant, Fide nostræ mysteria vera esse, & a Deo testata, quia fuerunt ante prædicta. Ita Justinus in apologia 2. ad Antoninum, S. Augustinus lib. de catechizandis rudibus c. 26. & plures alii.

Objicies, Dæmones aliquando futura contingentia prædixisse.

Respond. in eis etiam sæpissime hallucinatos, ac mentitos fuisse, sæpe etiam obscure, & ambigue locutos, ut fraudem, & ignorantiam suam occultarent. Quod si aliquando ea, quæ ab ipsis sunt prædicta, evenerunt, hoc non ideo factum est, quod illa certo scirent, sed quia per aliquas conjecturas id cognoscerent. Quod & homines aliquando faciunt, longe tamen perfectius dæmones, idque tum propter diuturnum usum, & continuam rerum experientiam, tum propter perspicacitatem ingenii, quæ vident circumstantias omnes ad cujusvis statum pertinentes, naturales item dispositiones uniuscujusque, ita ut, quo quisque ingenio, quibus moribus præditus sit, quæ indoles ejus, & propensio naturalis, perfectissime cognoscant. Adde, quod aliquando ea prædicunt, quæ ipsis a Deo certas ob causas interdum revelantur, vel quæ ipsi, Deo permittente, facturi sunt. Sic potuit Satan futuram calamitatem B. Job prænunciare, statim atque ipsi facultas eam infligendi a Deo concessa

cessa est. Quo prædictionis genere sæpenumero Gentiles delusi sunt.

3. Quæres, cur Angeli potius præterita cognoscant, quam futura, cum illa non magis, quam ista existant, ac proinde species ipsis inditæ non magis videantur posse illa repræsentare, quam ista.

Respondetur, speciem intelligibilem Angeli modificari, & quasi determinari per actualem existentiam rei præsentis, ut possit deinceps illam etiam præteritam repræsentare. Quod si hæc responsio non satisfacit, nihil dicendum superest, nisi voluisse Deum, species illas, quas Angelis impressit, ejus esse conditionis, ut non possent res futuras mere contingentes, quandiu futuræ sunt, repræsentare, sed tantum præsentis, vel præteritis.

Quod ad secundum spectat, dicendum est, Angelos naturaliter non posse certo cognoscere cogitationes illas, quæ libere a nobis in mente concipiuntur, nec etiam actus internos libere a voluntate elictos. Ita S. Thom. q. 57. ar. 4.

Probatur 1. ex Scriptura, quæ hanc cognitionem soli Deo tribuit. 2. Paral. c. 6. *Tu solus nosti corda filiorum hominum*. Jerem. 17. *Pravam cor hominis, & inscrutabile, quis cognoscet illud? ego Dominus*. Hebr. 4. *Discretor cogitationum, & intentionum cordis*.

Probatur 2. ex SS. Patribus, qui id unanimiter docent. S. Hilar. in Psal. 139. *Cogitationes cordis nosse non nostrum est, sed ejus, de quo dictum est: Scrutans corda, & renes Deus*. S. Chrys. hom. 24. in S. Joan. *Quæ in corde hominum insunt, nosse solius est Dei, qui singillatim corda finxit*. D. Cyr. Alex. l. 2. in S. Jo. loquens de Nathanaele, qui Christum Dei Filium confessus est, *Noverat, inquit, solum Deum scrutatorem esse cordium, nec ulli alteri mentem hominis patere*. S. Aug. ser. 234. de temp. loquens de Job Patriarcha, *Colebat, inquit, Deum, faciebat eleemosynas, & quo corde faciebat, nemo sciebat, nec ipse diabolus, sed solus Deus*. S. Hier. in Pl. 16. vers. 10. *Diabolus, inquit, nescit, quid intrinsecus in anima cogitet homo, nisi per exteriores motus intelligat*.

Probatur 3. ratione quam ducit S. Doctor ex præstantia, & nobilitate mentis humanæ, quæ soli Deo subjacet, tanquam primæ causæ efficienti, & ultimæ finali; unde consentaneum est, ut cogitationes, & affectiones, quæ ex libero ipsius arbitrio pendent, non nisi Deo soli pateant, aliis autem creaturis eatenus solum, quatenus ipsa mens humana eas ab illis cognosci velit, ita ut hic voluntatis consensus sit veluti conditio quædam, sine qua non possit cogitatio, vel affectio interna mentis intellectui Angelico repræsentari.

Neque dicas, Angelum naturaliter harum cogitationum, & affectionum species habere sibi inditas; ergo dum existunt, posse naturaliter illas cognoscere.

In primis enim probabile est, quod aliqui Theologi asserunt, non habere Angelos cogitationum illarum, & affectionum species sibi ab initio creationis inditas, sed illas a Deo accipere tunc, quando cogitatio-



tationes illæ, vel affectiones ad eos diriguntur. Deinde quamvis concederetur, ejusmodi species Angelis esse inditas, & concreatas, dicendum nihilominus esset, eos illis uti non posse ad tales cogitationes, aut affectiones cognoscendas, nisi accedat voluntas, & consensus hominis, cujus illæ sunt. Deus enim, ob suavem suæ providentiæ dispositionem, in gubernatione creaturarum rationabilium, voluit illas suarum cogitationum, & affectionum plenum, & absolutum habere dominium, ita ut possent illas pro libito vel occultas tenere, vel aliis detegere, proindeque species illarum Angelis inditas voluit esse tales, ut non possent Angelis repræsentare ejusmodi actus internos liberos, invita rationali creatura, cujus sunt, sed tantum, cum ad eos ab ipsa dirigerentur.

4. Objicies, variis experienciis compertum esse, demones cognoscere cogitationes, & affectiones internas, ex.gr. demones aliquando in corporibus obsessis aliorum cogitationes pure internas, etiam ipsis invitis, enunciare.

Respondetur, verum esse, tales actus internos aliquando cognosci a dæmonibus, non quidem in seipsis, sed in aliquo suo effectu; quando scilicet aliquo signo produntur, vel exterius ex motu corporis, mutatione vultus, & aliis similibus, per quæ etiam homines varios animi motus aliorum dignoscunt, vel interius ex iis, quæ in phantasia, & sensibus internis deprehendunt, in quibus ordinarie, ob arctissimam illorum sensuum interiorum cum intellectu, & voluntate connexionem, cogitationum, & affectionum nostrarum imagines sensibiliter efformantur, & sic dæmonum cognitioni patent, non quidem ut voluntati, & rationi subsunt, sed, ut ita loquamur, quasi materialiter, prout in illis motuum sensitivorum signis deprehenduntur.

Notandum est autem, totam illam cognitionem, quæ ex illis signis sensibilibus internis, vel externis a dæmonibus hauritur, non esse certam, sed tantum conjecturalem, cum semper arcanum voluntatis occultum ipsis sit, nec dignoscere queant, qualiter ipsa se habeat erga signa illa sensibilia, quæ nullam ejus actibus inferunt necessitatem, liberamque relinquunt, ut ipsis consensum præbeat, vel dissensum. Videndus S. Aug. l. de divinat. dæmon. c. 5. & Cassian. collat. 7. c. 15.

Quod ad tertium denique spectat, si Angeli considerentur secundum statum naturæ, seu secundum naturales ipsorum vires, quæ etiam in dæmonibus remanserunt, dicendum est, res in entitate supernaturales, seu quarum cognitio intellectus creati vim naturalem supergreditur, non posse ab ipsis naturaliter cognosci. Ita S. Th. q. 54. a. 5. Unde sequitur, demones cognoscere non potuisse mysterium Incarnationis, nec certo scire, an Christus esset vere Deus.

Hoc manifeste constat ex verbis Apost. 1. Cor. 2. *Loquimur, inquit, Dei sapientiam in mysterio, quam nemo Principum hujus sæculi cognovit, ubi per Principes hujus sæculi* S. Ans. & S. Th. in commentariis super hunc

Hunc locum, demones intelligunt. Si enim (ut ait S. Leo ser. 11. de Passione) crudelis, & superbus inimicus consilium misericordiae Dei nosse potuisset, Judaeorum animos mansuetudine potius temperare, quam injustis odiis studuisset accendere, ne omnium captivorum amitteret servitutem, dum nihil sibi debentis persequitur libertatem.

5. Objicies. S. Luc. c. 4. dici, quod exhibant demonia clamantia, quia tu es Filius Dei, & increpans non sinebat ea loqui, quia sciebant, ipsum esse Christum.

Respondetur 1. Dæmones istis verbis usos fuisse fide, & adulatorie, vel ut veritatem ex ipsius ore Christi elicerent, vel ut illi aliquam elationis, & superbiae occasionem darent. Ita S. Hieron. in c. 8. S. Matth. & Hugo Cardin. in locum S. Lucæ.

Respondetur 2. Si dæmones aliquam hujus mysterii cognitionem habuerunt, illam fuisse tantum conjecturalem, & abstractivam, non vero evidentem, & intuitivam, de qua solum hic quaestio est. Ita enim docet S. Leo ser. 4. in Quadrag. S. Hilar. can. 7. in S. Matth. S. Hieron. in c. 4. S. Matth. S. Aug. l. 9. de Civ. c. 21. & plures alii.

Quod si Angeli considerentur in statu Gratiae, dum erant in statu viae, dicendum est, aliqua mysteria sibi divinitus revelata cognovisse, puta mysterium SS. Trinitatis.

Non enim erant in eo statu nobis deteriores, nec ad minorem beatitudinem ordinabantur. Quare nec minorem hujus mysterii cognitionem, quam nos, habere debuerunt. S. Th. supra existimat, etiam revelatum ipsis tunc fuisse mysterium Incarnationis, quod etiam docet S. Aug. l. 5. de Gen. c. 19. & similiter probabile est, plures alias veritates supernaturales in eo statu fuisse ipsis divinitus revelatas, prout ad illius perfectionem requiri poterat.

Quod si denique considerentur secundum statum gloriae, dicendum est, omnia mysteria, quæ vel ad eorum majorem felicitatem, vel ad Ecclesiae militantis, animarumque ipsorum Angelorum custodiæ creditarum directionem, & salutem conferre possunt, ipsis vel in Verbo Divino, vel extra illius visionem beatificam, fuisse divinitus revelata, & patefacta.

Cum credibile non sit, in illo statu ullam ipsis earum rerum cognitionem denegari, quæ ad majus ipsorum, vel Ecclesiae bonum necessariae sunt, aut utiles.

## S E C T I O VII.

*Qualis sit Angelorum voluntas.*

1. **C**ertum est, in Angelis esse voluntatem, eamque libero arbitrio præditam. Quod ipsorum casus, & ruina satis evidenter demonstrat. Unde S. Basil. l. de Spiritu Sancto, c. 16. *Impiorum, inquit, & adversariorum spirituum defectio id, quod dicimus, approbat,*

*bat, scilicet juris sui, ac libertatis esse invisibiles Virtutes. Et hæc est etiam doctrina S. Th. 59. q. a. 3. cujus hæc est ratio. Ubiunque reperitur judicium indeterminatum, seu indifferens ad hoc, vel ad illud agendum, ibi reperitur voluntas libere, seu liberum arbitrium: sicut e contra ubiunque non reperitur tale judicium indifferens, ibi nec liberum arbitrium reperitur, ut patet experientia; atqui in omnibus habentibus intellectum inest ejusmodi judicium indeterminatum, eo quod per intellectum possunt percipere rationem ipsam universalem boni, sub qua possunt hoc, & illud cum quadam indifferencia sibi agendum proponere: hæc enim indifferencia judicii, & rationis circa bonum est quasi radix libertatis; quare cum Angeli nobilissimo intellectu sint præditi, concludendum est, in ipsis esse liberum arbitrium, idque excellentius, quam in homine, sicut ipse intellectus Angelicus humanum longe antecellit.*

Porro non est necesse ad electionem liberam in Angelo, quod præcedat consilium, seu inquisitio quædam mediorum, qualis requiritur in libera hominis electione. Non enim cognoscunt inquirendo, cum hoc pertineat ad discursum rationis, qui in Angelis non reperitur, ut Sectione 5. ostendimus, sed electio in Angelis fit per subitam acceptionem cognitæ veritatis, sine ulla inquisitiva deliberatione.

2. Quæres, an liberum illud arbitrium Angeli sit naturaliter inflexibile in electione semel facta.

Respondetur, duas esse oppositas super hac quæstione Doctorum sententias.

Quidam enim existimant, arbitrium Angeli naturaliter flexibile, ac mobile esse, perinde atque arbitrium hominis.

Ita S. Bonav. in 2. dist. 7. par. 1. a. 1. & plures alii. Atque hæc esse videtur sententia S. Damasceni l. 2. de Fide c. 3. ubi dicit, Angelos esse naturas ratione, intelligentia, & libertate præditas, ac proposito, & sententia mutabiles, idque ex se, & sua sponte. Et S. Fulgentii l. de Fide ad Petrum, ubi dicit, Angelos bonos non habere natura sua immutabilitatem ex bono in malum, sed sola Gratia.

Alii e contra censent, Angelos arbitrio ita inflexibili præditos esse, ut nequeant id averfari, quod semel libere elegerunt, neque id eligere, quod semel repudiarunt. Ita S. Th. 1. p. q. 64. a. 2. Cujus ratio hæc est, quod Angeli apprehensio ab apprehensione hominis multum differat. Angelus enim apprehendit immobiliter per intellectum, sicut & nos immobiliter apprehendimus prima principia, quorum est intellectus: homo vero per rationem apprehendit mobiliter discurrendo de uno ad alterum, potestque ad alterutrum oppositorum probabiliter procedere. Hinc fit, ut voluntas hominis adhæreat alicui mobiliter, ita ut possit ab ipso discedere, & contrario adhærere, at vero voluntas Angeli fixe, & immobiliter adhæreat. Ex quo patet, liberum arbitrium hominis flexibile esse  
ad



ad opposita ante, & post electionem, liberum autem arbitrium Angeli ad utrumlibet ante electionem flecti posse, sed post electionem semel factam esse inflexibile.

Liberum cuique est, quam voluerit, sententiam ex his duabus amplecti, cum utraque sit probabilis; quamvis propter Sancti Doctoris auctoritatem, & allatam rationem secunda videatur esse probabilior.

## S E C T I O VIII.

*Quomodo Angeli inter se loquantur.*

1. **C**ertum est 1. Angelos inter se loqui, & sibi invicem cogitationes, & conceptus suos manifestare.

Hoc manifeste constat ex Scripturis. Isa. 6. *Duo Seraphin clamabant alter ad alterum.* Et Apocal. 7. *Clamavit unus Angelus ad alios quatuor Angelos.*

Certum est 2. posse quidem Angelos loqui sive nobiscum, sive inter se vocibus corporeis, quæ sint similes nostris, quomodo eos sæpe cum hominibus locutos esse Scripturæ testantur, sed alio quoque modo posse ipsos inter se colloqui, nempe spiritali, & sine ullo adminiculo corporeæ vocis.

Constat ex his Apostoli verbis 1. Cor. 13. *Si linguis hominum loquar, & Angelorum,* &c. quibus cum Angelorum linguæ ab humanis distinguantur, significatur, Angelos aliquo inter se modo colloqui posse, quo non possunt homines, qui proinde alius non est, quam spiritalis. Quem Apostoli locum eo sensu exponens Theophyl. in 1. ad Cor. c. 10. *Angelis, inquit, lingua est intellectiva, vis nimirum illa, quæ sibi mutuo Divinarum rerum intellectum, ac divinas cogitationes impertium.* Et S. Damascen. l. 2. de Fide c. 3. de Angelis loquens, *Non lingua, inquit, neque auribus opus habent, verum citra sermonis adminiculum cogitationes suas, atque consilia inter se communicant.*

Cum igitur hæc certa sint, quæstionis propositæ difficultas consistit præsertim in explicando modo, quo Angeli inter se colloquantur. De qua quidem re cum in Scripturis nihil reperiatur, ideo maxime inter se variant Theologorum sententiæ, quas hic fusius explicare minime necessarium duximus, cum nihil ad Fidem pertineant. Ut tamen in re, quæ per se obscurissima est, & a sensibus humanis remotissima, lucem aliquam afferamus, breviter hic proponemus id, quod in hac quæstione probabilissimum nobis videtur.

2. Dicimus igitur, Angelum alteri Angelo loqui, dirigendo, & ordinando conceptum suum ad illum per operationem voluntatis, id est, volendo, ut alter Angelus conceptum illum suum cognoscat, sicque locutionem Angeli nihil aliud esse, quam conceptum illius libere ordinatum, & directum ad alterum, directionem vero illam voluntariam, & liberam esse veluti linguam, seu conditionem, si-

ne

ne qua Angeli unius cogitatio, seu conceptus alteri innotescere non potest. Quia tamen illa directio, licet necessaria, minime tamen sufficiens aliquibus Doctoribus videtur ad exprimendum illum locutionis Angelicæ modum, quantum a nobis exprimi potest; addunt, virtute illius directionis vel novam speciem produci in intellectu Angeli, ad quem conceptus alterius dirigitur, vel si species hujus conceptus ab initio creationis ipsi indita est, illam tunc novam modificationem, & veluti lucem quandam de novo recipere, ut per eam Angelus percipere possit id, quod eum antea latebat, & quod per alterum illi tunc manifestatur.

Porro ea, quæ de locutione Angelorum dicta sunt, debent similiter intelligi de eorum illuminatione, cum hac tamen differentia, quod locutio latius patet, quam illuminatio. Omnis enim illuminatio est locutio, cum Angelus unus non aliter Angelum alterum illuminet, nisi ei loquendo: at vero non omnis locutio est illuminatio, quia Angelus unus alterum illuminare dicitur, non quoties eum alloquitur, sed tunc solum, cum aliquam veritatem sibi divinitus revelatam alteri de novo aperit, & declarat, quod non sit, nisi per Angelos superiores respectu inferiorum, ut fuse docet, & explicat S. Dionysius de Cœl. Hier. c. 3. 4. & 8. Et S. Th. 1. p. q. 106.

## SECTIO IX.

*Quid de Ordinibus Angelorum sentiendum sit.*

1. **S**upponendum est, esse plures Angelos numero distinctos. Hoc variis in locis manifeste testatur Scriptura. Daniel. 7. *Millia millium ministrabant ei.* Apoc. c. 5. *Audiui vocem Angelorum multorum, & erat numerus eorum millia millium.* Ex quibus Scripturæ verbis colligitur, non tantum plures esse Angelos, sed etiam maximam esse illorum multitudinem. Quam tantam esse asserit S. Doctor 1. p. q. 50. a. 3. ut omnem rerum materialium multitudinem excedat. Unde S. Dion. lib. de Cœl. Hier. c. 14. *Multi, inquit, sunt supernarum Mentium beati exercitus, qui imbecillam, & contractam eorum, qui in materia cernuntur, & in usu nostro sunt, numerorum rationem excedunt.* In quo elucet omnipotentia simul, & magnificentia supremi rerum Conditoris, qui unico temporis momento tot, & tam nobiles, & perfectas creaturas solo verbo e nihilo produxit.

An autem sicut numero, sic etiam specie inter se Angeli distinguantur, nihil certo definiri potest, cum in Scripturis nihil super hac questione reperiatur. Imo S. Aug. lib. contra Priscillianistas c. 11. expresse profitetur, se hanc Angelorum differentiam ignorare, nec tamen in ista ignorantia periclitari, cum res ad Fidem non pertineat. Quare omissis, quæ super hac questione in utramque partem a Theologis dicuntur, quidquid sit de illa differentia specifica,

2. Sacrae Scripturae, & SS. Patres aliam declarant esse inter Angelos differentiam, scilicet Ordinum, quos novem esse docet S. Dionysius l. de Coelest. Hier. cap. 6. & 7. & S. Greg. Hom. 34. in Euang.

Hoc ex Scripturis explicat, & probat his verbis. Novem esse Angelorum ordines diximus, quia videlicet, testante sacro eloquio, scimus, esse Angelos, Archangelos, Virtutes, Principatus, Potestates, Dominationes, Thronos, Cherubim, atque Seraphim. Esse namque Angelos, & Archangelos pene omnes sacri eloquii paginae testantur. Cherubim vero, ac Seraphim saepe, ut notum est, libri Prophetarum loquuntur. Quatuor quoque Ordinum nomina Paulus Apostolus ad Ephesios enumerat dicens, Supra omnem Principatum, & Potestatem, & Virtutem, & Dominationem. Qui rursus ad Colossenses scribens, ait, Sive Throni, sive Dominationes, sive Principatus, sive Potestates, &c. Dum ergo illis quatuor, quae ad Ephesios dixit, conjunguntur Throni, quinque sunt Ordines, qui specialiter exprimuntur. Quibus dum Angeli, & Archangeli, Cherubim quoque, & Seraphim junguntur, procul dubio novem esse Angelorum Ordines inveniuntur.

Hos autem novem Angelorum Ordines in tres Hierarchias distributos esse testatur S. Dionysius supra, & in prima quidem, ac suprema Seraphim, Cherubim, ac Thronos collocatos esse, in secunda, & media Dominationes, Virtutes, & Potestates, in tertia denique, & infima Principatus, Archangelos, & Angelos.

3. Docet autem S. Th. q. 108. distinctionem illam Hierarchiarum, & Ordinum inter Angelos esse partim ab ipsorum natura, partim a Gratia illis concessa; a natura quidem dispositive, a Gratia autem complete, ac talem distinctionem remansuram post diem Judicii, tam quoad differentiam graduum, quam quoad executionem officiorum, non quidem omnium, sed eorum tantum, quae statui gloriae conveniunt, hominesque beatos assumendos esse pro meritis ad Ordines beatorum Angelorum, hoc est, illos per Christi Gratiam tantam Gloriam posse promereri, ut in illa Angelis secundum singulos Ordinis gradus aequentur. Et quaestione sequenti declarat idem S. Doctor, ordinem, & praelationem illam etiam inter Angelos reprobos post lapsum remansisse, non quidem quoad dona Gratiae, quibus spoliati sunt, sed quoad ea tantum, quae sunt naturae illorum propria, quae integra in eis remanserunt, ut infra dicetur.

Porro quidnam illa Ordinum nomina significant, qualiave sint illorum beatorum Spirituum officia, ac ministeria, fuse explicant S. Dionysius, S. Gregor. supra, & S. Antoninus 1. p. tit. 31. c. 6. Certe Deus Optimus Maximus in his Angelorum choris magnificentiam, ac excellentiam perfectionum suarum clare ostendit. Amat siquidem in Seraphinis, ut charitas, contemplatur in Cherubinis, ut veritas, sedet in Thronis, ut aequitas, imperat in Dominationibus, ut majestas, regit in Principatibus, tuctur in Virtutibus, corroborat in



Potestatibus, revelat in Archangelis, assistit in Angelis. Vide S. Thomam citata quæst. 108. ubi de his fusissime agit.

## CAPUT III.

*De Angelorum bonorum merito, ac beatitudine, & malorum peccato, ac damnatione.*

## SECTIO I.

*Quodnam fuerit Angelorum bonorum meritum, & malorum peccatum.*

1. **S**UPPONIMUS tanquam certum, Angelos non fuisse creatos in statu beatitudinis supernaturalis, quæ in clara Dei visione consistit.

Quia si in tali statu creati essent, in eo peccare non potuissent, constat autem, plures illorum peccasse.

Supponimus deinde, omnes Angelos fuisse conditos in Gratia, juxta Doctrinam S. Thomæ 1. p. qu. 62. ar. 3. quæ est communis Theologorum.

Constat ex Christi Dom. verbis, S. Jo. 6. quibus dicit, Diabolum non stetisse in veritate. Nomine enim veritatis ibi sanctitas intelligitur, prout S. Chrysost. & alii SS. Patres hunc locum interpretantur, præsertim S. Cyrillus lib. 6. in S. Jo. c. 6. *In veritate, inquit, non stetit, quia prolapsus est a veritate, nec manere voluit in sua originis sanctitate.* Et S. Judas in Epistola sua Canonica dicit, reprobos Angelos *non servasse suum principatum.* Ille autem principatus non potest intelligi de principatu naturæ, quia, ut infra dicetur, naturalia omnia integra in Dæmonibus remanserunt; ergo debet intelligi de principatu Gratiæ sanctificantis, quam in creatione acceperunt, & ex qua exciderunt. Accedit auctoritas Sanctorum Patrum, qui hoc asserunt, ut S. Basilii in Psal. 32. ubi dicit, Angelos *in prima constitutione substantiæ suæ simul infusam habuisse sanctitatem*, & S. Augustini lib. 12. de Civ. cap. 9. ubi ait, Angelos fuisse a Deo creatos *cum bona voluntate, & casto amore.* & paucis interjectis, *Erat Deus simul condens naturam Angelorum & largiens Gratiā.* His præsuppositis

2. Dicendum 1. quosdam Angelos in Gratia accepta perseverasse, & per actus aliquos bonos ex Gratia simul cum liberi arbitrii cooperatione beatitudinem æternam fuisse promeritos, alios autem ab illa Gratia per suæ voluntatis pravitatem excidisse, sicque damnationem æternam incurrisse.

Quod quidam Angeli sint beati, constat ex Scriptura S. Matth. 18. *Angeli eorum semper vident faciem Patris mei.*

Quod vero quidam sint damnati, constat etiam ex S. Matth. 25. *Discedite a me maledicti in ignem æternum, qui paratus est Diabolo, & Angelis ejus.*

Quod

Quod autem Angeli beati suam beatitudinem per aliquos actus bonos ex auxilio Gratiae fuerint promeriti, asserit S. Th. sup. ar. 4. Et hæc est doctrina SS. Patrum, ut S. August. l. 4. de Gen. ad lit. c. 24. ubi dicit, *Angelos beatitudinem consecutos, quia omnia sua ad Dei gloriam retulerunt*. Sancti item Gregorii hom. 7. in Ezech. ubi dicit, *Malis Angelis in superbiam prolapsis bonos in humilitate persistisse*.

Quod denique Angeli reprobi peccaverint, & per peccatum a Gratia exciderint, damnationemque incurrerint, constat manifeste ex Scriptura, Job. 4. *In Angelis suis reperit pravitatem*. Et S. Petri 2. *Deus peccantibus Angelis non pepercit, sed rudentibus Inferni detractos in Tartarum tradidit cruciandos*.

Dicendum 2. peccatum reproborum Angelorum fuisse peccatum superbiæ.

3. Prob. 1. ex Script. Isai. 14. *Detracta est ad Inferos superbia tua, qui dicebas, In cælum conscendam, similis ero Altissimo*, quem Prophetæ locum de Diaboli peccato intelligit S. Aug. l. 3. de Doctrina Christ. c. 37. S. Greg. hom. 34. in Evang. & S. Bern. ser. 38. in Cantica. Ezechielis 28. *Elevatum est cor tuum in decore tuo, Deus ego sum*, quæ verba similiter intelliguntur de Lucifero a SS. Patribus, S. Ambr. lib. de Paradiso c. 2. S. Hieron. in illum Ezechielis locum, & aliis.

Probatur 2. ex Sanctis Patribus, S. Chrysostomo homil. 3. de verbis Isaïæ, *Angelus per superbiam factus est Diabolus*, S. Ambr. Ep. 84. ubi dicit, *In lapsu Diaboli, & hominis prævaricatione initium peccati fuisse superbiam*.

Ad pleniorē autem eorum, quæ supra dicta sunt, intelligentiam

Quæres 1. quinam Angeli, & quot peccaverint.

Respondetur 1. non ex uno solo ordine, sed ex pluribus fuisse eos, qui peccaverunt.

Apostolus siquidem ad Ephes. 6. tribuit Dæmonibus nomina quorundam ordinum, ut Principatum, & Potestatum: ac proinde probabile est (ut docet S. Th. q. 61. art. 9. ad 3.) ex quovis ordine Angelorum aliquos peccasse, sicut & verisimile est, ad quemlibet ordinem Angelorum homines beatos assumendos esse ad instaurandas ruinas eorum, qui ceciderunt.

Respondetur 2. quod communis est SS. Patrum opinio, supremum ex illis, qui peccaverunt, fuisse omnium Angelorum supremum, id est primum ex ordine Seraphinorum. Ita S. Th. supra a. 7. Constat ex cap. 40. Job, ubi vocatur *Initium viarum Domini*, non quia fuerit ante alios, & primo creatus, cum omnes Angeli simul creati fuerint, sed quia (ut explicant S. Hier. & S. Greg. in illum locum) primus fuit dignitate, & excellentia. Id etiam asserit S. Aug. l. 11. de Civit. c. 15. & S. Basilius l. 4. contra Eunomium, & alii communiter.

Respondetur 3. quod docet S. Thomas citato art. 9. pauciores fuisse eos, qui peccaverunt, quam qui persistenter in bono.

Quod colligi posse videtur ex eo, quod Apoc. 13. dicitur, Draconem secum traxisse tertiam duntaxat stellarum partem.

Quæres 2. in quo posita fuerit Angelorum superbia.

4. Respondetur, varias esse super hac re Theologorum sententias. Quidam enim existimant, Angelos in sua naturali perfectione inordinatam habuisse complacentiam, & in illa, tanquam in fine suo ultimo, conquivisse. Alii dicunt, inordinate appetiisse beatitudinem supernaturalem, tanquam propriis viribus, & sine ullo Divinæ Gratiæ auxilio consequendam. Afferunt alii, peccasse Angelos in eo, quod accepta divinitus revelatione de hypostatica unione Verbi Divini aliquando facienda cum natura humana, hanc unionem sibi ex superbia expetierint, & Christo Domino, adeoque toti generi humano illam inviderint. Alii denique omnium probabilissime docent, peccatum superbiæ Angelorum in eo positum fuisse, quod Deo subiecti esse noluerint, sed independentiam ab ejus imperio appetierint, eoque modo similitudinem cum Deo, qui ab omni subjectione, & imperio est independens, affectaverint.

Ita S. Augustinus lib. 11. de Civit. c. 13. ubi de Diabolo dicit, quod *Recusavit suo subditus esse Creatori, & superbia sua, velut auctoritate privata, elatus est.* Et S. Greg. lib. 34. Moral. c. 13. *Ei, a quo conditus fuerat, subesse despexit. Ita enim Deus super omnia est, ut ipse sub nullo sit. Leviathan vero iste ejus celsitudinis culmen aspiciens ius perversæ libertatis appetiit.*

Quæres 3. quanto tempore Angeli fuerint in via, seu quanta fuerit duratio temporis illius, in quo potuerint mereri, aut demereri.

5. Respondetur. 1. dubitandum non esse, quin aliqua mora intercesserit inter creationem Angelorum, & ipsorum beatitudinem, vel damnationem, ita ut mora ista potuerit coexistere alicui parti nostri temporis.

Quod colligi potest ex eo, quod Angeli boni non potuerint simul esse beati, & simul mereri, cum actiones meritoriae secundum legem communem simul cum visione beatifica stare non possint; similiter Angeli reprobatii prius peccaverint, quam fuerint damnati.

Respondetur 2. constare inter Theologos, moram illam, & durationem viæ Angelorum fuisse brevissimam.

Etenim dicitur S. Joan. c. 8. *Diabolum fuisse homicidam ab initio, & in veritate non stetisse;* unde sequitur, illum statim post creationem peccavisse. Et revera jam peccaverat, antequam accederet ad primos parentes, ut eos in peccatum pertraheret. Accedit etiam, quod Angeli propter summam intelligendi sagacitatem, & perfectionem omnia celerrime exequuntur.

Quare dicendum videtur, saltem tria instantia temporis in illa duratione viæ Angelorum esse distinguenda. Primum, in quo omnes tam electi, quam reprobii in Gratia creati sunt, secundum  
in



in quo boni bene operati sunt & sic promeruerunt beatitudinem; mali contra peccaverunt, & sic damnationis reatum incurrerunt, tertium denique, in quo illi præmium virtutis, id est beatitudinem acceperunt, isti e contrario in peccati vindictam damnationis poena multati fuerunt.

SECTIO II.

*Quisnam sit status Angelorum in Gloria.*

1. **T**ria sunt, quæ S. Thomas tribus postremis articulis quæstionis 62. quærit circa beatitudinem Angelorum, quæ hic breviter explicanda sunt.

Primum est, utrum in Angelis beatis remaneat cognitio, ac volitio naturalis.

Respondet S. Doctor affirmative. Cujus ratio est, quia beatitudo naturam non destruit, sed perficit; ergo in beatis Angelis non tollit operationes, quæ illis ratione naturæ suæ conveniunt.

Secundum est, an Angeli beati peccare possint.

Respondet S. Doctor negative. Constat enim ex sacris Literis, beatitudinem electorum, sive Angelorum, sive hominum, æternam fore; at æterna non esset, si per peccatum ab illa excidere possent. Unde S. Fulgentius l. de Fide ad Petrum c. 131. sic loquitur. *Firmissime tene, & nullatenus dubites; omnem creaturam naturaliter mutabilem a Deo incommutabili factam esse, nec tamen posse quemlibet sanctorum Angelorum in deterius mutari, quia sic acceperunt æternam beatitudinem, qua Deo stabiliter perfruuntur, ut ea carere non possint.* Accedit ratio, qua utitur S. Doctor, quia scilicet Angeli beati in Deo clare viso vident omnem rationem boni diligibilis; ergo ab illo nullatenus averti potest eorum voluntas, cum illud bonum, utpote infinitum, omnem illorum capacitatem repleat.

Tertium est, an Angeli beati possint in beatitudine proficere.

Respondet S. Doctor cum distinctione.

Si enim sermo sit de beatitudine essentiali, quæ consistit in clara Dei visione, certum est, Angelos nullum illius incrementum unquam accepturos esse, aut promerituros, tum quia illa est terminus, & finis omnium meritorum, tum quia eodem modo se habet beatitudo in Angelis, atque in hominibus, juxta quod dicitur Apoc. 22. eandem esse hominis, & Angeli mensuram, hoc est rationem meriti; atqui homines beati secundum legem ordinariam in beatitudine proficere non possunt, juxta illud Eccles. 11. *Sive ad Austrum, sive ad Aquilonem ceciderit lignum, ibi erit, quod Sancti Patres interpretantur de immutabilitate quadam hominis in eo termino sive beatitudinis, sive damnationis, ad quem post hanc vitam pervenerit; ergo idem de Angelis beatis dicendum est.*

2. Si vero de beatitudine accidentali quæstio intelligatur, respondet

L 3

S. Do-

S. Doct. Angelos beatos posse in illa proficere, tum quia possunt nova subinde gaudia experiri, juxta illud S. Luc. 15. *Gaudium erit coram Angelis Dei super uno peccatore pœnitentiam agente*, tum quia possunt novas revelationes, & mentis illustrationes divinitus accipere, ut docet S. Dion. c. 7. de Coelesti Hier. & S. August. lib. de Gen. ad lit. c. 17. Haec autem novæ revelationes sicut & alia gaudia, ad beatitudinis accidentalis augmentum conferre possunt.

Osservandum est autem, quod quamvis Angeli beati gloriæ accidentalis incrementum aliquod accipere possint; non possunt tamen illud de novo mereri, ut docet S. Th. art. 9. ad 3. quia secundum communem Theologorum sententiam in termino viæ nullus amplius superest merito locus.

### SECTIO III.

*Qualia sint officia Angelorum beatorum erga homines.*

1. **D**icendum est 1. Angelos interdum ad homines divinitus mitti, velut Divinæ voluntatis internuncios, ac Divinorum consiliorum executores, & ministros.

Id manifeste constat ex Script. Exod. 23. *Ecce ego mittam Angelum meum, qui præcedat te*. S. Luc. 1. *Missus est Gabriel a Deo in Civitatem Galilææ, ad Virginem, &c.* Act. 12. *Nunc scio vere, quia misit Dominus Angelum suum, & eripuit me de manu Herodis*.

An autem omnes omnino Angeli mittantur, & si non omnes, quoniam ex illis, controversum est apud Theologos.

S. Thom. q. 112. a. 3. existimat, Dominationes, cæterosque superiores beatorum Spirituum ordines nunquam mitti, sed tantum reliquos ipsis inferiores.

Magister sententiarum in dist. 10. dicit, ordinarie quidem quatuor illos ordines superiores mitti non solere, sed tantum inferiores, extraordinarie tamen etiam superiores illos mitti. Et S. Greg. ho. 34. in Evang. videtur asserere, S. Gabrielem fuisse supremum Ordinis Seraphinorum. Quod etiam confirmari potest ex eo, quod S. Paulus Hebr. 1. loquens de omnibus illis beatis Spiritibus dicit: *Omnes sunt administratorii Spiritus in ministerium missi propter eos, qui hereditatem capiunt salutis*. Ubi observandum est, Apostolum loqui de omnibus beatis Spiritibus sine ulla exceptione, cum ibi de illis agat, prout Christo Dom. sunt inferiores, quod ad omnes spectare manifestum est. Et Isa. 6. dicit Propheta, ad se unum ex Seraphinis volasse.

Utraque sententia probabilis est, secunda tamen probabilior videtur, quia magis ad sensum Scripturæ videtur accedere.

2. Dicendum 2. Angelos mitti, & a Deo destinari ad custodiam hominum, non tantum in genere, sed & in particulari, ita, ut cuique homini suus adsit Angelus tutelarior.

Huic

Huic veritati, quæ de Fide est, oppositus est error Calvini, qui super illa verba Psalmi 90. *Angelis suis Deus mandavit de te*, ait custodiam illam Angelorum esse falsum commentum.

Refellitur hic error, & nostræ assertionis veritas probatur, 1. ex Scriptura. Gen. 48. *Angelus, qui eruit me de cunctis malis*. Judith. 13. *Custodivit me Angelus ejus & hinc euntem, & ibi commorantem, & inde huc revertentem*. S. Matth. 18. *Angeli eorum semper vident faciem Patris mei, qui in cælis est*.

Probatur 2. ex S. Basilio l. 3. contra Eunomium initio. Quod adfit, inquit, singulis credentibus Angelus tanquam pædagogus, & pastor viam dirigens, nemo contradicet, qui memor fuerit verborum Domini, ubi dicit, *Ne contemnatis unum de pusillis istis, quia Angeli eorum semper vident faciem Patris mei*. Et Psal. 33. *Aderit Angelus in circuitu timentium eum*. Et S. Hieronymus in c. 18. S. Matth. *Magna est dignitas animarum, ut unaquaque ab ortu nativitatis habeat in custodiam sui Angelum delegatum*.

Probatur 3. ex communi consensu totius Ecclesiæ, quæ semper ita esse sensit. Quod colligitur ex Act. 12. ubi, cum S. Petrus a carcere Divina virtute liberatus pulsaret januam domus, in qua Fideles congregati erant, & ipsi miraculum factum ignorarent, unanimi consensu omnes dixerunt, *Angelus ejus est*. Idem etiam colligi potest ex festo S. Angeli Custodis, quod a Summo Pontifice institutum, & approbatum summo omnium consensu ubique receptum est.

Porro S. Thom. art. 5. docet, Angelum custodem unicuique homini adesse, & erga illum suo munere fungi ab ejus ex utero matris nativitate, & non ante, usque ad ejusdem mortem, & non post, eo, quod ante nativitatem infans censeatur esse quasi pars quædam matris, & velut fructus adhuc in arbore pendens, unde tunc per Angelum custodem ipsius matris custodiri censetur; post mortem vero non amplius egeat homo Angelica custodia, cum sit in termino viæ, nec ullus superfit merito, vel demerito locus.

3. Observandum est autem (sicut docet S. Dionys. de Cœlesti Hierar. c. 9.) non solum hominibus singulis, sed præterea populis, regnis, provinciis, civitatibus suos peculiare Angelos, seu Archangelos esse a Deo præpositos. Quod etiam constat ex Scriptura Dan. 10. ubi dicitur, Principem regni Persarum restitisse Gabrieli a Deo Judaici populi liberationem postulanti. Ille enim Persarum Princeps non alius fuit, quam bonus Angelus hujus Populi custos, ac tutelar, ut exponit S. Hier. in eum locum, & S. Greg. lib. 17. Moral. c. 8. Et apud eundem Daniel. c. 8. S. Michael dicitur stare pro filiis Israel, quia nempe olim fuit custos Synagogæ, sicut nunc Ecclesiæ, teste S. Greg. l. c. Et S. Epiph. Hæres. 15. Angelos illos quatuor, de quibus mentio est Apocal. cap. 9. totidem populorum præsides, & custodes interpretatur, scilicet Assyriorum, Babyloniorum, Medorum, atque Persarum.



Præterea singulis etiam rerum generibus, atque speciebus præfici Angelos docet S. August. lib. 83. quæst. q. 79. Unde Apocal. 14. unus Angelus dicitur habere potestatem super ignem, & c. 16. alius vocatur *Angelus Aquarum*. Neque id mirari debemus. Si enim Deus ipse rerum omnium curam habere dignatur, & in Scripturis dicitur, escam dare pullis corvorum, & fœnum jumentis, ac vestire lilia agri; quidni harum etiam rerum custodiam Angelis commiserit?

Unde non sine ratione quidam Doctores existimant, ita exponi posse Scripturas, ut, dum alloquuntur creaturas rationis expertes, ignem, aquam, fontes, volucres, bestias, easque ad laudandum, & benedicendum Deum invitant, verba illa referantur ad Angelos custodes, quos rogamus, ut has omnes creaturas sibi commissas ad Dei gloriam dirigant.

Monet etiam S. Th. art. 4. ad 1. quod, quamvis cuilibet hominum Angelus aliquis ad custodiam deputetur, Christus Dom. tamen nullum habuit Angelum custodem, eo quod non indigeret tali custodia, cum esset impeccabilis, & ipse potius Angelorum custos dici deberet.

Innumera vero sunt beatorum illorum Spirituum erga animas custodiæ suæ concreditas officia. Arcent dæmones Tob. 8. Increpant peccatores Judic. 2. Docent, & instruunt Dan. 9. Consolantur in afflictionibus Tob. 5. Addunt animum, & subministrant vires 3. Reg. 19. Offerunt preces Apoc. 8. Denique animas justorum e corpore migrantes ad Beatorum Sedem deferunt Luc. 16.

Cum igitur tot, & tanta sint Angelorum beatorum in homines beneficia, sic vicissim hominum erga illos officia aliqua merito requiruntur; quæ paucis verbis complectitur S. Bernardus ser. 13. in Ps. 90. ubi explicans hæc verba, *Angelis suis Deus mandavit de te: Quantam, inquit, debet tibi hoc verbum inferre reverentiam, afferre devotionem, conferre fiduciam! reverentiam pro præsentia, devotionem pro benevolentia, fiduciam pro custodia*. Verum de his fusius in tractatu sequenti, cum de Sanctorum veneratione, & invocatione agemus.

#### S E C T I O I V.

*Qualis sit status damnationis reproborum Angelorum.*

1. **C**ertum est 1. Angelos prævaricatores statim post peccatum suum e cælo esse deturbatos, Apoc. 12. Neque locus inventus est eorum amplius in Cælo, & in Infernum detruſos, ut constat ex Epist. 2. Petri cap. 2. *Deus peccantibus Angelis non pepercit, sed rudentibus Inferni detractos in Tartarum tradidit cruciandos*.

Quod quamvis ita sit, nihilominus dæmones non semper in Inferno detineri, sed aliquando Dei permisso inter homines super terram vagari, constat ex variis Scripturæ locis, ut S. Luc. 8. ubi plurimi dæmones a Christo ex unius hominis corpore ejecti rogaverunt eum, ne illis imperaret, ut in abyssum irent, sed in porcos ingredi permetteret. Unde

Unde S. Thom. q. 94. art. 4. recte docet, duplicem locum poenitentia demonibus a Deo assignatum esse, unum quidem ratione culpæ suæ, & hic est Infernus, alium vero ratione exercitationis humanæ, & hic est aer caliginosus terræ vicinus, in quo permissum est eis vagari, & tentare, ut sic exercere possint homines. Cum autem usque ad extremum Judicii diem exercitatio illa durare debeat, ideo ad illud usque tempus (ut ait S. Doctor) & Angeli mali nobiscum hic versantur, ut impugnent, & boni, ut subsidio sint; post illum vero diem omnes mali, tam Angeli, quam homines, in Inferno per æternitatem detinebuntur, boni vero in Coelo manebunt.

Certum est 2. ut docet S. Thomas art. 3. dæmones esse doloris capaces, & susceptibles, non quidem illius doloris, qui est passio appetitus sensitivi, & percipitur organo corporeo, sed doloris pure spiritualis, qui (ut explicat idem S. Doctor) est quidam simplex actus voluntatis, quo refugit, & averfatur aliquid, tanquam sibi contrarium, & nocivum, ut mox explicabitur.

Cum hæc igitur certa sint, difficultas est, an dæmones ab igne inferni torqueantur. Pro cuius resolutione

2. Dicendum est 1. ignem Inferni, qui corporeus est, ac materialis, a Divina justitia tanquam instrumentum assumi ad puniendos dæmones, hosque proinde illo igne torqueri.

Quod ignis ille corporeus sit, ac materialis, in dubium revocare non licet; & Scripturæ, & Patres hoc expresse asserunt. Unde S. Greg. Papa lib. 4. dialog. c. 29. hoc tanquam certum proponit, & de quo nulli ambigere liceat. Et S. Aug. lib. 2. de Civit. cap. 10. hoc tanquam certum affirmat. Et huic veritati communiter subscribunt SS. Patres.

Quod autem ab illo igne Dæmones torqueantur, constat ex Scriptura. S. Matth. 25. ubi Christus Dominus dicit, ignem Inferni paratum esse diabolo, & Angelis ejus. Et Apoc. 10. dicitur Diabolus in stagnum ignis missus, ubi cum Bestia, & Pseudopropheta in æternum cruciandus est. Constat ex S. Gregorio, & S. Augustino locis supra citatis, in quibus asserunt, non tantum corpora reproborum hominum, sed & illorum animas ab Inferorum igne torqueri; eadem autem est ratio dæmonum.

Quæres, quomodo ille ignis, cum sit corporeus, in dæmones, qui puri Spiritus sunt, agere possit, illosque torquere.

Varie sunt super hac re Theologorum sententiæ. Alii liquidem existimant, Dæmones ab igne torqueri, in quantum ab illo detinentur, illique Divina virtute sunt alligati. Unde a S. Juda in Ep. Canonica dicuntur dæmones *vinculis æternis sub caligine reservari*. Alii dicunt, eos ab igne torqueri, non tantum quia detinentur, & alligantur, sed præterea ex eo, quod illum, tanquam sibi maxime disconvenientem, & nocivum apprehendunt, dum se ab illo in æternum detinendos continuo cogitant, nec ab illa cogitatione desistere possunt.

sunt. Alii arbitrantur, ex illa detentione in iis (Deo ita volente) oriri tristitiam, & molestiam ei similem, quam hominis animus ex aequali sui corporis combustione experiretur. Alii docent, ipsum ignem per qualitatem aliquam supernaturalem ipsi a Deo inditam realiter agere in dæmones, ipsisque dolorem cruciatuum incutere.

Verum, quamvis hæc omnia probabiliter dici possint, certissima tamen omnium videtur esse sententia illa, quæ nihil certi hac in re definiri posse asserit S. Augustinus loco supra citato, post multa super hac quæstione subtilissime disputata, tandem sapientissime concludit; *Spiritus illos incorporeos pœna corporalis ignis affici, veris quidem, sed tamen miris, & ineffabilibus modis.*

3. Dicendum 2. pœnas dæmonum, sicut & damnatorum hominum fore æternas.

Huic veritati, quæ de Fide est, oppositus olim fuit error Origenis, qui (ut refert Nicephorus lib. 17. hist. Eccl. cap. 27. & 28.) existimavit, hominum damnatorum, ipsorumque etiam dæmonum tormenta finem aliquando esse habitura.

Refellitur hic error, & nostræ assertionis veritas probatur 1. ex Scriptura S. Matth. c. 25. ubi Christus Dominus refert hæc verba, quæ in extremo judicio adversus reprobos prolaturus est, *Discedite a me, maledicti, in ignem æternum, qui paratus est Diabolo, & Angelis ejus, ex quibus verbis cum constet, ignem illum esse æternum, sequitur, illius pœnam fore quoque æternam, juxta id, quod subjungit, Ibunt hi in supplicium æternum.* Et 2. ad Thessal. 1. de reprobis dicitur, quod pœnas dabunt in interitu æternas. Et S. Jud. in ep. Canon. dicit, *Angelos reprobos vinculis æternis sub caligine reservari.* Et Apoc. 19. dicitur, quod *Diabolus missus est in stagnum ignis ardentis sulphure, ubi cruciabitur in sæcula sæculorum.*

Probatur 2. ex Concilio Lateranensi sub Innocentio III. cap. 1. de Fide Catholica, in quo expresse definitum est, reprobos, & malos cum diabolo pœnam perpetuam subituros esse.

Probatur 3. ex S. Aug. lib. de Fide, & operibus, cap. 5. ubi de reproborum damnatione loquens, *Erit, inquit, æterna eorum combustio, sicut & ignis æternus.* Et S. Ambr. l. 7. in Luc. ubi hæc verba Isa. 66. (*Vermis eorum non morietur, & ignis eorum non extinguetur*) de æternis damnatorum suppliciis exponit.

4. Quæres, qua ratione pœna æterna dæmonibus juste infligatur, cum illorum peccatum fuerit momentaneum.

Respondetur, id justissime fieri tam respectu dæmonum, quam etiam hominum reproborum.

1. Quia (ut ait S. August. lib. 21. de Civit. cap. 12.) *Ille dignus est æterno malo, qui hoc in se peremit bonum, quod esse posset æternum.*

2. Quia ut dicit S. Thom. in suppl. qu. 99. art. 1. ) pœna peccati taxatur secundum dignitatem ejus, in quem peccatur, unde majori pœna dignus



dignus esset, qui percuteret alapa Principem, aut Regem, quam si cuicumque alteri privato hanc injuriam irrogaret, atqui sive diabolus, sive homo mortaliter peccans, contra Deum infinitæ majestatis, & excellentiæ peccat, ejusque honori summam (quantum in ipso est) infert injuriam, dum in creatura per peccatum finem ultimum constituit; ergo infinita poena dignus est. Cum autem creatura, quæ in se finita est, poenam secundum intensiorem acerbitatis infinitæ ferre non possit, poena secundum durationem temporis infinita illi subeunda est; quæ proinde juste a Deo illi infligitur.

3. Quia (ut ait S. Greg. l. 4. Dial. c. 44.) *Ad magnam judicantis justiciam pertinet, ut nunquam careant supplicio, qui in hac vita nunquam voluerunt carere peccato.* Qui enim in peccatum mortale propria voluntate labitur, se in eum statum injustitiæ redigit, ex quo propriis viribus erui nunquam in æternum poterit; unde ex hoc ipso, quod vult peccare, vult consequenter in peccato per totam æternitatem manere. Quare juste a Deo peccator non solum ob actionem peccati, sed præsertim ob voluntatem in peccato permanendi, quæ (sicut dictum est) in æternum protenditur, poena interminabili, & æterna plectitur.

## S E C T I O V.

*Quæ sit Dæmonum conditio quoad intellectum, & voluntatem.*

1. **Q**uestionis propositæ sensus est, an intellectus dæmonum ita sit obcæcatus, ut nullam amplius habeat veritatis cognitionem: an item eorum voluntas omnino sit obstinata in malo, & quæ sit illius obstinationis causa.

Quod spectat ad intellectum, observandum est; duplicem esse cognitionem veritatis, unam speculativam, alteram practicam, & utramque rursus esse vel naturalem, vel supernaturalem. Hac observatione supposita

Dicendum 1. cognitionem speculativam naturalem integram in dæmonibus post peccatum mansisse, neque ullo modo fuisse diminutam. Ita S. Th. 1. p. q. 64. a. 1. quia in dæmonibus post lapsum dona omnia naturalia integra remanserunt, ut docet S. Dion. de Divin. nomin. c. 4. & S. Aug. l. 2. de Gen. ad lit. c. 17.

Dicendum 2. cognitionem speculativam supernaturalem non esse in dæmonibus totaliter ablatam, sed valde diminutam, ut docet S. Th. supra.

Quia scilicet de rebus supernaturalibus aliqua iis cognitio interdum conceditur, vel mediantibus Angelis, vel aliquibus aliis modis, quam proprie loquendo hæc cognitio in eis supernaturalis non nisi materialiter dici debeat, ut recte observant aliqui Theologi, in quantum scilicet est de aliquibus rebus supernaturalibus, non vero, quod procedat

ab

ab ullo habitu supernaturali Fidei, quo propter peccatum sunt spoliati, neque ex ullo motivo supernaturali, cujus in statu damnationis sunt incapaces.

2. Dicendum 3. cognitionem practicam de rebus bene agendis circa res morales, siue sit ordinis naturalis, siue supernaturalis, fuisse Dæmonibus ratione peccati detractam.

Probatur 1. ex Scriptura, in cujus variis locis Dæmon vocatur homicida mendax, ut S. Jo. 8. *Cum loquitur mendacium, ex propriis loquitur*. Item aliis in locis Dæmones vocantur spirituales nequitiae; Principes, & Potestates tenebrarum. Et Ezech. 28. de primo Angelorum dicitur, *Perdidisti sapientiam tuam in decore tuo*.

Probatur 2. ex S. Aug. in Enchirid. ad Laurentium c. 24. & 25. ubi dicit, ignorantiam rerum agendarum, & concupiscentiam nocivarum esse mala hominibus, & Dæmonibus communia.

Probatur 3. hac ratione, quia veritas, & rectitudo iudicii practici desumitur ex recta ordinatione affectus, & voluntatis erga bonum morale, ut docet in Ethicis Philosophus; sed Dæmones nec habent, nec habere possunt ullum affectum erga ullum morale bonum; ergo nec etiam iudicium practicum verum, & rectum.

3. Quod spectat ad voluntatem, dicendum est, voluntatem Dæmonum ita esse in malo obstinatum, ut nunquam possit flecti, & converti in bonum. Ita S. Th. sup. a. 2. Est de Fide contra Origenem, qui ideo censebat, tormenta dæmonum finem aliquando esse habitura, quia (ut refert S. Hier. Epist. 61. adversus Jo. Hierosolymitanum) existimabat, ipsos dæmones poenitentiam aliquando esse acturos.

Refellitur hic error, & veritas nostræ Fidei probatur ex eo, quod (ut docet S. Cyprianus in fine libri contra Demetrium) *Quando istinc excessum fuerit, nullus jam poenitentiae, nullus satisfactionis effectus erit*; quod & Scriptura figurate declarat Eccl. 11. *Ubi ceciderit lignum, ibi eris*; quod autem homini mors, hoc dæmoni casus fuit. Et Eccl. 9. dicitur, quod *Nec ratio, nec sapientia, nec scientia est apud Inferos*. Et Job 10. quod ibi *Nallus ordo, sed sempiternus horror inhabitat*. Unde S. Fulgentius l. de Fide ad Petrum c. 3. dicit, *In igne Inferni omnes Angelos pravaricatores nec mala voluntate posse carere, nec poena*. Et infra, *sic bonam amisisse voluntatem, ut amissam resumere nequeant*. Et S. Prosper l. 3. de vita contemplativa recte observat, damnatos mitti in tenebras ligatis manibus, & pedibus, ut dicitur Matth. 22. eo quod deinceps non possint bona ulla opera exercere.

Ratio autem, cur nullus sit dæmonibus, & damnatis poenitentiae locus, est, quia nullus est Gratia. Sicut enim hominibus in peccato mortali decedentibus nullam amplius Gratiā dare decrevit Deus, quā voluntates eorum ad poenitentiam excitentur: sic nec Angelis post lapsum. Sine Gratia autem nec hominis, nec Angeli voluntas ad veram poenitentiam converti potest, ut supponimus ex dicendis in tractatu de Gratia:

## SECTIO VI.

*Quomodo a Dæmonibus homines impugnentur.*

1. **C**ertum est ex Fide, Dæmones ex Dei permissu homines impugnare, eosque ad malum incitare, idque ipsos aliquando, imo sæpissime facere.

Id constat ex variis Scripturæ locis, ut Genes. 3. ubi refertur, primos parentes ad peccatum fuisse a Dæmone inductos. Et Epistola prima S. Petri c. 5. *Adversarius vester Diabolus, tanquam leo rugiens, circumit quærens, quem devoret.* Et Ephes. 6. *Non est nobis colluctatio adversus carnem, & sanguinem, sed adversus Principes, & Potestates, adversus mundi Rectores tenebrarum harum, contra spiritualia nequitie in cælestibus, &c.*

Faciunt autem hoc Dæmones, Deo non quidem jubente, sed tamen permittente, illorumque perversos conatus in electorum suorum bonum ordinante.

Unde S. Thomas quæst. 114. art. 1. dicit, impugnationem hominum a Dæmonibus ex ipsorum Dæmonum malitia procedere, ordinem vero impugnationis esse a Deo, qui novit malis bene uti, eaque ad bonum ordinare.

Sicut autem Deus homines a Dæmonibus impugnari permittit, sic & ipsis, cum impugnantur, Gratiæ suæ auxilia subministrat, quibus si velint, qualibet tentatione superiores possunt evadere.

Unde S. Paulus 1. Cor. 10. dicit. *Fidelis Deus, qui non patietur vos tentari supra id, quod potestis, sed faciet etiam cum tentatione proventum, ut possitis sustinere.* Et 2. Cor. 12. *Datus est mihi stimulus carnis meæ, Angelus Satanae, qui me colaphizet, propter quod ter Dominum rogaui, ut discederet a me, & dixit mihi; Sufficit tibi Gratiæ mea.*

2. Quæres, quomodo fiat illa hominis impugnatio per Dæmonem.

Respondetur, duobus præsertim modis fieri posse, Dæmone scilicet aliquid vel intra hominem, vel extra ipsum operante.

Primo enim modo tentare potest, vel commovendo spiritus vitales, in quibus species sensibiles continentur, & eas potentiis cognoscitivis obijciendo, sicque pravam aliquam imaginationem efformando, vel commovendo humores, & spiritus in organo corporeo appetitus sensitivi, sicque indirecte voluntatem ad malum aliquod excitando.

Secundo autem modo ( hoc est aliquid extra hominem operando ) ipsum tentare potest, cum aliquid verum, vel apparens sensibus externis obijcit, unde occasio alicujus peccati perpetrandi ipsi homini suggeratur. Ita S. Thomas quæst. 111. art. 1. 2. 3. & 4. ubi fuse explicat, qua ratione tam boni, quam mali Angeli interiorius, vel exteriorius in homines agere possint.

DE



## DE CREATIONE HOMINIS.

## CAPUT IV.

De Creatione Hominis, ac statu Innocentiæ.

## SECTIO I.

*Quid de creatione Hominis sentiendum sit, & qualis sit ejus anima, an incorporea, & immortalis.*

1. **P**ost creationem cæterarum omnium rerum, quæ ad mundi constitutionem, & ornatum spectant, sex diebus factam, ipsomet sexto die hominem a Deo creatum fuisse sacræ Litteræ testantur, Gen. c. 2. & in primis quidem corpus ipsius hominis virtute Divina e limo terræ formatum fuisse, tum animam rationis capacem, & expertem corruptionis eadem virtute Divina creatam, & corpori inditam fuisse docent his verbis. *Formavit Dominus Deus hominem de limo terræ, & inspiravit in faciem ejus spiraculum vitæ, & factus est homo in animam viventem.*

Sunt autem hic aliqua circa hominis creationem observanda.

Primum est, non solum primi hominis, sed etiam omnium aliorum animas singulas immediate a Deo creari, & corporibus infundi, ac proinde falsum esse, & erroneum id, quod censuit Tertullianus ( ut refert S. Hier. in Epist. ad Marcellinum, & Anapsychiam ) scilicet animas generari ab animabus parentum, sicut corpora a corporibus, & simul cum semine traduci.

Probatur 1. hæc veritas ex Scriptura. Psal. 32. *Qui finxit singillatim corda eorum.* Zachar. 12. *Fingens spiritum hominis in eo.*

Quibus locis ad hanc veritatem probandam utitur S. Hier. Ep. ad Pammachium adversus errores Joannis Hierosolymitani.

Probatur 2. auctoritate S. Leonis Papæ Ep. 93. ad Turibium c. 10. ubi expresse dicit, *animas corporibus uniri non ab alio, nisi ab opifice Deo, qui ipsarum est creator.* Ibidem etiam damnat errorem Origenis asserentis, animas diu ante corporum productionem fuisse creatas; definitque, animas hominum non esse, priusquam corporibus a Deo inspirentur. Et S. Hilar. l. 10. de Trin. ante medium, *Anima, inquit, opus est Dei, carnis vero generatio semper ex carne est.*

Nota, quod S. Thom. q. 118. art. 2. absolute pronunciat, hæreticum esse dicere, animam intellectivam traduci cum semine.

2. Secundum est, animam hominis esse substantiam pure spirituales.

Probatur 1. ex Scriptura, in qua, ut plurimum, anima humana vocatur spiritus. Eccl. 12. *Revertatur pulvis in terram suam, unde erat, & spi-*

*& spiritus redeat ad Deum, qui dedit illum. S. Luc. 23. In manus tuas commendo spiritum meum. Gal. 5. Caro concupiscit adversus spiritum.*

Probatur 2. ex Concilio Lateranensi sub Innocentio III. c. 1. ubi definitum est, *utramque creaturam, spirituales, & corporales, conditam esse a Deo, Angelicam scilicet, & mundanam, deinde humanam quasi communem spiritu, & corpore constitutam.*

Probatur 3. ex SS. Patribus, qui passim pro certo affirmant, animam hominis esse spiritum incorporeum; maxime S. Aug. qui variis in locis contrariam sententiam refutat, ut lib. de Hæresibus, Hæresi 86. & l. 10. de Gen. ad lit. c. 24. & seqq. ubi errorem Tertuliani animam corpoream asserentis confutat, & Ep. 28. ad S. Hier. ubi sic loquitur: *Incorpoream esse animam mihi fateor esse persuasum. & paucis interjectis, Neque hæc perinde loquor, ut te, quæ tibi nota sunt, doceam, sed ut aperiam, quid firmissime de anima teneam.* Eandem veritatem probat S. Hier. in c. 12. S. Matth. ex illis Christi Domini verbis. *Nolite timere eos, qui occidunt corpus, animam autem non possunt occidere.* In eadem etiam sententia sunt S. Gregorius Papa l. 21. Moral. c. 2. S. Gregorius Nazianzenus Apologetico 1. non longe ab initio, S. Ambrosius lib. de Noe, & Arca cap. 25. & lib. de bono mortis cap. 9. & communiter omnes alii.

3. Tertium est, animam humanam, cum sit spiritualis, esse quoque a corpore independentem, ac proinde immortalem.

Constat 1. ex Scriptura, quæ innumeris prope in locis id asserit, ut Sap. 2. *Nec judicaverunt honorem animarum Sanctorum, quoniam creavit Deus hominem inextermabilem.* Et cap. 3. *Iustorum animæ in manu Dei sunt, & non tanget illos tormentum mortis.* 2. Cor. 5. *Audemus, & bonam voluntatem habemus magis peregrinari a corpore, & præsentem esse ad Dominum.*

Constat 2. ex Concilio Lateranensi sub Leone, in quo id expresse definitum est his verbis. *Damnamus, & reprobamus omnes asserentes, animam intellectivam mortalem esse, aut unicam in cunctis hominibus, & hæc in dubium vertentes.*

Constat 3. ex S. Dionysio c. 4. de Div. nom. ubi dicit, *Animas humanas esse intellectuales, & habere substantialem vitam inconsumptibilem.* Et S. Ambr. citato lib. de bono mortis c. 9. & communiter alii SS. Patres ex eo, quod anima spiritualis sit, inferunt, & probant, illam esse quoque incorruptibilem, & immortalem.

Constat 4. rationibus, quibus hæc veritas a Philosophis, & Theologis probari solet. Quæ rationes petuntur 1. ex ipsius animæ, potentiarumque ejus præstantia, ac vi operatrice illimitata, quæ in omnes res existentes & possibiles, tanquam in objecta sibi propria, ferri potest; quod quidem formis materialibus nusquam competit, ut inductione constat. 2. ex naturali appetitu beatitudinis ipsi animæ indito, qui frustra esse dici non debet, nec tamen ullis bonis creatis in hac vita expleri potest,

potest, ut experientia satis est compertum. 3. ex operationibus quibusdam ipsius animæ a corpore omnino independentibus, quales sunt plurimæ cognitiones rerum universalium, aut pure spiritualium. Si enim anima operari potest independententer a corpore, poterit etiam esse independententer ab eodem, cum, juxta receptum axioma Philosophorum, modus operandi sequatur modum essendi. 4. denique ex consideratione Divinæ justitiæ. Cum enim plurima opera mala ab hominibus committantur, ob quæ nullam in hac vita poenam luunt, multa etiam opera bona exerceantur a justis, ob quæ nullam a Deo videantur recipere mercedem; hinc sequitur aliam esse vitam, in qua a Deo summe justo & malis supplicium debitum, & bonis præmium meritum retribuatur. Hoc argumento usus est S. Chrys. ser. 8. de providentia. Si, inquit, *nihil est post hanc vitam, ne Deus quidem est, si Deus est, justus est, quod si justus sit, pro dignitate unicuique retribuet.*

4. Quartum denique in creatione hominis observandum est, qua ratione dicatur, factum illum esse ad imaginem, & similitudinem Dei.

S. Aug. tract. 3. in S. Jo. existimat, id esse, quia mente rationis capaci præditus est. S. Hier. Ep. 146. quia voluntatem habet liberam, quam in utramvis partem flectere potest. S. Ambros. lib. de bono mortis c. 5. hanc Dei similitudinem, & imaginem in virtute constituit. *Fuga malorum*, inquit, *similitudo Dei est, & virtutibus imago Dei acquiritur.* S. Jo. Chrys. ho. 10. in Gen. in imperio, & dominatu, quem homo super animantes, aliasque creaturas sibi inferiores a Deo accepit.

Possunt convenientissimæ hæ, & aliæ similes SS. Patrum sententiæ simul jungi, ita, ut ad perfectam imaginis, & similitudinis cum Deo in anima humana complendam rationem singulæ aliquid conferre censeantur, atque ita homo dicatur esse ad imaginem, & similitudinem Dei factus, in quantum est rationis capax, arbitrii libertate præditus, imperio, & dominatu in creaturas sibi inferiores a Deo donatus, & virtutum, ac sanctitatis decore ornatus.

## S E C T I O II.

*Qualis fuerit conditio primi hominis quoad intellectum.*

1. **Q**uestio hæc, sicut & illa, quæ Sectione sequenti proponetur, intelligenda est de homine in statu illo, in quo primum a Deo creatus fuit, qui communiter vocatur status innocentie, seu justitiæ originalis. De homine igitur in illo statu quæritur, qualis fuerit illius conditio quoad intellectum. Pro cujus resolutione

Dicendum 1. Adamum in creatione accepisse a Deo perfectissimam scientiam, & cognitionem rerum omnium naturalium. Ita S. Thom. 1. p. qu. 94. art. 3.

Constat tum ex eo, quod Eccli. 17. de primis parentibus dicitur, quod *Deus disciplina intellectus replevit illos, creavit illis scientiam spiritus,*  
sensu



*sensu implevit cor illorum*, tum etiam ex eo, quod Gen. 2. Adamus Dei jussu cunctis animantibus nomina propria imposuit, unde sequitur, illorum omnium animantium naturas callere debuisse. Nomina enim, quæ vera & propria sunt, debent naturis rerum congruere. Hoc argumento ad probandum, perfectam rerum omnium in Adamo fuisse scientiam, utitur S. Chrysost. ho. 14. in Gen. & post illum S. Th. sup.

Dicendum 2. quamvis Adamus clare, & intuitive Divinam Essentiam non cognoverit, illum tamen longe altiorem, & perfectiorem Dei cognitionem habuisse, quam nos modo habeamus. Ita S. Thom. sup. art. 1.

Quod claram Essentiæ Divinæ visionem non habuerit, recte probat S. Doctor ex eo, quod si eam habuisset, a Deo per peccatum averti non potuisset, sicut nec possunt nunc Beati in cœlo.

Quod autem cognitio illa, quam de Deo habuit, altior, & perfectior fuerit ea, quam nunc habemus, constat ex eo, quod cum non haberet corpus tale, quod (ut ait Sapiens c. 9.) aggravaret animam, & sensum deprimeret, cumque (ut postea dicitur) inferiores animæ potentia in illo ita essent ordinatæ, ut perfecte superioribus subderentur, nec eas ullo modo impedirent, hinc fiebat (ut ait S. Doctor) quod homo non impediatur per res exteriores a clara, & firma contemplatione rerum intelligibilium, quarum cognitionem per primæ veritatis irradiationem facilius percipiebat. Additque ex S. August. lib. 11. de Gen. ad lit. c. 33. probabiliter dici posse, Deum tunc primis hominibus locutum fuisse, sicut loqui solet Angelis, ipsa incommutabili veritate illustrans mentes eorum, etsi non cum tanta participatione Divinæ lucis.

2. Dicendum 3. Adamo ante peccatum mysteria aliqua supernaturalia divinitus fuisse revelata, ea scilicet, quorum cognitio in primo illo instanti fuit ipsi necessaria. Ita S. Thom. ar. 3.

Unde S. Epiphani. initio Panarii adversus 80. Hæreses dicit, mysterium SS. Trinitatis fuisse ab Adamo cognitum. Et S. Doct. 2. 2. q. 2. ar. 7. asserit, eidem Adamo divinitus innotuisse mysterium Incarnationis, non quidem ut fuit institutum ad liberandum humanum genus a peccato, sed ut ordinatum erat ad beatificandos homines, seu ipsos ad claram Dei visionem perducendos, quam ipsi propriis viribus nec mereri, nec assequi unquam potuissent. Sunt etiam aliqui Theologi, qui probabile esse existimant, Adamum cognovisse bonorum Angelorum meritum, & beatitudinem, simulque malorum casum, & damnationem, tum ad ejus consolationem, cum intelligeret, nonnullos homines ex ipso oriundos in eorum locum asciscendos esse, tum etiam ad propriam cautelam. Cætera vero, quæ neque ex principiis naturalibus sciri possunt, nec ad homines recte gubernandos in ordine ad finem supernaturalem pertinent, recte a S. Thom. supra Adamum latuisse dicuntur.

## S E C T I O III.

*Qualis fuerit conditio primi hominis quoad voluntatem,  
& alias animæ potentias.*

1. **D**icendum 1. Adamum in creatione Gratiā sanctificantem a Deo accepisse, siue eam post creationem a Deo acceperit, siue (quod probabilius videtur) in ea creatus fuerit.

Prob. 1. ex Scriptura. Eccl. 7. *Deus fecit hominem rectum*; atqui non potuisset esse rectus sine Gratia; quia passim in Scriptura rectitudinis nomine denotatur Gratia, & Sanctitas. Job. 1. *Erat vir simplex, & rectus*. Psal. 7. *Salvos facit rectos corde*. Item Ephes. 7. *Renovamini spiritu mentis vestræ, & induite novum hominem, qui secundum Deum creatus est in justitia, & sanctitate*, quibus verbis significat Apostolus, nos per Christi Domini merita renovari ad eam justitiam, & sanctitatem, in qua initio conditi sumus.

Prob. 2. ex Conc. Trid. sess. 5. ubi anathema dicitur ei, qui non confiteretur, primum hominem Adam, cum mandatum Dei in Paradiso fuisset transgressus, statim justitiam, & sanctitatem, in qua constitutus fuerat, amisisse.

Prob. 3. ex SS. Patribus. Idipsum enim docent S. Basil. hom. 10. Hexamer. & S. Aug. lib. 14. de Civ. c. 11. & 27.

Dicendum 2. primum hominem simul cum Gratia sanctificante accepisse reliquas virtutes, & dona Spiritus Sancti, quæ ipsius Gratiæ infusionem comitantur.

Constat 1. ex Conc. Trid. sess. 6. c. 7. ubi docet, nos in Baptismo accipere veram, & Christianam justitiam, & sanctitatem, quam Adamus sua inobedientia sibi, & nobis perdidit. Et initio ejusdem capituli dicit, illam justitiam, & sanctitatem consistere in susceptione Gratiæ, & donorum. Quod si eam justitiam sibi Adamus perdidit; ergo eam prius habuit.

Constat 2. ex S. Damasc. l. 2. de Fide c. 12. ubi dicit, quod creavit Deus hominem innocentem, rectum, probum, omni virtutum genere excellens.

2. Dicendum 3. præter supra dicta, primum hominem accepisse a Deo aliud insigne donum, cujus beneficio appetitus sensitivus, tum concupiscibilis, tum irascibilis, ita erat parti superiori animæ, ac rationi subiectus, ut nunquam nisi ex illius præscripto & imperio moveretur, nihilque saltem inordinatum posset, præveniēdo rationem, appetere.

Constat 1. ex Conc. Trident. sess. 5. can. ult. ubi explicans verba Apostoli Rom. 7. sensualitatem peccatum appellantis, ait, hanc sensualitatem, id est appetitum sentientem, motibus suis inordinatis rationem prævenientem dici peccatum, quia a peccato est, & ad peccatum

tum inclinatur. Quod si a peccato est, ergo ante peccatum non erat.

Constat 2. ex S. August. lib. 3. de peccato originali contra Pelagium cap. 35. ubi dicit, in statu innocentiae motus sensualitatis futuros fuisse obediētes *imperio tranquillissimæ charitatis*.

3. Dicendum 4. donum illud perfectæ subjectionis appetitus sensitivi sub imperio rationis fuisse gratuitum, & naturæ hominis minime debitum, ac proinde supernaturale.

Probatur ex eo, quod inter articulos Michaelis Baji a Pio V. & Greg. XIII. damnatos hic erat, *Integritas primæ conditionis non fuit indebita humanæ naturæ exaltatio, sed debita ejus conditio*, tum etiam quia ex communi Theologorum consensu post peccatum omnia naturalia in homine integra remanserunt, quia peccatum, quatenus præcise peccatum est, nulli perfectioni pure naturali repugnat; atqui certum est, in hominibus prædictam illam subjectionem amplius non reperiri; ergo hæc ipsis naturalis esse dici non potest.

Porro ad illud donum subjectionis supra explicatum accedit aliud non minus excellens, dominium scilicet, quod homini in omnia animalia in statu innocentiae perfecte competebat, ut constat ex 1. Gen. Quamvis autem hoc dominium naturaliter homini convenire videatur, multo perfectius tamen illud Divino munere habuisset, si in statu innocentiae perseverasset. Tunc enim (ut recte observat Cajet. ad q. 96. n. 1.) non solum subiecta, sed etiam subdita, & obtemperantia sibi homo habuisset animalia; nunc autem, etsi naturaliter homini subiecta sint, illi tamen nec subduntur, nec obediunt, ut satis experientia constat.

Dicendum est 5. probabilissimum esse, iustitiam originalem, in qua primus homo conditus est, non fuisse unum aliquem simplicem habitum, quo totus homo rectus, & perfectus evaderet, sed potius fuisse quandam aptissimam plurimorum habituum supernaturalium complexionem, quorum alii in intellectu, alii in voluntate, alii denique in inferiori animæ parte residerent, quibus proinde totus homo secundum omnes facultates suas perficiebatur in ordine ad finem, ad quem creatus est. Ita Pererius lib. 5. in Gen. n. 88. Saliarius in Annal. veter. testam. ad diem 7. creationis n. 78. & plures alii.

Ratio est, quia unus, & simplex habitus non potuisset tam multiplices, & varios effectus producere, & tam diversas facultates regere, ac movere, ac in subiectis adeo differentibus residere.

4. Dicendum 6. primum parentem non sibi soli iustitiam originalem a Deo accepisse, sed etiam suis posteris, id est illam ab ipso, si non peccasset, in posteros fuisse transfundendam.

Id ex Fide certum est, ut patet ex doctrina, & definitione Concil. Trid. sess. 6. c. 6. asserentis, Adamum per suam inobedientiam sibi, & nobis perdidisse iustitiam illam, quam a Deo acceperat, & sess. 5. can. 2. anathema dicitur ei, qui asseruerit, Adæ prævaricationem sibi soli, & non ejus propagini nocuisse, & acceptam a Deo sanctitatem, &



justitiam illum sibi soli, & non etiam nobis, perdidisse; hanc autem ille nobis perdere non potuisset, nisi eam in nobis transfundendam accepisset.

## S E C T I O I V.

*An in statu innocentie homo fuisset immortalis.*

1. **D**uplex est immortalitas, ut notat Magister in 2. dist. 19. una, qua quis potest non mori, altera, qua non potest mori. De priorē tantum quæstio intelligenda est. Certum est enim, secundum immortalitatis genus proprium esse tantum status gloriæ post resurrectionem. Hac distinctione supposita,

Dicendum est, hominem in statu innocentie futurum fuisse immortalem priori modo, hoc est, quod si non peccasset, potuisset non mori.

Hæc veritas, quæ de Fide est, constat 1. ex Scriptura. Sap. 1. c. 1. *Deus mortem non fecit, &c.* 2. *Deus creavit hominem inexterminabilem, invidia autem diaboli mors introivit in orbem terrarum.*

Constat 2. ex Conciliis, Milevitano can. 1. & Tridentino sess. 5. ubi hæc veritas tanquam Fide certa definita est.

Quæres, quanam ratione fieri potuisset, ut homo in illo statu immortalis extitisset, siquidem corpus ejus, utpote ex quatuor elementis compactum, natura sua fuisset dissolubile.

Respondetur, immortalitatem hominis in statu illo causandam fuisse tum ex providentia Dei speciali, qua fuisset ab omni læsione agentium externorum præservatus, tum etiam ex esu fructuum arboris vitæ, quibus, præter id, quod illis cum aliarum arborum fructibus commune erat, nempe alere, & nutrire hominem, duplex adhuc inerat vis, una reparandi humoris radicalis, illiusque in primigeniam puritatem restituendi, altera caloris nativi corroborandi, ipsiusque vigorem pristinum restaurandi.

Ita S. Th. q. 97. ar. 4. & constat præterea ex S. August. l. 14. de Civ. c. 26. ubi etiam docet, hominem in statu innocentie non solum immortalem futurum fuisse, sed & impassibilem, hoc est expertem omnis læsionis, & immutationis corruptivæ, quæ mortem, aut morbos induceret. Quod & probat S. Doct. ar. 2. ex eo, quod si passibilis fuisset, etiam corruptibilis, ac proinde mortalis fuisset. Quod enim pati potest aliquid nature suæ contrarium, potest etiam corrumpi.

Observandum est autem 1. ex S. Doctore cit. ar. 2. lignum illud vitæ virtutem habuisse conferendi immortalitatem, non absolute, & simpliciter, ita ut qui semel de illius fructu comedisset, mori amplius non potuisset, sed tantum usque ad certum aliquod, & determinatum tempus, quo elapso, vel homo ad statum gloriæ translatus fuisset, vel illius esu iterum uti debuisset.

2. Ob-

## DE LAPSU HOMINIS.

181

2. Observandum 2. ex eodem S. Doctore q. 102. ar. 1. Paradisum illum, in cuius medio dicitur Gen. 3. lignum vitæ plantatum fuisse, & in quem primus homo post creationem a Deo translatus est, fuisse verum, & corporeum locum in partibus Orientis situm, & maxima aeris temperie præditum.

Constat 1. ex cap. 2. Gen. ubi locus, & arbores, & flumina Paradisi adeo accurate commemorantur, ut manifeste appareat, ea narratione non aliquid mystice, & figurate significari, ut Philo, & Origenes falso existimaverunt, sed historiam veram proponi, ut recte probat S. Chrysost. ho. 13. in Genes.

Constat 2. ex traditione Ecclesiæ, cuius testis est sexta Synodus generalis act. 13. ubi approbatur Epist. Sophronii, quæ act. 11. recitata fuerat, in qua Epistola Origenistæ damnantur ex eo, quod præter plurimos alios errores, etiam *contra paternam, & Apostolicam Traditionem Paradisi plantationem projecerint.*

Quæres, an adhuc extet ille Paradisus, an vero aquis diluvii, vel aliquo alio modo fuerit destructus.

Respondetur, S. Irenæum lib. 5. cont. Hær. c. 5. S. Athanas. in Epist. de Nicæna Synodo c. 3. & quosdam alios SS. Patres existimare, Paradisum illum adhuc extare, in eumque Henoch, & Eliam fuisse translatos, ibique etiamnum vivere. Sunt e contra quidam alii, qui illum non amplius extare sentiunt. Alii denique media via incedentes, regionem illam, in qua Paradisus erectus fuit, adhuc extare quidem arbitrantur, ipsas tamen loci delicias, arbores, fontes, aliaque ornamenta, Deo volente, ita exolevisse, ut mirum non sit, certa ejus aliqua vestigia nusquam gentium reperiri.

## DE LAPSU HOMINIS.

### C A P U T V.

*De lapsu hominis, & peccato originali.*

### S E C T I O I.

*Quale fuerit primorum parentum peccatum.*

1. **S**upponimus 1. (sicut docet sacra Scriptura, Gen. 3.) Divinus sapientiæ visum fuisse, hominem a se recenter conditum imposito præcepto sibi declarare subiectum. Cæteris enim arboribus Paradisi ad esum concessis, unius tantum exceptio facta est, a cuius fructibus, Deo ita iubente, abstinere deberet. Quod quidem præceptum (ut observat S. Chrysost. ho. 14. in Gen.) probandæ obedientiæ convenientissimum fuit, quippe quod datum est,

non de malo aliquo vitando, aut bono faciendo quod naturæ lex, aut recta ratio vitandum, aut faciendum diceret, sed quod ex sola iubentis voluntate penderet, ac sola Dei auctoritate niteretur.

Supponimus 2. ex eodem cap. 3. Genes. primos parentes, Deo ita permittente, fuisse a dæmone tentatos: *Neque enim, ut ait S. August. lib. de Gen. c. 4. magna laus illis fuisset, si propterea bene viverent, quia nemo male vivere suaderet.*

Quamvis autem Cajet. & aliqui alii existiment, narrationem tentationis illius, quæ in illo Genesis loco habetur, esse mysticam, & figuratam, nec ullum serpentem exterius intervenisse, sed diabolum, qui sæpe in Scripturis serpentis nomine designatur, per suggestionem mere internam primos parentes impugnasse; illa tamen opinio merito ab omnibus rejicitur, communisque, & receptissima Doctorum sententia est, dæmonem in hac tentatione veri serpentis organo usum fuisse, eaque omnia, quæ in illo cap. 3. referuntur, non figurate, sed proprie, & literaliter intelligenda esse, ut de facto intellexerunt S. August. lib. 11. de Gen. ad lit. c. 17. & S. Chrysost. hom. 16. in Gen. & communiter alii omnes.

His præsuppositis, queritur, quale fuerit peccatum, quod primi parentes commiserunt, cum tentationi dæmonis consenserunt, & de fructu vetito comederunt. Pro cuius resolutione

Dicendum 1. non unum, sed multiplex fuisse illorum peccatum.

Ita S. Doct. opusc. 2. c. 190. ubi docet, quinque modis Evam peccasse. Primo enim, inquit, *peccavit peccato superbiæ, qua inordinate excellentiam appetiit. 2. curiositatis, qua scientiam ultra terminos sibi præfixos concupivit. 3. gulæ, qua suavitæ cibi permota est ad edendum. 4. infidelitatis, per falsam æstimationem de Deo, dum credidit verbis diaboli contra Deum loquentis. 5. inobedientiæ, præceptum Dei transgrediendo.* Addi potest & sextum, scandali scilicet, quia fuit in lapidem offensionis, & in petram scandali viro suo, & per ipsum omni generi humano. Postquam enim ipsa peccavit, virum quoque suum ad peccatum induxit. Qui quidem præter alia supra dicta peccata, quæ ipsi cum uxore communia fuerunt, peccavit insuper (ut notat S. August. sup. c. 42.) peccato inordinati erga uxorem amoris, eligens potius Deo displicere, quam uxorem contristare.

3. Dicendum 2. inter illa primorum parentum peccata, primum, & præcipuum fuisse peccatum superbiæ. Ita S. Doct. 2.2.q. 163. ar. 1.

Constat 1. ex eo, quod Eccl. c. 10. dicitur, *Initium omnis peccati superbiæ.* Et Tob. 4. *In ipsa enim initium sumpsit omnis perditio.*

Constat 2. ex S. Greg. 1. 4. Mor. c. 9. *Duas, inquit, ad intelligendum se creaturas fecerat Deus, Angelicam scilicet, & humanam, utramque vero superbiæ perculis.* Eaque est communis SS. Patrum sententia, ac præsertim S. Aug. 1. 14. de Civ. cap. 13. & 15. S. Fulgent. lib. 2. de Incar. & Gratia Christi, cap. 22, & S. Ber. ser. 1. de Adventu.

Con-



## DE LAPSU HOMINIS.

183

Constat 3. ea ratione, qua utitur S. Doctor supra. Cum enim in statu innocentiae pars inferior animae superiori perfecte subdita esset, prima inordinatio appetitus humani non potuit esse circa bonum aliquod sensibile; unde sequitur, quod fuerit circa bonum aliquod spirituale, quod appetiit supra mensuram sibi ex Divina regula praestitutam. Et hoc superbiae proprium est.

Quaeres, in quo positum fuerit peccatum illud superbiae primorum parentum.

Respondetur, in eo positum fuisse, quod uterque illorum inordinate Divinam similitudinem appetiit, idque duobus modis (ut docet S. Th. sup. art. 2.) primo quantum ad scientiam boni, & mali, ut scilicet per virtutem propriae naturae determinaret sibi, quid esset bonum, & quid esset malum ad agendum, vel etiam ut per seipsum praecognosceret, quid sibi boni, vel mali esset eventurum, secundo quantum ad potestatem operandi, ut scilicet virtute propriae naturae operaretur ad beatitudinem consequendam. Unde S. August. lib. 11. de Gen. ad lit. c. 30. dicit, quod *menti mulieris inerat amor propriae potestatis, & quadam de se superba praesumptio*. Et in Enchir. c. 45. de peccato primi hominis loquens dicit, quod *per superbiam homo in sua potius esse, quam Dei potestate dilexit*.

## S E C T I O II.

*An peccatum primi hominis in ejus posteros traducatur.*

1. **C**ertum est, Adamum per suam praevericationem non tantum sibi nocuisse, sed etiam posteris suis (ut expresse definitum habetur in Conc. Trid. sess. 5. can. 2.) ipsosque proinde simul cum illo per primum ejus peccatum amisisse originalem justitiam, ejusque dotes omnes, mortemque, ac ærumnas varias corporis, & animae incurrisse.

Sed ex omnibus malis, quæ primi hominis praevericatio secum invexit, nullum gravius, & acerbius est macula illa, & foeditate originali, quam in ipso conceptu contrahunt omnes, qui de vitiata illius propagatione oriuntur. De qua nunc quaeritur, an veram, & propriam peccati rationem habeat, seu an posterius Adami proprie dictum peccatum ab ipso contrahant. Pro cuius resolutione

Dicendum est, peccatum primi hominis in ejus posteros traduci, illosque in primo conceptionis momento, quo anima corpori organizato infunditur, contrahere ab ipso peccatum originale.

Huic veritati, quæ de Fide est, opponitur error Pelagianorum, qui (ut refert S. Aug. lib. 3. de peccat. meritis, ac remissione c. 6. & lib. de Hær. hæresi 88.) asserebant, pueros nullum ex primo parente peccatum contrahere, mortem, & alios ejusmodi defectus fuisse ipsis in prima creatione naturales, hominesque tales post Adami peccatum nasci, quales ante ipsius peccatum nati fuissent, adeoque peccatum illud Adami humano generi obfuisse, non propagatione, sed exemplo,

M

qua-

quarenus imitati sunt eum omnes, qui postea peccaverunt. Huic Pelagianorum errori postea subscripserunt Albigenſes, Anabaptiſtæ, & alii, qui videri poſſunt apud Bellarminum tom. 4. lib. 4. cap. 2.

Refellitur hic error, & oppoſita veritas probatur 1. ex Script. Pf. 50. *Ecce in iniquitatibus conceptus ſum, & in peccatis concepit me mater mea*, quæ verba de peccato originali explicat S. Auguſtinus enarratione in ipſum Pfal. Rom. 5. *Per unum hominem peccatum in hunc mundum intravit, &c. in quo omnes peccaverunt.*

Probatur 2. auctoritate Conc. Arauſ. ſecundi can. 2. & Conc. Trid. ſeſſ. 5. can. 2. in quibus definitum eſt, per primi hominis inobedientiam non tantum mortem, & poenas corporis, ſed etiam peccatum (quod eſt mors animæ) in omne genus humanum tranſiſſe.

Probatur 3. ex S. Cyp. l. 3. Ep. 8. ad Fidum. *Infans, inquit, recens natus nil peccavit, niſi quod ſecundum Adam carnaliter natus contagium mortis antiquæ prima natiuitate contraxit.* Et S. Ambr. l. de Apologia David c. 11. *Antequam naſcamur, inquit, maculamur contagio, antequam aſurâ lucis originis ipſius excipimus injuriam, in iniquitate concipimur.*

Probatur 4. ex eo quod Baptiſmus ex Chriſti institutione, & præcepto neceſſarius eſt non ſolum adultis, ſed etiam infantibus, ut e poſtate Dæmonis eripiantur, & remiſſionem peccati percipiant, ut patet ex orationibus, quas Baptiſmi Sacramento Eccleſia præmittit; at Baptiſmus non confertur infantibus in remiſſionem peccatorum actualium, quæ committere non potuerunt, & ob quæ in poſtate dæmonis eſſe dici non poſſunt; ergo Baptiſmus datur illis in remiſſionem alicujus peccati, quod a primo parente contraxerunt.

Obſervandum 1. peccatum illud originis traduci in poſteros ex Adam ſiſi perſona. Unde dicit Ap. 1. Cor. 15. quod *in Adam omnes moriuntur.* Et in Conc. Trid. ſupra dicitur, Adamum non ſibi ſoli, ſed etiam poſteris Gratiam perdiditſſe. Ex quo ſequitur, quod, ſi Eva peccante, Adamus non peccaſſet, ejus poſteri nullum in origine peccatum contraxiſſent.

Obſervand. 2. non ſolum aliquos Adami poſteros, ſed omnes omnino, qui ab eo via ordinaria propagantur, peccatum originale contrahere, ut manifeſte conſtat ex antedictis. Quod quamvis verum ſit, Doctores tamen ab hac generali regula ſanctiſſimam Virginem Dei Genitricem Mariam excipiunt. De qua propter honorem Domini (ut loquitur S. Aug. lib. de natura, & Gratia c. 36.) nullam prorsus, cum de peccatis agitur, oportet habere quæſtionem. Et quamvis ſuper hac re nihil adhuc ab Eccleſia definitum fuerit, imo Xyſtus V. in extravaganti, *Græve nimis*, de Reliquiis, & veneratione Sanctorum, prohibuerit, ne quis affirmantem, aut negantem partem hæreticam eſſe cenſeat, ea tamen ſententia, quæ aſſerit, ſanctiſſimam illam Virginem ab omni originalis peccati labe fuiſſe prorsus immunem, adeo unanimi Doct. Catholicorum zelo propugnatur, ut Paulus V. Pontif. Max. decreto ſuo prohibuerit, ne quis in concionibus, lectionibus, aut quibuſcunque

que actibus publicis contrarium auderet asserere. Quam prohibitionem Greg. XV. ejus successor ad privata etiam colloquia extendit. Et inter decreta nobilissimæ Scholæ Sorbonicæ illud observatu dignum est, quod Immaculatam Deiparæ Conceptionem impugnari a suis prohibuit, imo potius ab illis quacunque data occasione propugnari, & stabiliri voluit, & ad illius decreti observationem eos jurejurando peculiari obstrinxit. In quo & suam in tuenda Virginis Immaculatæ dignitate pietatem ostendit, & omnibus aliis facem prætulit ad id præstandum.

## S E C T I O I I I.

*Quid sit proprie peccatum originale.*

1. **O**bscura, & difficilis est hæc quæstio, siquidem, ut recte dixit S. Aug. lib. 1. de moribus Ecclesiæ, c. 22. *Nihil est peccato originali ad prædicandum notius, nihil ad intelligendum secretius.* Et certe antiquorum Patrum vestigiis inhærere melius fuisset, qui (ut refert idem S. Doct. l. 3. de pec. mer. & remis. c. 6.) simpliciter credebant, Adami posteros peccatum vere incurrere, & esse natura filios iræ, ut loquitur Apost. nec ulterius, quid esset illud peccatum originale, inquirebant. Verum, cum hujus temporis Hæretici super hac re varia dogmata prava, & erronea protulerint, multum interest in hac quæstione saltem agnoscere, quid a veritate Catholica sit alienum, ac proinde, quid repudiandum, ut postea, quid tuto teneri possit, facilius innotescat.

Dux sunt igitur præcipuæ Hæreticorum hujus temporis super hac quæstione sententiæ, quæ breviter hic a nobis refutandæ sunt.

Prima est Matthiæ Illyrici, qui variis in libellis a se editis asseruit, vel potius somniavit, originale peccatum esse substantiam quandam a dæmone factam, quæ sit ipsius dæmonis viva, & essentialis imago, quæ per peccatum primi hominis rationali animæ cujusque posterorum ejus ita impressa sit, ut illam totam substantialiter corruperit, & in imaginem diaboli transformaverit.

Refellitur hic error in primis ex eo, quod peccatum non est substantia, sed potius privatio, & defectus, ut supponimus ex tractatu de peccatis. Deinde ex eo, quod dicitur Gen. 1. *Vidit Deus cuncta, quæ fecerat, & erant valde bona*, cap. autem 1. Jo. dicitur, *Omnia per ipsam facta sunt, & sine ipso factum est nihil.* Cum igitur omne id, quod aliquam existentiam realem habet, a Deo factum sit, & quidquid a Deo factum est, valde bonum sit, hinc manifeste sequitur, peccatum, quod est essentialiter malum, non posse esse aliquid, quod existentiam realem habeat, nec proinde esse substantialem aliquam diaboli imaginem.

2. Secunda sententia est Lutheri a. 2. de concupiscentia remanente in baptizatis, & Calvinii l. 1. Inst. c. 1. §. 8. qui asserunt, peccatum originale nihil aliud esse, quam concupiscentiam, seu inordinationem potentiarum inferiorum animæ, quam vocant hæreditariam naturæ nostræ corruptionem, seu pravitatem, quæ reos nos facit damnationis.

Re-



Refellitur hic error 1. auctoritate Scripturæ. Rom. 8. *Nihil ergo nunc damnationis est iis, qui sunt in Christo Jesu, per Baptismum scilicet, ut explicat Concilium Tridentinum sess. 5. c. 5. atqui in baptizatis remanet concupiscentia, & inordinatio illa inferioris appetitus, juxta illud Rom. 7. Video aliam legem in membris meis repugnantem legi mentis meæ.* Et ad Gal. 5. *Caro concupiscit adversus spiritum: ergo, &c.* Et in Ep. Canonica S. Jac. c. 1. *Concupiscentia cum conceperit, parit peccatum*, quem locum explicans S. Aug. l. 6. c. 15. adversus Julianum, *Profecto, inquit, in his verbis partus a pariente discernitur, pariens est concupiscentia, partus peccatum, sed concupiscentia non parit, nisi conceperit, non concipit, nisi illexerit, hoc est ad malum perpetrandum obtinuerit voluntatis assensum.* Ex quibus verbis Apostolicis explicatis patet, concupiscentiam non esse peccatum, sed causam peccati, ut in tractatu de peccatis fusius dicetur.

Refellitur 2. auctoritate Concilii Trident. sess. 5. c. 5. *Si quis per Jesu Christi Gratiam, quæ in Baptismate confertur, reatum peccati originalis remitti negat, aut asserit, non tolli totum id, quod verum, & propriam peccati rationem habet, anathema sit, &c.* Manere autem in baptizatis concupiscentiam, vel fomitem, hæc sancta Synodus fatetur, & sentit, quæ cum ad agonem relicta sit, nocere non consentientibus, sed viriliter per Jesu Christi Gratiam repugnantibus, non valet, quinimo, qui legitime certaverit, coronabitur. Hanc concupiscentiam, quam aliquando Apostolus peccatum appellat, S. Synodus declarat, Ecclesiam Catholicam nunquam intellexisse peccatum appellari, quod vere, & proprie peccatum sit, sed quia ex peccato est, & ad peccatum inclinat. Si quis autem contrarium senserit, anathema sit.

Refellitur 3. auctoritate SS. Patrum S. Joan. Chrys. hom. 13. in Ep. ad Rom. *Ipsæ, inquit, passionēs in se peccatum non sunt, effrenata vero ipsarum immoderantia peccatum operata est.* S. Aug. l. 1. de nupt. & concup. c. 23. *Concupiscentia, inquit, in renatis jam non est peccatum, si ei ad illicita opera non consentitur.* Et l. 6. cont. Julian. c. 7. *Percipitur in Baptismo perfecta novitas, & perfecta sanitas ab iis malis nostris, quibus eramus rei, non ab iis, cum quibus conflagrandum est, ne simus rei.*

3. His igitur erroribus refutatis, restat ut breviter videamus, quid de proposita questione sentiendum sit, & quid proprie sit peccatum originale.

Omissis autem variis Theologorum sententiis (quas hic referre nostri instituti non est) omnium probabilissima esse videtur ea, quæ asserit, peccatum originale formaliter nihil aliud esse, quam privationem ipsius justitiæ originalis, quatenus per illam hominis anima sanctificabatur, & perfecte Deo subiciebatur, non vero quatenus pars inferior animæ perfecte subdita per ipsam reddebatur superiori, corpusque a corruptione omni, ac læsione eximebatur. Ita S. Th. 1. 2. q. 82.

Ratio est, quia peccatum originale in eo formaliter consistit, quod  
per

per Baptismi Sacramentum tollitur privatio illa iustitiæ originalis superius explicata, cum per illud Gratia infundatur, quæ animam sanctificat, eamque habitualiter perfecte Deo subjicit, tum per se, tum per alios habitus supernaturales, quos secum in illam invehit, non tollitur autem per Baptismum inordinatio appetitus inferioris, sicut nec subiectio ad mortem, & alia hujus vitæ incommoda. Ergo in illa sola iustitiæ originalis privatione superius explicata consistit peccatum originale.

4. Quæres 1. quomodo hæc privatio iustitiæ originalis, veram, & propriam in Adæ posteris peccati rationem habeat.

Respondetur, id provenire ex eo, quod inerat illis obligatio, ac debitum nascendi cum illa iustitia originali, prout animam sanctificabat, & perfecte Deo subdebat, idque virtute præcepti divinitus ipsi Adamo impositi, tanquam totius generis humani capiti, quo obligabatur non tantum sibi iustitiam illam, & sanctitatem obedientia sua servare, sed etiam in posteros suos transmittere. Unde S. Ansel. l. de conceptu Virginali, c. 26. *Hoc peccatum, inquit, quod originale dico, aliud intelligere nequeo in ipsis infantibus, nisi ipsam, quam supra posui, factam per inobedientiam Adæ iustitiæ debita nuditatem, per quam omnes sunt filii iræ.*

Quæres 2. unde constet, præceptum illud obedientiæ datum fuisse Adamo, ut principi, & capiti totius generis humani, non vero, ut privatæ personæ.

Respondetur, id constare ex iis Scripturæ locis, in quibus dicitur, omnes Adami posteros in ipso per ejus inobedientiam peccasse, per illamque peccatores fuisse constitutos, ut Rom. 5. *Per unum hominem peccatum in hunc mundum intravit, in quo omnes peccaverunt: & rursus ibidem, Per inobedientiam unius hominis peccatores constituti sunt multi.* Neque enim melius explicari potest, quomodo id factum fuerit, quam quia præceptum illud Adamo impositum sit, ut Principi, & Capiti totius humani generis, in cujus sic spectati voluntate omnes omnium ejus posterorum voluntates quodammodo continebantur, non secus ac subditorum voluntates in principis voluntate, & motus omnes membrorum voluntarii in ipsa animæ voluntate.

5. Quæres 3. cur Deus voluerit Adamo, ut capiti totius humani generis, non vero tantum ut privatæ personæ illud obedientiæ præceptum imponere, quod tamen prævidebat ab ipso esse infringendum.

Respondetur, non esse nostrum id curiosius investigare, sed satius esse humiliter agnoscere, & confiteri, id iustissimo, licet occultissimo Dei judicio, factum esse, ut fatetur S. Aug. in libris cont. Julianum, & S. Ber. serm. 1. de Dom. 1. post Epiph. Unde Apost. postquam dixit Rom. 11. *quod conclusit Deus omnia in incredulitate, ut omnium miseretur, exclamat, Quam incomprehensibilia sunt judicia ejus, & investigabiles viæ ejus! quis enim cognovit sensum Domini?*

Quæres 4. quomodo fieri possit, ut anima cujusque hominis peccatum

tum illud originale ab Adamo contrahat, cum ab illo non oriatur per generationem, sed a Deo immediate creetur, & corpori infundatur.

Respondetur, peccatum illud contrahi, quatenus anima rationalis a Deo creata unitur corpori, quod ab Adamo per generationem ordinariam derivatur, & per hanc unionem fit pars hominis ab Adamo ortum habentis, qui deberet primo suæ generationis instanti habere sanctitatem, & iustitiam in ea sui parte, quæ illius habendæ capax est, quam cum non habeat primo illo momento, invenitur proinde privatus iustitia, ac sanctitate debita, & ex consequenti inquinatus originali peccato, quod (ut dictum est) in illius iustitiæ, ac sanctitatis privatione formaliter consistit. Quod si cui hæc solutio plene non satisfacit in hac quæstione, quæ vel ipsi S. Aug. semper difficillima visa est, videat ipsum S. Doctorem Ep. 29. ad S. Hier. ubi dicit, *sufficere nobis debere, ut sciamus modum, quo ab originali peccato liberari possimus, etiamsi nesciamus modum, quo in illud inciderimus.*

#### S E C T I O IV.

*Quinam sint effectus peccati originalis in hac vita.*

1. **C**UM (ut supra dictum est) originale peccatum consistat formaliter in privatione sanctitatis, & Gratiæ, quæ per iustitiam originalem homini collata fuisset, sequitur privationem omnium aliorum donorum, quæ iustitia originalis in se complectebatur (ut c. præced. sect. 3. diximus) esse effectum ipsius peccati originalis. Ex hac privatione autem secuta est ipsius naturæ humanæ debilitatio, & in deterius commutatio, ac corruptio, de qua loquitur Conc. Araus. II. can. 1. ubi dicitur, *Totum Adam per illam prævaricationis offensam secundum corpus, & animam in deterius commutatum fuisse.*

Hunc vero peccati effectum plenius explicans S. Th. 1. 2. q. 86. ar. 1. dicit, per peccatum originale hominem fuisse spoliatum gratuitis, & vulneratum in naturalibus. Et art. 3. enumerat quatuor vulnera animæ potentiis per peccatum originale inflicta, scilicet in intellectu ignorantiam, in voluntate malitiam, in irascibili infirmitatem, & in concupiscibili concupiscentiam, seu habitualement illam inclinationem, vel proclivitatem ad bonum sensibile, rectæ rationi repugnans, quæ alio nomine communiter Fomes peccati dicitur.

Porro hæc naturæ humanæ per peccatum originale vulneratio, ac corruptio non ita intelligenda est (ut recte docet Philippus Gama-chæus in 1. 2. q. 85. c. 1. Nicolaus Isambertus ad 1. 2. q. 83. disp. 6. art. 1. & alii Doctores communiter) quod per peccatum originale natura humana corrupta sit, aut quod ulla ejus propria, & intrinseca perfectio deperierit, ut dicunt Hæretici asserentes, liberum arbitrium fuisse in homine extinctum, idest per peccatum originale sublatam fuisse, & destructam voluntatis humanæ indifferentiam ad opposita, in qua e-  
jus



Jus naturalis libertas proprie consistit. Calvinus enim l. 2. Instit. c. 2. ideo tantum negat liberum hominis arbitrium post peccatum, quod homo post illud non habeat boni, vel mali electionem, ac quicquid bene, vel male operatur, illud necessario, quamvis non coacte, sed sponte operetur, quia in hominibus æque, ac in Angelis, post peccatum naturalia omnia integra remanserunt, ut ex S. Dionys. c. 4. de Div. nom. docet S. Th. 1. p. q. 95. a. 1. & cum eo communiter omnes Theologi.

2. Sed ideo dicitur natura humana per peccatum corrupta, quia per illud privata est justitia, & sanctitate originali, quæ ipsi, tanquam forma quædam supernaturalis inerat, qua perficiebatur in ordine ad Deum. Omnis enim destructio formæ est quædam corruptio subiecti, cui inest, quodque per illam perficiebatur.

Dicitur etiam vulnerata ob imperfectiones, quæ privationem illam justitiæ originalis consecutæ sunt. Quæ quidem imperfectiones vulnera dicuntur, non quod homo in puris naturalibus constitutus iis obnoxius non fuisset, sed quia tunc non habuissent rationem poenæ, nec ex aliquo reatu ortum habuissent, sed ex conditione ipsius naturæ.

Quare in puræ naturæ statu dicerentur defectus; in statu vero naturæ lapsæ dicuntur vulnera, quia supposito peccato, jam habent poenæ, ac vindictæ rationem.

Unde quando S. Aug. l. 3. de lib. arb. c. 18. dicit, *Concupiscentiam non esse naturam hominis instituti, sed poenam damnati*, sensus est, hominem in prima sui institutione, in qua creatus est a Deo sanctus, & rectus, non habuisse hanc imperfectionem, sed per peccatum illam contraxisse. Ibi enim non loquitur S. Aug. de creatione, & constitutione hominis in statu puræ naturæ, sed in statu justitiæ originalis, ut ex ejus contextu manifestum est.

Dices: si defectus illi essent homini naturales, sequeretur, malitiam voluntatis esse quoque illi naturalem, quod tamen falsum esse videtur.

Respondetur, malitiam duplici modo sumi posse, 1. pro vitioso aliquo habitu, sive actu, in qua significatione sumitur a S. Th. 1. 2. q. 78. a. 1. ad 3. & eo sensu non est illa homini naturalis. 2. pro defectu, & privatione bonitatis alicujus, quæ in justitia originali reperiebatur, & per quam voluntas hominis speciali modo ad Deum ordinabatur, & eo sensu malitia illa dici potest homini naturalis, quia scilicet illa bonitas, & rectitudo non erat ejus naturæ debita, sed ex gratuita Dei beneficentia procedebat, ut præcedenti capite dictum est.

Observandum est autem, quod licet defectus illi, qui ab originali peccato causantur, sint homini naturales, nihilominus verum est, illos cum per actualia peccata, tum per vitiosos habitus, qui per peccata illa contrahuntur, maxime augeri. Unde fit ut homo per peccata illa actualia, quæ committit, & per vitiosos habitus, quos ratione illorum contrahit, longe majorem obscuracionem in intellectu, & malitiam in voluntate, atque adeo longe acriores stimuli

mulos concupiscentiæ, & majorem ad illos reprimendos debilitatem experiatur, quam alioquin naturaliter haberet, si nulla actualia peccata commisisset, aut nullos habitus vitiosos contraxisset.

Jam quod spectat ad corpus, breviter dicendum est, dolores omnes, & poenas, necnon innumera morborum genera, quibus homines in hac vita subjacent, ac denique mortem ipsam, esse peccati originalis effectus.

Hoc manifeste constat ex Scriptura. Gen. 1. *Quocunque die comederis ex eo, morte morieris.* Et c. 3. *Multiplicabo arumnas tuas, &c. In sudore vultus tui vesceris pane.* Et Rom. 6. *Stipendia peccati mors.* Unde S. Aug. de verbis Domini, serm. 21. c. *Quis nescit, inquit, quia peccati poena est, necesse esse ut moriamur? & quod gravius est, quando nescimus: poena certa est, hora incerta.*

## S E C T I O V.

*Quinam sint effectus peccati originalis in futura vita.*

1. **Q**uestionis hujus præcipua difficultas est de parvulis sine Baptismo ex hac vita decedentibus, ac proinde in originali peccato morientibus, an scilicet ratione illius peccati originalis, cum quo solo decedunt, poena aliqua afficiantur, & quænam illa sit. Pro cuius resolutione

Dicendum est, parvulos cum originali peccato ex hac vita decedentes, nunquam perventuros esse ad fruitionem gloriæ coelestis, sed ea in æternum privandos esse.

Huic veritati, quæ de Fide est, opponitur error Pelagianorum, qui, (ut refert S. Aug. de hæres. c. 88.) parvulis, etiamsi non baptizarentur, æternam, & beatam vitam promittebant. Ad quem errorem proxime accedere videtur Hieronymus Savonarola l. de triumpho Crucis, ubi dicit, infantes in peccato originali morientes futuros post ultimum Judicium beatos naturali beatitudine, & in quodam velut Paradiso terrestri perpetuo, feliciterque victuros, plenos sapientia, & virtutibus, Deum toto corde diligentes, imo & Angelorum consortio, & revelationibus sæpe fruantes.

Refellitur hic error, & nostræ Fidei veritas probatur 1. ex Scriptura, Rom. 5. ubi dicit, *Per unius delictum in omnes homines in condemnationem*; ergo ex illius mente rei sunt damnationis, quicunque illo originali delicto implicantur. Et S. Jo. 3. ubi dicitur, quod *qui incredulus est Filio, non videbit vitam*; parvuli autem cum peccato originali decedentes neque actu, neque habitu credunt in Christum.

Probat 2. quia, si verum esset, parvulos in peccato originali decedentes fruituros esse Beatitudine illa supra memorata, sequeretur, illos meliores esse conditionis, quia peccaverunt in Adamo, quam si in puris naturalibus decessissent, neque enim tanta felici-

tas deberetur infantibus in statu puræ naturæ decedentibus; unde consequens foret, illos præmium ex peccato Adami esse consecuturos, quod est manifeste contra Scripturam.

Cum igitur certum sit, infantes cum originali peccato decedentes, gloria, & beatitudine in æternum privandos esse, ac proinde subituros æternam damnationem, quatenus in illa privatione consistit; controversum est inter Theologos, an in illo statu privationis aliquibus poenis afficiantur. De qua re tres esse inter illos sententias refert Bellarm. to. 4. l. 6. de amissione Gratiæ cap. 1.

Prima est eorum, qui existimant, parvulos propter solum originale peccatum, cum quo decesserunt, pœna ignis in æternum esse cruciandos. Ubi monet Bellarm. Hæreticos nostri temporis, qui sententiis extremis maxime delectantur, hanc ideo libenter sententiam amplecti.

Secunda est eorum, qui parvulos quidem ignis cruciatu liberant, sed tamen asserunt, eos interno quodam dolore propter amissionem coelestis Beatitudinis affici.

Tertia denique sententia est eorum, qui asserunt, parvulos cum solo originali peccato decedentes, ita ob illud damnari, ac visione Dei, & coelestis gloriæ fruitione privari, ut tamen nullum inde dolorem, neque internum, neque externum patiantur.

Hæc tertia sententia, ut aliis duabus minor, sic etiam probabilior videtur, maxime propter auctoritatem S. Gregor. Nazianz. orat. de Baptismo, ubi loquens de parvulis sine Baptismo decedentibus, *Existimo*, inquit, *illos neque gloria donandos, neque pœna mulandos esse, ut qui Baptismi quidem characterem non habeant, sed improbitate quoque non laborent, verum & ipsi damnum potius passi fuerint, quam injuriam fecerint.*

Huic S. Patri subscribunt S. Th. p. 5. de malo a. 1. 2. & 3. & S. Bonav. in 3. sent. dist. 33. quibus in locis varias asserunt rationes, ob quas recte dici potest, parvulos illos dolorem nullum ex amissione beatitudinis percepturos, quia scilicet ignorabunt omnino, se illam amisisse, cum id scire nisi per Fidem non possint, Fidem autem nunquam habuerint, nec in illo statu habituri sint; vel quia, quamvis agnoscant, se illam beatitudinem amisisse, tamen agnoscent etiam simul se aliorum damnatorum pœnas evasisse, quæ posterior cognitio tale gaudium in illis causabit, ut dolorem omnem, quem ex priori concipere possent, auferat, & sic in quodam statu medio inter gaudium, & dolorem ipsos perpetuo detineat; vel denique, quia quamvis videant se a gloria exclusos, simul etiam intelligent, nullam se unquam proportionem ad illam habuisse, cum nec usum liberi arbitrii, nec ullum Gratiæ supernaturalis auxilium unquam habuerint. Unde fiet, ut nulla inde tristitia afficiantur, sicut non tristantur infimæ conditionis homines, quod ad Regnum aliquod, vel imperium non pervenerint, quamvis se Regia, aut Imperatoria dignitate carere videant, nec  
ad



ad illam unquam se perventuros sperent.

Objicies. S. Aug. ser. 14. de verb. Apost. & S. Fulgent. lib. de Fid. ad Pet. c. 26. dicere, parvulos non baptizatos in ignem æternum ituros.

Respondetur, ignis æterni nomine duo posse intelligi. 1. locum inferni, in quo est ignis æternus. 2. poenam sensibilem, quæ ab illo igne infligitur, & juxta priorem sensum Patres illos intelligendos esse, ita ut velint solum, parvulos illos ad aliquam inferni partem descensuros, ibique perpetuo moraturos, ut & communiter Doctores docent, ubi tamen aliqua animi, & corporis pace, & quiete perfruentur, ita ut semper verum sit, nullam illos poenam sensibilem externam, aut internam subituros esse.

Unde & ipse D. Aug. l. 3. de lib. arb. c. 23 agens contra Manichæos negantes peccatum originale, & quærentes, quid infanti fieret, qui non percepto Baptismo mortuus esset, sic loquitur: *Non enim metuendum est, ne vita potuerit esse media inter recte factum, & peccatum, & sententia Judicis media esse non possit inter præmium, atque supplicium.*

## TRACTATUS V.

DE

GENERIS HUMANI REPARATIONE

PER

DIVINI VERBI INCARNATIONEM.

**P**ost considerationem lapsus primi hominis, ac ruinæ totius generis humani, videndum est nunc, qua ratione Deus, qui dives est in misericordia (ut ait Apost. Eph. 2.) propter nimiam charitatem suam, qua dilexit nos, cum essemus mortui peccatis, convivificavit nos in Christo, &c. ut ostenderet in sæculis supervenientibus abundantes divitias Gratiæ suæ. Cum igitur præcipuus hujus mysterii fructus ad nos ejus cognitione, & Fide derivetur, atque, ut ipse hominum Salvator Christus Dominus Patrem suum coelestem alloquens dixit S. Jo. 17. *Hæc sit vita æterna, ut cognoscant te solum verum Deum, & quem misisti, Jesum Christum;* ea de causa in hoc tractatu præcipuas veritates ad illius mysterii Fidem pertinentes peculiari studio collegimus, ut qui voluerint, præ oculis habere possint, non tantum quid de illo tanquam certum credere, quidque tanquam erroneum abjicere debeant, sed etiam quibus terminis, & loquendi modis sapientiam illam in mysterio absconditam aliis revelare, & explicare apte & convenienter possint.

CA.

## CAPUT I.

*De veritate mysteriorum Incarnationis.*

## SECTIO I.

*Quid nomine Incarnationis Verbi Divini intelligendum sit.*

1. **P**ER Incarnationem Divini Verbi nihil aliud intelligunt SS. Patres, & Doctores (ut ex infra dicendis constabit) quam duplicis in Christo naturæ, Divinæ scilicet ac humanæ conjunctionem, vel (ut brevius loquamur) Verbi Divini cum carne humana unionem, ita ut in illa duarum naturarum unione Divina quidem natura per propriam Hypostasim ipsius Verbi Divini subsistat, humana vero natura non per propriam, (ut fit in aliis hominibus) sed per alienam, nempe Divinam, terminetur. Unde unio hæc appellatur Hypostatica, seu personalis, eo quod duæ admodum dispares naturæ, Divina scilicet, & humana, in una eademque Hypostasi, seu Persona Divina uniantur, & subsistant, non confusione unius in alteram, sed (ut loquitur S. Athanasius in Symbolo) assumptione humanitatis in Deum.

Quare isto Incarnationis vocabulo per nomen carnis non ea sola humanæ naturæ pars significatur, quæ vocatur corpus, sed ipsa tota natura humana ex carne, seu corpore organico, & anima rationali constans; qua in significatione frequenter in sacris Scripturis sumptum reperitur. Gen. 6. *Omnis caro corruperat viam suam.* S. Luc. 3. *Videbit omnis caro salutare Dei.*

2. Quamvis autem mysterium istud variis nominibus, & vocabulis apud SS. Patres expressum reperiatur, & aliquando dicatur *Divini Verbi corporatio*, ut a S. Hilar. in prol. sup. Psal. aliquando *Contempnatio Divinitatis cum humanitate*, ut a S. Greg. Niss. orat. catechist. c. 11. aliquando *inhumanatio, æconomia*, &c. ut a S. Damasc. lib. 1. de Fid. c. 13. & aliis, usus tamen communiter invaluit, ut Incarnationis vocabulum tanquam omnium aptissimum ad illud significandum cæteris omnibus præferretur. Unde antiquissimi Ecclesiæ Patres illo usi sunt, ut S. Cypr. lib. 2. cont. Judæos, S. Ambr. in c. 2. S. Luc. S. Hieron. in c. 1. S. Marci, S. Aug. l. 10. de Civ. Dei c. 24. & plures alii. Qui videntur illud desumpsisse ex eo loquendi modo, quo S. Jo. c. 1. mysterium istud expressit, dicens, *Et verbum caro factum est.* Et certe vocabulum istud Incarnationis omnium optime ineffabilem Dei erga nos charitatem exprimere videtur, qui propter nos viles, & abjectos homunciones eo usque majestatem suam demittere dignatus est, ut (sicut dicit Apostolus Hebr. 1.) *carni communicaverit, & sanguini, illudque nobiscum commune habere voluerit, quod cum vilissimis, & abjectissimis animalculis nobis commune est.*

*Med. Theol. Pars I.*

N

SE-

## - S E C T I O    I I .

*Quomodo hujus mysterii veritas contra Ethnicos probari possit.*

1. **C**UM ( ut Apostolorum Princeps dixit epist. 1. c. 3. ) debeamus esse parati semper ad satisfactionem omni pascendi nos rationem de ea, quæ in nobis est, spe, possintque variae occurrere occasiones, in quibus necessitas aliqua, vel saltem utilitas audientium id a nobis exigere videatur, idcirco quod alii fusius, nos hic breviter, & quantum compendii ratio ferre potest, exequemur, ostendemusque, quibus argumentis contra ipsos Ethnicos & Paganos hoc Dominicæ Incarnationis mysterium demonstrari possit. Ad illius autem veritatem demonstrandam duo præsertim hic nobis probanda sunt, 1. quod unio illa naturæ Divinæ cum humana sit possibilis, 2. quod re ipsa in Persona Christi facta sit.

Quod ad primum spectat, hoc argumento uti possumus. Illud recta ratione naturali, & prudentum arbitrio possibile merito judicatur, quod nullis argumentis contrariis potest sufficienter refelli, nec absurdum, atque impossibile demonstrari; atqui Incarnatio Verbi Divini est ejusmodi; ergo merito possibilis existimari debet. Major propositio hujus argumenti constat ex eo, quod natura ipsa docet, viros prudentes nihil debere sine recta ratione affirmare, aut negare; ergo nec aliquid impossibile asserere, quando argumenta contraria probabiliter solvi possunt. Minoris vero propositionis veritas constabit ex solutione argumentorum, quæ in contrarium asferri possunt, quorum præcipua sunt hæc, quæ sequuntur.

Primum est, indignum videri Deo, ut dicatur passus, crucifixus, mortuus, &c.

Respondetur, in Christo Domino duas fuisse naturas, Divinam, & humanam; Divinam quidem omnis interitus, & mutationis expertem semper fuisse: non esse autem indignum Deo, imo ejus charitate, & misericordia infinita dignissimum, ut secundum naturam humanam, quam assumpsit, pati, & mori voluerit iis de causis, quibus passum, & mortuum esse credimus.

2. Secundum est, Deum non posse naturam humanam assumere, quin mutetur; hoc enim posito, aliter se haberet, quam antea, nempe esset verus homo, cum antea non fuisset.

Respondetur, mutationem illam totam se tenere ex parte naturæ assumptæ, non vero Personæ assumentis, quæ in isto naturæ humanæ accessu nullo modo immutatur, cum natura humana, neque ut aliquid essentiale, neque ut aliquid accidentale Divinæ illi Personæ accesserit, nihilque reale in ipsam agere, aut influere possit. Confirmatur hæc responsio ex eo, quod Deus per Incarnationem non acquirit, aut amittit ullam perfectionem sibi intrinsicam. Quamvis enim  
fiat



fiat homo, humanitas non sit intrinseca ejus Divinitati, sed solum illi unitur sine ulla intrinseca ipsius Dei mutatione. Unde quamvis ex eo quod dicitur Deum factum esse hominem, recte colligatur, mutationem aliquam esse factam, non tamen necesse est, factam esse in Deo, sed sufficit, quod facta sit in humanitate.

3. Tertium est, ea, quæ inter se nullam habent proportionem, non posse invicem uniri, ita ut ex eis fiat unica substantia, inter Deum vero, & naturam creatam, cum infinite inter se distent, nullam posse proportionem reperiri.

Respondetur, duplicem esse proportionem, unam geometricam, per quam dicimus, rem aliquam esse altera duplo, quadruplo, vel centuplo majorem, vel minorem, aliam vero, quæ dicitur habitudinis, seu ordinis alicujus inter unum, aut alterum, qualis est inter potentiam, & objectum, inter causam, & effectum. Quamvis autem inter Deum, & naturam creatam nulla geometrica proportio sit, aut esse possit, est tamen proportio habitudinis. Nam Persona Divina, & natura humana sunt inter se tales, ut hæc ab illa possit assumi, & tanquam a termino, & ultimo suo complemento pendere, & hanc illa possit sustentare, ac terminare.

Quartum est, Christum Deum, & hominem fore tantum per accidens, non per se. Illud enim dicitur a Philosophis ens per accidens, quod sit ex duobus entibus completis, & actu existentibus; atqui natura Divina, & humana in Christo sunt duo entia existentia, & completa. Respondetur, verum esse, ex duobus entibus in actu, quorum utrumlibet sit in suo genere perfecte completum, & terminatum, non posse fieri unum per se. At vero natura humana singularis, qua ratione est assumpta a Verbo, non est proprie ens in actu completo, siquidem est in potentia ad personalitatem, tanquam ad terminum substantialem. Quare ex illa, & personalitate Verbi constare potest unum ens per se, id est una substantia ultimo completa, seu Persona.

Jam quod spectat ad secundum, variis argumentis probari potest, peractum esse Incarnationis mysterium, ac illa, quæ de Christo Domino credenda proponuntur, esse Fide dignissima. Aliquot hic magis popularia proponemus.

4. Primum sumi potest ex Christi miraculis, quorum testis est orbis universus, quæque extant non solum in Evangeliiis, quibus Fidem non adhibent Ethnici, sed etiam in propriis ipsorum Historiis. Ejusmodi fuit silentium falsorum Deorum oraculis Christo adveniente impositum, cujus mentio fit apud Plutarchum, & alios. Item eclipsis illa stupenda, quæ præter omnem naturæ ordinem in morte Christi accidit, cujus meminit Plegon Chronologus Ethnicus, Adriani Imperatoris libertus lib. 13. de temporibus ut refert Origenes l. 2. contra Celsum, & Eusebius in Chronico, illiusque etiam in Archivis Romanorum factam fuisse mentionem asserit Tertull. in apolog. adver-

fas Gentes. Iisdem miraculis addi possunt prodigia, quæ nostrò etiam tempore sunt ad invocationem nominis Christi variis in locis circa ægrotos, & debiles, præsertimque circa energumenos. Quæ omnia cum ipsius naturæ vires longe superent, a solo Deo fieri potuisse manifestum est. Atqui Deus non potest falsum approbare. Cum igitur hæc miracula ad testandam Christi Divinitatem, eorumque omnium, quæ de illo credimus, veritatem facta sint, sequitur, illa omnia esse verissima, ac fide dignissima.

Secundum argumentum duci potest ex modo, quo totius mundi ad Christi Fidem conversio facta est. Hæc enim non est facta vi, aut armis, nec per sapientes, aut potentes sæculi, sed per duodecim pisces, Philosophiæ, ac litterarum humaniorum imperitos, idque non blanditiis, aut honoribus propositis, imo potius suppliciis, & carceribus, quin etiam suadendo relinquere amicos, parentes, consanguineos, calcare voluptates, colere humilitatem, castitatem, paupertatem, pati illatas injurias, inimicis benefacere, peccata omnia devitare, sicut & Plinius auctor Ethnicus testatur lib. 10. Epist. 97. ad Trajanum Imperatorem. Hoc enim revera omnem humanam industriam prorsus exsuperat, soliusque Divinæ potentiae proprium est talibus mediis, tam arduis, imo tam contrariis, & paradoxis, non unam solum civitatem, aut gentem, sed totum mundum ad Christi Fidem adduxisse, nec solos pauperes, sed etiam divites, & Imperatores, nec solos idiotas, sed Philosophos, & Sapientes, idque tam brevi tempore, neque tantum ad Fidem Christi adduxisse, sed etiam ad martyrium pro ipso perferendum animasse.

5. Tertium argumentum duci potest ex iis, quæ a Christo prædicta sunt, & prænunciata, ut Hierosolymitanæ urbis vastatio, templi destructio, Judæorum dispersio, & captivitas, ac innumera calamitates, quibus a Christi morte attriti sunt, Evangelii per universum orbem prædicatio, Ecclesiæ Catholicæ contra omnes Tyrannorum persecutiones, & Hæreticorum machinationes victoria, & triumphus, & alia multa similia, quæ partim adimpleta esse cognoscimus, partim etiamnum adhuc hoc tempore adimpleri cernimus. Quæ omnia tam clare, & distincte prænunciata, tam certo, & manifeste adimpleta, non ab alio, quam ab ipso Deo præsciri, & prænunciari potuerunt.

Quartum denique argumentum desumi potest tum ex infinito prope Martyrum numero omnis ætatis, sexus, conditionis; inter quos plurimi sapientia, & ingenii præstantia fuerunt celeberrimi, ut eorum scripta testantur, qui tamen omnes pro Fidei Christi confessione mortem constantissime subierunt: tum etiam ex puritate, & sanctitate doctrinæ ipsius Christi, quæ vel ex se sola videtur sufficere ad convincendos, imo & persuadendos animos, illius auctorem alium non esse, quam Deum omnis sanctitatis fontem, ac proinde vera esse omnia, quæ in ejus doctrina continentur.

S E-

## SECTIO III.

*Quomodo ejusdem mysterii veritas probari possit contra Judæos.*

1. **C**Um Judæi veteris testamenti Scripturas admittant, ex ipsarum auctoritate contra illos hujus mysterii veritas probanda est. Quod ut distinctius, ac melius fiat, duo præsertim hic a nobis demonstranda sunt. Primum est, Messiam in lege promissum non esse purum hominem, sed verum, & naturalem Dei Filium, atque adeo verum Deum. Secundum est, Messiam illum jam venisse, & opus humanæ redemptionis peregerisse.

Quod spectat ad primum, ex innumeris prope Scripturæ testimoniis, quibus Divinitas Messiae, seu Christi in lege promissi probari potest, duo tantum hic seligemus.

Primum desumitur ex his Psalmi 109. verbis quibus ipsemet Christus ad id probandum usus est, *Dixit Dominus Domino meo, sede a dextris meis*. Etenim Dominus ille, cui dicitur, *sede a dextris meis*, est ipse Messias in lege promissus, ut sentiunt, & explicant ipsimet Rabbini Judæorum, quos refert, & citat Galatinus lib. 3. de arcanis cap. 5. & lib. 8. c. 24. Atqui idem ille Dominus est etiam verus Deus, alias nec deberet, nec posset sedere ad dextram Dei, quod est æqualitatis cum ipso symbolum, nec etiam dici posset *ex utero*, id est ex substantia Dei, & *ante Luciferum*, id est ab æterno genitus, quod nulli puro homini convenire potest.

Secundum testimonium petitur ex his verbis Isa. cap. 9. *Parvulus natus est nobis, & filius datus est nobis, & vocabitur nomen ejus Deus fortis*, &c. quibus verbis, quæ de Messia intelligunt ipsi Judæi, ut notat idem Galatinus l. 3. de arcanis c. 18. & 19. ejus Divinitas manifestissime declaratur.

2. Quod ad 2. attinet, ex pluribus Scripturæ testimoniis, quibus Messiam in lege promissum jam venisse probari potest, duo tantum proferemus, quæ ipsi Judæorum Rabbini de Messia interpretantur, ut videre est apud eundem Galatinum l. 4. c. 49. & seqq.

Primum desumitur ex Gen. c. 49. ubi hæc verba ab ipso Patriarcha Jacob morti proximo proferuntur, *Non auferetur sceptrum de Juda, & Dux de femore ejus, donec veniat, qui mittendus est, & ipse eris expectatio gentium*, hoc est non deerunt Reges, Duces, Legislatores de tribu Juda, donec veniat Christus. Atqui jampridem videmus nullos amplius Reges, nullos Duces, nullos Legislatores de tribu Juda, imo nec de ulla alia tribu inter Judæos, sed omnes penitus defecisse, idque ab annis mille sexcentis, & amplius, quibus Judæi per orbem vagantur, & aliarum gentium quasi perpetuæ servituti mancipati sunt. Constat præterea (quod etiam maxime observandum est) Christum Dominum



natum esse circa illud tempus, quo Regia potestas a Judæis ablata est, cum Herodes alienigena Judaici Regni sceptrum invasit.

Secundum testimonium ex Dan. c. 9. petitur, ubi Angelus Gabriel prædicit, Christum post septuaginta hebdomadas esse venturum, & a Judæis occidendum, & exinde civitatem Hierusalem evertendam, & populum Judæorum dissipandum, & vastitatem ejus, ac desolationem duraturam usque in sæculi finem, quæ omnia completa esse manifestum est. Hebdomadæ enim illæ intelliguntur, non dierum, sed annorum, quod apud Judæos consuetum fuisse ex Levit. cap. 25. colligitur. Illas autem fuisse completas eo tempore, quo Christus occisus est, fusc probant Scripturæ Interpretes super illum Danielis locum. Vastitatem autem civitatis, & Templi, & Judæorum dissipationem ab illo tempore per tot sæcula durasse, satis compertum est.

#### S E C T I O I V.

*Quomodo eadem veritas possit contra Hæreticos propugnari.*

1. **I**Nter plurimas Hæreses, quæ Incarnationis Dominicæ veritatem impugnarunt, duæ præcipuæ extiterunt, ad quas reliquæ omnes aliquo modo possunt revocari, ac proinde in quarum refutatione cæterarum falsitas facile poterit agnosci.

Prima fuit Eutychetis, qui assererat, post Incarnationem Verbi Divini unam tantum in Christo remansisse naturam, eamque factam esse ex Divinitate, & carne per conversionem ipsius Divinitatis in carnem, aut per commixtionem utriusque. Assererat præterea, Divinitatem Verbi eo modo dici posse, ac revera fuisse passam, mortuam, ac sepultam. Hunc Hæreticum ita sensisse colligitur ex variis Epistolis S. Leonis Papæ, præsertim vero ex Epist. 9. 10. 52. & 97. item ex Evagrius lib. 2. hist. cap. 18.

Catholica Fides duas veritates huic Hæresi oppositas confitetur. Prima est, in Christo post Incarnationem duas integras, veras, & perfectas naturas remansisse, Divinam scilicet, & humanam, quæ sine ulla confusione, aut permixtione in Persona Verbi subsistunt. Secunda est, Divinam Christi naturam neque passam, neque mortuam fuisse, aut dici posse, sed impassibilem, & immutabilem semper remansisse.

2. Hæ veritates Catholicæ probantur, & simul errores oppositi refelluntur. 1. ex Scriptura in qua duæ in Christo naturæ manifeste distinguuntur pluribus in locis, præsertim cap. 2. Ep. ad Philip. ubi Apost. distincte declarat, *Christum Jesum, cum in forma Dei esset, formam servi accepisse*. Quæ verba explicans S. Vigilius Papa l. 2. contra Eutychetem, *Mirum est*, inquit, *cur timeant quidam dicere duas Christi naturas, cum Paulus dicat duas formas*. Deinde evidenter dicitur, Christum non secundum naturam Divinam, sed secundum humanam passum

sum esse in Epist. 1. S. Petri cap. 2. *Christus peccata nostra pertulit in corpore suo super lignum.* & cap. 4. *Christo igitur passo in carne.*

Probatur 2. ex Concilio Chalcedonensi generali, quod fuit celebratum contra Eutychetem, in cuius actione 1. anathema profertur in ipsum Eutychetem dicentem, in Christo esse unam naturam ex Divina, & humana factam. & actione 5. profitentur Patres Concilii, se credere *Christum Dominum eundem perfectum in Deitate, eundem perfectum in humanitate, Deum vere, & hominem vere, &c.*

Probatur 3. ex S. Justino martyre in expositione Fidei. *Filius Dei, inquit, cum unus sit, duæ in eo naturæ sunt, altera, quæ Divina est, edit miracula, altera, quæ humana est, humilia excipit. Quæ enim ex parte Deus est, res admirandas operatur, quæ vero ex Virgine est homo, crucem, passionem, & consimilia voluntate sua naturaliter perfert.* Et ex S. Leone Papa, serm. 17. de Passione Domini, cap. 1. *Manente, inquit, in sua proprietate utraque substantia, nec Deus reliquit sui corporis passionem, nec Deum fecit caro passibilem, quia Divinitas, quæ erat in dolente, non erat in dolore.*

3. Altera Hæresis fuit Nestorii, qui (ut refert Evagrius l. 2. & seq.) assererat, Beatam Virginem purum hominem peperisse, qui non solum naturam, sed & personam humanam haberet, proindeque illam Dei genitricem dici non debere. Addebat autem, Personam Divinam Verbi unitam postea fuisse Filio Mariæ, non quidem substantialiter communicando hypostasim, sed accidentaliter, in quantum scilicet Verbum Divinum illi nomen, & dignitatem suam impertivit, ut nimirum Deus, ac Dei Filius diceretur, & ab omnibus adoraretur. Sicque dicebat in Christo non solum duas naturas, sed etiam duas Personas eo, quo explicavimus, modo, inter se unitas.

Catholica veritas huic Hæresi opposita docet, unam esse tantum in Christo, Personam, eamque Divinam, proindeque Christum Dominum, qui secundum carnem de Virgine natus est, esse verum Deum, ac verum hominem, sanctissimamque Virginem vere, ac proprie Dei Matrem esse, ac dici debere.

Hæc veritas sic explicata probatur, & oppositus error simul refellitur. 1. ex Scriptura. S. Luc. 1. *Quod nascetur ex te sanctum, vocabitur Filius Dei.* S. Matth. 16. *Tu es Christus Filius Dei vivi.* S. Jo. 20. *Hæc scripta sunt, ut credatis, quia Jesus est Christus Filius Dei.*

Probatur 2. ex Conc. Ephesino, in quo Hæresis illa damnata est, ipseque Nestorius depositus, ac in exilium missus, ubi misere interiit, lingua ejus, qua in Christum Dominum, ejusque Sanctissimam Matrem tam impie blasphemaverat, a vermibus penitus corrosa, ut refert Evagrius loco sup. cit. Item ex Conc. Constantinop. II. can. 5. *Si quis introducere conatur in mysterio Christi duas substantias, seu duas personas, anathema sit.* & can. 6. *Si quis abusive Dei genitricem esse dicit gloriosam semper Virginem Mariam, anathema sit.*

Probatur 3. ex S. Leone Papa Epist. 97. ad Leonem Augustum, ubi sic loquitur. *Anathematizetur ergo Nestorius, qui Beatam Virginem Mariam non Dei, sed hominis tantummodo credidit Genitricem, ut aliam Personam carnis, aliam faceret Divinitatis.* Et S. Greg. Papa l. 38. c. 27. *Quamvis, inquit, ipse Christus aliud ex Patre, & aliud ex Matre, non tamen alius ex Patre, & alius ex Matre, sed ipse est æternus ex Patre, ipse temporalis ex Matre, ipse qui fecit, qui factus est, ipse auctor operis, ipse opus auctoris, manens unus ex utraque, & in utraque natura, nec naturarum copulatione confusus, nec naturarum distinctione geminatus.*

Optime denique Vincentius Lirinensis lib. advers. Hæres. c. 19. *In Deo, inquit, una substantia, sed tres Personæ, in Christo due substantiæ, sed una Persona, in Trinitate alius, atque alius, non aliud, atque aliud, in Salvatore aliud, atque aliud, non alius, atque alius.*

## SECTIO V.

*An conveniens fuerit Incarnationis mysterium.*

1. **P**roposita quæstio triplici modo potest intelligi. 1. an conveniens fuerit, Personam Divinam aliquam incarnari. 2. an secundam potius, quam alteram. 3. an tali tempore, & non citius, nec tardius. Pro cuius resolutione

Dicendum 1. convenientissimum fuisse, ut aliqua Persona Divina incarnaretur, seu naturam humanam hypostatice sibi uniret. Ita S. Th. 3. p. q. 1. art. 1.

Ratio, qua id probat, hæc est. Unicuique rei conveniens est illud, quod sibi competit secundum propriæ naturæ rationem; atqui natura Dei est ipsamet essentia bonitatis, ex S. Dion. c. 1. de Div. nom. unde quidquid pertinet ad rationem boni, conveniens est Deo. Ad rationem autem boni pertinet, ut se alii communicet, ex eodem S. Dion. c. 4. Quare ad rationem summi boni pertinet, quod modo summo se communicet. Et id maxime fit per unionem hypostaticam, per quam Deus summo, & præstantissimo, quo fieri potest, modo, se creaturæ humanæ communicat, quæ per illam communicationem ad tantum dignitatis, & excellentiæ gradum evecta est, ut (teste S. Aug. lib. de prædest. Sanctor. c. 15.) *quo altius ascenderet, non haberet.*

Dicend. 2. convenientissimum fuisse, ut Persona Filii potius, quam Patris, ac Spiritus sancti naturam humanam assumeret. Ita S. Th. q. 3. a. 8.

Cujus rei licet præcipua, & summa ratio sit, quod ita Divinæ Sapientiæ visum fuerit, præter illam tamen quædam aliæ a SS. Patribus afferuntur. Unam, aut alteram hic delibare nobis sufficiet.

2. Prima igitur ea est, quam profert S. Basil. hom. de principio Evangelii S. Joan. & S. Aug. l. 15. de Trin. cap. 11. quia scilicet maxime decuit, ut illa Persona jungeretur naturæ humanæ, per quam homines, qui



qui in tenebris erroris, ac ignorantiae per peccatum jacebant, peculiari quadam ratione illuminarentur, ac instruerentur; ea vero Persona est Verbum Divinum, juxta illud Sap. 1. *Fons sapientiae Verbum Dei in excelsis*. Ita enim a Patre coelesti sumus per Verbum suum edocti, ut ait S. Tho. supra, sicut discipulus docetur verbo magistri.

Aliam rationem affert S. Athan. lib. de Incarn. quia scilicet scopus Incarnationis fuit instauratio Divinae imaginis, quae per peccatum fuerat in nobis oblitterata, unde decuit, ut naturae nostrae ille uniretur, qui (ut ait Apost. Coloss. 2. & Hebr. 1.) est *Imago Dei invisibilis, splendor Patris, & figura substantiae ejus*, ut sic imago illa in nobis, quasi impressione sigilli Divini, repararetur, ut loquitur S. Clem. Alexandr. in orat. exhortatoria ad Gentes.

Dicendum 3. convenientissimum fuisse, ut hoc mysterium non statim ab initio mundi conditi, nec omnino sub finem, sed in medio quasi tempore perageretur.

Non quidem statim ab initio, ut homines diuturnioribus malis confictari melius agnoscerent naturae suae infirmitatem, majorique affectu Divinae Gratiae optarent, ac quaererent auxilium, & ob diuturnam expectationem pluri aestimarent Divinae misericordiae beneficium. Neque etiam conveniens fuit, differri usque ad mundi finem, ne Dei cognitio prorsus in hominibus extingueretur, neve generis humani strages, ac ruinae nimium augerentur. Unde consequens est, convenientissimum fuisse tempus illud, quod ad exequendum istud Mysterium Deus elegit.

## SECTIO VI.

*An Incarnationis mysterium fuerit necessarium.*

1. **C**ertum est in primis, Verbi Divini incarnationem non fuisse ullo modo necessariam, sed prorsus liberam respectu Dei, cum ipsa etiam mundi creatio, & quaelibet alia operatio ad extra Deo sit omnino libera.

Certum est deinde, neque etiam supposito lapsu generis humani fuisse absolute, & simpliciter necessarium ad illius reparationem Filium Dei incarnari.

Constat ex eo, quod Scriptura variis in locis generis humani reparationem eo modo, quo facta est, tribuit charitati, ac misericordiae Divinae. Ad Tit. 3. *Secundum misericordiam suam salvos nos fecit*. S. Jo. 3. *Sic Deus dilexit mundum, ut Filium suum unigenitum daret*. Beneficium autem ex charitate, & misericordia collatum supponit in benefactore conferendi libertatem.

Præterea SS. Patres docent, potuisse Deum multis aliis modis humanum genus liberare. Poterat (inquit S. Athan. ser. 3. cont. Arianos) *sine ullo adventu Christi solummodo loqui Deus, & solvere maledictionem*.

*tionem*. Et S. Aug. lib. 13. de Trin. cap. 10. dicit, *non alium modum possibilem Deo defuisse, cuius potestati cuncta aequaliter subjacent, sed sanandæ nostræ miseriæ convenientiorem alium modum non fuisse.*

Quæstio igitur intelligenda est præsupposita hypothese, quod Deus non aliter genus humanum reparare voluerit, nisi per condignam pro peccato exhibitam sibi satisfactionem, an scilicet ea suppositione facta necessarium fuerit, Personam Divinam incarnari, ut condignam illam satisfactionem pro peccatis nostris exsolveret, an vero aliquis purus homo, qui non esset Deo hypostatice unitus, id efficere potuerit. Pro cuius resolutione

2. Dicendum est, ad reparationem generis humani per condignam, & æquivalentem pro peccatis hominum satisfactionem absolute, & simpliciter necessarium fuisse Personam Divinam incarnari.

Hujus assertionis veritas ex duobus principiis pendet, quæ hic a nobis probanda sunt.

Primum est, nullum purum hominem, quibuscunque Gratia donis ornatum, potuisse condignam, & æquivalentem satisfactionem Deo pro peccatis aliorum hominum exhibere.

Secundum est, Christum Dominum Deum, & hominem id perficere potuisse, & reipsa perfecisse.

Quod purus homo id non potuerit, probatur 1. ex his verbis Ps. 48. *Frater non redimit, redimet homo, non dabit Deo placationem suam, & pretium redemptionis animæ suæ.* Quæ verba explicans S. Basil. in hunc locum, sic ait: *Ne igitur fratrem quære in redemptionem, sed eum, qui excepit naturam tuam, neque hominem nudum, sed hominem Deum Jesum Christum, qui solus placationem Deo dare potest pro omnibus nobis.*

Probat. 2. ex S. Leone Papa serm. 1. de Nativ. ubi loquens de Christo, *Nisi, inquit, esset Deus, non afferret remedium, nisi esset homo, non præberet exemplum.* Et S. Aug. in Ench. c. 108. *Neque, inquit, per ipsum liberaremur mediatorem Christum, nisi esset Deus.* Et S. Fulgent. l. de Incarn. c. 4. *Nullatenus, inquit, humana natura ad auferendum peccatum mundi sufficiens, atque idonea fieret, nisi unione Verbi Dei.*

Probat. 3. ea ratione, qua utitur S. Anselmus lib. 1. cur Deus homo, cap. 2. & S. Tho. quæst. 1. art. 2. ad 2. quia scilicet in omni peccato mortali reperitur semper offensa, & injuria objective infinita, quatenus est contra infinitam Dei bonitatem, & excellentiam; at vero omnis satisfactio puri hominis non potest esse nisi finita, quamvis ex Gratia Dei procedat. Quælibet enim Gratia creaturæ collata semper est finita, ipsique solum confert dignitatem finitam. Inde sequitur, ex illa nullam actionem procedere posse, quæ illatæ injuriæ, & offensæ commissæ sit æqualis, ac sufficiat ad perfectam, & æquivalentem satisfactionem.

Confirmatur ex eo, quod gravitas peccati desumitur ex dignitate, & excellentia illius, qui offenditur, quantitas vero, & magnitudo satisfactio-

tionis ex dignitate personæ, quæ satisfacit; at in omni peccato mortali is qui offenditur, semper est infinitus, nempe Deus, in satisfactione autem puri hominis is, qui satisfacit, semper est finitus; ergo impossibile est, in ejus satisfactione, quantumvis magna, posse reperiri æqualitatem cum offensa in Deum commissa.

3. Jam vero quod Christus Dominus Deus, & homo potuerit de condigno, & æquivalenter pro peccatis hominum satisfacere, & re ipsa satisfecerit, probatur 1. ex duobus locis Apostoli.

Primus locus habetur c. 10. Ep. ad Hebr. ubi Apost. conferens Sacerdotes antiquæ legis, eorumque sacrificia cum Christo, ejusque sacrificio in Cruce pro nobis oblato, sic loquitur. *Et omnis quidem Sacerdos præsto est quotidie ministrans, & easdem sæpe offerens hostias, quæ nunquam possunt auferre peccata: hic autem (Christus scilicet) unam pro peccatis offerens hostiam, una oblatione consummavit in sempiternum sanctificatos.* Quibus verbis Apostolus hoc discrimen constituit, quod cum illi Sacerdotes sacrificiis illis toties repetitis peccata auferre non possent, Christus id unica sui oblatione perfecit, quod discrimen nulum esset, si Christi oblatio condigna, & æquivalens non fuisset.

Si enim tantum ex quadam congruitate remissionem peccatorum nobis Christus impetravit, hoc etiam haud dubie illis antiquis sacrificiis fieri potuit, cum essent actus Religionis ex se boni, & divinitus ad Deum placandum instituti.

4. Secundus locus habetur c. 5. Ep. ad Rom. in quo sic loquitur Apost. *Sed non sicut delictum, ita & donum. Si enim unius delicto multi mortui sunt, multo magis Gratia Dei, & donum in Gratia unius hominis Jesu Christi in plures abundavit.* Quibus verbis Apostolus Christi meritum ad salvandum præfert Adami demerito ad perdendum. Cum igitur Adami peccatum tale fuerit, ut per illud juste, & condigne universum genus humanum Gratia privatum sit, & damnationis æternæ reatum incurrerit; sequitur ex Apostoli mente, multo magis in Christi merito fuisse vim, ac virtutem condigne redimendi, ac reparandi genus humanum, & perfecte, ac æquivalenter pro ejus reatu satisfaciendi.

Probat 2. ex Agapito Papa Ep. 5. ad Anthimum, ubi eandem comparisonem inter Christum, & Adamum faciens dicit, *validius fuisse donum libertatis, quam debitum servitutis.* Et S. Chrysost. hom. 10. in c. 5. Ep. ad Rom. ubi dicit, Christum pro reatu primi parentis, ac totius generis humani satisfecisse: quemadmodum si quis aliquem decem obolos debentem, & ob id carcere cum uxore, & liberis detentum ab illo carcere liberet, non tantum solvendo decem illos obolos, sed & innumera auri talenta largiendo. Unde paulo post subdit, Christum multo plus, quam deberemus, solvisse pro nobis, tantoque plura, quanto guttulam exiguam pelagus excedit immensum, peccataque, pro quibus satisfecit, fuisse *tanquam scintillam, satisfactione, quam exhibuit, tanquam supereffuso mari solutam, & extinctam.*



Probatur 3. hac ratione, quia Christi satisfactio fuit simpliciter valoris infiniti; ergo æquivalens, & condigna fuit. Quod autem fuerit infiniti valoris, colligitur tum ex infinita dignitate Personæ satisfaciens, tum ex valore infinito rei in satisfactionem oblata. Christus enim non aliam hostiam obtulit, quam seipsum.

Objicies 1. Christus non satisfecit, ut Deus, sed solum, quatenus homo; atqui ut homo, non fuit infinitæ dignitatis; ergo nec potuit in actiones suas satisfactorias valorem infinitum transfundere.

Respondetur, Christum satisfecisse, in quantum fuit homo Deus, id est, in quantum ejus humanitas in Persona Divina subsistebat, seu per actiones humanitatis in Persona divina subsistentis, quæ actiones ut sic erant infiniti valoris, cum a Persona infinite digna procederent.

Objicies 2. Christus Dominus pro remissione peccatorum nobis impetranda Patrem suum oravit; ergo ad æqualitatem pro ipsis non satisfecit. Si enim tali modo satisfecisse se cognovisset, frustra pro ipsa remissione Patrem orasset.

Respondetur, Christum Dominum orasse, non ut precibus suis suppleret aliquid, quod satisfactioni suæ deesset, sed quia ex ordinatione Divina una ex actionibus quibus Christus nos a peccatis redimere, & pro illis satisfacere debebat Divinæ Justitiæ, erat oratio. Unde Isa. 53. inter alias actiones, quæ a Propheta enumerantur, quibus Christus pro peccatis hominum satisfacere debebat, ponitur oratio, quam Deo Patri obtulit pro transgressoribus. *Ideo dispersit ei plurimos, & fortium dividet spolia, pro eo quod tradidit in morte animam suam, & cum sceleratis reputatus est, & ipso peccata multorum tulit, & pro transgressoribus rogavit.*

## S E C T I O VII.

*An si homo non peccasset, Filius Dei incarnatus fuisset.*

1. Sensus quæstionis est, an vi illius Decreti, quo statuit Deus, ut Verbum Divinum carnem assumeret, quodque per Scripturas sacras nobis innotuit, facta fuisset Incarnatio, etsi primus homo non peccasset.

Duæ autem sunt super hac re Theologorum sententiæ, ambæ maxime probabiles, & pietati consentaneæ. Utranque hic breviter explicabimus, ut cuique liberum sit (cum nihil super hac re ab Ecclesia definitum fuerit) eam, quæ magis arriserit, amplecti.

Prima sententia est eorum, qui negant, Adamo non peccante, Filium Dei fuisse incarnandum.

Prob. 1. auctoritate Scripturæ, quæ variis in locis nullum alium finem proponit, cur Filius Dei sit incarnatus, quam generis humani redemptionem. S. Luc. 19. *Venit Filius hominis quærere, & salvum facere, quod perierat.* S. Jo. 10. *Ego veni in hunc mundum, ut vitam habeant, &*  
abun-

*abundantius babeant. 1. ad Timoth. 1. Christus Jesus venit in hunc mundum peccatores salvos facere.*

Probatur 2. auctoritate SS. Patrum, S. Leonis ser. 3. in Pentec. *Si homo ad imaginem Dei factus in suæ honore naturæ mansisset, nec diabolica fraude deceptus a lege sibi posita per concupiscentiam deviasset, Creator mundi creatura non fieret.* S. Iren. l. 5. adv. Hæ. c. 14. *Si non haberet caro salvari, nequaquam Verbum caro factum esset.* S. Greg. in l. 4. Reg. c. 1. *Si Adam non peccasset, Redemptorem nostrum carnem subire non oporteret.* S. Aug. ser. 8. de verb. Apost. *Si homo non periisset, Dei Filius non venisset.*

2. Secunda sententia est eorum, qui asserunt, Verbi Divini Incarnationem, tanquam maximum, nobilissimum, & perfectissimum Divinæ Sapientiæ opus, a Deo intentam, ac decretam fuisse, ante quamcunque puram creaturam in particulari consideratam, ac proinde ante prævisionem peccati primi hominis ut determinate futuri, secundum nostrum concipiendi modum.

Probatur 1. ex 8. Prov. *Dominus possedit me in initio viarum suarum*, vel ( ut Septuaginta Interpretes vertunt ) *Dominus creavit me initio viarum suarum, antequam quidquam faceret a principio*, ubi de se loquitur Sapientia Incarnata, seu Christus secundum humanitatem, ut docet S. Ambr. l. 1. de Fide c. 7. & probat ex illa voce *Dominus*. Nam Christus secundum Divinitatem non potest Deum appellare Dominum suum, sed Patrem: cum ergo ibi appellet eum Dominum, sequitur, quod de se loquatur secundum humanitatem. Quod etiam docent alii SS. Patres. Nam cum Arianæ ex hoc loco probare conarentur, Christum esse creaturam, respondebant SS. Patres, locum illum intelligi debere de Christo secundum humanitatem. Ita S. Athan. ser. 3. & 4. contra Arianos, S. Cyrill. Alex. l. 4. Thesauri c. 4. 6. & 8. S. August. l. 1. de Trinit. c. 12. Si ergo Christus secundum humanitatem est initium viarum, idest operum Dei, cum id non possit intelligi de ordine temporis, sed de ordine Divinæ intentionis, & æternæ prædestinationis, hinc sequitur, Christum secundum humanitatem fuisse intentum ante omnes alias creaturas, atque adeo ante prævisionem peccati primi hominis.

3. Confirmari potest 1. ex eo, quod idem Christus Dominus ab Apost. ad Colos. c. 1. vocatur *Primogenitus omnis creaturæ*: loquitur autem de Christo secundum humanitatem, ut exponunt ibi S. Hier. & S. Ansel. Unde S. Cyril. l. 10. Thesa. c. 4. dicit, Christum vocari primogenitum, quatenus homo est, unigenitum vero, quatenus Deus est.

Confirmari potest 2. ex his Apost. verbis 1. Corinth. 3. *Omnia vestra sunt, vos autem Christi, Christus autem Dei*. Quibus verbis Apost. dicere intendit, quod sicut omnes aliæ creature propter hominem factæ sunt, & ex consequenti ipse homo a Deo ante illas est intentus, ut finis illarum, sic ipsi homines, omnesque aliæ creature propter Christum factæ sunt, & ex consequenti Christus ipse prior ipsis a Deo intentus est.

Pro-

Probatur 2. ex S. Aug. l. 1. de nuptiis, & concupisc. c. 21. ubi dicit, illud, quod de Sacramento Matrimonii habetur apud Apost. Ephes. 5. *Sacramentum hoc magnum est, ego autem dico in Christo, & in Ecclesia*, implendum fuisse in statu innocentiae, si homo in illo perseverasset, unde sequitur secundum illius mentem, etiam Adamo non peccante, Christum incarnandum fuisse. In eadem sententia sunt multi alii SS. Patres, ut S. Cyrill. Alexandr. l. 5. Thesauri c. 3. & 13. S. Anselmus l. 1. cur Deus homo, Rupertus lib. de gloria, & honore Filii hominis, ubi ex professo illud probat. His merito annumerare possumus beatæ memoriæ Franciscum Salesium olim Episcopum Genevensensem, qui in suo Theotimo, seu tractatu de Divino amore l. 2. c. 4. eandem sententiam clarissime pro more suo explicat, & tuetur, eamque dicit se collegisse ex attenta consideratione Scripturarum, ac doctrinæ SS. Patrum.

Probatur 3. hac ratione. Qui ordinate vult, is post intentum finem prius vult media propinquiora fini, quam remotiora. At Deus ordinare vult id, quod vult, & ultimus finis, quem intendit, est bonitatis, ac gloriæ suæ manifestatio, propter quam omnia alia extra se vult, & operatur. Unde sequitur, quod post hunc finem intentum prius velit media illi propinquiora, quam remotiora. Atqui Incarnatio est medium propinquius Divinæ gloriæ, quam humani generis redemptionem, estque in se longe excellentius, & ad divinam gloriam manifestandam aptius, cum Christus solus, quatenus Deus, & homo majorem gloriam Deo reddere possit, quam universi Angeli, & homines, qui creati, aut redempti fuerunt, imo qui sunt possibiles. Ergo Deus prius ipsius Christi Incarnationem voluit, quam generis humani redemptionem, ac proinde ipsum Christum non propter homines primo, & principaliter, sed potius & homines, & Angelos, & quascunque alias creaturas propter ipsum Christum esse voluit.

Utraque sententia probabilis est, ut diximus; secunda tamen videtur probabilior, tum ob ea, quæ in ejus probationem allata sunt, tum etiam, quia auctoritates Scripturæ, & SS. Patrum, quæ in probationem prioris citatæ sunt, facile possunt explicari.

Quod enim spectat ad ea Scripturæ loca, in quibus dicitur, Christum venisse ad peccatores salvandos, fatemur, illud esse verissimum. Quamvis enim primo, & principaliter ante cujuslibet peccati prævisionem a Deo Christi Incarnatio intenta fuerit, hoc tamen non obstat, quin præviso postea Adami peccato, totiusque generis humani lapsu eadem Incarnatio quasi secundario, & minus principaliter ad illius restorationem divinitus ordinata fuerit. Et sic utrumque verum est, & Christum venisse ad salvandos homines, & nihilominus ante quamcunque creaturam a Deo intentum fuisse.

Ad illud autem, quod aliqui SS. Patres dicunt, Adamo non peccante Christum non fuisse venturum, dicendum est, hoc verum esse,



esse, si intelligatur, Christum non fuisse venturum eo modo, quo venit, hoc est, in carne passibili, neque ea facturum fuisse, aut passurum, quæ humanæ salutis causa fecit, & passus est.

## C A P U T II.

*De modo, quo peractum est Incarnationis mysterium.*

## S E C T I O I.

*Quid sit unio hypostatica.*

1. **E**Xplicatis iis, quæ ad veritatem hujus mysterii pertinent, doctrinæ ordo postulat, ut videamus qua ratione illud peractum sit. Cum autem (ut constat ex ante dictis) Incarnatio facta fuerit per unionem naturæ humanæ cum Divina in ipsius Verbi Persona, videndum est in primis, quid sit illa unio. Quod ut melius intelligatur, Supponendum est ex Philosophia, subsistentiam, seu personalitatem nihil aliud esse, quam modum aliquem realem, & substantialem, quo natura rationalis ultimo perficitur, & completur, ita ut per se, & independenter ab omni alio subsistat, & cuivis alteri ut sic incommunicabilis existat. Et ita ex natura substantiali rationali, & subsistentia illa, seu personalitate fit una singularis persona. Hoc præsupposito, ut quæstioni propositæ satisfiat,

Notandum est, unionem hypostaticam duplici modo sumi posse.

Primo pro actione, qua Deus univit, seu conjunxit humanam naturam cum Hypostasi, seu Persona Divini Verbi, quo sensu vocari potest unitio; & hæc actio, seu unitio est a tota SS. Trinitate, sicut omnes aliæ actiones ad extra, ut definitum est in Conc. Lateranensi sub Innocentio III. c. 1. & in Conc. Toletano sexto c. 1.

Secundo pro termino proximo, & immediato illius actionis, qui quidem secundum probabiliorem Doctorum sententiam non est alius, quam modus quidam, quo Humanitas Christi formaliter manet unita cum Persona Verbi.

Hic autem modus non accidentalis, sed substantialis est, ut docet S. Th. q. 2. a. 6. cum sit de intrinseco, & essentiali conceptu aliqujus substantiæ, nempe Christi, prout est quoddam substantiale suppositum in Divina, humanaque natura subsistens. Unde Martinus I. in Concilio Lateran. cons. 5. can. 8. damnat eum, qui non confitetur proprie, & secundum veritatem in eodem Christo naturarum substantialem unionem indivise, & inconfuse.

Porro modus ille substantialis unionis e duabus unionibus partialibus conflatus est, quarum altera est in corpore, altera in anima Christi. Nam & corpus per se unitum est Verbo, similiter & anima eidem Verbo per se unita est. Quod manifeste apparuit in tri-

triduo mortis Christi. Tunc enim anima fuit a corpore separata, & tamen utrumque seorsum mansit unitum cum Verbo. Unde sequitur, quod in utroque reperiatur unio partialis, materialis quidem in corpore, spiritualis autem in anima, cum utriusque conditio id exigat.

Est etiam modus ille unionis relativus, saltem relatione transcendentali, cum dicat essentialem respectum partim ad humanitatem, tanquam ad subiectum, quod modificat, & tanquam ad terminum, quem unit, partim ad ipsum Verbum Divinum, tanquam ad alium terminum, quem cum ipsa humanitate connectit.

2. Quæres, an unio illa, quæ inter Personam Verbi, & inter Humanitatem intercedit, sit omnium aliarum unionum, quæ in creaturis reperiuntur, maxima, & arctissima.

Respondetur affirmative. Ratio est, quia illarum rerum unio maxima, & arctissima est, quæ magis accedunt ad indivisionem, & indistinctionem; atqui natura Divina, & humana in Christo, quatenus ambæ in eadem Verbi Divini subsistentia ununtur, maxime accedunt ad indivisionem, & indistinctionem, eo quod arctissimum ordinem habent ad invicem, utpote qui fit per aliquod, quod est simplicissimum, & maxime unum, scilicet per Verbi Divini subsistentiam. Unde S. Bernard. l. 5. de consid. c. 8. *Inter omnia, inquit, quæ recte unum dicuntur, arcem tenet unitas Trinitatis, quæ tres Personæ una substantia sunt, secundo loco illa præcellit, quæ e converso tres substantiæ, scilicet Verbum, Anima, & Corpus, una in Christo persona sunt.*

Hinc sequitur, illam unionem, sicut est arctissima, sic etiam esse maxime indissolubilem. Unde S. Leo serm. 17. de Passione, *Intantam, inquit, unitatem Dei, & hominis natura convenit, ut nec supplicio dirimi potueris, nec morte disjungi.*

## S E C T I O II.

*An sola Filii Persona naturam humanam assumpserit.*

1. **S**ensus quæstionis est, an natura humana ita cum Persona Filii fuerit unita, ut solus Filius vere, & proprie incarnatus, atque homo factus sit, non item Pater, aut Spiritus Sanctus. Pro cuius resolutione

Dicendum est, certum esse ex Fide, soli Personæ Filii naturam humanam fuisse unitam, atque adeo solum Filium non vero Patrem, & Spiritum Sanctum, naturam humanam assumpsisse, & hominem factum esse.

Hæc veritas aperte constat ex quamplurimis Scripturæ locis, ut S. Jo. 1. *Verbum caro factum est & c. 3., Sic Deus dilexit mundum, ut Filium suum unigenitum daret.* Id etiam expresse definitum est in variis

Con-

Conciliis, ut in Conc. Chalcedon. act. 5. Constantinop. II. c. 5. & continetur in omnibus Symbolis, quibus Ecclesia Catholica utitur.

Verum difficultas est, cum in Divinis omnia opera ad extra sint indivisa, & tribus Personis communia, quomodo unio illa in solâ Persona Filii, non item Patris, ac Spiritus Sancti fieri potuerit. Quæ difficultas ut facilius solvatur.

Observandum est id, quod docet S. Th. 1. p. q. 40. ar. 2. & communiter cum eo Theologi, Personas Divinas constare Essentia Divina tanquam aliquo communi, & suis proprietatibus personalibus, tanquam ratione constitutiva, & distinctiva aliarum.

Hac observatione supposita, ad propositam difficultatem respondetur.

Si per unionem, & assumptionem humanæ naturæ intelligatur actio illa, qua cum Persona Verbi conjuncta fuit, illam esse communem toti Trinitati, ut supra dictum est.

Quod si per unionem intelligatur terminus immediatus illius actionis, quæratque, quomodo Persona Filii potius, quam Patris, aut Spiritus sancti immediate terminet, & sustentet ipsam naturam humanam, dicendum est, id fieri, quia illam terminat, ipsique unitur, non per aliquid absolutum, & essenziale, sed per aliquid relativum, & personale sibi proprium.

Hoc expresse definitum, & explicatum habetur in Concilio Tolentino VI. cap. 1. in professione Fidei his verbis: *Cum tota cooperata sit Trinitas cooperationem suscepti hominis, quoniam sunt inseparabilia opera Trinitatis, solus tamen Filius suscepit humanitatem in singularitate Personæ, non in unitate naturæ, id est in eo, quod proprium est Filii, non quod commune Trinitatis.*

Dices, apud SS. Patres aliquando reperiri, quod natura Divina humanam assumpsit, unde sequitur, cum illa Patri, & Spiritui sancto, sicut & Filio communis sit, æque dici posse, Patrem, aut Spiritum sanctum incarnatum esse, ac Filium.

Respondetur, cum dicunt Patres, naturam Dei incarnatam fuisse, sensum esse (ut recte explicat S. Th. 3. p. qu. 2.) Personam Filii primario, & propriissime naturam humanam assumpsisse, & sic fuisse incarnatam, consequenter autem, & secundario Divinam naturam, quæ cum ipsa Filii Persona identificatur, naturam illam humanam assumpsisse, adeoque fuisse carni unitam, atque eatenus esse, & dici posse incarnatam.

Porro, quamvis eo sensu modus ille loquendi verus sit, communiter tamen usurpari non debet, quin proprius, & legitimus ejus sensus explicetur. Unde S. Damascenus lib. 3. de Fide cap. 6. licet enuntatur, de illo tamen postea dubitat, an verus, & proprius sit, & an debeat usurpari.



## S E C T I O . III.

*An post duarum in Christo naturarum unionem manserit proprietatum utriusque natura distinctio.*

1. **C**atholica Fides docet ( ut ex ante dictis satis constat ) ita factam esse naturæ Divinæ, & humanæ in Persona Verbi unionem, ut tamen manserit semper omnimoda proprietatum cujusque naturæ distinctio.

Huic autem veritati præter Hæreses capite præcedenti relatas, & refutatas, opposita est nova Hæresis Ubiquistarum, qui asserunt, humanam naturam Verbo Divino hypostatice hoc ipso unitam esse, quod omnis plenitudo, & energia Divinitatis Verbi sit illi realiter communicata, & ita in eam transfusa, ut Christus etiam secundum humanitatem, atque adeo quatenus homo, verissime dicatur esse Deus, omnipotens, æternus, infinitus, ubique præsens, unde & Ubiquistarum appellationem sortiti sunt.

Refellitur hæc Hæresis, & nostræ Fidei veritas probatur 1. ex Scripturis, quæ utriusque naturæ proprietates in Christo distinguunt. 1. Cor. 13. *Etsi crucifixus est ex infirmitate, sed vivit ex virtute Dei.* 1. Pet. 4. *Christo igitur passo in carne pro nobis.* S. Jo. 20. *Christus Dominus de se loquens, Ascendo, inquit, ad Patrem meum, & Patrem vestrum, Deum meum, & Deum vestrum.*

Probatur 2. ex Conc. Chalcedonensi Act. 5. ubi definitum est, *Unum, & eundem Jesum Christum Unigenitum in duabus naturis inconfusibiliter cognoscendum esse, nulla naturarum differentia sublata propter unionem, sed magis utriusque naturæ proprietate in unam Personam, & in unam subsistentiam concurrente.* Et ex Conc. Later. I. sub Martino I. c. 9. *Si quis non confitetur proprie, & vere naturales proprietates Deitatis Christi, & humanitatis indiminue in eo, & sine defectione salvatas, &c. sit condemnatus.* Et in Epist. Agathonis Sape, quæ in sexta Synodo generali act. 4. lecta, & recepta est, dicitur, *unamquamque naturam Christi proprietatem naturalem retinere, & habere Divinam omnia, quæ Divina sunt.*

Probatur 3. ex S. Greg. Nazianz. in orat. de Filio, *Uno capitulo, inquit, moneo, ut altiora adscribas Divinitati, humiliora autem naturæ humanæ attribuas.* Et S. Jo. Dam. lib. 2. de Fide c. 4. *Divinitatem, inquit, dicentes, non nominamus ea, quæ sunt propria humanitatis, neque de carne prædicamus ea, quæ sunt Divinitatis propria.*

Probatur 4. ex absurdis, quæ posita illa Hæresi consequuntur. Si enim Christo secundum humanitatem proprietates Divinæ vere competere, sequeretur, ipsum Christum secundum humanitatem suam esse auctorem suæ humanitatis, & secundum animam suam esse creatorem suæ animæ, item secundum humanitatem suam extitisse, ante-  
quam

quam ipsa humanitas existeret : similiter secundum humanitatem suam neque pati, neque mori potuisse, atque adeo neque passum, neque mortuum fuisse. Quæ omnia quam absurda sint, nemo non videt.

Observandum est autem, Doctores Catholicos non negare, Imo ultro fateri, omnem plenitudinem Divinitatis, atque adeo Divinas omnes perfectiones naturæ humanæ Christi fuisse communicatas, non tamen eo sensu, quo illi Hæretici volunt, quasi vero illæ Divinæ perfectiones naturæ humanæ attribui possint, aut de illa prædicari, seu de Christo secundum ipsam, sed solum isto sensu, qui verissimus est, quatenus nimirum natura humana in ipsa Verbi Persona subsistit per ipsam Verbi substantiam, cum qua ipsius Verbi Divini, ejusque perfectiones identificantur.

#### SECTIO IV.

*Quenam humane naturæ partes a Verbo assumptæ sint.*

1. **D**icendum 1. Filium Dei verum, & naturale corpus, ejusdemque rationis cum nostris corporibus assumpsisse.

Est de Fide contra Manichæos, & Cerdonianos, qui ( ut refert S. August. lib. de Hæres. c. 41. & 66. ) asseriebant, Christum Dominum non habuisse verum, & naturale corpus, sed phantasticum, & apparens.

Refellitur hic error, & veritas opposita probatur iisdem auctoritatibus Scripturæ, Conciliorum, & Patrum, quibus supra probatum est Christum Dominum veram naturam humanam assumpsisse, verumque Deum, ac verum hominem esse. Nisi enim verum, & naturale corpus assumpsisset, non posset dici verus homo, nec vere humanam naturam assumpsisse. Unde S. Aug. lib. 83. qq. qu. 14. Si, inquit, phantasticum fuit corpus Christi, fefellit Christus, & si fefellit, veritas non est; est autem veritas Christus: non igitur phantasma fuit corpus Christi.

2. Dicendum 2. Filium Dei sicut verum corpus, sic etiam veram animam rationalem intellectu, ac voluntate præditam, ac ejusdem naturæ cum animabus cæterorum hominum assumpsisse.

Huic veritati, quæ de Fide est, oppositus fuit olim error Apollinaris, qui ( ut refert S. Aug. lib. de Hæres. cap. 55. ) assererat, Verbum Divinum assumpsisse carnem sine anima; ipsumque Verbum fuisse instar animæ rationalis in carne assumpta.

Refellitur hic error, ac nostræ Fidei veritas probatur 1. iisdem testimoniis, quibus supra constare diximus, Christum esse sicut verum Deum, sic etiam verum hominem; quod dici non posset, si animam humanam non assumpsisset, cum anima sit pars essentialis hominis.

Probatur 2. eadem veritas ex iis Scripturæ locis, in quibus dicitur, Christum Dominum veram animam habuisse. S. Matth. 26. *Tristis est anima mea usque ad mortem.* S. Jo. 20. *Potestatem habeo ponendi animam meam,*

*meam, & iterum sumendi eam.* Quibus in locis animam proprie accipi pro anima humana docet S. August. lib. 83. qq. q. 8.

Probatur 3. ex Concilio Ephesino c. 13. ubi expresse asseritur, *Dei Filium carnem animatam anima rationali sibi copulasse.* Et ex Symbolo S. Athanasii, ubi habetur, *Perfectus Deus, perfectus homo, ex anima rationali, & humana carne subsistens.*

Ex quibus sequitur, falsum & erroneum quoque esse id, quod aliqui Apollinaris discipuli dixerunt, qui cum Evangelii testimoniis convicti, Filium Dei animam assumpsisse faterentur, illam tamen mente, ac intellectu privatam fuisse ajebant; ejusque defectum a Verbo Divino suppletum fuisse; cum intellectus ad veritatem humanæ naturæ absolute pertineat, nec anima humana perfecta esse possit sine intelligendi facultate, neque possibile sit, ut Divinitas in Christo suppleat rationem alicujus partis, vel facultatis, cum omnis pars sit ens imperfectum, & incompletum comparatione totius. Unde & hæc opinio a S. Leone Papa ser. 8. de nativ. Christi omnino reprobata est.

Dicendum 3. totum sanguinem, qui fuit in Corpore Christi, fuisse ipsi Verbo hypostatice unitum.

Probatur 1. ex Scriptura Hebr. 10. ubi Filius Dei dicitur *participasse carni, & sanguini*, sicut reliqui homines, ubi Apostolus eodem modo de sanguine, ac de carne loquitur; unde sequitur, Verbum Divinum eodem modo sanguinem, atque carnem assumpsisse. Item ex omnibus aliis Scripturæ locis, quæ peccatorum remissionem, & hominum redemptionem attribuunt Sanguini Christi, ut ad Eph. 1. *In quo habemus redemptionem per sanguinem ejus.* & Ep. 1. S. Jo. c. 1. *Sanguis Jesu Christi Filii ejus emundat nos ab omni peccato.*

Probatur 2. ex Concilio Ephesino in Epist. ad Nestorium, ubi dicitur, *Verbum factum esse hominem assumptione carnis, & sanguinis.* Et ex Concilio Chalced. I. ubi lecta, & approbata est quædam Epist. S. Cyrilli ad Acacium, in qua ipse ait, *Verbum caro factum est, idest carnem, & sanguinem assumpsit.*

Probatur 3. auctoritate Clementis VI. in Extravag. *Unigenitus*, de poeniten. & remission. ubi affirmat, *modicam guttam Sanguinis Christi propter unionem cum Verbo Divino suffecisse ad redemptionem totius humani generis.*

Probatur 4. hac ratione. Omne id, quod ad veritatem humanæ naturæ pertinet, a Verbo Divino assumptum fuit, ut constat ex ante dictis, cum fuerit verus homo; atqui sanguis pertinet ad veritatem humanæ naturæ. Sive enim informetur ab anima rationali, ut plerique sentiunt, sive habeat formam distinctam, semper tamen est pars omnino necessaria ad conservationem corporis humani, qua sublata, tota hominis natura corrumpitur, neque homo ipse operari, neque subsistere ad momentum potest. Unde concludendum, est, illum a Verbo Divino fuisse assumptum.



3. Objicies illud vulgatum axioma S. Damasc. *Quod Verbum assumpsit, nunquam dimisit*. Atqui in triduo mortis Christus dimisit sanguinem, cum ab ipsius corpore separatus fuerit.

Respondetur, quod etsi sanguis Christi totus effusus fuerit, non tamen fuit a Verbo separatus, neque fuit corruptus, sed divinitus assertivatus, suam partialem formam sanguinis retinuit, ac post triduum denuo a Christo resurgente resumptus fuit. Et hoc constat, tum ex communi Doctorum consensu, tum etiam ex eo, quod refertur in Directorio Inquisitorum par. 2. q. 10. n. 1. a Clemente VI. damnatum fuisse id, quod quidam Concionator publice in Ecclesia Barcinonensi dixerat, sanguinem Christi fuisse in ejus morte a Divinitate separatum. Quam doctrinam Inquisitor Fidei ut hæreticam redarguit, ad eamque publice retractandam, illius Summi Pontificis auctoritate, Concionatorem illum adegit.

Quod ad alios tres humores spectat, cum ad integritatem, & veritatem humanæ naturæ pertineant, valde probabile est, illos fuisse a Verbo assumptos, sicut & dentes, & capillos, & ungues, quos aliqui probabiliter existimant esse animatos, & quamvis non essent, ita tamen ad complementum corporis humani pertinent, ut S. Aug. in Enchir. cap. 88. & lib. 12. de Civ. cap. 19. existimet, illos reperiendos esse in corporibus Beatorum post resurrectionem.

## S E C T I O V.

*Quo ordine partes humane nature a Verbo assumptæ sint.*

1. SI spectetur ordo temporis, dicendum est, nec corpus, nec animam Christi fuisse ante unionem hypostaticam cum Verbo Divino, sed omnes humanæ naturæ partes eodem temporis momento, quo esse inceperunt, simul a Verbo assumptas fuisse. Ita S. Th. q. 6. a. 4.

Hæc propositio de Fide est, ut constat ex 6. Synodo generali, ubi aët. 11. lecta est Epistola Sophronii, & aët. 13. approbata, in qua hæc verba habentur: *Simul quippe caro, simul Dei Verbi caro, simul caro animata rationalis, simul Dei Verbi caro animata rationalis*. Et in quinta Synodo generali apud Nicephorum l. 17. hist. cap. 28. hic canon tertius legitur: *Si quis dixerit, prius formatum corpus Christi in utero Sanctæ Virginis, & deinceps unitum ei Verbum esse, anathema sit*.

Hanc etiam veritatem tanquam de Fide docent SS. Patres. S. Hier. Apolog. cont. Rufinum lib. 2. S. Leo Papa Epist. 11. ad Julianum. S. Fulgent. lib. de Fide ad Pet. c. 18. & S. Damasc. lib. 3. de Fide c. 11.

Probari insuper potest hac ratione: quia si aliquo temporis momento partes humanitatis Christi prius conceptæ fuissent, ac positæ in rerum natura, quam Verbo unirentur, sequeretur, beatissimam Virginem non concepisse Deum, sed tantum hominem, qui postea

futurus erat Deus, quod sapit hæresim Nestorii, & in Concilio Ephesino c. 3. damnatum est.

2. Quod si spectetur ordo naturæ, & rationis docet S. Th. qu. 6. ar. 1. & seq. animam prius natura fuisse Verbo unitam, quam corpus, & spiritum, seu mentem, vel intellectum prius, quam animam, ipsamque animam intellectu mediante, & corpus mediante anima fuisse a Verbo assumptum.

Ita S. Aug. lib. de Agone Christiano c. 18. *Immortalis Veritas per spiritum animam, & per animam corpus suscipiens, toto homine assumpto, eum ab infirmitatibus suis liberavit.* Et in 6. Synodo generali act. 18. in edicto Fidei Constantini Pogonati Imperatoris dicitur, *Verbum sibi compaginasse corpus, & animam per Spiritum ex sancta, & immaculata Virgine, & carnem quoque mediante anima rationali.* Quod quidem edictum ab ipso Concilio, & a Summo Pontifice Leone II. approbatum fuit, ut patet ex ipsius Leonis Epist. ad dictam Synodum.

## SECTIO VI.

*An Filius Dei aliquos defectus corporis assumpserit.*

1. **O**bservandum est, corporales defectus in duplici esse differentia. Alii enim communes sunt omnibus hominibus, & totam naturam consequuntur, ut sunt mors, fames, sitis, dolor, &c. Alii vero ex causis quibusdam particularibus proveniunt, suntque tantum in aliquibus hominibus, ut sunt lepra, febris, & alia id genus. Hac distinctione supposita

Dicendum 1. Filium Dei, assumendo corpus humanum, simul etiam assumpsisse omnes illos defectus, qui sunt communes toti naturæ humanæ, atque ita assumpsisse corpus passibile, & obnoxium fami, siti, æstui, frigori, dolori, morti, & similibus, atque reipsa hæc omnia perpeßum fuisse.

Huic veritati, quæ de Fide est, oppositus fuit olim error Severianorum, qui ( ut refert Nicephorus lib. 7. c. 29. ) asseriebant, corpus Christi non fuisse vere, & proprie passibile, & cum sensu doloris vulnerabile, quem errorem secuti sunt Armenii quidam, ut refert Euthimius in sua Panoplia p. 2. tit. 10.

Refellitur hic error, & veritas nostræ Fidei probatur ex Scriptura. Isa. 53. *Vere languores nostros ipse tulit, & dolores nostros ipse portavit, vulneratus est propter iniquitates nostras,* ubi hæc particula vere notanda est. S. Luc. 24. *Oportebat Christum pati.*

Probatur 2. ex variis Conciliis, Ephesino, anathematismo 12. Chalcedon. act. 5. Lateran. sub Martino I. consult. 5. can. 4. istam veritatem definientibus.

Prob. 3. ex S. Cyril. Hierosol. catech. 13. *Passus est, inquit, Jesus pro*

*pro hominibus vere. Non enim apparentia est crux, neque opinio redemptio, non imaginaria mors, & fabulatoria salus: vere crucifixus est, & non confundimur, neque negamus, sed potius in eo gloriamur. Hanc veritatem, tanquam Fide certam, profitentur communiter SS. Patres. S. Ambros. lib. 2. de Fide cap. 4. S. August. epist. 146. S. Leo Papa epist. 10. S. Damasc. lib. 3. de Fide cap. 28. & reliqui omnes.*

Dicendum 2. Filium Dei non assumpsisse defectus illos, qui ex causa particularibus consequuntur, v. g. deformitatem, morbos, & similes. Ita S. Thom. qu. 14. art. 14. & cum eo communiter omnes.

Ratio est, quia ibi tantum reperiuntur defectus illi, ubi eorum causæ, & radices locum habent. Atqui defectuum illorum causæ, aut radices non fuerunt in Christo. Oriuntur enim vel ex culpa, seu vitio, aut ignorantia hominis, vel ex defectu, & imbecillitate virtutis formatricis, quæ est in parentibus. Nulla autem culpa in Christo fuit, aut esse potuit, nullum vitium, nulla ignorantia, aut inconsideratio: neque virtus illa, qua ejus corpus formatum fuit, imbecillis, aut infirma fuit, cum de Spiritu sancto conceptus fuerit. Imo opera, quæ miraculose a Deo facta sunt, semper perfectissima fuerunt: proinde cum Christi corpus fuerit miraculose per Spiritus sancti virtutem formatum, dicendum est, illud fuisse perfectissimum, pulcherrimum, optimo temperamento præditum, & omnibus partibus suis absolutissimum.

## SECTIO VII.

*An Christus in anima sua defectus aliquos habuerit.*

1. **D**E quatuor præsertim defectibus difficultas aliqua esse potest, scilicet de peccato, de fomite peccati, de ignorantia, & de passionibus, seu motibus appetitus inferioris; de quibus hic singillatim, breviter tamen agendum nobis est.

Dicendum igitur 1. Christum Dominum nullum unquam contraxisse peccatum originale, nec ullum actuale etiam levissimum commisisse.

Probatur ex Scriptura. 1. S. Petri 2. ubi de Christo dicitur, quod peccatum non fecit, nec inventus est dolus in ore ejus. Heb. 4. Tentatus per omnia pro similitudine absque peccato. Et cap. 7. vocatur Sanctus, innocens, impollutus, segregatus a peccatoribus. Eadem veritas definita est in Concilio Ephesino can. 10. & Later. sub Martino I. Consult. 5. can. 5. & ab omnibus SS. Patribus unanimiter tanquam certissima ex Fide asseritur.

Quæres, quo sensu debeant intelligi hæc verba Ps. 21. *Deus Deus meus, quare me dereliquisti? longe a salute mea verba delictorum meorum,* quæ communiter a SS. Patribus Christo patienti adaptantur.

Omissa impia, & blasphemica cujusdam Hæretici explicatione, qui

Q 4 (ut



(ut refert Cardinalis Hosius lib. 1. de Hæresib. nostri temporis) hæc verba Christi desperantis esse asseruit, respondetur, duplicem illorum verborum a SS. Patribus expositionem afferri.

Prima est, Christum ibi non in sua, sed in membrorum suorum; hoc est, omnium hominum persona, de illorum peccatis, non de suis loqui. Ita S. Leo Papa serm. 16. & 17. de passione, S. Gregor. Nazianz. orat. 36. quæ est quarra de Theologia, S. Damasc. lib. 4. de Fide cap. 19. & S. Thom. q. 15. art. 1. ad 1.

Secunda expositio est, verba illa esse quidem Christi loquentis in sua Persona, illumque delicta appellasse sua, quæ nostra erant, & a nobis commissa, eo quod pro illis sponsorem se præstitisset, Divinæque justitiæ satisfacere ad rigorem deberet. Ita S. Ambr. 1. de Incarnationis Dominicæ Sacramento, c. 5. S. Hieron. in illum Psal. 21. S. August. in 2. enarratione ejusdem Psalmi.

2. Dicendum 2. Christum Dominum non modo nullum peccatum commisisse, sed nec committere potuisse, ac proinde fuisse prorsus impeccabilem.

Ita communiter SS. Patres. S. Athanas. lib. de incarnatione Christi post medium, *Verbi, inquit, incarnatio secundum naturam Dei facta nostrorum vitiorum susceptibilis non fuit.* S. Cyrill. Alex. libro contra Anthropomorphitas cap. 23. vocat illos *stolidos prorsus, ac dementes, qui Christum nescio quo pacto peccare posse affirmant.*

Ratio autem illius impeccabilitatis in Christo ex triplici potissimum capite desumitur.

Primo ex unione humanitatis ejus cum Divinitate, quæ quidem Divinitas cum sit infinita simpliciter in omni genere sanctitatis, humanitatem Christi Domini ita sanctificat, (sicut infra dicetur) ut quemadmodum ipsa Divinitate nulla major, aut altioris ordinis sanctitas esse, aut excogitari potest, ita humanitatis Christi sanctificatione nulla major, aut altioris ordinis esse, aut excogitari queat, cum qua sanctificatione proinde nullum peccatum stare potest, cum illi absolute, & omnimode sit oppositum. Unde S. Greg. Naz. citat. orat. 36. de Christo Domino loquens, *Quia, inquit, illius voluntas tota deificata est, Deo procul dubio non adversatur.*

Secundo ex visione beatifica Essentiæ Divinæ, qua Christi anima frui a primo instanti suæ conceptionis incepit, ut infra dicetur; hæc autem visio ex se est cum omni peccato impossibilis.

Tertio denique ex Gratia consummata, qua ejus anima prædita est, quæ quidem cum longe major extiterit, quam in omnibus Sanctis, & Angelis fuerit, aut futura sit, ejus voluntatem ita in bono stabilire potuit, ut vel ex hoc capite etiam impeccabilis dici potuerit.

Dicendum 3. in Christo peccati fomitem nullo modo fuisse. Ita S. Thom. q. 15. art. 2.

Pro-

Probatur ex eo, quod fomes peccati ex peccato originali provenit; atqui in Christo peccatum originale nec fuit; nec esse potuit; ergo nec fomes peccati. Sublata enim causa, tollitur effectus. Præterea eadem rationes, quæ probant, in Christo peccatum esse non potuisse, probant etiam, in illo peccati fomitem non fuisse, cum idem prorsus sit habere in se fomitem peccati, ac habere in se inordinatam inclinationem ad peccatum, ac proinde esse peccabilem, quod tamen de Christo nullatenus dici posse supra probatum est.

Dicendum 4. in anima Christi nullam fuisse ignorantiam. Ita Sanctus Thomas art. 3.

Probatur 1. ex Scriptura. S. Joan. 1. dicitur, Christum Dominum fuisse *plenum Gratiæ, & veritatis*. & cap. 21. dixit illi S. Petrus, *Domine tu omnia nosti*. & Coloss. 2. dicit Apostolus, quod *in illo sunt omnes thesauri sapientiæ, & scientiæ Dei*.

Probatur 2. ex 6. Synodo act. 13. ubi approbata est Epistola Sophronii, in qua damnatur Hæresis Agnoitarum, qui asseriebant, Christum Dominum ignorasse diem Judicii extremi.

Objicies, in Evangelio dici, quod puer Jesus proficiebat ætate, & sapientia; ergo aliquid illius sapientiæ deerat, si in ea proficiebat.

Respondetur cum S. Gregor. Naz. in orat. in S. Basilium, Jesum dici profecisse sapientia, *non quod incrementum aliquod acceperit, cum ab initio sapientia plenus esset, sed quod sapientiam suam hominibus paulatim magis, ac magis detegeret*.

3. Dicendum 5. animam Christi Domini vere fuisse passibilem, id est, potuisse moveri affectibus illis, qui passiones dicuntur. Ita S. Thom. ar. 4. & seq.

Constat manifeste ex Scripturis, Christum multos ejusmodi affectus re ipsa habuisse, ut tristitiam, S. Matth. 26. timorem, seu pavorem, S. Mar. 14. iram, ejusdem S. Mar. 3.

Hæ tamen passiones longe diversæ fuerunt in Christo ab illis, quæ in nobis solent oriri; in illo siquidem (ut dicit S. August. lib. 14. de Civ. c. 8.) fuerunt ordinatissimæ. Quocirca S. Th. l. c. triplex discrimen assignat inter passiones, quæ in Christo fuerunt, & illas, quæ in nobis.

Primum ex parte principii, quia in Christo sequebantur semper rationis deliberationem, in nobis illam sæpè antevertunt.

Secundum ex parte objecti, quia Christi passiones habuerunt semper objectum rectæ rationi consentaneum, nostræ vero sæpissime feruntur in objectum ipsi rationi repugnans.

Tertium denique ex parte effectus. In Christo enim ratio nullo modo ab ejus passionibus impedita est, in nobis vero passiones ipsam rationem vel impediunt, vel etiam aliquando prorsus obruunt.

Quibus de causis aliquibus SS. Patribus visum est, hujusmodi motus, & affectus in Christo non passiones, sed propassiones dici debere.

## CAPUT III.

*De modo, quo de mysterio Incarnationis loquendum est.*

**P**Ræcipuæ difficultates, quæ in modis loquendi de mysterio Incarnationis occurrere possunt, oriuntur præsertim ex ipsa communicatione idiomatum, seu proprietatum utriusque naturæ, Divinæ scilicet, & humanæ, in una Christi Persona. Idcirco de illa idioma-  
tum communicatione agendum nobis est.

## SECTIO I.

*An in Christo aliqua communicatio idiomatum admittenda sit.*

1. **C**Um per unionem hypostaticam (ut ex ante dictis constat) duæ sint naturæ in Persona Verbi unitæ, & in illa subsistentes, Divina scilicet, quæ ipsius Verbi propria est, & humana, quam assumpsit; hinc oritur duplex communicatio respectu illius Divinæ Personæ, una ipsarum duarum naturarum, altera proprietatum, seu attributorum cujusque naturæ. Prior in eo consistit, quod duæ naturæ prædicentur in concreto de Persona Verbi: posterior, quod etiam attributa, & proprietates utriusque naturæ in concreto de eadem Persona similiter prædicentur. Juxta priorem recte dicimus, *Filius Dei est Deus*, vel *Filius Dei est homo*: juxta posteriorem, *Filius Dei est æternus, infinitus, impassibilis*, *Filius Dei est temporalis, finitus, passibilis*. Quod sic intelligendum est, *Est æternus secundum Divinitatem, temporalis secundum humanitatem*, & sic de aliis. Hac observatione supposita

2. Dicendum est, aliquam idiomatum, seu proprietatum communicationem vere, & proprie in Christo esse admittendam. Est de Fide.

Probatur in primis ex iis Scripturæ locis, in quibus ea Christo Domino tribuuntur, quæ naturæ tum Divinæ tum humanæ propria sunt, ut S. Jo. 3. *Nemo ascendit in cælum, nisi qui descendit de cælo, Filius hominis, qui est in cælo*. S. Luc. 1. *Quod nascetur ex te sanctum, vocabitur Filius Dei*. S. Jo. 8. *Antequam Abraham fieret, ego sum*.

Probatur 2. ex Concilio Ephesino in anathematismis S. Cyrilli, in quibus damnantur Nestoriani, qui communicationem idiomatum negabant, asseriturque, Christum secundum veritatem esse, & dici verum Deum, & verum hominem.

Probat. 3. ex S. Leone Pap. Ep. ad Palæstinos. *Non interest, inquit, ea qua substantia Christus nominetur, cum inseparabiliter manente unitate Personæ idem sit & totus hominis filius propter carnē, & totus Dei Filius propter unam cum Patre Deitatem*. Et S. Damasc. l. 3. de Fide c. 3. *Verbum*, inquit, ea, quæ humanitati conveniunt, sibi vindicat, ac vicissim carnem, quæ



*quæ sua sunt, impertit, communicationis videlicet ratione, ob mutuum partium inter se communicationem, ac personalem unionem.*

Hinc intelligitur, quo sensu accipienda sint ea, quæ ipse Christus de se aliquando dixit, in quibus aliqua contradictio esse videtur, ut cum dixit, *Pater major me est*, S. Jo. 14. *Ego, & Pater unum sumus*. S. Jo. 10. Hæc enim, quamvis in specie sibi contradicere videantur, sunt tamen verissime dicta, siquidem in priori loco Christus de se secundum humanam naturam loquitur, in posteriori vero secundum Divinam.

## SECTION II.

*Traduntur quædam regulæ in hac communicatione idiomatum enuncianda observandæ.*

1. **P**rima est. De omnibus nominibus positis pro Persona Christi, seu pro Supposito Verbi Divini possunt in concreto prædicari nomina omnia, quæ naturam Divinam, vel humanam, aut illorum proprietates, seu attributa significant. Ita S. Th. q. 16. a. 4. Hæc etiam expressa est doctrina S. Damasceni l. 3. de Fide c. 4. sic loquentis. *Cum de Persona Filii, inquit, verba facimus, sive ab utraque natura simul, sive ab altera duntaxat eam appellamus, utriusque naturæ proprietates ipsi imponimus. Etenim Christus (quæ vox utrumque complectitur) Deus, & homo dicitur, creatus, & increatus, passibilis, & impassibilis.*

Ratio hujus regulæ est, quia, cum nomina in concreto significant id, quod habet formam per ipsa significatam, sensus illarum propositionum erit, Verbum Divinum habere naturam Divinam, aut humanam, vel proprietates Divinas ratione naturæ Divinæ, aut humanæ ratione humanæ, quod quidem supposita veritate Incarnationis ipsius Verbi verissimum est. Unde quocunque nomine vocetur Christus, sive dicatur Verbum, sive Filius Dei, sive Filius hominis (ut seipsum persæpe vocat in Evangeliiis) sive alio quocunque vocabulo designetur, dummodo per illud Persona ipsius Christi, seu Suppositum Verbi Divini significetur, vere, & proprie de illo natura Divina, & humana, & utriusque proprietates in concreto prædicari poterunt. Ex. gr. demonstrato Christo, verum erit dicere, quod Ap. Petrus dixit, *Hic est omnium Dominus*: verum etiam erit dicere, quod idem dixit, *Hic passus est pro nobis, & peccata nostra pertulit in corpore suo per lignum.*

Secunda regula: De nominibus, quæ pro Christi Persona ponuntur, non possunt in abstracto prædicari nomina pertinentia ad humanam ejus naturam, dicendo v. g. *Verbum Divinum est humanitas*, ac multo minus illius naturæ proprietates. Neque etiam ulla nomina unius naturæ possunt in abstracto prædicari de nominibus alterius naturæ, dicendo v. gr. *Divinitas est humanitas*, aut *Divinitas est mortuus*. Ita S. Thom. ar. 1.

Cujus

Cujus ratio hæc est, quia significaretur tunc identitas Personæ cum natura humana, aut ejus proprietatibus, aut identitas ipsius Divinitatis cum humanitate, quod esset prorsus a veritate alienum.

Possunt tamen nomina Divinæ naturæ propria prædicari etiam in abstracto de nominibus positis pro ipsa Divini Verbi Persona. Unde Apost. 1. Cor. 1. vocat Christum *Dei virtutem, & Dei sapientiam*.

Ratio hujus differentię est, quia proprietates Divinæ cum ipsa Verbi Persona identificantur, unde fit, ut de illa etiam in abstracto prædicari possint, quod de humanæ naturæ proprietatibus dici non debet.

2. Tertia regula: Nulla naturæ humanæ proprietas, etiam in concreto, potest de Christi Persona prædicari cum reduplicatione Deitatis, neque proprietas ulla naturæ Divinæ cum reduplicatione humanitatis. Ex. gr. dici non debet, quod Christus, quatenus Deus, passus, aut mortuus fuit, & e contra, quod quatenus homo, sit omnipotens, æternus, &c.

Ratio est, quia inde sequeretur, per unionem hypostaticam confusas esse in Christo naturas, aut illarum proprietates, quod est contra hujus mysterii veritatem, ut supra demonstratum est. Unde quando in aliqua propositione affirmatur, vel negatur aliquid de Christo cum reduplicatione alicujus naturæ, videndum est, ut hoc illi conveniat, vel disconveniat secundum naturam illam: alias propositio falsa esset.

Quarta regula; Nullum prædicatum, quod formaliter includit personam humanam, aut excludit Divinam, debet attribui Christo. E.g. dici non debet, quod Christus est purus homo, quod est aliud a Deo.

Ratio est, quia hæ, & similes propositiones significant vel Christi Personam non esse Divinam, vel duas esse in illo Personas, quod a veritate prorsus alienum est.

### S E C T I O III.

*Observationes aliquæ traduntur super regulis prioris  
Sectionis propositis.*

1. **Q**uamvis regulæ superius traditæ verissimæ, ac certissimæ sint, nihilominus, ut in modis loquendi de mysterio Incarnationis nihil excidat, quod vel minimum ab illius veritate discordet, aliqua hic observanda supersunt.

Primum est, cavendos esse certos loquendi modos, quibus quamvis ad rigorem secundum supra dictas regulas uti licitum sit, quia tamen ab aliquibus Hæreticis usurpati sunt ad aliquos errores contra hujus mysterii veritatem invehendos, vel quia ipsi erroribus favere aliquo pacto videntur, ideo ab illis abstinere tutius est. Unde S. Th. a. 8. recte dicit, quod *ne nomina quidem debemus habere cum hæreticis communia*.

Hanc ob causam, quamvis hæ propositiones, *Christus est creatura, vel Christus incepit esse*, in aliquo sensu veræ sint, & ita usurpatæ reperian-  
tur

tur a quibusdam SS. Patribus; quia tamen Ariani illis usi sunt, ut ipsius Filii Dei Divinitatem impugnarent, tutius est vel absolute ab illis abstinere, ut monet idem S. Doctor, vel non nisi cum reduplicatione ipsius naturæ humanæ iis uti.

Obeandem rationem hæc alia propositio, *Christus est Dei servus*, communiter usurpari non debet, quia scilicet tum Ariani, tum etiam Nestoriani hoc loquendi modo utebantur, illi, ut Christum Deum esse negarent, illi, ut personam humanam in eo assererent. Unde in Concilio Ephesino in Ep. ad Nestorium hic loquendi modus rejectus est, sicut in Ep. Adriani I. ad Episcopos Galatiæ, & Hispaniæ, & in Concilio Francofordiensi adversus Elipandum Archiepiscopum Toletanum, qui hac formula loquendi abutebatur.

Eadem ratione Christus Filius Dei adoptivus dici non debet, ut observat S. Th. q. 2. a. 4. siquidem nomine Filii adoptivi connotatur, seu significatur ille, qui est extraneus, ac proinde qui non est Filius Dei naturalis. Unde S. Hilar. l. 3. de Trin. *Hic est, inquit, verus, & proprius Filius origine, non adoptione, veritate, non nuncupatione.*

Secundum est, quoties de hoc mysterio ad populum verba facienda sunt, abstinendum esse ab iis omnibus loquendi modis, qui licet sint veri, possunt tamen aliquo pacto esse piarum aurium offensivi. Omnia enim, quæ dicuntur, ad ædificationem audientium dici debere monet Apost. 1. Cor. 14. Unde quoties de Christo Domino loquendum est, videndum, ne aliquid excidat, quod vel reverentiæ ipsi debitæ, vel hujus mysterii veritati quocunque modo repugnare videatur.

Ex. gr. quamvis propositiones illæ, quibus diceretur Christus minus sapiens, aut minus potens, quam Pater, aut Angelis inferior, veræ sint, si de illo præcise secundum naturam humanam intelligantur, cum & ipse Christus eo sensu de se dixerit, Patrem majorem se esse, & Apostolus eundem dicat modico, quam Angelos minoratum; quia tamen hæc, & similes propositiones in animas audientium aliquam possunt ingenerare cogitationem hujus mysterii veritati, aut reverentiæ Christo debitæ parum consentaneam, ideo ab illis abstinendum est.

3. Tertium est, ab omnibus quoque loquendi modis minus aptis, de quibus aliqua inter ipsos Theologos controversia est, tutius esse omnino abstinere, quam ad ostentationem ingenii, vel doctrinæ iis uti, aut eos, præsertim coram laicis, propugnare velle.

Talis est ista propositio, *Christus est homo Divinus*, quæ quamvis aliquo sensu possit sustineri, cum etiam Verbum ipsum dicatur Verbum Divinum, nihilominus cum aliquam difficultatem hæc denominatio patiatur, videaturque significare, hominem illum, de quo prædicatur, non esse Deum, sed accidentalem tantum habere cum Deo conjunctionem, idcirco melius est ab illa abstinere. Unde S.

Da-



Damascenus l. 3. de Fide c. 12. ob eandem rationem negat, Christum dici debere hominem Deiferum.

Talis est etiam hæc alia propositio, *Homo factus est Deus*, quæ licet aliquo sensu possit esse vera, nimirum, si per illam intelligatur factum esse, ut homo sit Deus, in sensu tamen proprio, & genuino falsa est, ut docet S. Th. sup. ar. 7. significat enim prius hominem extitisse, postea factum esse Deum, quod est prorsus a veritate alienum.

Quartum denique, & ultimum hic observandum est, SS. Patres non semper secundum rigorem Logicum, sed interdum Oratorio more de hoc mysterio locutos fuisse, proindeque a regulis præcedenti Sectione traditis aliquando recessisse, & nomina abstracta pro concretis, & concreta pro abstractis quandoque usurpasse. Unde apud illos propositiones quædam reperiuntur, quæ non tam secundum propriam verborum significationem accipiendæ sunt, quam secundum sensum ab illis intentum, qui semper verus, & orthodoxus fuit.

Quare, cum ex. gr. legitur apud quosdam, carnem Christi fuisse deificatam, sensus est, quod cum homo carne constans vere sit Deus, ejus caro etiam vere est caro Dei, & eo sensu dici potest caro Deificata. Cum autem dicunt, Filium Dei assumpsisse hominem, sensus illorum est, Filium Dei humanam naturam, non vero humanam Personam assumpsisse. Et sic dicendum est de quibusdam aliis propositionibus, quæ passim apud illos occurrere possunt.

## C A P U T IV.

### *De Gratia Christi.*

## S E C T I O I.

### *Qualis fuerit Gratia Christi.*

1. **N**omine Gratiæ hic intelligimus in genere illud, per quod aliquis Deo gratus, & dilectus efficitur, ac proinde justus, & sanctus. Cum autem certum sit, Christum Dominum non solum secundum Divinitatem, sed etiam secundum humanitatem fuisse Deo gratum, ac dilectum, quod & testimonio cœlitus misso tum in ejus Baptismo, tum in Transfiguratione declaratum est) ac proinde justum, & sanctum, ut sæpe in Scripturis vocatur; quæstio est, qua ratione fuerit in quantum homo Deo gratus, ac dilectus, seu per quid humanitas fuerit formaliter sanctificata. Pro cujus resolutione

Dicendum 1. Christi humanitatem sanctificatam fuisse per Gratiæ habitualement ejus animæ infusam.

Probat 1. ex c. 11. Isaiæ, ubi de Christo dicitur, quod *Requiescet*

*scet super eum Spiritus Domini*, quo loco per Spiritum Domini Gratiā habitualementē sanctificantem intelligi docet S. Th. q. 7. a. 1. item ex c. 1. S. Jo. ubi Verbum Incarnatum dicitur *plenum Gratiae, & veritatis, &c., De plenitudine ejus nos omnes accepimus*. Unde sic argumentari licet: Christus plenus fuit illa Gratia, quae ex eo tanquam fonte in nos effluit, & per quam sanctificamur, ut supponimus ex tractatu de Gratia; ergo Christus fuit praeditus, imo plenus Gratia illa habituali sanctificante.

Probatur 2. ex S. Athanasio ser. 2. contra Arianos, ubi de Christo sic loquitur: *Quia ipse ut homo Gratiam accepit, inde etiam factum est, ut nos etiam acceperimus*.

Probatur 3. ratione ducta ex his Apostoli verbis Rom. 8. *Quos praescivit, & praedestinavit conformes fieri imaginis Filii sui*. Ubi enim conformitas sanctitatis est, ibi eadem forma sanctificans debet reperiri; unde sequitur, quod cum inter Christum, & alios justos conformitas illa secundum Apostoli mentem reperiri debeat, sicuti justī per Gratiam habitualementē sanctificantur, sic etiam Christus per eandem dici debeat sanctificatus.

2. Dicendum 2. Christi humanitatem praeterea fuisse quoque sanctificatam per ipsammet Divinitatem, cui unita fuit in Persona Verbi.

Probatur 1. ex cap. 10. Act. ubi S. Petrus dicit, Christum fuisse unctum Spiritu Sancto, quo loco per unctionem S. Aug. l. 16. de Trin. c. 26. intelligit sanctificationem, quasi dicat S. Petrus, Christum ideo fuisse Sanctum, quia ipsamet Divinitate unctus, & sanctificatus fuit.

Probatur 2. ex 6. Synodo generali act. 17. ubi dicitur, voluntatem Christi ideo nihil contrarium Deo velle, quia deificata est, idest sanctificata per Divinitatem, cui unita est.

Probatur 3. ex S. Gregorio Nazianz. orat. 36. n. 93. & 94. ubi dicit, Christum ut hominem esse Divinitate ipsa unctum, id est sanctificatum, nec illam unctionem fieri per aliquam operationem, ut in aliis, qui sanctificantur, sed totius Divinitatis ungentis praesentia. Et S. Damasc. l. 3. de Fide c. 3. ubi sic loquitur: *Ipse Christus seipsum unxit, ungens ut Deus, unctus autem ut homo, unctio autem humanitatis est Divinitas*.

Probatur 4. ex eo, quod actiones humanitatis Christi fuerint infiniti valoris, ut dicetur c. 6. unde sequitur, ipsius sanctitatem fuisse infinitam, quia valor moralis, & meritum actionum fundatur praesertim in sanctitate personae operantis, ut supponimus ex tractatu de Gratia: non potest autem intelligi, quomodo Christus secundum humanitatem fuerit infinite sanctus, nisi in quantum humanitas per ipsammet Divinitatem fuit sanctificata.

3. Dicendum 3. humanitatem Christi a primo instanti suae conceptionis fuisse duobus supra dictis modis sanctificatam.

Fuit

Fuit enim a primo illo instanti Verbo Divino unita, ut ex antedictis constat: unionis autem illius excellentia hoc postulabat, ut anima Christi Gratia illa, & sanctitate habituali donaretur, cum ratione illius unionis a primo illo instanti dignissima esset, cui Gratia illa conferretur.

Quæres 1. an sicut Christus habuit Gratiam habitualement sanctificantem, sic etiam Gratiam actualem excitantem, & adjuvantem acceperit ad actus supernaturales eliciendos, sicut & cæteri homines ex ejus meritis eam accipiunt.

Respondetur negative. Sicut enim Beati in coelo Gratia illa excitante, & adjuvante non indigent, quia clara Dei visio, & ejus perfectus, ac beatificus amor illius sufficiunt ad actus virtutum supernaturalium eliciendos, qui eorum statui conveniunt: sic, cum anima Christi fuerit a primo instanti conceptionis excellentissimo lumine gloriæ prædita, proindeque clara Essentiæ Divinæ visione, ejusdemque amore beatifico dotata, nulla actuali Gratia indiguit ad quosvis virtutum actus exercendos.

Quæres 2. an Gratiæ illæ, quæ gratis datæ vocantur, Christo collatæ fuerint.

Respondetur affirmative. Ratio est, quia hæ Gratiæ maxime aptæ fuerunt ad ea opera exercenda, per quæ ipse Christus generis humani redemptionem perfecit; unde convenientissimum fuit, ut in gradu perfectissimo illi conferrentur.

Quæres 3. an Gratia habitualis Christi aliquod incrementum acceperit.

Respondetur negative. Ratio est, quia Gratia collata fuit Christo a primo instanti conceptionis, intuitu unionis hypostaticæ, ut supra dictum est; illius autem unionis dignitas, & excellentia requirebat, ut in Christo talis gloriæ plenitudo inesset, quæ nullum postea incrementum acciperet. Id etiam præterea constat ex eo, quod Gratia non augetur in statu viæ secundum legem Dei ordinariam, nisi per merita; atqui Christus nihil sibi meruit quoad animam, & perfectiones illi inexistentes, ut infra dicetur. Unde S. Greg. Nazianz. Ep. 1. ad Cledonium paulo post initium exponens illi Fidem Catholicam, sic loquitur, *Si quis Christum ex operibus perfectum esse dixerit, anathema sit*, ex quo loquendi modo patet, hanc veritatem, ut Fide Divina credendam, ab illo propositam fuisse.

Nec his obstat, quod S. Luc. c. 2. dicit, puerum Jesum profecisse Gratia, & sapientia apud Deum, & homines. Ut enim docet S. Th. q. 7. a. 12. ad 3. particulis istis *Sapientia, & Gratia*, non intelliguntur habitus, sed ipsa opera *Sapientiæ, & Gratiæ*, sensusque est, Christum pro ætatis suæ progressu, perfectiora opera sapientiæ, & Gratiæ exercuisse. Solet enim Scriptura (ut monet S. Doctor) opera virtutum nuncupare ipsomet nomine virtutum.

S E-



## S E C T I O I I.

*An in Christo fuerint virtutes , & dona Spiritus sancti .*

1. **Q**Uæstio intelligenda est non de virtutibus intellectualibus , ut sapientia , scientia , de quibus postea , sed de virtutibus proprie dictis , sive moralibus , sive Theologicis . Pro cuius resolutione Dicendum 1. in Christo fuisse omnes virtutes , quæ nullam secum imperfectionem includunt ejus beatitudini repugnantem .

Hoc constat ex eo , quod ( ut docet S. Th. q. 7. a. 2. ) virtutes ab ipsa Gratia tanquam a proprio fonte derivantur ; unde cum in Christo fuerit Gratia perfectissima , sequitur , quod ex illa perfectissimæ etiam virtutes processerint .

Diximus in assertione , *virtutes illas in Christo fuisse , quæ nullam includunt imperfectionem ejus beatitudini repugnantem* . Supponimus enim ( sicut ex dicendis in sequenti capite constabit ) animam Christi fuisse a primo instanti suæ creationis beatam , idest clara , & intuitiva Dei visione præditam . Ex dictis

Sequitur 1. in Christo non fuisse Fidem . Virtus enim illa nullo modo potest cum visione beatifica consistere , ut docet S. Th. ar. 3.

Sequitur 2. in Christo non fuisse spem . Primarium enim illius virtutis objectum est animæ beatitudo nondum obtenta , ut docet S. Th. ar. 4. At Christi anima ( ut dictum est ) a primo instanti suæ conceptionis fuit beata .

Dices , videri Christum utranque virtutem habuisse . De illo enim dixit Isaias c. 11. *Erit Fides cinctorium renum ejus .* & in ejusdem Persona David dixit Psal. 30. *In te Domine speravi .*

Quod attinet ad Fidem , respondetur , Isaiam Prophetam Fidei nomine intelligere fidelitatem in verbis , & promissis , ut explicat S. Hieron. in eum locum .

Quod attinet ad Spem , respondetur , Christum habuisse quidem actum spei respectu gloriæ corporis , quæ est objectum spei secundarium , non tamen ipsam spei virtutem , seu habitum , cum nullum actum circa primarium ejus objectum elicere potuerit . Unde & probabiliter aliqui Theologi dicunt , actum illum spei respectu gloriæ corporis non processisse ab ullo virtutis habitu , sed fuisse actum simplici-ter elicitum ab ipsa Christi voluntate in statu beatitudinis jam posita , talemque actum nobiliorem fuisse , quam si processisset ab anima Christi habitu spei prædita , sed extra statum beatitudinis posita .

Sequitur 3. in Christo non fuisse virtutem poenitentiae , si per illam intelligatur virtus illa specialis , cujus proprius actus sit dolere de peccato a se commisso , Deoque pro illo satisfacere , cum ( ut ex ante dictis constat ) Christus nullum unquam peccatum commise-

rit, vel committere potuerit. Si vero per poenitentiam intelligatur virtus aliqua, cujus actus sit detestari peccatum, a quocunque commissum sit, velleque pro illo satisfacere, ac Divinam offensam compensare, certum est, talem virtutem in Christo fuisse, cum pro peccatis omnium hominum Divinæ Justitiæ satisfecerit, illaque summo odio, & horrore persecutus fuerit.

2. Dicendum 2. in Christo fuisse dona Spiritus sancti. Ita S. Tho. supra ar. 5.

Probatur 1. ex Isa. 11. ubi de Christo dicitur, quod *requiescet super eum Spiritus Domini, Spiritus sapientia, & intellectus, &c.*

Probatur 2. ex eo, quod (ut dicit S. Doct.) per dona Spiritus sancti intelliguntur habitus quidam supernaturales divinitus infusi hominem ad hoc disponentes, ut facillime a Spiritu sancto moveatur ad heroicas quasdam, seu præstantissimas virtutum actiones; constat autem, quod anima Christi facillime, ac perfectissime a Spiritu sancto ad quælibet excellentissima opera movebatur, juxta illud S. Luc. 4. *Jesus autem plenus Spiritu sancto, egressus est a Jordane, & agebatur a Spiritu in desertum.*

Dices 1. hæc dona in Beatis non amplius reperiri, neque enim in cælo fortitudine opus est ad res arduas, & difficiles, quæ illic nullæ sunt, neque consilio etiam opus est, nec timore. Ergo cum Christus a primo instanti conceptionis suæ beatus fuerit, sequitur, quod dona illa non habuerit.

Respondetur 1. Christum non solum beatum, ac comprehensorem fuisse, sed etiam simul viatorem, ac peregrinum, ut docet S. Tho. q. 15. art. 10. ac proinde simul secundum partem superiorem animæ Divina visione, ac fruitione præditum fuisse, simul etiam secundum inferiorem ejusdem animæ portionem iis omnibus difficultatibus, si-ve externis, si-ve internis (si peccatum, ignorantiam. & alios defectus, de quibus supra dictum est, excipias) obnoxium fuisse, quibus alii homines viatores subjacent; proindeque dona illa Spiritus sancti in eo non fuisse inutilia.

Respondetur 2. quamvis hæc dona non maneant in Beatis quoad passionem inferioris partis reprimendas, vel dirigendas, manere tamen in illis quoad ornatum animæ, ac rectitudinem voluntatis, quæ perfectam aptitudinem, ac dispositionem semper retinet ad hoc, ut facillime a Spiritu sancto moveri possit ad quidlibet illi placitum fuerit, ac proinde ea etiam ratione dona illa potuisse in Christo Domino reperiri.

3. Dices 2. donum timoris versari circa malum culpæ, vel poenæ propter admissam culpam; atqui Christus nullo modo peccare potuit.

Respondetur cum S. Th. q. 7. ar. 6. fuisse in Christo timorem Dei, non quidem servilem, qui animam affligeret, sed filialem, qui charitatem accenderet; isque est, quem S. Aug. lib. 14. de Civ. c. 9. vocat timorem castum, quo quis peccatum horret, non sollicitudine necessita-

*tis, sed tranquillitate charitatis.* Unde ( ut recte explicat S. Doctor ) in Christo fuit timor Dei, non prout respicit malum separationis a Deo per culpam, aut malum punitionis pro culpa, sed secundum quod respicit ipsam Divinæ majestatis eminentiam, prout scilicet anima Christi a Spiritu sancto movebatur in Deum affectu quodam singularis reverentiæ. Hunc enim effectum reverentiæ ad Deum Christus, quatenus homo, præ cæteris habuit pleniorē; ideoque attribuit ei Scriptura Isai. 11. plenitudinem timoris Domini.

## C A P U T V.

### *De Scientia Christi.*

## S E C T I O I.

### *Qualis fuerit Scientia Christi.*

1. **S**upponimus tanquam certum, Christum Dominum præter scientiam increatam, & Divinam, quæ illi competebat, in quantum est Deus, habuisse etiam scientiam creatam, in quantum est homo, cum habuerit animam potentia intellectiva præditam, sicut cæteri homines.

Constat 1. ex Scriptura Isa. 11. *Requiescet super eum Spiritus scientiæ, & intellectus.* S. Jo. 13. *Sciens Jesus, quia venit hora ejus.*

Constat 2. ex eo, quod in 6. Synodo generali definitum est adversus Monothelitas, omnia in Christo fuisse duplicia, & sicut duas naturas, sic etiam in eo cujusque naturæ operationes proprias fuisse. Et in Concil. Later. sub Martino I. c. 9. definitum est, Christum assumpsisse animam rationalem cum omnibus proprietatibus, ac per omnia cæteris animabus hominum similem, dempto peccato. Hoc præsupposito,

Dicendum est 1. in Christo fuisse Scientiam beatificam, idest, Christi intellectum illustratum fuisse lumine gloriæ, ac per illud clare Divinam Essentiam, pluresque alias res cognovisse. Ita S. Th. q. 9. ar. 2.

Prob. 1. ex Script. S. Jo. 1. Verbum incarnatum dicitur fuisse *plenum gratiæ, & veritatis.* Si enim Christus habuit plenitudinem veritatis, sicut & gratiæ, sequitur, quod sicut in Gratia super omnes Angelos beatos in hac vita excelluit, sic etiam in cognitione, & scientia; non excelluisset autem, si visionem beatificam non habuisset. Item ex c. 17. S. Jo. *Volo, ut ubi sum ego, & illi sint mecum, ut videant claritatem meam,* quibus verbis Christus Patrem suum pro Discipulis suis orat, postulatque, ut ejusdem gloriæ, qua tunc fruebatur, illos participes reddat; alia autem gloria intelligi non potest, nisi ea, quæ in visione clara Divinæ Essentiæ consistit, quam proinde tunc Christus habuit.

Probatur 2. ex S. Damasc. orat. de Transfiguratione, ubi dicit, illam



Iam Christi Transfigurationem fuisse quandam manifestationem gloriæ, quæ in ejus anima erat.

3. Prob. 3. hac ratione, qua utitur S. Thom. supra: Christus ut homo fuit auctor salutis, ac beatitudinis aliorum ( sicut vocat eum Apost. ad Hebr. 2. ) ergo cum causa effectus sui perfectionem continere debeat, Christus illam beatitudinem habere in se debuit.

Porro ea, quæ diximus ad probandum, Christum in statu viæ scientiam beatificam habuisse, probant etiam, illam habuisse a primo instanti conceptionis, proindeque illum ab eo instanti fuisse beatum. Siquidem jam ab eo instanti fuit plenus gratiæ, & veritatis, fuit etiam auctor salutis cæterorum hominum; & sicut ratione unionis hypostatice Patris æterni naturalis filius fuit, sic etiam heres universæ gloriæ illius, ( ut vocat eum Apost. Hebr. 1. ) ac proinde possessor.

Quamvis autem hæc veritas non sit absolute de Fide ( ut recte observat Isambertus ad qu. 9. disp. 2. ar. 6. ) quia tamen pluribus Scripturæ locis, communique Doctorum consensu innixa est, ideo sententia opposita tanquam temeraria censenda est, ac omnino repudianda.

Dicendum 2. præter scientiam beatificam, duplicem aliam præterea fuisse in Christo scientiam, infusam scilicet, & acquisitam. Ita S. Th. sup. art. 3. & 4.

De scientia infusa constat 1. ex Script. S. Jo. 7. *Mirabantur Judæi, dicentes, quomodo hic literas scit, cum non didicerit?* Colossen. 2. *In quo ( Christo scil. ) sunt omnes thesauri Sapientie, & Scientiæ absconditi.* Constat 2. ex eo, quod si scientiam infusam Christus non habuisset, caruisset aliqua perfectione, qua beati Angeli præditi sunt: illi siquidem ( ut docet S. Aug. l. 11. de Civ. cap. 7. ) duplicem habent de rebus cognitionem, unam, quam vocat matutinam, idest beatificam, alteram, quam vespertinam, idest infusam, & per proprias species. Ergo idem de Christo Domino dicendum est.

De scientia acquisita constat 1. ex Scriptura. Isai. 7. *Ut sciat reprobare malum, & eligere bonum,* quod tanquam de Christo prædictum Patres omnes interpretantur. Heb. 5. *Cum esset Filius Dei, didicit ex iis, quæ passus est, obedientiam.* Constat 2. hac ratione, qua utitur S. Th. ar. 4. Nihil eorum, quæ naturæ nostræ per se competunt, defuit humanitati a Verbo Divino assumptæ; atqui naturæ humanæ per se competit in ipsa rationali anima intellectus agens, sicut & patiens, seu passibilis, ut communiter docent Philosophi; ergo Christus assumpsit animam intellectu tum patiente, tum agente præditam; atqui frustra Christus intellectum agentem assumpsisset, nisi per ipsum aliquid operatus fuisset, operatio autem propria intellectus agentis est species a phantasmatis abstrahere, & sic cognitionem, & scientiam per illas species sic abstractas comparare, quæ scientia dicitur acquisita. Unde sequitur, scientiam illam acquisitam in Christo fuisse.

S E.

## S E C T I O II.

*Ad quasnam res Christi Scientia se extenderit.*

1. **S**ensus quæstionis est, quasnam res Christus Dominus in statu viæ cognoverit per triplicem illam scientiam, quam diximus illum habuisse. Pro cuius resolutione

Dicendum est 1. Christum Dominum per scientiam beatificam perfectius, & clarius vidisse Divinam Essentiam, quam quælibet alia creatura videre possit, atque ideo scientia illa cæteris omnibus beatis, sive Angelis, sive hominibus longe præcelluisse, non tamen Divinam Essentiam comprehendisse, nec comprehendere potuisse.

Prima hujus assertionis pars constat ex eo, quod dicit Apostolus Ephes. 1. Christum a Deo Patre constitutum *ad illius dexteram in celestibus, supra omnem Principatum, & Potestatem, & Virtutem, & Dominationem, & omne nomen, quod nominatur non solum in hoc sæculo, sed etiam in futuro.*

Secunda assertionis pars ex eo constat, quod universim SS. Patres asserunt, nullum intellectum creatum posse Divinam Essentiam comprehendere, ut S. Basilus lib. 1. contra Eunom. S. Aug. Epist. 112. & plures alii, quod proinde intelligendum est etiam de humano Christi intellectu. Cujus rei ratio est, quia nullus intellectus creatus cognoscere potest omnes effectus possibiles Divine omnipotentie, cum sint infiniti, nullus etiam intellectus creatus cognoscere potest ipsam Divinam Essentiam eo perfectionis gradu, quo est a seipsa cognoscibilis.

2. Dicendum 2. Christum Dominum per illam scientiam beatificam cognovisse omnia, quæcunque Deus cognoscit scientia, ut vocant, visionis; hoc est, omnia quæcunque actu sunt, fuerunt, vel futura sunt, ac proinde omnes, & singulos homines, ac singulas cujusque actiones, cogitationes, volitiones, cum omnibus circumstantiis. Ita S. Thom. q. 10. ar. 2.

Quod probat ex eo, quod unusquisque Beatus in Essentia Divina clare visa cognoscat omnia, quæ ad ipsum spectant; ad Christum autem, & ad ejus dignitatem, quodammodo spectant omnia, in quantum omnia sunt ei subjecta, & præterea, quia in quantum homo constitutus est a Deo omnium iudex; est autem proprium judicis ea cognoscere, de quibus ferre judicium debet.

Objicies, Christum diem extremi Judicii non cognovisse, ut ipsemet testatur S. Mar. 13. n. 32.

Respondetur, SS. Patres duplicem illius loci afferre explicationem.

Quidam enim (ut S. Athan. orat. contra Arianos, S. Greg. Nazianz. orat. 4. de Theologia) explicant, Christum Dominum, quatenus homo erat, naturali cognitione diem judicii nescisse, alii

( ut S. Basilius lib. 1. contra Eunomium, S. Ambros. lib. 5. ad Gratian. c. 8. S. August. lib. 1. de Trin. c. 12. S. Hieron. in c. 24. S. Matth. & S. Greg. l. 1. Regist. Ep. 42. ) volunt, Christum dixisse, nescire se illum diem, subintelligendo, ut Apostolis declararet.

3. Dicendum 3. Christum Dominum per scientiam infusam perfecte cognovisse omnia, sive naturalia, sive supernaturalia, quæ ab homine, vel ab Angelo cognosci possunt, ac proinde omnia mysteria, omnes scientias tam speculativas, quam morales, omnia denique naturaliter, vel supernaturaliter scibilia.

Hoc constat tum ex verbis Apostoli dicentis, in eo reconditos esse thesauros omnes sapientiæ, ac scientiæ, tum etiam ex eo, quod omnimoda illa scientia competebat Christo, in quantum caput erat tam hominum, quam Angelorum, ut infra diceretur; in capite siquidem præ cæteris membris vigere debent omnes sensus.

Dicendum 4. Christum Dominum per scientiam acquisitam ea omnia cognovisse, quæ ab homine naturaliter per lumen intellectus agentis cognosci possunt. Ita S. Thom. q. 12. a. 1.

Quod probatur ex eo, quod nihil imperfectum fuit in Christo quantum ad animam; fuisset autem imperfecta hæc ejus scientia, si secundum eam non scivisset omnia, quæ per illam sciri possunt.

Observandum est autem, Christum Dominum hanc scientiam acquisitam non habuisse ab instanti conceptionis, ut docet S. Doct. ar. 2. sed illam acquisivisse brevissimo aliquo temporis spatio, idque ob admirabilem ingenii præstantiam, illum tamen ( ut recte monet idem S. Doct. a. 3. ) nihil unquam ab ullo vel homine, vel Angelo didicisse, sed per proprii ingenii virtutem scientiam illam ex rebus ipsis hausisse. Cum enim & hominum, & Angelorum caput esset, ejus dignitati non congruebat, ut quidquam ab aliis addiceret.

Objicies, constare ex Evangeliiis, quod Christus Dominus homines aliquando interrogavit, & multa ab iis quæsit.

Respondit S. Doct. a. 3. ad 1. Christum Dom. homines aliquando interrogasse, non ut aliquid addiceret, sed ut interrogatos erudiret.

## C A P U T VI.

*De voluntate, & merito Christi.*

### S E C T I O I.

*An Christi voluntas fuerit libera.*

1. **S**upponimus, in Christo Domino fuisse non solum Divinam, sed humanam voluntatem; sive nomen voluntatis sumatur pro facultate volendi, sive pro ipso actu volendi.

Pri-



Primum enim constat ex eo, quod in Christo D. fuit natura integra, & perfecta. Est autem de integritate, & perfectione naturæ humanæ, cum intellectualis sit, ut volendi facultate prædita sit.

Secundum etiam patet ex eo, quod de ratione ipsius facultatis volendi sit, ut actus sibi proprios, & connaturales elicere queat.

Utrunque autem tanquam Fide certum definitum fuit contra Monothelitas, unam tantum in Christo voluntatem (Divinam scilicet) admittentes, & humanam negantes, in 6. Concilio Generali, act. 4. & 8. in Epist. Agathonis Papæ ibidem lecta, & recepta, & in Concilio Lateran. sub Martino I. consult. 5.

2. Hac igitur veritate supposita, quæritur, an voluntas humana Christi fuerit libera. De Divina enim jam egimus tract. 2. c. 4. sect. 3. Pro cuius resolutione

Dicendum est, Christi Domini voluntatem fuisse vere, & perfecte liberam. Est de Fide, & constat 1. ex Scripturis. Isa. 7. prædicit Propheta de Christo, quod *sciet reprobare malum, & eligere bonum*; atqui electio est actus proprius liberæ voluntatis, ut docet S. Tho. 3. p. q. 18. art. 4. ubi hunc locum Isaie ad probationem hujus veritatis adhibet. Item c. 53. ejusdem Prophetæ dicitur de Christo, quod *oblatus est, quia ipse voluit*. Et ipse Christus Dominus dicit S. Jo. 10. *Nemo tollit animam meam a me, sed ego pono eam a me ipso, & potestatem habeo ponendi eam, & potestatem habeo iterum sumendi eam*.

Probatur 2. hac ratione. Christus Dominus præsertim per obedientiam suam perfecit opus nostræ redemptionis, Rom. 5. ubi Apostolus dicit, per Christi obedientiam homines esse justificados; atqui perfecta obedientia sine voluntatis libertate esse non potest, juxta quod dicit S. Aug. Ep. 46. *Nullam posse sine arbitrio libero esse obedientiam*, unde sequitur, Christi voluntatem fuisse perfecte liberam.

Objicies, Christum Dom. ut supra diximus, non potuisse peccare, ex quo sequitur, illum in exequendis iis, quæ sibi a Patre imperata fuerunt, liberum non fuisse. Si enim liber fuisset, potuisset illa non facere, ac non faciendo peccare. Hæc objectio gravem continet difficultatem, an scilicet, & qua ratione Christi libertas cum ejus impeccabilitate conciliari possit.

3. Omissis autem variis Theologorum ad hanc objectionem responsionibus, omnium probabilissime loqui videntur illi, qui dicunt, quod, quamvis Christus Dominus ratione suæ impeccabilitatis liber non fuerit ad observanda, vel non observanda in genere præcepta sibi a Deo Patre imposita, e. g. præceptum illud affirmativum, quo ad genus humanum per mortem suam redimendum obligabatur; liber tamen fuit ad illud observandum, vel non observandum, in specie, vel in individuo: id est, quod quamvis mandato illo divinitus accepto liberum illi non fuerit in genere mortem acceptare, vel non acceptare, liberum tamen illi fuit mortem acceptare tali hora, vel

momento temporis serius, vel citius, liberum item ei fuit illam acceptare cum tali charitatis ardore, vel intentione majori, vel minori, item ex motivo talis virtutis, v.g. religionis, obedientiæ, patientiæ, fortitudinis, & similium. Unde sequitur, illam mortis acceptationem Christo Domino fuisse simpliciter & absolute liberam, non solum quoad ejus circumstantias, sed etiam quoad ipsius actus substantiam, non modo numericam, sed etiam specificam. Non enim est idem numero secundum substantiam voluntatis actus intensus, ac remissus, multoque minus actus elicited ex proprio motivo alicujus virtutis, & ex proprio alterius diversæ speciei; cum utriusque actus entitas seu substantia non modo numerice, sed etiam specificè diversa sit. Et quamvis externa mortis, & tormentorum perpassio sit eadem secundum physicam suam entitatem, quocunque ex actu voluntatis, sive intenso, sive remisso, & quocunque ex formali motivo acceptetur; nihilominus in genere moris diversa prorsus est pro diversitate actus voluntatis, per quam acceptatur, nec quidquam bonitatis moralis, aut meriti habet, nisi dependenter ab interno voluntatis actu. Unde sequitur, acceptationem, ac perpassionem mortis in Christo fuisse illi omnino liberam, quæ tamen libertas nullam cum ejus impeccabilitate repugnantiam habuit. Et sic dicendum est de aliis ejus actibus.

## S E C T I O II.

*Qua ratione Christi voluntas libera fuerit.*

1. **N**on est opus hic ea repetere, quæ tractatu 2. cap. 4. sect. 3. dicta sunt, ubi observavimus, de triplici libertate apud sanctos Patres fieri mentionem, nempe de libertate Naturæ, Gratiæ, & Gloriæ. Quæstio autem proposita intelligenda non est de libertate Gratiæ. Constat enim ex antedictis, Christum Dominum a peccato fuisse perfecte liberum. Nec de libertate Gloriæ, cum a primo instanti conceptionis ipsam acceperit, quamvis illa quoad corpus, & partem animæ inferiorem in hac vita fructus non fuerit. Quærimus igitur hic solum de libertate naturæ, qua ratione Christi voluntas perfecta naturæ libertate prædita fuerit. Quod ut evidentius fiat,

Supponimus id, quod loco citato a nobis dictum est, libertatem scilicet naturæ in eo consistere, quod voluntati non solum nulla coactio, sed neque etiam ulla necessitas inferatur, ac ipsa voluntas libera prorsus, & indifferens relinquatur tam quoad exercitium, quam quoad specificationem sui actus. Quamvis autem hoc ibi a nobis auctoritate SS. Ambr. Hieronymi, August. & Bernardi obiter probatum sit, quia tamen hæc veritas maximi momenti esse censetur, & ex illa tanquam ex certo principio plurimæ aliæ Theologicæ conclusiones dependent, idcirco illam hic denuo

2. Probamus 1. auctoritate Scripturæ, 1. Cor. 7. n. 37. ubi Apostolus lo-

loquens de servanda virginitate, expressis verbis dicit, hominem *non habere necessitatem, sed potestatem habere suæ voluntatis*, ubi potestatem volendi opponit necessitati volendi. Eccles. 15. n. 15. ubi dicitur, *Deum reliquisse hominem in manu consilii sui, apposuisse illi ignem, & aquam, vitam, & mortem, bonum, & malum, ut ad quod voluerit, porrigat manum suam, & quod placuerit ei, detur illi*. Quem locum Patres Conc. Senonensis tractarunt anno Dom. 1528. adversus hujus temporis Hæres. tunc exortas congregati in decreto Fidei de homine in statu naturæ lapsæ, & per Christum reparatæ, ubi expresse contra præfatos Hæretic. definiunt, *Liberum in utramvis partem esse hominis arbitrium*.

Probamus 2. auctoritate Concilii Tridentini sess. 6. c. 5. ubi dicitur, quod tangente Deo cor hominis per Spiritus sancti illuminationem, is qui recipit inspirationem, possit eam abjicere, si velit. & can. 4. definitur, hominem Gratiae posse dissentire, si velit. Ex quibus Concilii verbis Guillelmus Estius in dist. 24. §. 1. Gabriel Pennotus lib. 1. c. 6. & alii Doctores efficaciter probant, non solum coactionem, sed etiam necessitatem libertati naturali hominis esse contrariam. Et certe, quando idem Concilium can. 5. anathema dicit in eos, qui asserunt, per peccatum Adæ liberum hominis arbitrium fuisse amissum, & extinctum, non alios haud dubie intelligit, quam Lutherum, Calvinum, & eorum asseclas, in quos ille canon directus est, qui tamen non aliter liberum hominis arbitrium amissum, & extinctum esse dicunt, nisi quia cum in creatione homo accepisset indifferentem ad utrumlibet arbitrii facultatem, illam per peccatum amisit, ita ut quamvis in hoc statu, in quo nunc est, non agat coacte, necessario tamen agat.

Probamus 3. auctoritate Summorum Pontificum Pii V. & Gregorii XIII. qui in Bulla contra Michaellem Bajum edita has ejus proposuit. damnarunt: *Quod voluntarie fit, etiamsi necessario fiat, libere tamen fit: & Sola violentia repugnat libertati hominis naturali. & Homo peccat etiam damnabiliter in eo, quod necessario facit*. Quæ quidem Bulla denuo Urbani VIII. auctoritate confirmata, & publicata est.

Probamus 4. auctoritate almæ Facultatis Sorbonicæ, quæ in decreto suo anno Dom. 1560. edito, has, quæ sequuntur, propositiones tanquam falsas, & hæreticas damnavit: *Liberum hominis arbitrium non habet potestatem ad opposita. & Libertas, & necessitas eidem conveniunt respectu ejusdem. item Liberum arbitrium libere vult id, quod necessario vult. & Homo necessario peccat etiam damnabiliter in aliqua specie peccati*.

3. Probamus 5. auctoritate S. Th. in quæst. disputatis de Malo q. 6. art. 1. ubi sic loquitur. *Dicendum, quod quidam posuerunt, quod voluntas hominis ex necessitate movetur ad aliquid eligendum, nec tamen ponebant, quod voluntas cogeretur. Non enim omne necessarium est violentum, sed solum cujus principium est extra. Hac autem opinio est hæretica. Tollit enim rationem meriti, & demeriti in humanis actibus*.

Ex quibus cum evidenter constet, libertatem naturalem hominis



requirere non solum exemptionem a coactione, sed etiam a necessitate, in eoque consistere, ut possitis omnibus ad agendum prærequisitis, homo semper maneat indifferens ad agendum, vel non agendum, ad hoc, vel illud agendum; consequenter dicendum est, cum Christus Dominus naturam humanam omnibus suis facultatibus, ac proprietatibus instructam assumpserit, proindeque voluntatem ejusdem conditionis cum cæteris hominibus, illius libertatem naturalem in eo sitam fuisse, quod ab omni non solum coactione, sed etiam necessitate fuerit exemptus, potueritque pro libito agere, vel non agere, hoc, vel illud agere. Quod tamen intelligendum est respectu actionum bonarum. Libertas enim illa, quæ nobis est ad faciendum malum repudiato bono, in Christo non fuit propter ejus impeccabilitatem; quod tamen non obstat, quin vere, & perfecte liber fuerit. Ut enim recte dicit S. Th. in q. disp. de verit. q. 22. ar. 6. *Velle malum non est libertas, nec pars libertatis, quamvis sit quoddam signum libertatis.*

## S E C T I O I I I.

*An, & qua ratione Christi actiones fuerint meritorie.*

1. **D**icendum 1. Christi Domini actiones humanas vere, & proprie fuisse meritorias. Ita S. Th. q. 19. art. 3. Est de Fide.

Probat 1. ex Scriptura, in qua dicitur, redemptionem nostram, ac peccatorum nostrorum remissionem ex Christi sanguine, hoc est, ex passionis ejus, ac mortis merito procedere. Ad Coloss. 1. *In quo habemus redemptionem, & remissionem peccatorum.* Apoc. 5. *Redemisti nos Deo in sanguine tuo.*

Prob. 2. ex Conc. Trid. sess. 6. cap. 7. ubi dicitur, *Nostræ justificationis causam meritoriam esse Dominum nostrum Jesum Christum, qui, cum essemus inimici, propter nimiam charitatem suam, qua dilexit nos, sua sanctissima Passione in ligno Crucis nobis justificationem meruit, & pro nobis Deo Patri satisfecit.*

Probat 3. hac ratione. Omnes conditiones ad meritum requisitæ in actionibus Christi Domini reperiuntur; ergo fuerunt meritorie. Probat 4. antecedens, quia conditiones ad meritum requisitæ (ut supponimus ex tractatu de Grat.) sunt hæ, quæ sequuntur: prima, ut actio sit libera, secunda, ut sit honesta, seu bona moraliter, tertia, ut sit a persona grata Deo, & iusta, quarta, ut exerceatur in statu viæ, quinta denique ut pactum intercedat ex parte Dei de præmio reddendo pro tali actione. Atqui hæ conditiones in actionibus Christi reperiuntur. Fuerunt enim libere, ut præcedenti Sectione probatum est, fuerunt honestæ, & bonæ, quod Christus ipse declaravit S. Jo. 8. *Ego, quæ placita sunt ei, facio semper*, fuerunt a persona Deo grata, quod & ipse Deus Pater in Baptismo, & Transfiguratione Christi testatus est, fuerunt factæ in statu viæ,

viæ, cum Christus fuerit simul viator, & comprehensor; pactum denique intercessit ex parte Dei Patris, juxta illud Isa. 53. *Si posueris pro peccato animam suam, videbit semen longævum, & voluntas Domini in manu ejus dirigetur.*

2. Dicendum 2. Christi Domini actiones fuisse infiniti valoris ad merendum.

Probatur 1. ex dictis supra c. 1. sect. 6. ubi probavimus, Christi Domini actiones fuisse valoris infiniti ad satisfaciendum. Rationes enim, quæ probant de uno, probant etiam de altero.

Probatur 2. auctoritate Clementis VI. Summi Pontificis in Extravagante, quæ incipit *Unigenitus*, de poenitentia, & remissionibus, ubi dicit, *Christum Dominum acquisivisse Ecclesiæ thesaurum infinitum, constantem suis meritis, & operibus satisfactoriis, &c. & non esse aliquatenus formidandum de corruptione, seu imminutione hujus thesauri, propter infinita ejus merita.*

Quæres, quando meritum Christi Domini inceperit, quanto tempore duraverit, & quando desierit.

Respondetur 1. Christi meritum incepisse a primo instanti suæ conceptionis. Ita S. Thom. qu. 34. a. 3.

Constat ex c. 10. ad Hebr. ubi refert Apostolus, Christum ingredientem in hunc mundum dixisse, *Ecce venio, ut faciam, Deus, voluntatem tuam*: & postea subjungit, *in qua voluntate sanctificati sumus*. Ex quo sic possumus argumentari: Ille actus Christi est meritorius, in quo sumus sanctificati; atqui in primo instanti conceptionis (tunc enim in hunc mundum ingressus est, ut explicat S. Th. in illum locum Apostoli) actum submissionis, & obedientiæ erga Deum Patrem elicuit, in quo sanctificati sumus; ergo a primo instanti conceptionis mereri incepit.

Respondetur 2. Christum Dominum toto vitæ suæ tempore, continuo, & sine ulla intermissione omnibus actionibus suis meruisse.

Constat ex supra relatis Christi verbis, quibus dixit, se, quæ placita erant Patri suo, fecisse semper, deinde ex eo, quod Christus Dominus potuit quovis tempore tam somni, quam vigiliæ mereri per actus internos elicitos independentes a sensibus, ratione scientiæ infusæ, si autem potuit, cum ejus charitas esset perfectissima, non est dubitandum, quin fecerit. Unde SS. Patres illum etiam ipsius infantiæ tempore meruisse asserunt, ut S. Ambr. l. in S. Luc. *Me, inquit, illius infantiæ vagientis abluunt fletus, mea lacrymæ illæ delicta laverunt.*

Respondetur 3. Christum Dominum a momento suæ mortis mereri desisse. Ita S. Th. q. 19. a. 3. ad 1. ubi dicit, ex quo Christus viator esse desit, illum non amplius fuisse in statu merendi.

Ratio est, quia Christus per passionem in Cruce merita sua omnia consummavit, ut ipsemet testatus est, cum antequam ultimum spiritum emitteret, dixit, *Consummatum est.*

3. Objicies 1. frustra fieri per plura, quod potest per pauciora; atqui  
Chri-

Christus per unicam actionem potuit nobis peccatorum remissionem, & salutem promereri; ergo frustra videntur tot ejus merita fuisse multiplicata.

Respondetur, verissimum esse unicam Christi actionem ad universum genus humanum redimendum fuisse sufficientissimam, cum fuerit infiniti valoris, ac meriti; illum tamen non frustra pro nobis tot, & tanta facere, ac pati voluisse, tum ut excessum infinitum suæ erga nos charitatis ostenderet, tum ut magis, ac magis Patrem suum meritis suis glorificaret, tum ut præceptum sibi a Patre de redimendis hominibus impositum quam perfectissime adimpleret.

4. Observandum tamen est, quamvis Christus quacunque actione sua nobis vere, ac de facto meruerit omnia, & singula Gratiæ, & Gloriæ dona, nihilominus non meruisse, nisi respective ad mortem crucis, ita ut singula ejus merita per mortem compleri, & consummari deberent: non sane, quod aliter fieri non posset, cum vel minima Christi actio propter infinitam Divini Suppositi dignitatem per se ad redimendos mille mundos plusquam sufficeret; sed quia ab æterno definitum fuerat, ut redemptio nostra non aliter compleretur, quam per Christi mortem, ac passionem. Unde Is. c. 53. de illo prædixerat, *Si posuerit pro peccato animam suam, videbit semen longævum*. Et ipse Christus sæpe in Evangelio de passione sua, tanquam de re prædefinita divinitus ad generis humani redemptionem locutus est, ut Marc. 8. *Cæpit docere eos, quoniam oportet, Filium hominis pati multa, & occidi*. & S. Joan. 12. de passione, ac morte sua loquens (ut explicat S. Aug. tract. 31. in S. Jo.) *Nisi granum frumenti cadens in terram mortuum fuerit, ipsum solum manet, si autem mortuum fuerit, multum fructum affert*.

Objicies 2. Christum Dominum per vulnus illud, quod post mortem accepit, meruisse, cum plures Sancti Patres doceant, ex ipsius latere Sacramenta Ecclesiæ fluxisse.

Respondetur, vulnus illud fuisse meritorium, non pro illo instanti, quo inflatum est, sed ratione temporis præcedentis, quo Christus adhuc vivens illud præviderat, & ultro, ac sponte acceptaverat, imo etiam Deo Patri pro nostra salute obtulerat.

## C A P U T IV.

*Quid Christus Dominus sibi, & quid nobis meruerit.*

1. **D**icendum 1. Christum Dominum sibi gloriam corporis, & nominis exaltationem promeruisse. Ita S. Th. q. 9. a. 3. Constat ex Script. S. Luc. 24. *Oportuit Christum pati, & ita intrare in gloriam suam*. Phil. 2. *Humiliavit semetipsum, factus obediens usque ad mortem, &c. propter quod & Deus exaltavit illum*. In quem locum S. Chrys. *Extremam, inquit, Christus præstitit obedientiam, & propterea accepit supremam hono-*



*honorem. & S. Aug. tract. 10. in S. Jo. Humilitas claritatis est meritum, & claritas humilitatis est premium.*

Dicendum 2. Christum Dominum nec Gratiam, nec visionem beatificam, nec unionem hypostaticam sibi meruisse. Ita S. Th. loc. cit.

Quod probat ex eo, quod meritum non sit, nisi ejus, quod nondum habetur; unde si Christus ista meruisset, sequeretur, quod aliquando iis caruisset, quod tamen falsum est, ut ex ante dictis constat.

Dicendum 3. Christum nobis meruisse salutem æternam per media convenientia consequendam, & omnia illa media, quæ ad illam consequendam aut necessaria sunt, aut utilia.

Probatur universim ex his Apostoli verbis ad Ephes. 1. ubi dicit, quod *Deus benedixit nos in omni benedictione spirituali in cœlestibus, in Christo.*

In particulari autem Christum nobis meruisse vitam æternam, constat Rom. 6. *Gratia Dei Vita æterna in Christo Jesu Domino nostro.* Et S. Jo. 3. dicitur, Deum dedisse Filium suum, ut omnis, qui credit in ipsum, non pereat, sed habeat vitam æternam.

2. Quod autem spectat ad media, cum illa plura, & diversa sint, ex ordine per singula discurremus.

In primis Christus nobis meruit Gratias omnes actuales, quæ peccatorum remissionem antecedunt, & per quas ad illam disponimur, ut constat ex Conc. Trid. sess. 6. c. 5. ubi declarat. *Justificationis exordium in adultis a Deo per Jesum Christum præveniente Gratia sumendum esse, hoc est, ab ejus vocatione, qua nullis eorum existentibus meritis vocantur.*

Præterea Christus meruit nobis remissionem omnium, & quorumcunque peccatorum, tam actualium, mortalium, & venialium, quam originalis. Hoc constat ex Scriptura. 1. S. Jo. 1. *Sanguis Jesu Christi emundat nos ab omni peccato.* Et ex Conc. Trid. supra c. 7. ubi dicitur, neminem justificari posse, nisi per merita passionis Christi Domini. Ubi observandum est (quod Concilium fuse explicat) Christum Dominum eatenus nobis remissionem peccatorum meruisse, quatenus Sacramenta, & alia media, quibus illam remissionem consequimur, nobis promeritus est.

Eodem etiam sensu dicere debemus, Christum Dominum remissionem poenarum omnium nostris peccatis debitarum nobis promeruisse, quatenus nobis media omnia promeruit, per quæ poenarum illarum indulgentiam, ac remissionem accipimus, aut pro illis satisfacimus. Unde Con. Trid. sess. 14. c. 8. dicit, omnem nostram sufficientiam ad satisfaciendum esse a Christo, nos in illo satisfacere, & facere fructus dignos poenitentiae, qui ex illo vim habent.

3. Ipsam præterea animæ sanctitatem, quæ formaliter consistit in Gratia habituali nobis inhærente, ac ejus quodcunque augmentum, vim etiam illam, & virtutem merendi, quæ per illam Gratiam operibus nostris inest; dona item Spiritus sancti, virtutes infusas, & omnia  
alia

alia quæcunque Gratiarum genera, & Divinæ largitatis munera tam interna, quam externa, quæ ad æternam salutem conducunt, finalem denique perseverantiam, Christi Domini meritis adscribere debemus. Hoc constat ex Scriptura, Rom. 8. ubi dicitur, Deum nobis omnia cum Christo donasse. Huc etiam pertinet id, quod Christus dixit S. Jo. 15. *Ego sum vitis, vos palmites, qui manet in me, & ego in eo, hic fert fructum multum, quia sine me nihil potestis facere.* Quæ verba expendens Conc. Trid. sess. 6. c. 16. dicit, *Christum Dominum tanquam caput in membra, & tanquam vitem in palmites, in ipsos justificatos jugiter virtutem influere, quæ virtus bona illorum opera semper antecedit, & comitatur, & subsequitur.*

Denique Christus Dom. ipsam nobis prædestinationem promeruit, ut constat ex eo, quod dicit Ap. Ephes. 1. *Elegit nos in ipso ante mundi constitutionem, ut essemus sancti; & eod. cap. Prædestinavit nos in adoptionem filiorum per Jesum Christum.* Et certe cum Christus prædestinatis meruerit omnia dona supernaturalia a prima vocationis Gratia usque ad ultimam Gloriæ consummationem, ut supra dictum est, Deusque dona illa omnia, non nisi intuitu meritorum ipsius Christi, ab æterno illis præparaverit; ex consequenti dici debet, prædestinationem ipsam ex ejus meritis esse, cum juxta S. Aug. lib. de bono persever. c. 14. prædestinatio nihil sit aliud, quam *Præscientia, & preparatio beneficiorum Dei, quibus certissime liberantur, quicunque liberantur.*

4. Quæres, an Christus etiam Angelis Gratiæ, ac Gloriæ donæ promeritus sit.

Respondetur affirmative. Quamvis enim id aliqui Doctores negent, probabilius tamen est, quod meritorum Christi virtus, & efficacia etiam ad beatos illos Spiritus se extendat. Et hoc constare videtur ex Ap. ad Ephes. 1. ubi dicit, Christum Dominum esse caput supra omnem Principatum, & Potestatem, & Virtutem, & Dominationem, & adimplere omnia in omnibus: unde sequitur, omnes Grantias, & omnia dona supernaturalia ab ipso, tanquam a capite, non solum in universam hominum Ecclesiam, sed etiam in omnes beatorum illorum Spirituum Hierarchias derivari. Accedit auctoritas S. Bern. ser. 22. in Cant. ubi dicit, quod ille (Christus scilicet) *qui hominem lapsum erexit, Angelo stanti, ne laberetur, dedit, sic illum ex captivitate eruens, sicut hunc a captivitate defendens, & hac ratione fuit utrique redemptor, solvens illum, & servans istam.*

## S E C T I O V.

*An, & qua ratione Christi merita omnibus hominibus applicentur.*

1. **N**otandum est 1. meritum Christi, & ejus applicationem distinguui inter se, ut recte observat Isambertus ad q. 1. disp. 6. art. ult. sicut pretium depositum ad emendam domum sufficiens, & ejus

& ejus emptio, seu illius pretii solutio differunt. Meritum enim Christi se habet ut pretium sufficiens ad homines redimendos, applicatio vero ut illius pretii solutio.

Notandum 2. applicationem meritorum Christi duplici modo posse considerari, active scilicet, & passive, seu prout se tenet ex parte ipsius Christi, in quantum ipse per aliquos actus suæ voluntatis merita sua ordinavit, & applicavit ad salutem hominum procurandam: vel prout se tenet ex parte ipsorum hominum, quatenus merita Christi de facto ipsis communicantur, & eorum effectus ab ipsis reipsa percipiuntur. His prænotatis, pro quæstionis propositæ resolutione

Dicendum 1. Christi Domini merita non tantum ex se sufficientia, & condigna fuisse ad totius generis humani redemptionem, sed ab ipso ad hunc finem fuisse Deo Patri oblata, sicque Christum Dominum vere pro omnibus hominibus redimendis mortuum esse, ac vere ipsis, quantum ex se fuit, merita passionis, ac mortis suæ applicavisse.

Probatur 1. ex Scriptura. ad Tim. 2. *Unus mediator Dei, & hominum, homo Christus Jesus, qui dedit semetipsum redemptionem pro omnibus. Et c. 4. Speramus in Deum vivum, qui est Salvator omnium hominum, maxime Fidelium.* 2. Cor. 5. *Christus pro omnibus mortuus est.* Ephes. 5. *Christus dilexit nos, & tradidit semetipsum pro nobis oblationem, & hostiam Deo.* 1. Jo. 2. *Si quis peccaverit, advocatum habemus apud Patrem Jesum Christum justum, & ipse est propitiatio pro peccatis nostris, non pro nostris tantum, sed etiam pro totius mundi.*

Probatur 2. ex Conc. Arelatensi, in quo approbata est Epist. Faustini adhuc nomen Catholicum profitentis, ubi anathema profertur in eum, qui dixerit, quod Christus non sit mortuus pro omnibus. Et ex Conc. Trid. sess. 6. c. 3. ubi Concilium expressis verbis dicit, Christum Dominum pro omnibus mortuum esse, quamvis non omnes beneficium mortis ejus recipiant.

2. Probatur 3. ex SS. Patribus, qui id ipsum unanimi consensu asserunt. S. Basil. in Ps. 48. *Inventum est unum pro omnibus simul hominibus dignum pretium, nempe sanctus, & omni pretio superior pretiosus sanguis Domini nostri Jesu Christi, quem pro nobis omnibus effudit.* S. Greg. Nazianz. orat. 2. in Pascha, vocat Christi Domini passionem, & mortem, non exiguae cujusdam partis orbis terrarum, sed totius mundi expiationem nunquam intermorituram. S. Chrys. ho. 7. in 1. Ep. ad Tim. explicans hæc Apost. verba sup. cit. *Qui dedit semetipsum redemptionem pro omnibus. Quid ergo, inquit, & pro Gentilibus? ita Christus etiam pro Gentilibus mortuus est. Et quo pacto, inquires? illi non crediderunt, quia noluerunt, quod erat partium ipsius, impletum est.* S. Cyril. l. 4. in S. Jo. explicans illa Christi verba, *Panis, quem ego dabo, caro mea est pro mundi vita: Crucifixus est, inquit, Christus pro omnibus, & propter omnes, ut uno pro omnibus mortuo, omnes in ipso vivamus.* S. Ambr. in Ps. 118. explicans hunc versiculum, *Miseri-*



*sericordia Domini plena est terra: Sol, inquit, justitiæ omnibus ortus est, omnibus venit, omnibus passus est, omnibus resurrexit. Si quis autem non credit in Christum, generali beneficio ipse se fraudat, ut si quis clausis fenestris radios Solis excludat; non enim ideo Sol non est ortus omnibus, quia calore ejus se fraudavit. S. Hier. Ep. 38. ad Oceanum, Mentitur, inquit, Joannes Baptista digito Christum, & voce demonstrans, ac dicens, Ecce Agnus Dei, ecce qui tollit peccata mundi, si sunt adhuc in sæculo, quorum peccata Christus non sustulerit. S. Aug. in Ps. 56. Vendere se potuerunt homines, sed redimere non potuerunt, venit Redemptor, & dedit pretium, fudit sanguinem suum, & emit orbem terrarum. Quæritis, quid emerit? videte, quid dederit, & invenietis, quid emerit. Sanguis Christi pretium est. Tanti quid valet? quid, nisi totus orbis? quid, nisi omnes gentes? S. Leo Papa ser. 1. de Nativ. Christus, sicut nullum a reatu liberum reperit, ita pro liberandis omnibus venit. S. Bern. in Psal. Qui habitat: Sicut possunt omnia dicere Christo, Creator meus es tu, sic possunt omnes homines eidem dicere, Redemptor meus es tu. His addimus beatæ memoriæ Franciscum Salesium Genevensem Episcopum, in tractatu de Amore Divino lib. 5. c. 5. ubi fuse eandem veritatem docet, & probat.*

Observandum est autem, in iis Scripturæ, & SS. Patrum testimoniis duo præsertim dici. Primum est, Christum Dominum semetipsum dedisse, tradidisse, obtulisse, &c. quæ verba significant actum voluntatis, quo Christus Dominus, quantum ex ipso fuit, passionis, ac mortis suæ merita applicavit. Secundum est, hanc traditionem, & oblationem factam fuisse pro omnibus hominibus, pro peccatis totius mundi, quod nihil aliud significat, quam Christum Dominum meritorum suorum valorem, quantum in ipso fuit, applicasse non solum prædestinatis, sed generatim omnibus omnino hominibus sive prædestinatis, sive reprobis, sine ulla exceptione.

3. Probatur 4. hac ratione. Pro iis omnibus mortuus est Christus, qui per Adami peccatum perierunt, & mortui sunt; atqui omnes homines per Adami peccatum mortui sunt; ergo pro omnibus hominibus mortuus est Christus. Minor certa est. Major probatur ex eo, quod dicit Apost. 2. Cor. 5. *Si unus pro omnibus mortuus est, ergo omnes mortui sunt*, ubi infert, omnes per Adæ peccatum mortuos esse, ac periisse, quia Christus pro omnibus mortuus est. Quo etiam argumento utitur S. Aug. l. 6. cont. Julian. c. 11. ubi probat, omnes etiam parvulos per peccatum originale mortuos esse, ex eo, quod Christus pro omnibus mortuus est. Quod argumentum nullum foret, si existerent, pro quibus Christus mortuus non esset.

Neque dicas, S. Aug. & alios SS. Patres eatenus solum velle, Christum pro omnibus mortuum esse, quatenus mortis, ac passionis ejus meritum ad omnes redimendos sufficiens fuit.

Respondetur 1. quod manifeste patet, hanc explicationem nullo modo

modo congruere cum verbis Sanctorum Patrum supra relatis.

Respondetur 2. quod si hoc esset, inde consequens foret, quod etiam pro daemonibus Christus mortuus esset, quodque daemonum æque, ac hominum Salvator dici posset, & deberet, cum ad demones salvandos meritum ejus sufficiens fuerit: quod non solum a mente S. Augustini, & aliorum SS. Patrum, sed etiam a veritate Catholica prorsus alienum est.

4. Dicendum 2. quamvis Christus vere pro omnibus mortuus sit, mortisque & passionis suæ merita Deo Patri pro omnibus hominibus obtulerit, non omnes tamen meritorum ejus fructum, ac mortis beneficium recipere. Ita Conc. Trid. sess. 6. c.

Certum est enim ex. gr. plurimos Judæorum olim fuisse, qui exterius per Evangelii prædicationem, & interius per Gratiae motionem ad veritatem amplectendam excitati, illam repulerunt, de quibus conqueritur Deus, ut Apostolus testatur Rom. 10. his verbis per Isaiam Prophetam c. 65. olim prænunciatis, *Tota die expandi manus meas ad populum non credentem, & contradicentem*, quibus item exprobrabat Apost. Act. 13 *Vobis oportebat primum loqui Verbum Dei, sed quoniam repellitis illud, &c.* Certum est etiam, plurimos homines Gratiam Dei (ut ait Apostolus 2. Cor. 6.) in vacuum recipere, id est variis inspirationibus, & motionibus Spiritus sancti præveniri, & excitari, quibus tamen consentire nolunt, ut supponimus ex tractatu de Gratia. Atqui Christus mortis, & passionis suæ merita Deo Patri pro illis omnibus obtulit, & ex virtute illius oblationis processerunt haud dubie Gratiae illæ, quibus præventi, & excitati sunt; cum nulla Gratia nisi ex meritis Christi hominibus conferatur. Quia tamen illas ex voluntatis pravitate abjecerunt, ideo nullus ad eos ex Christi morte fructus derivatus est, non defectu applicationis ex parte ipsius Christi, sed defectu consensus, & cooperationis ex parte illorum.

Dices, inde sequi, Christi Domini voluntatem humanam non fuisse semper Divine conformem. Sciebat enim, v. g. Judæos a Deo Patre ob prævisam eorum incredulitatem esse reprobatos, & tamen ad promerendam illis Gratiam, & Gloriam merita mortis suæ applicavit.

Respondetur, Christi Domini voluntatem fuisse semper Divine Patris voluntati perfectissime conformem, nec in applicatione meritorum suorum ullatenus ab illa recessisse.

Quod ut melius intelligatur, varios actus in Christi Domini voluntate distinguere possumus.

3. Primus est, illum voluntate quadam generali, & antecedente voluisse, ut omnes homines, qui per peccatum Adæ perierant, per media quædam convenientia salutem æternam consequerentur, sicut & sciebat, Deum Patrem eo modo velle, *omnes homines salvos fieri, & ad agnitionem veritatis venire*, ut habetur, 1. Tim. 2.

Secundus est, illum voluisse pro omnibus mori, ac mortis, & pas-

Med. Theol. Pars I.

Q

sio.

tionis sue merita Deo Patri offerre, ut omnibus media illa ad salutem consequendam necessaria, & Gratias ad id sufficientes obtineret, sicut & Patrem etiam velle sciebat.

Tertius denique, cum previdisset, quod aliqui Gratias illas oblatas abjicerent, alii vero eas acceptarent, iisque consensum preberent, tum illos in peccato suo iustissime dereliquisse, ut ipsemet declaravit S. Jo. 8. *Ego vado, & quæretis me, & in peccato vestro moriemini*: istis autem justificationem, & si in accepta iustitia fideles essent, finalem in ea perseverantiam, ac demum eternam salutem voluisse, & ad id obtinendum passionis, ac mortis sue merita efficaciter applicasse, & Deo Patri obtulisse, quod & voluntati ejus conforme esse certo sciebat, & sic in omnibus perfectam cum illo conformitatem semper servavisse.

Dicendum 3. Christum Dominum non tantum in generali omnibus hominibus, sed etiam in particulari cuilibet illorum merita sua applicasse, ut specialia Gratiæ dona secundum cujusque statum, & exigentiam obtineret.

Constat tum ex illis Christi verbis S. Matth. 18. *Non est voluntas atri Patrem vestrum, ut pereat unus de pusillis istis*, tum ex parabola boni Pastoris ovem errantem requirentis, & inventam in humeros reportantis, & etiam ex eo, quod dicit S. Jo. 11. bonam Pastorem vocare oves nominatim. Constat enim ex illis Apostoli verbis Ephes. 4. *Unicuique nostrum data est Gratia secundum mensuram donationis Christi*, ex quibus colligitur, omnes, & singulas Gratias, quæ unicuique conferuntur, ab illa speciali applicatione meritorum Christi provenire. Quod & docuit, & cum maximo pietatis sensu explicavit prefatus Episcopus Genevensis Introductionis sue par. 5. cap. 13. adeo ut sicut olim summus Sacerdos super pectus in Rationali suo filiorum Israel nomina descripta gerebat, ita Christus Dominus (ut veritas figure responderet) omnes homines vere in corde suo habuerit, & sic omnibus, & singulis meritorum suorum fructus distribuerit.

Dicendum 4. & ultimo, merita Christi Domini non equaliter omnibus ab ipso fuisse applicata.

Constat manifeste ex Script. S. Matth. 25. *Uni dedit quinque talenta, alii duo, alii unum. Et 1. Cor. 7. Unusquisque proprium donum habet ex Deo, unus quidem sic, alius vero sic*. Hæc autem diversitas, & inæqualitas Gratiarum ab ipsius Christi voluntate procedit, qui dividit singulis prout vult. In qua gratiarum divisione tamen nihil aliud facit, quam quod Divine Patris voluntati gratum, & acceptum esse cognoscit.

Superest adhuc una difficultas, nimirum quomodo fieri potuerit, ut omnia Gratiæ beneficia antiquis Patribus collata ex meritorum ipsius Christi applicatione processerint, cum nulla tunc adhuc essent Christi merita.

Respondetur, Gratias illas antiquis Patribus a Deo collatas fuisse propter Christi merita, non quidem adhuc existentia, sed futura, & intuitu-



intuitu applicationis per ipsum Christum faciendæ. Nihil enim repugnat, ut aliqua res nondum existens, sed tantum futura sit causa motiva, & excitans ad aliquid faciendum. Quamvis etiam dici possit, merita illa Christi Domini, sicut & alia omnia, quæcunque futura, fuisse tunc æternitati Dei præsentia, ac proinde Deum intuitu illorum æque operari potuisse in distributione donorum suorum, ac si jam de facto extitissent.

Quæres, quomodo intelligi possit, Christum merita passionis suæ obtulisse pro salute illorum, qui ante ejus adventum non solum mortui, sed & ob peccata sua, in quibus decesserant, jam damnati erant.

Respondetur, eatenus intelligi Christum merita passionis suæ obtulisse pro illis, quatenus approbavit, & veluti ratam habuit concessionem gratiarum ad salutem sufficientium ipsi a Patre coelesti factam intuitu futurorum meritorum suorum, quæ quidem eodem modo ipsis applicavit, quo a Patre suo jam applicata fuerant; quod non impedivit, quin simul etiam ratam haberet illorum reprobationem ob abusum gratiarum, & finalem impoenitentiam.

## S E C T I O VI.

*Quando Christus Deum Patrem oraverit.*

1. **Q**Uoniam oratio genus quoddam actionis est summopere meritoria, ideo locus hic postulare videtur, ut de Christi Domini oratione breviter aliquid dicamus.

Certum est 1. Christum Dominum, quatenus hominem, dum in statu viæ esset, vere oravisse.

Constat ex variis Evangelii locis. S. Luc. 6. *Erat pernoctans in oratione Dei.* S. Marc. 1. *Diluculo valde surgens abiit in desertum locum, ibique orabat.*

Quamvis autem Christus oratione pro se non indiguerit, sicut nos indigemus, maxime tamen conveniens fuit, ut oraret, tum quia actus orandi ex se est excellentissimus, cum sit actus Religionis, tum etiam quia Christus orando submissionis, ac fiduciæ erga Deum nobis exemplum præbuit.

Certum est 2. Christum Dominum, quatenus hominem, etiam nunc in statu gloriæ Deum Patrem pro nobis orare, vel expresse petendo a Deo, ut ea, quæ nobis salutaria sunt, conferat, vel saltem tacite, humanitatem suam, tanquam hostiam olim in cruce oblatam, illi exhibendo, ut in eam Deus intuens nobis benefaciat. Et de hac assertionem sic disjunctive posita dubitari non debet.

Constat enim ex variis Scripturæ locis, ut Rom. 8. *Christus Dominus, qui est ad dexteram Dei, qui etiam interpellat pro nobis.* 1. S. Jo. 2. *Advocatum habemus apud Patrem Jesum Christum justum.*

Q 2

An

An autem nunc tantum oret modo illo tacito, an vero etiam per expressam petitionem, non est satis compertum. Quidam enim negant, Christum nunc expresse aliquid pro nobis petere, ut Rup. l. 9. de Div. Offic. c. 3. & Alensis p. 4. q. 91. memb. 1. alii vero affirmant, ut S. Th. in Ep. ad Rom. 8. lect. 7. & ad Heb. c. 7. lect. 4. & S. Bonav. opusc. 39. c. 38. Et hæc sententia propter Sanctorum illorum auctoritatem videtur probabilior. Neque hinc sequitur, orationem illam Christi esse nunc meritoriam, cum non sit amplius in statu merendi, nec etiam impetratoriam proprie loquendo, sed solum quatenus nunc a Deo Patre pro nobis exigit, quod præteritis passionis, ac mortis suæ meritis debetur, quodque jam per merita illa pro nobis impetravit.

Porro recte observat S. Th. in suppl. 3. p. q. 72. ar. 2. ad 3. Ecclesiam non solere, nec nos etiam debere absolute petere a Christo Domino, ut oret pro nobis, sed tantum, ut exaudiat nos, vel ut nostri misereatur, ne scilicet Arrianis, aut Nestorianis assentiri videamur, qui ipsam Christi Personam, ad quam dirigitur oratio, sentiebant esse creatam, & Divina inferiore.

2. Quæres, an omnis Christi oratio fuerit semper exaudita.

Respondetur 1. orationem omnem Christi proprie dictam, quæ ex absoluta, & efficaci voluntate proficiscebatur, fuisse semper exauditam. Ita S. Th. q. 21. ar. 4. Ratio est, quia Christus voluntate absoluta nihil unquam voluit, aut oravit, nisi quod Deum Patrem absolute velle sciebat.

Respondetur 2. quod si quæstio sit de oratione improprie dicta, per quam desideria inferioris appetitus explicabat, certum est, non fuisse semper exauditam, cum & ipse Christus voluntate absoluta, & efficaci eam exaudiri noluerit, qualis fuit ista Matth. 26. *Pater, si possibile est, transeat a me calix iste, verumtamen non sicut ego volo, sed sicut tu.* Quamvis autem hæc oratio non fuerit exaudita, non fuit tamen inutilis, imo summa cum ratione Christus Dominus illam exprimere voluit, tum ut per illam indicaret, se esse verum hominem, qui instar aliorum naturaliter mortem exhorresceret, tum etiam ut patientiæ, ac submissionis perfectæ erga Divinam voluntatem nobis præberet exemplum, ut docet S. August. Epist. 121. ad Probam, cap. 14.

## C A P U T VII.

*De vitæ, ac mortis Christi Domini mysteriis.*

Quamvis ea, quæ pertinent ad mysteria vitæ, ac mortis Christi Domini ex ante dictis satis intelligi possint, cum omnia, quæ de mysterio Incarnationis dicuntur, non alio fine dicantur, nisi ut quæ Christus Dom. in assumpta carne gessit, aut passus est, recte, & sane intelligantur; quia tamen præter illa, quæ dicta sunt, quædam adhuc

huc occurrere possunt, in quibus aliqua luce opus est, ut quæ certæ sunt, ab incertis, aut etiam falsis, & erroneis discernantur, ideo breviter in hoc capite mysteria illa transcurramus, eaque adnotabimus, quæ ad finem nobis propositum necessaria videbuntur. Quod ut facilius exequamur, juxta ordinem a S. Doct. præscriptum, considerabimus in primis ingressum Christi Domini in hunc mundum, deinde progressum vitæ ejus in hoc mundo, demum ejusdem egressum ex hoc mundo, & ea, quæ egressum illum consequuta sunt.

S E C T I O I.

*De Christi Domini ingressu in hunc mundum.*

1. **I**ngressus Christi Domini in mundum duo præcipua mysteria hic a nobis breviter considerata complectitur, Conceptionem scilicet ejus, & Nativitatem.

Quod ad Christi conceptionem spectat, duo sunt observanda.

Observandum 1. id, quod docet S. Ambros. lib. de Incarnat. c. 6. in illa reperiri aliquid secundum naturam, aliquid supra naturam. Secundum naturam fuit, quod Christus ex muliere ortus est, supra naturam, quod ex Virgine.

Ad supernaturalem itaque modum conceptionis Christi pertinet, quod activum principium generationis ejus non fuit virtus maris generativa, sed virtus supernaturalis Divina, juxta quod SS. Virgini prædixerat Angelus, S. Luc. 1. *Spiritus Sanctus superveniet in te, & virtus Altissimi obumbrabit tibi*. Quibus verbis quamvis hoc opus (utpote charitatis Dei infinitæ) per quandam appropriationem Spiritui Sancto tribuatur, illum tamen (ut ait S. Doctor qu. 32. ar. 1. & ex ante dictis patet) tota Trinitas operata est.

Ad naturalem vero modum conceptionis illius pertinet, quod materia, de qua Corpus Christi formatum est, fuit conformis materiæ, quam aliæ fœminæ concipiendo foetui subministrant, cum hac tamen differentia (ut docet S. Doct. q. 31. a. 1. & 3.) quod cæterorum hominum corpora ex sanguine menstruo, & semine mulieris formantur, at vero corpus Christi ex purissimis sanguinibus SS. Virginis formatum est, quod ante illum docuerat S. Damasc. l. 3. de Fide c. 2.

2. Observandum 2. ex eodem S. Doct. q. 33. a. 1. 2. & 3. Corpus Christi eodem instanti, quo Divina virtute conceptum est, fuisse eadem virtute perfecte formatum, & organizatum, & simul animatum, ac Verbi Divini Personæ unitum.

Ita etiam S. Damasc. sup. & Sophron. in supra citata Epist. quæ in 6. Synodo generali Aët. 11. & 13. lecta, & approbata est, ubi hæc verba habentur: *Simul quippe caro, simul Verbi Dei caro, simul caro animata rationalis, simul Verbi Dei caro animata rationalis*. Unde S. Th. cit. q.



33. art. 3. docet, contra Fidem esse, si quis dicat, quod caro Christi fuit prius concepta, & postmodum a Verbo assumpta.

\* Observandum 3. ex eodem S. Doct. q. 34. a. 2. & 3. Christum a primo instanti conceptionis perfectum rationis, ac liberi arbitrii usum habuisse, actusque virtutum sanctissimos, ac perfectissimos jam tum exercuisse, & proinde per illos jam ab illo primo instanti mereri incepisse, ut jam alio in loco dictum est.

Quod autem ad Christi nativitatem attinet,

Notandum est 1. Christum Dominum ex Sanctissima Virgine Matre Maria ita esse natum, ut neque conceptione sua, neque nativitate ullum ejus Virginitati perpetuæ intulerit detrimentum, ita ut ante partum, & in partu, & post partum inviolata, & illibata semper Virgo permanferit.

3. Huic veritati, quæ de Fide est, oppositus olim fuit error Helvidii Hæretici, qui (ut refert S. August. lib. de Her. c. 84.) ore blasphemio asserere ausus est, SS. Virginem post partum fuisse corruptam, quod ante illum docuerat Jovinianus, eodem S. August. teste c. 82.

Refellitur hic error, & nostræ Fidei veritas probatur 1. ex Script. Isa. 7. *Ecce Virgo concipiet, & pariet Filium, & vocabitur nomen ejus Emmanuel*, quem locum pro asserenda Matris Dei Virginitate communiter SS. Patres urgent, ac præ cæteris S. Basil. orat. in sanctam Christi nativitatem, S. Hieron. in illum Prophetæ locum.

Probatur 2. ex Symbolo Apostolorum, ubi Christus dicitur conceptus de Spiritu sancto, natus ex Maria Virgine, cujus Symboli Apostolici auctoritate perpetuam beatæ Mariæ Virginitatem astruit S. Ambros. Epist. 81. ad Siricium.

Probatur 3. ex S. Leone Papa serm. 2. de Nativ. Dom. *Humano*, inquit, *usu, & consuetudine, quod credimus, caret, sed Divina potestate subnixum est, quod Virgo conceperit, Virgo pepererit, & Virgo permanferit*, & S. August. Ep. 3. ad Volusianum, *Ipsa virtus Divina per inviolatæ Matris virginæ viscera membra infantis eduxit, quæ postea per clausa ostia membra juvenis introduxit*.

Notandum est 2. Sanctissimam Virginem omnis prorsus doloris in partu expertem fuisse.

Prob. auctoritate 6. Synodi generalis c. 79. *Absque ullo dolore Virginis partum esse confitemur*. Et S. Aug. ser. de Assumpt. B. Virginis, *Illa enim*, inquit, *quæ sine peccati corruptione, & sine virilis admixtionis detrimento Christum suscepit, sine dolore peperit*. S. Hieron. denique l. cont. Helvid. c. 4. id probat ex eo, quod in Evangelio dicitur, B. Virginem puerum JESUM recens natum suis manibus pannis involvisse, & in præsepio reclinasse, nec ulla obstetrice opus habuisse.

\* Notandum 3. ex S. Doct. q. 35. ar. 7. & 8. inter alia plurima discrimina, quæ inter nativitatem Christi, & aliorum infantium reperiuntur, illud consideratione dignum esse, quod alii infantes nascuntur subje-

subiecti necessitati temporis, Christus vero tanquam Dominus, & conditor omnium temporum elegit sibi tempus, in quo nasceretur, & nec citius, nec tardius vel unico momento natus est, quam ipse nasci voluit. Unde Apostolus vocat tempus nativitatis Christi *plenitudinem temporis*, ad Galat. 4. Nec solummodo tempus, sed & locum nativitatis suæ Christus sibi delegit, civitatem scilicet Bethlehem, tum ut Prophetiæ, quæ de ipso erant, implerentur, tum ut agnosceretur esse de domo, & familia David, qui ex Bethlehem ortus erat, & inde ad Regni Judaici solium assumptus, & cui promissum fuerat, quod ex ejus stirpe Christus nasceretur, ut ex ipso loco nativitatis Christi promissio ei facta impleta ostenderetur.

## S E C T I O II.

\* *De Circumcisione, & impositione nominis Jesu.*

1. **D**Ocet S. Thom. 3. p. q. 37. art. 1. pluribus de causis Christum debuisse circumcidi, 1. ut carnis humanæ, quam assumpserat, veritatem ostenderet contra Manichæum, qui eum dixit habuisse corpus phantasticum, & contra Apollinarem, qui dixit, Corpus Christi esse Divinitati consubstantiale, & contra Valentinum, qui dixit, Christum de Cœlo corpus attulisse. 2. ut ritum Circumcisionis olim a Deo institutum se approbare demonstraret. 3. ut testaretur, se esse filium Abrahæ, qui Circumcisionis mandatum in signum Fidei acceperat. 4. ut tolletet Judæis omnem excusationem, & prætextum, quo uti potuissent ad eum non recipiendum, si fuisset incircuncisus. 5. ut obedientiæ virtutem suo nobis commendaret exemplo. 6. ut quia in similitudinem carnis peccati advenerat, remedium, quo caro a peccatis mundari consueverat, non respuerit. 7. denique, ut legis onus in se sustinens, alios a legis onere liberaret, juxta illud Apost. ad Gal. 4. *Misit Deus Filium suum factum sub lege, ut eos, qui sub lege erant, redimeret.*

Quod spectat ad impositionem nominis Jesu, observat S. Doct. sup. art. 2. ad 3. consuetum fuisse apud Judæos ipso circumcisionis die imponere nomina pueris, quasi antequam circumcisionem acciperent, perfectum esse habere non censerentur. Et ideo Christus Dominus, ut per omnia, quantum ejus infinita sanctitas fieri permittebat, aliis assimilaretur, nomen Jesu in circumcisione accepit.

Dignitas vero, & excellentia illius nominis ex duobus præsertim capitibus desumitur. 1. ex illius auctore, qui non alius fuit, quam ipse Deus, cujus speciali mandato Angelus Gabriel tum Sanctissimæ Virgini Mariæ, etiam antequam ex Spiritu sancto in ejus utero conciperetur, tum etiam S. Josepho ejus sponso, antequam Divinus ille Infans nasceretur, significavit, illum vocandum esse Jesum. Ex in eo impletum fuit, quod a Propheta fuerat longe ante prædictum,

*Isa. 62. Vocabitur tibi nomen novum, quod os Domini nominavit.*

2. Ejusdem nominis dignitas, & excellentia desumitur ex illius significatione. Ut enim recte observat S. Doct. sup. art. 2. nomina debent proprietatibus rerum respondere, unde & communiter nomina imponi solebant pueris apud Judæos ab aliqua proprietate, seu qualitate, aut dispositione illius, cui nomen imponebatur, quod variis exemplis ex Scriptura confirmat. Quia igitur excellentissima hæc proprietas, seu potius dignitas Christo Domino singulariter competebat, ut salutem humano generi tribueret, ipsique hoc munus Gratiæ prorsus singularis collatum erat, ut per ipsum omnes homines, quantum ex ipso erat, salvarentur, ideo convenienter vocatum est nomen ejus *Jesus*, idest *Salvator*.

Porro *Jesus* dictus est *Christus*, idest *unctus*, quia scilicet non modo omni Gratiarum genere, sed & ipsamet Divinitate unctus est, & veluti consecratus, utpote qui futurus erat Sacerdos æternus secundum ordinem Melchisedech, & Rex super Sion montem sanctum, cujus Regnum nunquam desitutum esset.

Apposite ad utrunque nomen S. Augustinus tract. 1. in Ep. 1. Joan. *Aliam*, inquit, *significationem habet Jesus, aliam habet Christus. Cum sit unus Jesus Christus Salvator noster, Jesus tamen proprium est nomen illius. Quomodo Moyses proprio nomine appellatus est, quomodo Elias, quomodo Abraham, sic tanquam proprium nomen habet Dominus noster Jesus. Christus autem Sacramenti nomen est. Quomodo si dicatur Propheta, quomodo si dicatur Sacerdos, sic Christus commendatur unus, in quo esset redemptio totius populi Israel.*

### C A P U T III.

*De progressu vitæ Christi Domini in hoc mundo.*

1. **T**ria hic præsertim occurrunt observanda.

Observandum est 1. conveniens fuisse, ut Christus Dominus a S. Joanne baptizaretur, tum ut suo Baptismate mundaret, ac sanctificaret aquas, vimque regenerandi illis conferret, ut docet S. Ambr. lib. 2. in S. Luc. tum etiam, ut insigne humilitatis exemplum nobis exhiberet, & prius ipse exequeretur id, ad quod alios adhortari volebat, ut idem S. Amb. declarat l. c. & S. Aug. ser. 63. de verb. Dom.

Est autem hic obiter notandum, Baptismum illum, quem S. Joannes conferebat, non fuisse Sacramentum, nec habuisse ullam vim ex opere operato. sed fuisse quemdam ritum externum divinitus ipsi S. Joanni inspiratum, quo homines excitabantur ad poenitentiam agendam de peccatis (unde appellatur *Baptismus poenitentiae*. S. Luc. 3. & Act. 19.) & sic disponebantur ad Gratiâ per Baptismum Christi recipiendam. Ita S. Thom. q. 38. art. 2.

Observandum est 2. conveniens quoque fuisse Christum Dominum a dæ-



a dæmone tentari ob varias rationes, quas S. Doct. explicat q. 41. a. 1.

Ubi tamen notandum est, hanc Christi Domini tentationem fuisse tantum exterius factam, apparente scilicet ei dæmone sub specie aliqua humana, ut probabilissime conjici potest, & externa voce illum alloquente, non vero per internam suggestionem, quia cum omnes motus animæ Christi essent perfecte rationi subiecti, nulla illicita cogitatio, nullus illicitus affectus a dæmone poterat in eo excitari. Ita docet S. Greg. hom. 6. in Evang. & S. Damasc. lib. 3. cap. 20.

Observandum est 3. conveniens etiam fuisse, ut Christus Dominus doctrinam suam variis miraculis confirmaret ob eas rationes, quas explicat S. Doctor q. 43. art. 3. Porro circa hæc Christi miracula tres præfertim difficultates hic solvendæ occurrunt.

Prima est, an Christus Dominus, non solum ut Deus, sed etiam ut homo, potestatem habuerit faciendi miracula.

Respondetur affirmative. Quod probatur ex eo, quod in Euangeliiis passim Christus Dominus multas curationes miraculosas solo tactu perfecit, & S. Luc. c. 6. dicitur, quod *Omnis turba quærebat eum tangere, quia virtus de illo exibat, & sanabat omnes*. Unde S. Cyrillus lib. de recta Fide ad Reginas, titulo, Quod Christus sit vita, dicit, Christi Corpus fuisse vivificum, id est vitam aliis tribuens, & S. Damasc. l. 3. de Fide c. 5. dicit, *Idem corpus fuisse instrumentum, ac veluti organum Divinitatis ad operationes Divinas efficiendas*, & S. Hilar. c. 9. in S. Matth. *Potestas, inquit, intra Corpus Christi manens rebus ipsis caducis efficientiam addebat sanitatis*. Ex quibus, & aliis similibus SS. Patrum dictis sequitur, probabilissimum esse, quod plures Theologi docent, Christi humanitatem fuisse illorum miraculorum causam instrumentalem, non tantum moralem, sed etiam physicam, & effectivam, id est Christum Dominum, quatenus hominem; non solum orando, & per modum causæ moralis, & meritoriae, sed etiam physicæ simul cum Divina virtute miracula illa esse operatum. Quod confirmari potest ex eo, quod Christus Dominus plurima ex illis miraculis fecit non deprecando, sed imperando, ut S. Matth. 8. ubi dicitur, quod *imperavit ventis, & mari, & facta est tranquillitas magna*, & S. Luc. 4. ubi de socru Simonis febricitante dicitur, *Stans super illam imperavit febrī, & dimisit illam*.

2. Secunda difficultas est, an miracula, quæ Christus fecit, fuerint ad ejus Divinitatem probandam sufficientia.

Respondet S. Doctor qu. 43. ar. 4. affirmative, idque probat 1. ex eo, quod illa miracula transcendebant omnem creatæ virtutis potestatem, ideoque non nisi Divina virtute fieri poterant. Et propterea cæcus illuminatus recte dicebat S. Jo. 9. *A sæculo non est auditum, quod aperuerit quis oculos cæci nati*. Probat. 2. ex modo, quo faciebat miracula. Non enim (ut dictum est) orando, ut cæteri Prophetæ, & Sancti, sed imperando, & tanquam potestatem habens illa perficiebat. Unde

Unde colligi poterat illum cum Deo Patre æqualem habere virtutem. Probat. 3. ex ipsa eius doctrina, qua se Deum dicebat, quæ si vera non fuisset, miraculis Divina virtute factis confirmata non fuisset.

Tertia difficultas est, an per illa miracula dæmones Christi Divinitatem certo cognoscere potuerint.

3. Respondetur, quod (sicut recte dicit S. Aug. lib. 6. de Civ. c. 21.) Christus Dominus tantum innotuit dæmonibus, quantum voluit; tantum autem voluit, quantum oportuit. Quare, cum ex una parte non esset expediens, ut dæmones Christi Divinitatem aperte cognoscerent, ex altera vero requireretur, ut aliquid de illa suspicarentur; ideo speciali quadam Dei providentia factum est, ut dæmones simul aliquo pacto cognoscerent, & etiam dubitarent. Ita S. Thom. q. 45. art. 1. ad 2. ubi etiam id confirmat auctoritate S. Ambrosii. S. Chrysostomi. & aliorum Patrum.

Quamvis autem dæmones Christi Divinitatem, quandiu mortalis inter homines vixit, certo cognoscere non potuerint; est tamen verum, ipsis illam post ejus mortem certo innotuisse, illoque vel invitos Christum Dominum esse verum, & naturalem Dei Filium credidisse. Unde dixit S. Jacob. in Epist. can. c. 2. *Dæmones credunt, & contremiscunt*, & S. Paul. ad Phil. 2. *Ut in nomine Jesu omne genuflectatur, Cælestium, terrestrium, & infernorum*. Et ratio est, quia tunc evidentissima signa Divinitatis ipsius experti sunt, cum viderunt eum ad inferiores terræ partes descendentem, & inde summa cum potestate justorum animas eripientem.

#### S E C T I O IV.

*De egressu Christi Domini ex hoc mundo.*

**C**irca egressum Christi tria quæri possunt.

Quæres 1. quid nobis Christi passio, & mors contulerit, & qua ratione nobis proficua fuerit.

Resp. S. Doct. q. 48. quinque præsertim modis passionem, ac mortem Christi ad salutem nostram contulisse, nobisque proficua fuisse.

Primo per modum meriti, quia Christus quatenus caput omnium hominum, per illam nobis ut membris suis de condigno meruit ipsam æternam salutem, & omnia etiam media ad illam consequendam aut necessaria, aut utilia, ut supra dictum est.

Secundo per modum satisfactionis pro totius mundi peccatis, quæ quidem satisfactio a Christo Domino in passione, ac morte Deo Patri pro nobis exhibita, non solum sufficiens, sed & superabundans fuit, non tantum propter dignitatem Personæ satisfaciæntis, aut rei oblatæ, ut c. 1. diximus, sed præterea propter nimiam charitatem, ex qua patiebatur, & atrocitatem tormentorum quæ patiebatur. Ut enim observat S. Doct. q. 46. art. 1. passus est in omnibus, in quibus pati potuit, & ab omnibus, a quibus pati potuit.

Ter-

Tertio per modum Sacrificii. Christi enim passio, & mors fuit verum, & proprium, & vere propitiatorium Sacrificium, ut vocatur a Concil. Trid. sess. 22. c. 2. quod quidem ex quacunque parte consideretur, infiniti valoris fuit, ut ex ante dictis constat.

Quarto per modum redemptionis, passio siquidem, & mors Christi fuit quædam solutio, per quam homines a servitute tum peccati, tum dæmonis redempti sunt, sicut captivi, ac servi pretio redimi solent. Unde Princeps Apostolorum Ep. 1. c. 1. *Non corruptibilibus, inquit, auro, vel argento redempti estis de vana vestra conversatione, sed pretioso sanguine quasi Agni immaculati Christi.* Et hinc vere, ac proprie Christus Dominus hominum Redemptor dicitur, ut fusius explicabitur infra Sect. 12.

Quinto denique, & ultimo, per modum efficientiæ, hoc est, quod passio, & mors Christi Domini salutem nostram, ac media omnia ad illam operata est per modum causæ efficientis instrumentalis. Cum enim humanitas Christi Domini fuerit instrumentum Divinitatis (ut supra dictum est) ideo ex consequenti omnes actiones passionis Christi instrumentaliter operatæ sunt ad salutem humanam in virtute Divinitatis, & secundum hoc passio, & mors Christi salutem humanam efficienter causare dicitur.

Observat autem S. Doct. sup. a. 6. ad 3. inter istos quinque modos hanc esse differentiam, quod Passio Christi Domini, in quantum comparatur ad ejus Divinitatem, agit per modum efficientiæ, in quantum vero refertur ad ejus voluntatem humanam, agit per modum meriti, secundum vero quod consideratur in ipsa carne Christi Domini, agit per modum satisfactionis, redemptionis, & sacrificii.

2. Quæres, an in Christi Domini morte humanitas ejus fuerit a Divinitate separata.

Respondetur, humanitatem Christi Domini, etiam in ejus mortistriduo, mansisse inseparabiliter Divinitati unitam, ipsamque Divinitatem ejus corpori in sepulcro, & animæ in Inferno conjunctam semper extitisse.

Ita S. Damasc. l. 3. de Fide c. 275. Fulgent. l. ad Trasimundum c. 23. & unanimiter omnes alii SS. Patres, estque de Fide, ut ex ante dictis constat. Probatque S. Doctor q. 50. a. 2. ex eo, quod in Symbolo de Filio Dei dicitur, quod fuerit crucifixus, mortuus, & sepultus, quod ejus corpori mortuo tantum convenit, item quod descenderit ad Inferos, quod solam ejus animam spectat, quæ vera non esset, nisi ratione unionis hypostaticæ, per quam utraque pars Divinitati semper conjuncta remansit.

Quæres 3. an corpus Christi Domini post mortem corruptum fuerit.

Respondet S. Doct. q. 51. a. 3. negative. Quod, ut melius intelligatur, notandum est ex S. Dam. l. 3. de Fide c. 18. duplicem esse corporis humani corruptionem. Una est, quæ fit per separationem animæ ab illo, & hoc



hoc modo tam certum est, Christi Domini corpus fuisse corruptum, quam ipsum Christum fuisse mortuum. Alia corruptio est illa, quæ fit per resolutionem corporis in vermes, cineres, aut aliquid simile, & hoc modo constat ex Fide, Christi Domini corpus non fuisse corruptum, juxta illud Psal. 15. *Non dabis Sanctum tuum videre corruptionem*. Hunc enim locum S. Petrus Act. 2. & Paulus c. 13. de Christi corpore mortuo exponunt. Additque S. Doctor supra, non decuisse, Christum pati corruptionem in corpore, ne mors ejus potius necessitati, quam voluntati adscriberetur.

## S E C T I O V.

*De Christi Domini descensu ad Inferos.*

1. **C**ertum est ex Fide, Christum Dominum, secundum animam, vere, & proprie descendisse ad Inferos, non vero metaphorice tantum, ut falso hunc Symboli articulum Hæretici interpretantur, quorum aliqui dicunt descendere ad Inferos idem esse, ac interire, alii idem esse, ac sepulturæ tradi, alii denique omnium impiissime, per descensum Christi ad Inferos, significari asserunt, Christi animam dolores, ac desperationem animarum damnatarum pertulisse. Ita Calvinus l. 2. de Instit. c. 16. §. 8. & seq.

Refellitur hæc blasphemia, & nostræ Fidei veritas prob. 1. ex Script. S. Matth. 12. *Sicut fuit Jonas in ventre ceti tribus diebus, &c. sic erit Filius hominis in corde terræ, &c.* ubi per cor terræ S. Hier. in c. 2. Jonæ Infernum intelligit. Et ad Ephes. 4. *Quod autem ascendit, quid est, nisi quis & descendit primum in inferiores partes terræ?* quem locum de Christi Domini descensu ad Inferos exponunt S. Chrys. & Hier. commentariis in illam Apostoli Epistolam, & S. Irén. l. 5. c. 31.

Probatur 2. ex Symbolo Apostolorum, & Symbolo S. Athanasii, in quibus hæc veritas expressis verbis continetur.

Probatur 3. ex SS. Patribus, qui unanimiter huic veritati subscribunt, ut S. Leo Papa ser. 1. de Resur. *Resurrectio Salvatoris nec animam in Inferno, nec carnem diu morari passa est in sepulchro*. S. Ambr. l. de mysterio Paschæ c. 4. S. Greg. Papa l. 13. Mor. c. 20. & plures alii, qui citantur a Bellarmino l. 4. de Christo, c. 14.

Cum igitur hoc certum sit, quædam dubia circa hunc Christi ad Inferos descensum solvenda supersunt.

2. Primum dubium est, ad quæ Inferorum loca Christus descenderit.

Ad hujus dubii solutionem observandum est ex S. Doct. in 4. dist. 45. a. 3. Inferorum nomine quatuor loca intelligi. Primus est ille, in quo damnatorum animæ cum Dæmonibus torquentur; secundus est Limbus puerorum cum solo peccato originali ex hac vita decedentium; tertius est locus ignis Purgatorii, in quo animæ justorum a peccatorum reliquiis expiantur; quartus denique est Limbus San-

cto-

etorum Patrum, in quo ante Christi adventum Sanctorum animæ recipiebantur, ubi absque ullo doloris sensu beata redemptionis spe sustentati placida quiete fruebantur, qui locus passim in sacris Literis Abrahæ Sinus nuncupatur. Hac observatione præmissa,

Dicendum est cum S. Doctore q. 52. a. 1. Christi Domini animam vere quidem, & secundum substantialem præsentiam descendisse ad Limbum SS. Patrum, ibique cum illis mansisse per triduum illud, quo a corpore fuit separata, ad alia vero loca Inferorum non descendisse, nisi secundum aliquem specialem suæ virtutis effectum.

Prima pars assertionis, qua diximus Christum in Limbum Sanctorum Patrum descendisse, patet ex eo, quod communiter SS. Patres dicunt, ideo Christum Dominum descendisse ad Inferos, ut inde Sanctorum animas educeret, ac secum in coelum eveheret, ut S. Ignatius in epist. ad Trallianos, & S. Hieron. in c. 4. ad Ephes. Quod autem ibi triduum remanserit, præter auctoritatem S. Doctoris, id assertum habetur apud Irenæum l. 5. c. ult. & Tertull. in l. de anima c. 13.

Altera vero assertionis pars, qua diximus, Christum Dominum non descendisse secundum realem præsentiam ad alia Inferorum loca, probatur a S. Doctore ex eo, quod

In primis Christus Dominus nullam habuit causam ad Infernum damnatorum descendendi, cum neque locus esset ipsi congruus, & decens, neque ad hoc ut damnatos, ac Dæmones sibi genuflectere compelleret, necessarium fuerit, ut eorum teterrium, ac foedissimum carcerem adiret. Idem de Limbo puerorum dici debet, tum quia locus ille minime Christo Domino congruebat, tum etiam, quia non satis constat, an Christus Dominus se illis manifestaverit.

Similiter videtur non fuisse conveniens, ut locum Purgatorii Christus adiret, ac præsentia sua illustraret, cum locus ille sit tantum poenis destinatus.

3. Secundum dubium est, quid Christus Dominus ad Inferos descendens animabus justis contulerit.

Respondetur, Christum Dominum illis tria contulisse.

In primis enim Gloriæ lumen illis indidit, atque adeo illas beatas effecit, ut docet S. Th. q. 52. a. 3. ad 1. Hoc colligitur ex illis Domini ad latronem crucifixum verbis, S. Luc. 24. *Hodie mecum eris in Paradiso*, hoc est in loco, ubi mecum, & cum aliis eris beatus. Postea illucescente tertia die, beatas illas animas inde secum eduxit. Quo pertinet illud Zachar. 9. *Tu quoque in sanguine testamenti tui emisisti vinctos tuos de lacu.*

Denique quadragesima post resurrectionem die sanctas illas animas secum in coelum invexit, quando ipse (ut dicitur Psal. 67.) *Ascendens in altum captivam duxit captivitatem.*

SE.

## S E C T I O VI.

*De Christi Domini resurrectione.*

1. **F**ides Catholica docet, Christum Dominum tertia post mortem die surrexisse a mortuis, animamque ejus proprio corpori iterum fuisse unitam. Circa hanc vero Christi resurrectionem quædam hic observanda occurrunt.

Primum est, Christum Dominum non aliena, sed propria sua virtute a mortuis surrexisse, juxta quod ipse dixerat S. Jo. 10. *Potestatem habeo ponendi animam meam, & potestatem habeo iterum sumendi eam.*

Secundum est, Christum Dominum post resurrectionem in corpore suo glorioso vulnerum cicatrices retinuisse, idque non ex impotentia curandi, ut ait Beda in cap. ult. S. Luc. *sed ut perpetuum victoriæ suæ circumferret triumphum.* Quod & de Sanctis Martyribus dicit S. Aug. 1.22. de Civ.c.10. his verbis: *Fortassis in illo Regno in corporibus Martyrum videbimus cicatrices vulnerum, quæ pro Christi nomine pertulerunt. Non enim deformitas in eis, sed dignitas erit, & quædam quamvis in corpore non corporis, sed virtutis pulchritudo fulgebit.*

Tertium est, Christi Domini corpus gloriosum resurgendo clausum sepulcrum penetrasse. Neque enim existimare debemus (ut ait S. Hier. Ep. ad Hedibiam q. 6.) Angelum idcirco venisse, ut aperiret Domino resurgenti, & revolveret lapidem, sed postquam Dominus resurrexit, indicasse, quod factum est, & sepulcrum vacuum revolutione lapidis ostendisse. Hoc enim corporis sui gloriosi proprium fuisse ipsemet postea ostendit, cum ad Discipulos in Coenaculo congregatos januis clausis ingressus est, ut habetur S. Jo. 20.

2. Quartum est, Christi Domini resurrectionem vere dici, ac esse causam resurrectionis nostræ futuræ (ut docet S. Th. q. 56. a. 1. & 2.) non quidem meritoriam, cum post mortem nihil amplius meruerit, sed efficientem, in quantum humanitas Christi est instrumentum Divinitatis. Sicut enim per illam plurima miracula, & etiam mortuorum aliquorum resurrectionem alias fecit, sic etiam universalem omnium resurrectionem faciet. Quo sensu Christus D. S. Jo. 5. dixit: *Venit hora, quando omnes, qui in monumentis sunt, audient vocem Filii Dei, & procedent qui bona egerunt, in resurrectionem vitæ, &c.* Quæ Christi verba S. Doct. in supplem. q. 76. art. 2. literaliter intelligit de sensibili voce Christi, per quam imperabit resurrectionem, & simul illam operabitur. De qua etiam voce Cassiod. interpretatur illud Psal. 67. *Ecce dabis voci suæ vocem virtutis, ad suscitandum scilicet mortuos.*

Dici etiam potest, Christi Domini resurrectionem esse causam non solum efficientem, sed etiam exemplarem resurrectionis nostræ futuræ, in quantum scilicet (ut dicit Apost. Philipp. 3.) *Reforma-*  
bit



*dit corpus humilitatis nostræ configuratum corpori claritatis suæ. Et eodem sensu resurrectio Christi Domini dici etiam potest causa exemplaris resurrectionis spiritualis animarum nostrarum; ut sicut Christus resurrexit a mortuis per Gloriam Patris, ita & nos in novitate vitæ ambulemus, ut habetur Rom. 6.*

## S E C T I O VII.

*De Christi Domini in cælos Ascensione, & ad dexteram Patris sessione.*

1. **S**icut de resurrectione, sic etiam de ascensione dicendum est, Christum Dominum non aliena ope, sed propria virtute tum Divinitatis, tum etiam humanitatis glorificatæ ad cælos ascendisse. Ita S. Doct. q. 57. art. 3.

Sicut autem certissimum est, Christum Dominum ad cælos ascendisse, sic etiam convenientissimum fuit, ut idem S. Doct. dicit a. 6. Cum enim locus debeat esse locato proportionatus, hinc sequitur, corpori Christi, glorioso, & incorruptibili locum gloriæ, & incorruptionis debitum fuisse.

Quæres, quo Christus ascenderit, seu quisnam fuerit terminus ascensionis ejus.

Respondet S. Doct. q. 57. ar. 4. Christi Domini humanitatem fuisse supra omnes cælos elevatam, juxta quod dixit Apost. Ephes. 2. quod Deus Pater constituit illum ad dexteram suam in cælestibus supra omnem Principatum, & Potestatem, & Virtutem, & Dominationem, & omne nomen, quod nominatur non solum in hoc seculo, sed etiam in futuro, & omnia subjecit sub pedibus ejus.

Cæterum quomodo, & quo situ, & in qua cæli parte sit corpus Christi Domini, supervacaneum est quærere, ut ait S. Aug. lib. de Fide, & Symb. c. 6. tantummodo in cælo esse credendum est. Non enim est fragilitatis nostræ cælorum secreta discutere, sed est nostræ Fidei de Dominici corporis dignitate sublimia, & honesta sapere, ut ibidem dicit.

2. Quod spectat ad sessionem ipsius Christi Domini, quæ dicitur esse ad dexteram Patris, observandum est ex S. Doct. q. 58. figuratam esse istam locutionem, proindeque non corporalem aliquam sessionem, sed tranquillitatem, ac firmitatem status gloriæ Christi Domini debere intelligi, vel etiam Regiam, & Judiciariam ejus potestatem, sicut & nomine dexteræ Patris non significatur pars illa corporis humani, quæ appellatur dextera (cum enim Deus sit purissimus spiritus, nihil in eo corporeum cogitari fas est) sed ipsius Divina beatitudo, & gloria, quæ dexteræ nomine quandoque in Scripturis designatur, ut Ps. 15. *Delectationes in dextera tua usque in finem*, vel potius supremæ potestatis ejus participatio. Et sic Christus

stus Dominus dicitur sedere ad dexteram Patris. 1. in quantum Dei Filius, ipsi Patri consubstantialis, ac proinde paternæ potestatis, & gloriæ confors, & particeps. 2. in quantum homo ad ejusdem gloriæ, & potestatis consortium, & participationem ratione unionis hypostaticæ admissus, & a Deo Patre supremus omnium Rex, ac Judex constitutus, ut ex infra dicendis constabit. Et eo sensu docet S. Th. art. 4. solius Christi proprium esse sedere ad dexteram Patris, nec ulli Angelo, vel homini posse convenire.

## S E C T I O VIII.

*De Regia potestate, quæ Christo Domino competit.*

1. **C**ertum est 1. Christum Dominum, non modo ut Deum, sed etiam ut hominem, Regiam potestatem, & summam auctoritatem habuisse circa omnia spiritualia, ita ut potuerit arbitratu suo instituire, præcipere, & immutare, quæcunque ad Ecclesiæ Hierarchiam, ejusque statum spirituales pertinent.

Hæc veritas, quæ de Fide est, constat ex eo, quod in Evangeliiis dicitur, Christum Dom. absolute, & sine ulla limitatione potestate illa spirituali usum fuisse, illiusque virtute legem veterem abrogasse, novam condidisse, Sacramenta instituisse, peccata remisisse, & alia ejusmodi fecisse, quæ non nisi ab habente summam in Ecclesiæ regimine auctoritatem fieri potuerunt. Huc pertinet illud Ps. 2. *Ego autem constitutus sum Rex ab eo super Sion montem sanctum ejus.*

Certum est 2. Christum Dominum non habuisse tale dominium in res omnes temporales, quo ipse solus esset quarumcunque rerum temporalium Dominus, ita ut nullus præter ipsum cujuscunque rei dominus, aut proprietarius esset; cum nec ipse Deus tale dominium sibi vindicare voluerit, sed retento absoluto quodam, & supremo in res omnes dominio, proprietatem illarum hominibus benigne concesserit, ita ut dependenter ab illo supremo dominio vere sint, ac dicantur rerum suarum proprietarii, & domini. Unde refellitur quorundam error, qui asserunt, omnes Principes, ac dominos terræ a Christi Domini conceptione fuisse suis dominiis privatos. Cujus præterea falsitas evidenter convincitur vel ex ipsius Christi testimonio dicentis S. Matth. 22. *Reddite, quæ sunt Cæsaris, Cæsari.*

Cum hæc duo certa sint, unum est dubium, an scilicet Christus Dominus, quatenus homo, habuerit supremum quoddam dominium directum, & absolutum in res omnes temporales, & in omnia Regna mundi, ita ut posset quoscunque Reges, & Principes privare suis Regnis, & dominiis, si voluisset. Pro cuius resolutione duo breviter dicenda sunt.

1. Primum est, Christum Dominum, etiam ut hominem, vere, & pro-

proprie dominium illud in res omnes habuisse, ac proinde fuisse verum, & supremum Regem, ac Monarcham rerum omnium temporalium.

Prob. 1. ex Scriptura. Psal. 2. *Dabo tibi gentes hereditatem tuam, & possessionem tuam terminos terræ.* S. Matth. 28. *Data est mihi omnis potestas in cælo, & in terra.* Apoc. 19. *Habet in vestimento, & in femore suo scriptum, Rex Regum, & Dominus Dominantium.* Quæ Scripturæ testimonia de Christo Domino, ut homine, communiter a Sanctis Patribus intelliguntur.

Prob. 2. ex S. August. tract. 115. in S. Jo. super hæc Christi verba, *Regnum meum non est de hoc mundo*, ubi recte observat, Christum Dominum non dixisse, *Regnum meum non est in hoc mundo*, cum vere haberet Regnum etiam in terra, sed solum dixisse, *Non est de hoc mundo*, id est non acceptum ab hominibus, nec humana auctoritate, aut humano jure devolutum. Et S. Bern lib. 3. de consid. ad Eugenium Papam, ubi de Christo sic loquitur. *Hic est, de quo Propheta ait, Er erit omnis terra possessio ejus, Christus hic est, qui possessionem sibi vindicat & jure creationis, & merito redemptionis, & dono Patris. Cui enim alteri dictum est, Postula a me, & dabo tibi gentes?*

Probatur denique ex eo, quod Christi Domini, etiam in quantum hominis, dignitas, & excellentia, ratione unionis hypostaticæ, talis, ac tanta fuit, ut nullus honoris, prærogativæ, aut potestatis titulus esse potuerit, qui non illi merito deberetur.

Secundum est, Christum Dominum potestate illa, & dominio, quandiu mortalis inter homines vixit, numquam uti voluisse, sed sponte, ac voluntarie illius usu seipsum abdicasse, ac paupertatem perfectissimam amplexum fuisse, ut sic non solum merito suo, sed etiam exemplo nos efficacius juvaret. Unde Apost. de illo dicit 2. Cor. 8. quod *Cum esset dives, propter nos egenus factus est.* Et ipse Christus Dominus eo sensu de se locutus est, cum dixit S. Matth. 8. *Vulpes foveas habent, & volucres cæli nidos, Filius autem hominis non habet, ubi caput reclinet.*

## SECTIO IX.

### *De Judiciaria Christi Domini potestate.*

1. **C**UM ( ut ait S. Doct. q. 59. ) Regiam dignitatem potestas judiciaria consequatur, de illa, prout Christo Domino competit, nobis agendum est, ac

Dicendum in primis, judiciariam illam potestatem Christo Domino competere, non modo quatenus Deus est, sed etiam quatenus homo, cum hac tamen differentia, quod, quatenus Deus est, illam ex se habeat, quatenus autem homo, non ex se, sed auctoritate sibi divinitus commissa, & delegata.

*Med. Theol. Pars I.*

R

Hoc



Hoc constat ex Scriptura. Act. 10. *Hic est, qui constitutus est a Deo Judex vivorum, & mortuorum.* & S. Jo. 5. *Potestatem dedit ei judicium facere, quia filius hominis est.*

2. Dicendum 2. ad judiciariam Christi potestatem pertinere non solum ultimum illud, & generale Judicium, de quo sæpius in Evangeliiis mentio fit, ut S. Matth. 16. 24. & 25. & 2. Cor. 5. sed etiam particulare judicium in morte cujusque ab illo faciendum. Tale enim judicium in morte cujusque faciendum esse

Constat 1. ex Scriptura Eccl. 11. *Facile est coram Deo in die obitus retribuere unicuique secundum vias suas.* & Heb. 9. *Statutum est hominibus semel mori, post hoc autem Judicium.*

Constat 2. ex S. August. lib. 2. de anima, ubi hanc veritatem asserit: S. Hieron. in cap. 2. Joel. ubi per diem Domini diem Judicii intelligendum esse dicit, sive diem exitus uniuscujusque de corpore. *Quod enim, inquit, in die judicii futurum est omnibus, hoc in singulis in die mortis impletur.* & S. Chrysost. hom. 14. in S. Matth. *Omnes, inquit, animæ, cum hinc emigraverint, variis peccatorum catenis implicite ad terribile illud tribunal ducentur.*

Tertio id constat ex eo, quod Fide certum est, atque in Conc. Florentino definitum in decreto unionis, animas post mortem sine mora recipi in coelum, si sint omnino expiate, vel amandari in infernum, si peccato mortali obstrictæ ex hac vita decesserint. Atqui dici non debet, hoc ita fieri sine speciali judicii Divini decreto.

Quod vero Judicium illud particulare æque, ac ultimum generale a Christo Domino quatenus homine exerceatur, constat ex eo, quod dicitur S. Jo. 5. quod *Pater non judicat quenquam, sed omne judicium dedit Filio, ut omnes honorificent Filium.*

Porro ad hoc judicium particulare subeundum, necesse non est, animas realiter in coelum deferri, aut Christum ad illas e coelo delabi, sed sufficit, quod illæ in ipso mortis instanti intellectualiter eleventur ad audiendam sententiam Judicis, ita ut in eodem instanti cognoscant sese judicari, & pro ratione eorum, quæ in vita gesserunt, & boni, vel mali status, in quo decesserunt, salvari, vel damnari, imperio, & auctoritate non solum Dei, sed etiam hominis Christi, ac eodem momento per instantaneam loci mutationem constituentur in loco illo, in quo ex vi judicii, & imperii Christi Domini future sunt, sive in Paradiso, sive in Purgatorio, sive in Inferno.

3. Dicendum 3. ad eandem quoque judiciariam Christi potestatem pertinere alia omnia judicia, quæ erga homines, etiam dum in hac vita mortali degunt, divinitus exercentur, erga bonos quidem, cum pro eorum meritis, & recto Gratiarum usu Gratiæ ipsis augentur, & copiosiora auxilia subministrantur, erga malos vero, cum pro eorum demeritis abundantiora Gratiæ auxilia ipsis subtrahuntur, permittunturque excecari, & indurari. Quod enim hæc non tantum eterno,

ac supremo Dei judicio, sed etiam Christi Domini, quatenus homo est, imperio peragantur, constat ex eo, quod (ut supra ex Act. 10. retulimus, non solum mortuorum, sed etiam vivorum Judex a Deo sit constitutus.

Quæres, an etiam ad Angelos extendat se judiciaria illa Christi Domini potestas.

Respondetur affirmative cum S. Doctore q. 59. ubi dicit, Angelos omnes, sive bonos, sive malos judiciariæ potestati Christi Domini, etiam quatenus hominis, subesse, idque ratione eorum, quæ circa homines operantur. Cum enim tam boni, quam mali Angeli aliquid ad salutem, vel damnationem hominum cooperentur, Ideo Christi supremi Judicis sententiam, quoad præmium, vel supplicium accidentale sunt subituri. Quo sensu ipse Christus Dominus dicit S. Luc. 15. quod *Gaudium erit Angelis Dei super uno peccatore pœnitentiam agente*: & e contra dæmones dicunt c. 8. S. Matth. & c. 1. S. Marc. *Quid nobis, & tibi, Jesu Fili Dei? venisti hic ante tempus torquere, & perdere nos?*

## SECTIO X.

*De dignitate capitis, quæ Christo Domino competit respectu tam Angelorum, quam hominum.*

1. **O**bservandum est hic ex S. Th. qu. 8. rationem capitis mystici desumi ex proportionem ad caput naturale, in quo cum tria considerari possint, ordo, perfectio, & virtus; ordo quidem, quia est prima pars hominis, perfectio vero, quia in eo vigent omnes sensus interiores, & exteriores, cum in cæteris membris sit solum tactus; virtus denique, quia motus omnis cæterorum membrorum ab illo derivatur: sic etiam tria de capite mystico intelligi debent, ita ut cum queritur, an Christus Dom. sit caput hominum, vel Angelorum, idem sit, ac si queratur, an respectu illorum hæ tres prærogative Christo Domino competant. Hac observatione supposita,

Dicendum 1. Christum Dominum, etiam quatenus hominem, esse caput totius Ecclesiæ.

Constat in primis ex Apost. Ephes. 1. ubi dicitur, quod Deus Pater Christum Dominum *dedit caput supra omnem Ecclesiam*. & Coloss. 1. *Ipse est caput corporis Ecclesiæ*.

Constat præterea ex eo, quod Christo Domino, etiam quatenus homini, tres supradictæ capitis prærogative competunt. Est enim primus in ordine prædestinationis Divinæ, unde vocatur ab Apost. Rom. 8. *Primogenitus in multis fratribus*. Deinde ceteros omnes fideles omni virtutum, & gratiarum genere antecedit, ut ex antedictis patet. Tertio denique virtutem habet influendi Gratiæ in omnia membra Ecclesiæ. Unde S. Jo. 1. dicitur, quod *de plenitu-*

*dine ejus omnes accepimus.* & ipse Christus Dominus c. 15. seipsum viti comparat, & Fideles palmitibus, qua comparatione influxum suum in illos satis declarat.

2. Dicendum 2. Christum Dominum, quatenus hominem, esse caput omnium prorsus hominum. Ita S. Th. ar. 3.

Probari potest enumeratione facta per diversos gradus hominum, quibus omnibus certum est illum & ordine, & perfectione antecellere, & in eos omnes influxum aliquem habere. Et primo quidem de Beatis constat, cum sint membra Ecclesiae triumphantis ipsi Christo perfectissime unita. De Justis item tum in Purgatorio, tum in hac vita existentibus, cum ab ipso influxum gratiae, & charitatis recipiant. De Fidelibus etiam, qui in peccato mortali sunt, cum adhuc per Fidem, licet velut membra mortua, illi jungantur, atque ideo ipse in eos Fidem illam, sive habitualement, sive actualem, & alias omnes gratias actuales, quibus ad poenitentiam excitantur, influat. De Infidelibus quoque idem dici debet, cum (ut supra probatum est) pro illis etiam Christus Dominus mortuus sit, & ex consequenti (ut supponimus ex tract. de Gratia) illis, sicut & aliis omnibus, & etiam parvulis sine Baptismi susceptione decedentibus, gratias ad salutem sufficientes promeruerit.

Porro licet hoc sensu Infideles dicantur membra Christi, non tamen propterea dici possunt membra Ecclesiae. Ad hoc enim non sufficit, ut quis a Christo Dom. influxum aliquem recipiat, aut recipere possit, sed praeterea necessarius est aliquis alius Gratiae effectus, nempe ut fiat Fidelis, & saltem in voto Baptismi Sacramentum recipiat.

Ex dictis autem intelligi potest, Christum Dominum nullo modo esse, aut dici posse caput damnatorum, cum ex lege Dei ordinaria non sint amplius in potentia ad ullam cum Christo unionem, aut ad ullum Gratiae influxum ab ipso recipiendum, qui proinde neque sunt, neque dici debent membra Christi.

3. Dicendum 3. Christum Dominum, etiam quatenus hominem, esse caput Angelorum. Ita S. Thom. ar. 4.

Constat ex Scriptura. Coloss. 2. Christus vocatur ab Apostolo *Caput omnis Principatus, & Potestatis.* & Ephes. 1. idem Apost. dicit, Christum Dominum a Deo Patre constitutum esse ad dexteram suam in caelestibus *supra omnem Principatum, & Potestatem, & Virtutem, & Dominationem, & ipsum dedisse caput supra omnem Ecclesiam.* & Ep. 1. S. Pet. 3. Christus Dominus dicitur *profectus in caelum subiectis sibi Angelis.* Ex quibus Scripturae verbis constat, Christum Dominum, saltem quoad ordinem, & perfectionem, Angelis praeminere, & sic illorum esse caput.

Quod vero sit etiam illorum caput quoad influxum, constat ex iis, quae praecedenti capite diximus, ubi probavimus, Angelos Gratiae, ac Glorae dona ex Christi meritis accepisse.

4. Di-



4. Dicendum 4. quod licet solius Christi proprium sit esse caput totius Ecclesiae, quatenus est fons, & origo Gratiarum omnium; hoc tamen non obstat (ut recte docet S. Th. ar. 6.) quominus alia sint ipsi subordinata Ecclesiae capita. Itaque, quoniam sub Christo Romanus Pontifex totam visibiliter gubernat Ecclesiam, in illamque influit, docendo, præcipiendo, pascendo, leges ferendo, varia gratiarum dona conferendo, ideo vere, ac proprie caput visibile totius Ecclesiae dicitur. Imo & unusquisque Episcopus in Ecclesia sua quandam habere capitis dignitatem vere dici potest.

Neque id absurdum videri debet, quod in mystico Ecclesiae corpore plura sint capita sub uno primario, & præcipuo capite; sicut nec absurdum est, sub uno summo Pastore Christo plures esse, & dici in Ecclesia Pastores, Epist. 1. S. Pet. c. 5. & præter fundamentum primum, & præcipuum (quod est Christus) alia etiam esse, & dici ejusdem Ecclesiae fundamenta, Apoc. 21. sicut in quolibet Regno præter Regem, qui (ut dicitur 1. Reg. 15.) totius Regni caput est, sunt etiam alii duces, & optimates ab eo dependentes, qui etiam dicuntur *capita populorum*, Amos 6.

## C A P U X I.

### \* De Sacerdotio Christi.

**S**acerdotii nomine intelligitur munus illud, quo quis constituitur, ut res sacras, & Divinas tanquam Dei minister hominibus communicet, & vicissim etiam pro hominibus offerat Deo dona, preces, & sacrificia, ut colligitur ex variis Scripturae locis, & præsertim Malach. c. 2. & Ep. ad Hebr. 5. & plenius explicat D. Th. 3. p. q. 22. a. 1.

Hac observatione supposita, dicendum 1. Christum Dominum verum, ac proprie dictum Sacerdotem extitisse, & munere Sacerdotii vere, ac proprie functum fuisse. Id manifeste constat ex his verbis Psal. 109. *Tu es Sacerdos in æternum*, &c. & ex cap. 4. & 5. Epist. ad Hebr. ubi Apostolus de Christi Sacerdotio agit, & plenius adhuc constabit ex assertionibus sequentibus.

Dicendum 2. Christum Dominum Sacerdotii sui munus exercuisse in coena ultima, cum sub speciebus panis, & vini, incruento, & admirabili modo semetipsum Patri suo in sacrificium obtulit. Ita expresse definitum est in Conc. Trid. sess. 22. c. 1. ita etiam docuerunt SS. Patres, S. Cypr. lib. 2. Ep. 3. ad Cæcilium, ubi sic loquitur: *Jesus Christus Dominus, & Deus noster, ipse est summus Sacerdos Dei Patris, & Sacrificium Deo Patri seipsum primus obtulit, & hoc fieri in sui commemorationem præcepit*. Et S. Greg. Niss. orat. 1. de sancto Festo Paschæ, *Pro ineffabili, inquit, arcanoque Sacrificii modo, sua dispositione, & administratione præoccupat impetum violentum, ac sese ob-*

*lationem, & victimam offert pro nobis Sacerdos simul, & Agnus Dei, qui tollit peccata mundi. Quando hoc accidit? cum suum Corpus ad comedendum, & Sanguinem suum familiaribus exhibuit ad bibendum. Qua autem ratione actio illa, quam Christus Dominus in cœna exercuit, verum, & proprie dictum sit Sacrificium, plenius explicabitur in Secunda Parte hujus Operis tract. 1. cap. 4. sect. 11.*

Dicendum 3. Christum Dominum Sacerdotii quoque sui munere functum fuisse in cruce, ibique seipsum Deo Patri in Sacrificium obtulisse. Id constat manifeste ex Scripturis, ac præsertim cap. 5. Epist. ad Ephes. ubi Apost. dicit, quod *Christus dilexit nos, & tradidit semetipsum pro nobis oblationem, & hostiam Deo*. D. Thom. de eadem veritate pluribus agit 3. p. q. 22. & q. 48. ar. 3.

Verum difficultas est, quomodo Christus Dominus dici possit Sacrificium in cruce Deo Patri obtulisse. Nam ille proprie sacrificare dicitur, qui ad honorem Dei rem aliquam ita offert, ut ad eum finem eam consumat, & destruat; at Christus Dominus non obtulit seipsum eo modo in cruce; non enim seipsum in cruce interfecit, sed ab aliis interfectus est.

Ad hanc difficultatem variis modis Theologi respondent. Quidam enim dicunt, Christum Dominum sacrificium sui ipsius obtulisse, in quantum ad mortem propriam est aliquo modo cooperatus, eam scilicet non impediendo, cum potuisset impedire virtute beatitudinis animæ, qua a primo instanti conceptionis fruebatur: unde ipse dixit Jo. 10. *Nemo tollit animam meam a me (invito scilicet) sed ego potestatem habeo ponendi eam*. Alii dicunt, Christum cooperatum esse ad actionem illam, qua mors ipsi illata est, non quidem in quantum erat homo, sed in quantum erat Deus, sine cujus, ut causæ primæ, concursu actio illa fieri non potuisset. Melius tamen, & verius juxta D. Th. doctrinam respondet Gregorius a Valentia disp. 1. de Incarn. q. 22. punct. 4. ad rationem Sacrificii non esse determinate necessarium, ut ille, qui rem offert, eam etiam ipsemet conficiat, & destruat, sed sufficere, ut ab ipso offeratur, & eo consentiente, & volente conficiatur, & destruat; quod quidem perfectissime a Christo Domino in cruce peractum est, cum mortem sibi illatam volens acceptavit, & seipsum morientem tanquam hostiam in sacrificium Deo Patri obtulit.

Dicendum 4. Christum Dominum ejusdem Sacerdotii sui munere quotidie adhuc fungi per ministros suos Sacerdotes in Missæ sacrificio. Ita expresse habetur in Conc. Trid. sess. 22. cap. 2. ubi dicitur, quod *In Divino Sacrificio, quod in Missa peragitur, idem ille Christus continetur, & incruente immolatur, qui in ara Crucis semel seipsum cruenta obtulit, &c.* Idem etiam offerens Sacerdotum ministerio, qui seipsum tunc in Cruce obtulit, sola offerendi ratione diversa. Hujus vero assertionis veritas fusius explicabitur, & plenius constabit ex iis, quæ dicentur in Secunda hujus Operis Parte loco sup. cit.

## S E C T I O XII.

\* *De eximio, & honorifico Redemptoris, & Mediatoris titulo, qui in Scripturis Christo Domino tribuitur.*

**V**aria sunt sacræ Scripturæ loca, in quibus tum Redemptoris, tum Mediatoris titulus in utroque Testamento sive a Prophetis, sive ab Apostolis Christo Domino tribuitur. Ac in primis vocatur Redemptor, Job. 19. Isa. 41. 44. 47. 49. 59. Act. 7. Rom. 3. dicit Apostolus, nos esse justificatos per Redemptionem, quæ est in Christo Jesu. & Coloss. 1. idem dicit, nos habere Redemptionem in Christo per sanguinem ejus. & 1. Timoth. 2. dicit, ipsum Christum dedisse semetipsum Redemptionem pro omnibus. Additque ibidem, unum esse Mediatorem Dei, & hominum, Christum Jesum. & passim in Epist. ad Hebræos vocat illum Mediatorem novi Testamenti.

Jam quod spectat ad titulum Redemptoris, error fuit Petri Abailardi negantis, Christum redemisse genus humanum a servitute diaboli, quia, ut agebat, diabolus nullum jus acquisierat in homines per peccata illorum. Contra quem errorem S. Bern. fuse agit Ep. 191. ad Innoc. Papam, ubi pluribus Scripturæ testimoniis veritatem oppositam probat, ostenditque, Christum Dominum vere genus humanum redemisse, ac vere dici hominum Redemptorem.

Porro ad majorem veritatis illius elucidationem, observandum est ex S. Doct. 3. p. qu. 4. a. 4. hominem per peccatum duplicem contraxisse servitutem, primo ratione culpæ, per quam Deo ita juste permitte redactus erat in potestatem diaboli, & ejus servus effectus. *A quo enim quis superatus est* (inquit Apostolorum Princeps 2. Pet. cap. 2.) *hujus & servus efficitur*. Erat autem homo peccator in diaboli potestatem redactus, in quantum peccando amiserat justitiæ libertatem, & dignus effectus erat, qui in æternum privaretur omni Gratia, sine cujus auxilio neque a peccato commisso resurgere, neque alia omnia peccata in futurum, saltem toto vitæ tempore, vitare poterat. Et sic unusquisque hominum in illo miserando statu vere sibi applicare poterat illud August. Confess. lib. 8. cap. 5. *Suspirabam ligatus non ferro alieno, sed ferrea mea voluntate; velle meum tenebat inimicus, & inde catenam fecerat, & constrinxerat me*. Et hoc etiam sensu peccatores ab Apost. 2. ad Timoth. 2. dicuntur esse *in laqueis diaboli, & ab eo captivi teneri ad ipsius voluntatem*.

Secunda obligatio, seu servitus, quam contraxit homo per peccatum, est quantum ad reatum poenæ, quam pati debebat, & ad quam adstrictus erat secundum ordinem Divinæ justitiæ. *Ad servitutem enim pertinet* (ut ait S. Doct.) *quod aliquis patiatur id quod non vult, liberi siquidem hominis est uti seipso, prout vult*. Et in Jure illi, qui ad aliquam poenam damnati sunt, dicuntur *Servi poenæ*. Et ea ratio-



ne S. Aug. tract. 52. in Jo. dicit, quod *diabolus possidebat genus humanum, & homines reos suppliciorum tenebat chirographo peccatorum.*

*Quia igitur (ut loquitur S. Th. sup.) Passio Christi Domini fuit sufficiens, & superabundans satisfactio pro peccatis hominum, tam quoad reatum culpæ, quam quoad reatum pœnæ, idcirco ejus passio fuit quasi quoddam pretium, quo redempti sumus, & liberati ab utraque obligatione, & servitute. Nam ipsa satisfactio, qua quis satisfacit sive pro se, sive pro alio, pretium quoddam dicitur, quo se, vel alium redimit a peccato, & a pœna, juxta illud Danielis 4. Peccata tua eleemosynis redime. Christus autem satisfecit, non quidem pecunias dando, aut aliquid simile, sed dando id, quod fuit maximum, scilicet seipsum pro nobis. Unde Apostolus: Non corruptibilibus (inquit) auro, vel argento redempti estis de vana vestra conversatione, &c. sed pretioso Sanguine quasi Agni immaculati, & incontaminati Christi.*

Ex quo intelligitur, qua ratione Passio Christi Domini fuit vera redemptio, & ipse Christus verus hominum Redemptor dictus est, & simul refellitur error Abaillardi. Quamvis enim verum sit, diabolum in homines nullum jus acquisivisse per peccata illorum, hominesque quantumcunque peccatores semper Divinæ potestati subiectos remanere, hoc tamen non obstat, quin sit etiam verum, peccatores dæmonum tentationibus, & suggestionibus in malum consentientes eorundem servituti, Divina id exigente justitia, subdi; sicut illi, qui ad metalla, aut ad remos damnati sunt, humanæ justitiæ executoribus, qui ejusmodi operibus præsumunt, subduntur. Æquum est enim, ut ii, qui optimo Patri obedire, ejusque onus leve, & jugum suave ferre noluerunt, in pœnam inobedientiæ sævissimi tyranni servituti mancipentur, coganturque vel inviti ejus durissimum jugum portare.

Unde solvitur alia objectio ejusdem Abaillardi dicentis, pretium redemptionis hominum non fuisse persolutum Diabolo, quod tamen fieri debuisse videtur, ut ab ejus servitute redimerentur. Respondetur enim, quod cum diabolus jus nullum haberet in peccatores, sed tantummodo se haberet ut executor Divinæ Justitiæ in illos, nihil pro redemptione illorum ei solvi debebat; sed ipsi Justitiæ Divinæ, cui debitores erant, & cui proinde tam pro culpa, quam pro pœna satisfacere debebant.

Quæres, qua ratione dici possint redempti illi, qui a Deo sunt reprobati, cum diaboli servituti sint in æternum mancipati. Respondetur, illos vere fuisse redemptos, quantum ex parte Christi Domini requisitum fuit, hoc est pretium ab eo pro ipsorum liberatione fuisse persolutum, Gratiasque sufficientes ad salutem acquisitas esse virtute meritorum ejus, ipsisque oblatas, ut supponimus ex dicendis in tractatu sequenti. Quia vero Gratiis illis cooperari noluerunt, nec redemptione oblata uti, idcirco in æternam illam servitutem devoluti sunt, non defectu Redemptoris, sed vitio prævæ volun-

voluntatis, quæ redemptionis Gratiam aut repudiavit, aut neglexit.

Quæres iterum, quibus præsertim actibus Christus Dominus redemptionem hominum perfecit. Respond. Christum Dominum Redemptoris officio functum fuisse omnibus humanis, ac liberis actibus suis, idque ab ipso Incarnationis momento usque ad mortem, ita tamen, ut quamvis singuli illi actus ex se sufficientissimi fuerint ad redemptionem illam perficiendam, ea nihilominus Dei voluntas fuerit, ut non nisi per Christi passionem, & mortem in Cruce redemptio illa perficeretur. Et quidem, quod Christus per totam vitam huic Redemptionis operi incubuerit, vel ex illo ejus dicto Jo. 17. satis intelligi potest, *Opus consummavi, quod dedisti mihi ut faciam*, ubi dicit, se consummasse, id est, jam, cum morti vicinus esset, consummatum esse opus redemptionis, quod scilicet jam ante inchoaverat. Quod autem non nisi per passionem ejus, & mortem in Cruce, opus illud redemptionis consummatum re ipsa fuerit, patet ex iis Scripturæ locis, quibus illud quasi pactum dicitur, ut per ejus passionem, & mortem in Cruce perficeretur nostra redemptio, ut Isa. 53. *Si posuerit pro peccato animam suam, videbit semen longævum.* & Jo. 12. *Nisi granum frumenti cadens in terram mortuum fuerit, ipsum solum manet, si autem mortuum fuerit, multum fructum affert.* & Luc. 24. *Nonne oportuit pati Christum, & ita intrare in gloriam suam?*

Jam quod spectat ad titulum Mediatoris, dicendum est, illum Christo Domino ita convenire, ut solius Christi proprium sit esse Mediatorem inter Deum Patrem, & homines, mediatione scilicet redemptionis, in quantum (ut loquitur S. Doctor 3.p.q.26. art.1.) homines Deo reconciliavit, ipsum placando, & pro peccatis eorum ipsi satisfaciendo. Quod docuit Apostolus 1. Tim. 2. cum dixit: *Unus est Mediator Dei, & hominum homo Christus Jesus, qui dedit semetipsum redemptionem pro omnibus*, quibus verbis aperte declaravit, Christum Dominum eatenus fuisse Mediatorem, quatenus nos redemit, ac proinde ea ratione, quæ illius solius propria est, fuisse unicum, & singularem Mediatorem.

Quod tamen non obstat, quin alii etiam dicantur Mediatores aliquo modo, & secundum quid, in quantum scilicet (ut dicit idem S. Doctor supra) cooperantur ad unionem hominum cum Deo dispositive, & ministerialiter, v.g. Sancti in cælo, in quantum intercessionibus suis varias nobis Gratias obtinent, quibus ad illam cum Deo unionem juvamus, & Sacerdotes in terra, qui Christi personam gerunt, & vice illius Sacramenta, & alia sanctificationis media nobis exhibent. Ex quo duplex differentia innotescit inter mediationem Christi, & aliorum. Nam Christus est Mediator per Redemptionem, alii per intercessionem, aut ministerium aliquod: Christus est Mediator per seipsum, & ex propriis meritis; Sancti vero non nisi per ipsum Christum, & ejus merita, sine quibus nihil possunt apud Deum.

C A.

## CAPUT VII.

*De adoratione Christo Domino debita,  
Nec non*

*De veneratione Sanctissimæ Matri ejus, caterisque Sanctis, ac  
eorum reliquiis, & imaginibus exhibenda.*

## SECTIO I.

*Quenam adoratio humanitati Christi Domini debeatur.*

1. **A**D clariorem eorum, quæ dicenda sunt, intelligentiam, notandum 1. est ex S. Doctore 2.2. q. 84. 91. & 103. inter laudem, honorem, & adorationem hoc esse discriminis, quod laus sit quædam excellentiæ testificatio, quæ in verbis consistit; honor etiam in factis, & aliis signis externis; adoratio vero, præter illam testificationem excellentiæ, includit essentialiter submisionem aliquam erga id, quod adoratur. In quo differt a laude, & honore; siquidem laudamus, & honoramus etiam æquales, vel inferiores, non adoramus vero nisi superiores. Unde adoratio definitur a S. Damasc. lib. 3. cap. 4. *Animi cedentis, demissi, & humilis significatio.*

Notandum 2. ad completum actum adorationis tria ex parte hominis requiri. 1. ut intellectus agnoscat excellentiam ejus, qui adoratur. 2. ut voluntas internum erga eundem affectum concipiat. 3. denique, ut aliquo exteriori actu submisionem aliquam erga eum protestetur.

Notandum 3. duplicem in universum esse adorationem, sicut duplex excellentia est, ratione cujus potest aliquis nobis esse superior, una increata, altera creata.

Adoratio illa, quæ ratione increatæ excellentiæ defertur, usu in Ecclesia communiter recepto Latria vocatur, quo vocabulo significatur cultus religiosus, qui soli Deo habetur in signum, & protestationem supremi domini, quod in res omnes creatas obtinet. Sicque sumitur in Scriptura, in qua falsorum Deorum cultus nomine Idololatriæ exprimitur. Act. 17. *Videns idololatriæ deditam civitatem.* & falsorum Deorum cultores, idololatræ vocantur. 1. Cor. 10. *Neque idololatræ efficiamini*, ideo, quod cultum illum latriæ, quæ soli Deo debetur, ad idola transferrent. Et eodem etiam sensu illud latriæ vocabulum sumitur in 7. Synodo generali act. 3. 4. & 6. & in Conc. Trid. sess. 13. c. 5. & apud S. Basil. in cap. 1. Isa. & S. Aug. l. 10. de Civ. c. 1. & l. 15. cont. Faust. c. 9. Imo & ipsa vox adorationis passim ex communi usu jam recepta est ad significandum illum cultum, qui soli Deo debetur. Unde dicimus, solum Deum esse adorandum.

2. Cultus autem ille religiosus, qui ob creatam excellentiam defertur,  
com-



communiter *dulia* vocatur, quo nomine ex usu Ecclesiæ significatur servitus, & submissio, non quælibet abjecta, & vilis, qualis est mancipiorum, neque etiam honoraria, & politica, qualis est subditorum erga Principes, & inferiorum erga superiores, sed religiosa, & pia, quæ scilicet Sanctis deferitur ob eorum virtutem, & sanctitatem. Et quoniam inter Sanctos varii, & inæquales sunt gradus sanctitatis; ideo iis, qui meritis, ac virtutibus insigniores fuerunt, specialis aliquis honor deferitur, qui ex communi usu *hyperdulia* nomine significatur, quo quidem honoris genere sanctissimam Virginem Deiparam præ aliis omnibus Sanctis colendam esse, Orthodoxi omnes unanimiter consentiunt.

Notandum 4. discerni non posse ex actu exteriori, utrum cultus, qui deferitur, latriæ sit, vel *dulia*. Iisdem enim actibus, & signis externis, quibus Deum adoramus, Sanctos etiam sæpissime colimus. Sicut enim Deo, sic & illis caput aperimus, genua flectimus, &c. Quare hoc interno voluntatis affectu discernendum est. Si enim exterior ille, v.g. genuflexionis actus dirigatur ad protestandam infinitam Dei supra omnes creaturas eminentiam, nostramque omnimodam ab illo dependentiam, erit adorationis, seu latriæ actus: si vero illa genuflexione intendamus cultum religiosum alicui Sancto ob ejus virtutes, vel gloriam deferre, erit actus *dulia*. His prænotatis, pro quæst. propositæ resolutione

3. Dicendum est, Christi Domini humanitatem Verbo Divino hypostatice unitam eadem adoratione latriæ, quæ ipsi Verbo Divino debetur, esse adorandam. Ita S. Th. 1. p. q. 25.

Probatur 1. ex Concilio Ephesino can. 8. ubi definitur, Christum hominem Deum unam esse adoratione adorandum, quod S. Cyrillus, qui huic Concil. nomine Summi Pontificis præfuit, clarius explicavit lib. 1. de Fide ad Reginas, ubi docet, *in Christo non esse unam naturam, quæ adoretur, & alteram, quæ non adoretur, sed utranque simul adorari unica adoratione*. Item ex 2. Synodo generali collat. 8. can. 9. *Si quis duas adorationes introducit, & non una adoratione Verbum incarnatum cum propria carne adorat, anathema sit*.

Probatur 2. ex S. Amb. lib. 3. de Spiritu sancto c. 12. ubi explicans illa verba Psal. 98. *Adorate scabellum pedum ejus: Per scabellum*, inquit, *terra intelligitur, per terram autem caro Christi, quam hodie quoque in mysteriis adoramus, & quam Apostoli in Domino Jesu adoraverunt; neque enim divisus est Christus*. Et S. August. orat. in eundem Psalm. Exponens, inquit, Scriptura, *quid sit scabellum pedum ejus, dicit, Terra autem scabellum pedum meorum. Anceps factus sum, timeo adorare terram, ne damnet me, qui fecit cælum, & terram, &c. Fluctuans converto me ad Christum, & invenio, quomodo sine impietate adoretur terra. Suscepit enim terram de terra, quia caro de terra est, & de carne Mariæ carnem accepit. Et quia in ipsa carne hic ambulavit, ipsamque carnem nobis manducandam ad salutem dedit, nemo autem illam carnem manducat, nisi prius adoraverit; in-*

*ventum est, quomodo adoretur scabellum pedum Domini, & non solum non peccemus adorando, sed peccemus non adorando.*

Objicies, soli Deo deberi adorationem, & latriæ cultum, humanitatem autem Christi, quantumvis unitam hypostatice Deo, Deum tamen non esse.

Respondetur, duplicem esse adorationem, unam absolutam, quæ fit propter excellentiam inexistentem illi, qui adoratur, seu quando aliquid adoratur propter se, alteram vero respectivam, quando aliquid adoratur propter aliud, seu propter excellentiam inexistentem alteri, ad quod habet specialem ordinem, & habitudinem; & primo quidem genere adorationis adorari debere Christi Divinitatem, imo ipsum Christum, cum per hoc nomen connotetur Divinum Suppositum, quod propter se, & ratione propriæ increatæ excellentiæ adorari debet, secundo vero adorationis genere humanitatem ejus adorandam esse, hoc est non propter se, sed propter Verbum Divinum, cui conjuncta est, non accidentaliter, sed vera, substantiali, & hypostatica unione. Sicque humanitatem Christi honore Divino affici debere affirmant SS. Patres, ut S. Athan. lib. de Incarn. Christi pag. 6. ubi de Corpore Christi loquens ait; *Illud Divina adoratione coli, quia increati Corpus factum est.* Et S. Aug. ser. 58. de verb. Dom. Ego, inquit, *Dominicam Carnem, imo perfectam in Christo humanitatem propterea adoro, quod a Divinitate suscepta, atque Deitati unita est.*

4. Quæres, utrum humanitas Christi Domini per se præcise sumpta, & considerata solum secundum excellentiam aliquam creatam, quæ ipsi inest, puta ratione Gratiæ sanctificantis, aut virtutum, debeat cultu latriæ, an aliquo alio adorari.

Respondetur ex S. Thom. q. 15. ar. 3. ad 2. humanitati Christi Domini, ut sic, non deberi latriæ cultum, sed tantum hyperdulæ, quia in illa hypothese nihil in ea consideratur, nisi creatum, quod proinde latriæ cultu adorari non debet.

Quamvis autem speculative hoc verum sit, sapienter tamen monet Philippus Gammachæus ad præfatam quæst. 25. moraliter, & præctice loquendo istas præcisiones, & abstractiones non esse admitendas, sed Christum perpetuo adorandum supremo latriæ cultu, cum vere, & a parte rei sit semper homo Deus, istamque quæstionem non metaphysice, sed moraliter, ac theologice esse tractandam, nec ludendum in rebus tanti momenti, ne forte occasio vel scandali, vel erroris aliquibus præbeatur. Adde, quod Ecclesia nunquam solet humanitatem Christi hoc modo spectatam venerari, sed semper tanquam conjunctam, & unitam Verbo Divino adorare. Unde S. Athanasius orat. cont. Arianos, *Adoraturi, inquit, non seponimus Verbum a carne.*

## S E C T I O II.

*Quomodo Sancti a nobis colendi sint.*

1. **C**UM ( ut ait S. Hier. Epist. 53. ad Riparium ) *Honor servorum redundet ad Dominum, & ad gloriam Christi summi totius Ecclesiæ capitis pertineat veneratio membrorum ejus nobilioribus exhibita, ideo post explicationem eorum, quæ ad humanitatis ipsius adorationem pertinent, agendum est de cultu illius Sanctis debito.*

Dicendum igitur 1. Sanctis tam Angelis, quam hominibus, æterna gloria in cœlo perfruuntibus, cultum aliquem sacrum, & religiosum esse reddendum, longe quidem minorem eo, qui Deo debetur, sed tamen majorem cultu illo civili, & politico, qui hominibus quantæcunque dignitatis in hac vita defertur.

Probat. 1. ex Scriptura. Genes. 18. & 19. ubi Abraham, & Loth dicuntur Angelis sibi apparentibus honorem aliquem singularem, & religiosum detulisse. Idem dicitur de Josue c. 5. & de Patre, ac Matre Samsonis Judic. 13.

Probat. 2. ex SS. Patribus, qui id unanimiter docent, ut Greg. Nissen. orat. in S. Theod. Mart.: *Cui Regum, inquit, talis honor habetur? quis ex iis, qui supra modum inter homines excellere visi sunt, tali memoria celebratur? quis Imperatorum adeo honoratur, ut hic miles pauper? &c. & S. Damasc. l. 4. de Fide c. 16. An non honorandi, qui totius humani generis patronos se profitentur, ac Deo nostri causa supplicant? honorandi certe, & quidem ita, ut in eorum nomine templa Deo extruamus.*

Probat. 3. ex eo ritu, qui in universa Ecclesia semper viguit, templa, & Basilicas in honorem Sanctorum ædificandi, illorumque festa celebrandi; cujus rei fidem faciunt omnes fere SS. Patres, & Ecclesiastici Scriptores, qui videri possunt apud Judocum Coccium, tom. 1. l. de Sanctis Ecclesiæ, ar. 13. & 14. Et certe vel ipsa antiquissima Basilicarum, & sacrorum ædificiorum monumenta in honorem Sanctorum Deo consecrata, quæ ubique terrarum visuntur, satis aperte testantur, Sanctis ab universa Ecclesia cultum religiosum semper fuisse delatum, minorem quidem illo, qui Deo debetur, sed longe majorem quovis honore politico, & civili, qui Principibus, & Regibus in terra defertur.

2. Dicendum 2. Sanctos gloria cœlesti perfruentes a nobis esse invocandos, & hanc invocationem ad cultum ipsis debitum pertinere.

Probat. 1. ex Scriptura. Gen. 48. ubi Jacob benedicens filiis Joseph, Angelum suum custodem invocatur, ut ipse illis benedicat. Exod. 32. Moyses sic orat: *Recordare, Domine, Abraham, Isaac, & Jacob, servorum tuorum.*

Probat. 2. ex Concilio Chalcedonensi aet. 11. ubi Patres Concilii sic loquuntur: *Flavianus post mortem vivit, martyr pro nobis orat.* Et in 7. Synodo generali aet. 6. hæc verba habentur: *Cum timore omnia*



*omnia agamus, postulantes intercessionem incontaminatæ Deiparæ, & sanctorum Angelorum, omniumque Sanctorum.*

Probatur 3. ex antiquo usu Litaniarum, quæ in honorem Sanctorum indicebantur, de quo ritu mentio fit in variis Conciliis, ut in Concilio Aurelianensi I. can. 29. Toletano V. can. 1. Bracarenſi II. can. 9. Moguntino sub Carolo Magno can. 33. Quæ quidem Concilia ante mille annos sunt celebrata.

Probatur 4. ex SS. Patribus, qui & ipsi Sanctos invocaverunt, ut S. Athanas. serm. in Evang. de Sanctissima Deipara, seu de Annuntiatione, in ejus fine ipsam Sanctam Deiparam invocat; S. Greg. Nissen. orat. in S. Theodorum, ipsum etiam Sanctum invocat. Idem facit S. Greg. Nazianz. orat. in S. Athanas. quem in fine invocat, & S. Hieron. in Epitaphio S. Paulæ eam similiter invocat.

3. Dicendum 3. Sanctos in cælo pro nobis orare, & orando patrocinari, ac subvenire.

Probatur 1. ex Scriptura. 2. Machab. 15. *Hic est Jeremias Propheta Dei, qui multum orat pro populo, & pro universa sancta Civitate.* & S. Pet. Epist. 2. c. 1. *Dabo, inquit, operam, & frequenter habere vos post obitum meum, ut horum memoriam faciatis.*

Probatur 2. ex S. Basil. Epist. ad Julianum Apostatam. *Suscipio, inquit, sanctos Apostolos, Prophetas, Martyres, qui pro me apud Deum supplicant, quo per illorum mediationem propitius mihi sit Deus.* Et S. Greg. Nazianz. orat. 20. in laudem ipsius S. Basilii: *Ac nunc ille quidem in cælo est, pro populo preces fundens.* Neque enim ita nos reliquit, ut prorsus reliquerit. Eandem veritatem fuse probat S. Hieronymus in toto libro contra Vigilantium hæreticum, qui Sanctos ex hac vita functos pro nobis orare negabat.

Porro circa illam Sanctorum intercessionem, & (ut loquitur S. Basilius) mediationem, observandum est, illam nullo modo derogare qualitati Mediatoris, quæ Christo Domino competit, quamque illi Apost. tribuit 1. Tim. 2. *Unus est Mediator Dei, & hominum, Christus Jesus,* tum quia loquitur ibi Apostolus de mediatione redemptionis, quod ex verbis immediate sequentibus patet, *Qui dedit semetipsum redemptionem pro omnibus, qua ratione solus, & unicus Mediator est Christus:* tum quia quocunque modo dicitur Mediator, semper illi hæc dignitas salva, & integra manet, cum Sanctorum intercessionem, & interventionem non nisi ex ipsius Christi meritis, & ex unione Sanctorum cum illo, ut capite valorem hauriant. Unde quantumcunque Ecclesia suffragia Sanctorum apud Deum impendat, semper tamen orationes, ac petitiones suas concludit his verbis: *Per Dominum nostrum Jesum Christum, &c.* ex quibus evidens est, Sanctorum mediationem, & intercessionem Christi Domini honori, ac dignitati nullatenus officere, imo vim omnem suam ab ejus mediatione accipere.

4. Quæ-

4. Quæres, quomodo Sancti in coelo audiant, & cognoscant preces, & supplicationes, quæ ad ipsos a nobis diriguntur.

Variæ sunt super hac re SS. Patrum, & Doctorum sententiæ, quas refert Bellarm. l. 1. de SS. beatit. c. 20.

Quidam enim existimant, id fieri per relationem Angelorum, qui nunc a coelis ad nos descendunt, nunc a nobis ad coelos ascendunt, & hunc modum attingit S. Aug. l. de cura pro mortuis c. 15.

Alii dicunt, Sanctorum animas, sicut etiam Angelos, mira quadam celeritate naturæ quodammodo ubique adesse, & sic per se preces supplicantium posse audire, quem modum videtur innuere S. Hieron. lib. cont. Vigilant.

Alii denique probabilius asserunt, Sanctos vel in Essentia Divinæ clare visa preces illas cognoscere, vel per speciales revelationes sibi a Deo factas easdem preces percipere. Ita S. Greg. l. 12. moral. c. 13. S. Th. 2. 2. q. 83. a. 4. & 3. p. q. 10. a. 10. & S. Aug. sup. c. 15.

## S E C T I O III.

*Qualis cultus Sanctissimæ Virgini Deiparæ Mariæ debeat.*

1. **C**Um (ut ex ante dictis constat) honoris, ac cultus, qui Sanctis deferendus est, mensura, & modus ex magnitudine sanctitatis, virtutum, ac meritorum accipiendus sit; hinc colligi potest, qualis honor, & cultus Sanctissimæ Virgini debeat, cum ejus sanctitas, virtus, ac meritum supra omnes alios Sanctos longe superemineat. Ut tamen certius, & evidentius istud innotescat, aliquot speciales sanctitatis, & excellentiæ titulos in illa Sanctissima Virgine hic adnotabimus, ex quibus inferre quivis poterit, quo Religionis cultu prosequenda sit. *Neque enim (ut recte dixit S. Bern. Ep. 174) Virgo Regia falso, aut fucato eget honore, cum veris honorum titulis, & infulis dignitatum decora sit.*

Primus igitur excellentiæ titulus ducitur ex singulari ejus innocentia, quæ consistit in eo, quod Sanctissima Virgo privilegio speciali, nec ulli alteri Sanctorum unquam concessa, ab omni peccati, sive originali, sive actuali labe prorsus immunis extitit.

Quod nullum unquam peccatum actuale, ne veniale quidem commiserit, docet S. Th. 3. p. q. 27. a. 4. estque communis totius Ecclesiæ sensus, ut habetur in Conc. Trid. sess. 6. c. 23. Huic etiam veritati suffragatur S. Aug. l. de natura & Grat. c. 36. ubi dicit de Sanctissima Virgine Maria loquens, *De qua propter honorem Domini nullam prorsus, cum de peccatis agitur, habere volo mentionem.* Et S. Bernard. Epist. 174. *Decuit, Reginam Virginum singulari privilegio sanctitatis absque omni peccato ducere vitam,*

2. Quod autem etiam originalis peccati maculam nunquam contraxerit,

Pro-

Probari potest ex iis omnibus Scripturæ locis, in quibus illius singularis, & omnimoda puritas, & innocentia significatur, ut Cantic. 4. *Tota pulchra es, amica mea, & macula non est in te*; atqui tota pulchra non esset, nec maculæ omnis expers, si originali peccato foedata fuisset. Ibidem vocatur *Hortus conclusus, fons signatus*. Et c. 6. *Una est columba mea, perfecta mea*. Item ex illis ad eandem sanctissimam Virginem Angeli verbis S. Luc. c. 1. *Ave gratia plena, Dominus tecum*. Quibus (ut dicit S. Aug. ser. 11. in natali Dom.) ostendit ex integro iram primæ sententiæ exclusam, & plenam benedictionis Gratiæ restitutam.

Probari etiam potest ex eo, quod idem S. Aug. l. 5. cont. Julian. c. 9. dicit, illum, qui in ætate adulta peccatum nullum commisit, nullum etiam in infantili contraxisse. Unde sequitur, cum, ex eodem S. Aug. supra, Beatissima Virgo nullum in vita sua peccatum commiserit, nullum etiam in origine sua contraxisse. Et S. Ansel. l. de conceptu Virginali c. 18. *Decens, inquit, erat, ut Sanctissima Virgo ea puritate niteret, qua major sub Deo nequit intelligi*. & in c. 12. ad Cor. *Omnes mortui sunt in peccatis, sive originalibus, sive voluntate additis, nemine prorsus excepto, dempta Matre Dei*. Et Petrus Damian. serm. de Assumptione, *Caro Virginis, inquit, ex Adam assumpta, maculas Adæ non admisit*.

Accedit auctoritas Xysti IV. Summi Pontificis in Extravagan. *Cum præexcelsa*, de reliquiis, & veneratione Sanctorum, ubi Fideles ad celebrationem Immaculatæ Conceptionis Sanctissimæ Virginis (sic enim loquitur) etiam Indulgentiarum largitione invitatur.

Et quamvis nihil adhuc ab Ecclesia super hac re definitum fuerit, nec proinde censendus esset Hæreticus, qui oppositum teneret, ut expresse declaravit idem Xystus IV. in Extravagante, *Grave nimis*, quam renovavit Conc. Trid. sess. 5. c. 5. sententia tamen illa, quæ asserit Sanctissimæ Virginis ab omni originali peccato exemptionem, adeo vera est, ut Paulus V. oppositum asserere in Concionibus, Læctionibus, aut aliis actibus publicis prohibuerit, quam prohibitionem Gregorius XV. ejus successor etiam ad privata colloquia, & scripta extendit.

3. Dices, hinc sequi, Beatissimam Virginem a Christo Domino non fuisse redemptam. Cum enim nullum unquam peccatum actuale, aut originale incurrerit, videtur; quod Christi Domini redemptione non indiguerit.

Respondetur, illam indiguisset Christi Domini redemptione, non quidem ut a peccato liberaretur, sed ut a peccato præservaretur, ac proinde illam excellentiori modo præ omnibus Adæ posteris a Christo Domino fuisse redemptam. Cum enim ex modo Conceptionis suæ, utpote vera Adami filia, & ex eo via generationis ordinaria ortum ducens, peccatum originale contrahere deberet, quod illud non contraxit, Christo Redemptori debitorix fuit, cum propter prævisa ejus merita ab illo peccato penitus præservata fuerit.

Secun-



Secundus excellentiæ titulus ducitur ex perfectissima Gratiarum omnium plenitudine, & eminentissima sanctitate, qua B. Virgo ceteros omnes Sanctos tam Angelos, quam homines longe superavit.

Constat 1. ex illis verbis, quibus ab Angelo dicta est *Gratia plena*, & a Beata Elisabeth *Benedicta inter mulieres*, item ex iis, quæ de seipsa Sanctissima virgo dixit, *Beatam me dicent omnes generationes, quia fecit mihi magna, qui potens est*.

Constat 2. ex eo, quod universa Ecclesia professæ est in 7. Synodo generali act. 5. his verbis, *Si quis non confitetur, Sanctam semper Virginem Mariam, proprie, ac vere Dei Genitricem, sublimiorem esse omni visibili, & invisibili creatura, anathema sit*.

4. Accedunt plurima eximia, & præclara Sanctissimæ Virginis elogia a SS. Patribus prolata, quibus illius supra omnes Sanctos eminentiam singularem aperte testantur. Aliquot illustriora hic proferemus. S. Epiph. serm. de laudibus Deiparæ ipsam alloquens, *Quid dicam, inquit, aut quod proloquar, & quo pacto beatam prædicabo gloria radicem? solo enim Deo excepto, cunctis aliis superior existit*. S. Ephrem orat. de laudibus ejusdem, illam vocat *Optimam, præcellentissimam, sublimiorem Cælitibus, honoratiorem Cherubim, Seraphim sanctiorem, & incomparabiliter cunctis aliis supernis exercitibus superiorem*. S. Gregorius Neocæsar. hom. in Annunciat. B. Virg. Maria sic *Gratia plena* dicitur, quod in illa totius Gratiæ thesaurus recondideretur. S. Ambr. in c. 2. S. Luc. Bene *Gratia plena* dicitur, quæ sola Gratiâ, quam nullæ alia meruerat, consecuta est, ut Gratiæ repleatur Auctore. S. Petrus Chrysol. ser. 143. Bene *gratia plena*, quia ceteris per partes tribuitur, Mariæ vero simul se totam infudit Gratiæ plenitudo. S. Chrysost. or. in Hypapante vocat illam *Mundi miraculum*, S. Damasc. orat. de Assumpt. *Abyssum Gratiæ, & sanctitatis*. S. Anselm. lib. de excell. Virg. c. 8. dicit, in B. Virgine fuisse *quandam immensitatem gratiæ, & gloriæ*, S. denique Gregor. Papa explicans illa verba Isa. 2. *Erit in novissimis diebus preparatus mons Domini in vertice montium, Potest, inquit, hujus montis nomine Beatissima semper Virgo Maria designari. Mons quippe fuit, quæ omnem electæ creaturæ altitudinem electionis suæ dignitate transcendit. An non mons sublinis Maria? quæ, ut ad Conceptionem Verbi æterni pertingeret, meritorum verticem supra omnes Angelorum choros usque ad solium Deitatis erexit?*

Ex quibus S. Gregorii verbis colligitur, probabilissimum esse, quod aliqui Doctores existimant, Gratiâ illam sanctificantem, quæ Beatissimæ Virgini in primo instanti conceptionis collata fuit, majorem, ac pleniorē extitisse Gratiâ consummata cujuslibet etiam maximæ Sancti. Quod si tanta fuit Mariæ Gratiâ in primo ingressu, quantam in progressu fuisse existimare debemus? cum præsertim nullum vel momentum vitæ otiosum in ea fuerit, fidelissimeque, ac perfectissime Gratiis acceptis cooperata sit.

5. Tertius denique, & ultimus excellentiæ titulus desumitur ex dignitate Maternitatis Dei.

Constat enim, illam esse vere, & proprie Dei Matrem, quia scilicet is, qui ex ea natus est, sicut est verus homo, sic etiam verus Deus est, ut ex ante dictis patet; & proinde cum verus Deus ex ea natus sit, inde sequitur, illam esse veram Matrem Dei. Et idcirco hanc in ea dignitatem universa Ecclesia agnovit in Concilio Ephesino, ubi can. 1. anathema dicitur in eum, qui sanctam Virginem Dei genitricem esse non confitetur. Et in 5. Synodo generali act. 4. idem anathema rursus profertur in eum, *qui sanctam, & gloriosam semper Virginem proprie, & vere Genitricem Dei esse non confitetur.*

Neque solum Beata Virgo vere, & proprie Dei Mater extitit, sed præterea dignissima fuit, quæ ad illam maternitatem divinitus eligeretur: hancque proinde meritis suis, si non de condigno, certe de congruo consecuta est. Ita S. Ambr. l. 2. de Virg. *Maria*, inquit, *digna extitit, ex qua Filius Dei nasceretur.* Et S. Hieron in Ep. ad Eustochium de custodia virginittis, *Tantæ, inquit, puritatis extitit Maria, ut Filii Dei Mater effici mereretur.* Et universa Ecclesia in quadam Antiphona id ipsum profitemur.

Ex hac autem dignitate Matris Dei, quam sic promeruit, & cujus sublimitas nec dici, nec concipi potest, duplex adhuc excellentia derivatur. Prima, quod ratione illius dicatur, & vere sit omnium creaturarum, etiam sanctissimarum, & in altissimo gloriæ gradu existentium, Regina, & Domina (prout ab Ecclesia honorifice nuncupatur) ab iisque proinde cultum, & honorem tantæ majestati condignum recipiat. Secunda, quod ratione ejusdem maternitatis ipsemet Dei Filius illi se subjecerit, & (ut testatur Evangelista) subditus illi esse voluerit. His igitur paulo fusius explicatis, restat, ut videamus qualis cultus sanctissimæ Virgini ratione tantæ, & tam sublimis excellentiæ debeat. Pro cujus resolutione

6. Dicendum est, sanctissimam Virginem singulari, & maxima præ omnibus aliis Sanctis veneratione, seu hyperdulia colendam esse tam publice, quam privatim. Ita S. Th. 3. p. q. 25. ar. 5.

Ratio est, quia veneratio, & cultus (ut jam dictum est) excellentiæ, ac sanctitati correspondere debet; atqui excellentia, & sanctitas Beatissimæ Virginis omnium aliorum Sanctorum excellentiæ, ac sanctitati longe præeminet, ut ex titulis supra explicatis constat; ergo cultus illi debitus longe major esse debet eo cultu, qui aliis quibuscunque Sanctis defertur.

Quæres, an præter cultum hyperduliæ, possit etiam cultus latriæ exhiberi sanctissimæ Virgini, ratione unionis illius, quam inter illam, & Filium ejus Christum Dominum esse concipimus.

Respondetur negative cum S. Th. ar. 5. sup. cit. Quamvis enim metaphysice loquendo, aliquo sensu possit adorari adoratione aliqua respectu-

ſpectiva, moraliter tamen, & practice loquendo, id fieri non debet, propter periculum erroris, & ſcandali. Unde merito S. Epiph. hæreſ. 78. & 79. reprehendit, & hæreſeos arguit aliquas mulieres in Syria, quæ Beatæ Virgini in ſignum adorationis libationes quaſdam offerebant.

7. \* Jam verò cum inter plurima cultus, ac venerationis officia, quæ univerſa Eccleſia ſanctiſſimæ Virgini exhibet paſſim in precibus, & doxologiis diurnis, & nocturnis, ſalutationem Angelicam in ejus honorem ſæpius illi offerat, non erit inutile breviffimam hic verborum, quibus hæc ſalutatio conſtat, explicationem ſecundum mentem Sanctorum Patrum attexere.

Ave, ideſt ſalve, ſeu gaude. Non ſimplex, fateor (inquit S. Petrus Chryſol. ſer. 140.) vel conſueta fuit iſta ſalutatio, ſed omni admiratione digna; ſiquidem venerationis fuit delatio, oblatio muneris, ſamulatus obſequii. Injungitur (inquit S. Bern. ſer. de Annunc.) nova legatio Angelo Gabrieli, & novam profeſſa virtutem novæ ſalutationis honoratur obſequio. Antiqua excluditur maledictio mulierum, novam nova Mater accipit benedictionem.

Maria. Dignitas Virginitatis (inquit S. Chryſol. ſup.) annuntiatur ex nomine. Nam Maria Hebræo ſermone, Latine domina dicitur. Hoc nomen Maria interpretatum (inquit S. Bern. ho. 2. in Miſſus eſt) Maris Stella dicitur, & Matri Virgini valde convenienter aptatur. Ipſa namque optiſſime ſideri comparatur, quia ſicut ſine ſui corruptione ſidus ſuum emittit radium, ſic obſque ſui læſione Virgo parturit Filium. Nec ſideri radius ſuam minuit claritatem, nec Virgini Filius ſuam integritatem.

Gratia plena. Singulis (inquit S. Chryſol. ſup.) Gratia ſeſe per parietes largita eſt, Maria vero ſe ſimul totam infudit Gratia plenitudo. Vere Gratia plena (inquit S. Hieron. apud S. Thom. in caten. aur.) per quam largo Sancti Spiritus imbre ſuperfuſa eſt omnis creatura.

Dominus tecum Cum Deus ſit cum omnibus Sanctis (inquit S. Bern. ho. 3. in Miſſus eſt) ſpecialiter tamen cum Maria eſt, cum qua utique tanta ei conſenſio fuit, ut illius non ſolum voluntatem, ſed etiam carnem ſibi conjungeret, ac de ſua, Virginisſque ſubſtantia unum Chriſtum efficeret.

Benedicta tu in mulieribus. Quia (ut ait S. Bern. ſup.) illam generalem maledictionem evaſit, & ſingularem conſecuta eſt benedictionem &c. & in terris ab Angelo benedicta, a cunctis generationibus merito beatæ prædicatur. Vel (ut loquitur S. Aug. ſer. 2. de Annunc.) ideo in mulieribus benedicta, quia vitam & viris, & mulieribus peperit.

Et benedictus fructus ventris tui. Vere (inquit S. Bern. ſup.) benedictus, in quo benedictæ ſunt omnes gentes. Benedictus Fructus (inquit Andreas Cretenſis ſer. in ſalut. Ang.) ex quo emanant fontes aquæ ſalientis in vitam æternam, Fructus, ex quo vitalis panis Domini Corporis, & ſalutare immortalitatis poculum conficitur.

8. Additur huic ſalutationi ex priſco Eccleſiæ uſu brevis precatuncula, qua hujus ſanctiſſimæ Virginitatis interceſſionem poſtulamus toto



huius vitæ tempore, sed præsertim in extremo illius exitu, ac novissima mortis hora. Quod & antiquos Patres peculiari devotionis affectu fecisse constat, inter quos S. Ephrem, qui ante 12. sæcula vixit, orat. ad Sanctissimam Virginem, sic eam precabatur: *Adesto mihi nunc, & semper, o Virgo Dei Genitrix, Mater misericordiæ, benigna, & clemens, in præsentem quidem vitæ cursu protectrix, & auxiliatrix, ac in extremo vitæ articulo miseram animam meam conservans, & tenebrosos, atque horrendos pessimorum demonum insultus ab ea procul repellens.*

## S E C T I O IV.

*Qualis veneratio imaginibus, & reliquiis exhibenda sit.*

1. **S**upponimus, hanc esse differentiam imaginis, & idoli ( ut recte docet, & probat Bellarm. lib. 2. de Sanctis c. 5. ) quod imago sit vera similitudo rei alicujus, ut cum pingitur homo, equus, &c. unde & imago ab imitando dicta est, idolum vero sit falsa similitudo, quæ repræsentat id, quod re vera non est, ut cum Gentiles repræsentabant statuas Jovis, Martis, &c. tanquam Deorum, qui tamen revera Dii non erant, nec esse poterant.

Hanc autem esse differentiam illarum vocum, inde patet, quia Scriptura nunquam tribuit nomen idoli veræ imagini, sed solum simulacris Gentilium, v. g. vocat Filium Dei, imaginem Patris, ad Coloss. 1. at nunquam vocat idolum Patris. Item 3. Reg. c. 6. Salomon dicitur fecisse ad ornatum Templi imagines leonum, boum, palmarum, &c. nec tamen unquam ista vocantur idola, quia rerum verarum erant similitudines. Unde Theodor. qu. 8. in Exod. dicit, *Repræsentationes rerum non subsistentium dici idola*, & S. Hieron. in c. 7. Osee, loquens de idolis, notat expresse simulacrum, seu idolum ita opponi Deo, sicut mendacium veritati.

Hinc patet, imagines Christi, & Sanctorum non esse idola, cum res veras exhibeant, sed nec etiam Sanctissimæ Trinitatis, & Angelorum imagines idola dici posse, quia non sunt factæ ad repræsentandam naturam Trinitatis, vel Angelorum, sed ad exhibendam formam, in qua Divinæ Trinitatis Personæ, aut Angeli ipsi aliquando apparuerunt, vel certe ad eorum proprietates, & perfectiones signis quibusdam corporalibus exprimendas. Unde S. Greg. Nazianz. orat. in laud. Heronis dicit, quod quando Angeli pinguntur, candida vestis, atque hilaris, & splendida facies solet illis tribui, ad designandum scilicet tum naturæ illorum puritatem, tum gloriæ, qua perfruuntur, splendorem. Hoc præsupposito, pro resolutione quæstionis propositæ

2. Dicendum 1. usum sacrarum imaginum, seu quibus res sacræ repræsentantur, esse honestum, & licitum.

Probatur 1. ex Script. Exod. 25, *Dixit Dominus ad Moysen, facies duos*

*duos Cherubim aureos ex utraque parte Oraculi*, ubi per duos illos Cherubim aureos S. Hieron. in cap. 41. Ezech. intelligit duas statuas, seu imagines aureas, quæ duos Angelos Cherubinos repræsentabant. Et 3. Reg. 6. dicitur, quod Salomon Cherubinatorum imagines ex lignis olivarum factas posuit in Sanctuario.

Probatur 2. ex 7. Synodo generali aët. 6. ubi hæc habentur: *Non est pictorum adinventio, imaginum factura, sed Catholicæ Ecclesiæ approbata legislatio, & traditio, &c. Testimonium perhibet ipsa rerum antiquitas, & Sanctorum Patrum doctrina, qui has in venerabilibus templis susceperunt, & venerabilia templa dedicantes, has pingere studuerunt.*

Probatur 3. ex usu antiquo Ecclesiæ Catholicæ, qui passim apud antiquos Partes refertur. Tertull. lib. de pudic. c. 7. & 10. testatur, antiquitus Christi Domini imaginem sub specie pastoris ovem deperditam, & recuperatam super humeros gestantis, in calicibus sacris effigiari consuevisse. S. Aug. l. 1. de consensu Evangelist. c. 10. testatur, Christum Dominum in templi parietibus depictum fuisse cum Sanctis Apostolis Petro, & Paulo sibi ex utroque latere astantibus. S. Greg. Nazianz. orat. in laudem defuncti patris refert, templum ab illo extructum fuisse variis picturis, & imaginibus sacris decoratum. Sanctus denique Paulinus Ep. 12. loquitur de variis imaginibus SS. Trinitatis, & mysteriorum vitæ Christi in Ecclesiæ apside pingi solitis.

3. Dicendum 2. sacras imagines esse a nobis venerandas, & colendas.

Prob. 1. ex eo, quod Scriptura docet, rebus sacris, & Divino cultui dicatis venerationem, & honorem deberi. Psal. 98. *Adorate scabellum pedum ejus, quoniam sanctum est*, quæ verba, quamvis in sensu mystico, & allegorico a quibusdam SS. Patribus de Christi Domini humanitate accipiantur, ut supra vidimus, in sensu tamen literali intelliguntur de arca testamenti, quæ 1. Paral. 28. vocatur scabellum pedum Dei. Atqui sacre imagines sunt etiam res quædam Divino cultui dicatæ. Ergo a pari veneratio illis, & honor debetur.

Prob. 2. ex supra relata Synodo 7. generali, in cujus Aët. 7. hæc verba habentur: *Sanctorum Patrum doctrinæ insistentes, & Ecclesiæ Catholicæ (in qua Spiritus Sanctus inhabitat) traditionem observantes, definimus, cum omni diligentia, & cura venerandas esse sanctas imagines, &c. illasque in templis esse collocandas.* Et in Conc. Trid. sess. ult. definitum est, imagines sacras in templis præsertim habendas, & retinendas esse, eisque debitum honorem, & venerationem impertiendam esse.

Prob. 3. ex S. Basil. supra citata Epist. ad Julian. Apostat. ubi postquam locutus est de cultu Christo Domino, Sanctissimæ Virgini, & aliis Sanctis debito, & a seipso exhibito; subjungit: *Unde & characteres imaginum ipsorum honoro, & adoro, præcipue cum hoc a sanctis Apostolis traditum sit.* Et ex S. Athanas. in qq. ad Antioch. q. 39. ubi ait eos esse dementes, & fastu quodam arreptitio, qui Crucem, effigiesque Sanctorum adorare recusant. Item ex S. Hieron. in Epitaphio S.

Paulæ c. 3. ubi dicit, illam prostratam ante Crucem, quasi pendentem Dominum cerneret, adorasse. Plures alii SS. Patres citantur in præfata Synodo 7. præsertim Act. 4. diversa etiam miracula pro confirmatione ejus veritatis divinitus facta ibidem referuntur.

4. Quæres, quo genere cultus imagines honorandæ sint.

Respondetur cum S. Doct. qu. 25. imaginem duplici modo posse considerari, 1. ut est res quædam, puta lignum sculptum, vel pictum, 2. ut est imago alterius, & ipsi quidem, priori modo spectatæ nullum honorem deberi, cum nullam habeat excellentiam honore dignam, posteriori vero eundem illi cultum, & honorem deferendum esse, qui debetur prototypo, cum hac tamen differentia, quod prototypo honor, & cultus primario, & per se seu propter excellentiam propriam tribuatur, imagini vero non nisi secundario, & propter ipsius prototypi excellentiam, cui aliquo modo participare censetur propter moralem quam habet cum ipso prototypo unionem, & conjunctionem. Unde propriè loquendo cultus imaginum, v. g. Christi, aut Sanctorum, neque latria, neque dulia dici potest, cum hæ voces interiorem submissionis affectum designent erga eum, qui adoratur, aut colitur, quæ affectus proinde erga ipsam imaginem præcise concipi non potest, sed tantum improprie, & respectivè, ita ut dum externa submissionis nota, puta genuflexionis, imagini exhibetur, internus honoris, puta latriæ, vel duliæ, affectus erga prototypum concipiatur.

Hunc imaginum cultum ita esse intelligendum, & explicandum, constat ex præfata Synodo 7. generali, in cujus Act. 3. in literis Orientalium Episcoporum ibidem lectis, & approbatis habentur hæc verba: *Sanctas imagines reveremur &c. non in materia, aut coloribus honorem constituentes, sed per hoc officium nostrum, quod ipsis debemus, quorum typum imagines gestant, impertientes.* Et ex Conc. Trid. sess. 25. in decret. de vener. imag. ubi expresse dicitur, *Imaginibus venerationem debitam impertiendam esse, nō quod credatur inesse aliqua in iis divinitas, vel virtus, propter quam sint colendæ, &c. sed quoniam honos, qui eis exhibetur, refertur ad Prototypa, quæ illæ representant, ita ut per imagines, quas osculamur, & coram quibus caput aperimus, & procumbimus, Christum adoremus, & Sanctos veneremur, quorum illæ similitudinem gerunt.*

Quod spectat ad Sanctorum reliquias, dicendum est, illis quoque cultum, & honorem esse deferendum.

Probat 1. ex Scriptura. Isa. 11. *In eum gentes sperabunt, & erit sepulcrum ejus gloriosum,* ubi Propheta de Christo Domino loquitur, dicitque, sepulcrum illius fore honorandum, quod intelligendum est non tantum pro eo tempore, quo Christi Domini corpus in eo jacuit, sed etiam pro tempore futuro, postquam a mortuis resurrexit, ut explicat S. Hieron. in Epist. ad Marcellam.

Prob. 2. ex Conc. Nicæ. II. & ex Trid. sess. 25. in præfato decreto, ubi dicitur, Sanctorum corpora a Fidelibus esse veneranda, quia viva mem-



membra Christi fuerunt, ac templum Spiritus sancti, ab ipsoque ad æternam vitam suscitanda, & glorificanda; & per illa multa beneficia hominibus a Deo præstari.

Probat 3. ex miraculis, quæ per Sanctorum reliquias divinitus facta sunt. 4. Reg. 13. ad contactum corporis Elisæi defuncti mortuus dicitur resurrexisse, quod S. Ambr. in c. 1. S. Luc. ipsius Elisæi sanctitati tribuit. Et Act. 19. refertur, sudaria, & semicinctia S. Pauli ægrotis applicata, sanitatem ipsis contulisse. Sanctus item Ambr. Ep. 54. testatur, plures a possessione dæmonum esse liberatos ad inventionem, & translationem corporum SS. Martyrum Gervasii, & Protasii, ut vestem prædictorum Sanctorum contigerunt, & Epist. 55. dicit, idem factum esse, dum reliquie SS. Martyrum Vitalis, & Agricolaë transferrentur. Et S. Aug. l. 22. de Civ. c. 2. refert varia insignia miracula, quæ facta sunt ad contactum reliquiarum S. Martyris Stephani. Ex quibus miraculis colligitur, pium ac Deo gratum esse cultum illarum reliquiarum, cum cultores earum tot beneficiis cumulet.

6. Quod si quæras quo cultu honorandæ sint Sanctorum reliquie, Respondetur, idem de illis, ac de imaginibus esse dicendum, illas scilicet cultu respectivo esse honorandas propter Sanctos, quorum sunt reliquie, ac proinde eodem honore, quo illi, ita ut qui honorat reliquias, illum primario honorare intendat, cujus sunt reliquie, & simul cum illo has ejus reliquias tanquam aliquid illius.

Docet autem S. Thom. 2. 2. q. 96. art. 4. ad 3. reliquias collo appensas circumferri posse, & hoc patet etiam ex S. August. Epist. 103. & S. Chrysost. (quod Christus sit Deus) & S. Greg. lib. 7. Epist. 120. tum ut ea gestatione honorem, & amorem nostrum erga Sanctos testemur, tum etiam, ut per intercessionem illorum, quos hoc pacto honoramus, vel ab aliquibus malis Divina misericordia liberemur, vel gratias aliquas impetremus.

Hinc etiam patet, quid de cultu, & adoratione Sanctæ Crucis sentiendum sit. Cum enim (ut observat S. Thom. q. 25. art. 4.) duobus modis spectari possit, vel ut Christi in ea fixi, & extensi figuram representat, vel prout ipsius Christi Corpori, & Sanguini contactu conjuncta fuit; si priori modo spectetur. habet rationem imaginis, & convenit omnino Cruci, sive in materia solida sculptæ, sive depictæ in pariete, sive manu in aere formatæ, & quovis alio modo expressæ, & de illa idem omnino dicendum est, ac de aliis imaginibus Christi Domini. Si vero spectetur modo posteriori, habet rationem reliquie, quod quidem de illa sola Cruce dici potest, in qua ipse Dominus passus, & mortuus est, & de illa ut sic eodem modo, ac de aliis reliquiis loquendum est.

Observandum est autem, quod quamvis honor, qui reliquiis debetur, ejusdem generis sit, ac ille, qui deferatur imaginibus, hæc tamen inter utrumque differentia est, quod reliquie peculiarem

quandam venerationem postulant præ imaginibus , propter unionem , quam habent cum illo , cuius sunt reliquæ , quæ haud dubie major , & arctior esse censetur ea , quæ inter imaginem , & ejus prototypum intercedit . Et ea ratione Sanctorum reliquæ in majori habentur veneratione , quam illorum imagines , & Crux illa , in qua Christus affixus , & mortuus est , peculiari affectu , & devotione colitur præ aliis Crucis ejusdem imaginibus , propter unionem , quam habuit cum ipsius Christi corpore , cuius contactu nobilitata est , & sanguinis ejusdem effusione decorata .

## T R A C T A T U S VI. DE GRATIA DIVINA.

**C**um præcipuus meritorum Christi Domini effectus sit Gratia Divina , quæ reliqua omnia bona ex illius Salvatoris fontibus scaturientia vel in se complectitur , vel ex se diffundit , doctrinæ ordo postulat , ut de illa nunc tractemus , eaque præsertim circa illam investigemus , quæ a nobis Deus sciri voluit , & idcirco Ecclesiæ suæ revelare dignatus est , sepositis in hac materia omnibus aliis , quæ tenuitatis nostræ modum excedunt , memores illius effati , *Altiora te ne quæseris* , Eccl. 3. & *Qui scrutator est majestatis , opprimetur a gloria* , Prov. 25.

Ut igitur ordine procedamus , tractatum hunc in quinque capita dividemus , in quorum 1. agemus de necessitate Gratiæ Divinæ , in 2. de ipsius Gratiæ sufficientia , in 3. de ejusdem efficacia , in 4. de primario ejus effectu , seu de justificatione , in 5. denique de altero Gratiæ effectu seu de merito .

### C A P U T I.

#### *De necessitate Gratiæ Divinæ .*

#### S E C T I O I.

##### *Quid nomine Gratiæ intelligatur .*

1. **G**ratia nomen , si illius etymologiam spectemus , significat id , quod datur gratis , seu ex pura benevolentia , ut docet S. Isidorus l. 7. etymolog. cap. 3. Si autem illius communem acceptionem attendamus , duobus præsertim modis inveniemus , nomen illud Gratiæ apud Sanctos Patres sumi , ut alias acceptiones minus proprias , & a nostro instituto alienas omittamus .

Primo late pro quocunque dono gratuito divinitus collato , quo sen-  
su

su creatio, conservatio, &c. potest Divinæ Gratiæ nomine appellari. Unde S. Hier. ep. 139. ad Cyprianum dixit, *Gratiæ Dei esse, quod creatus sit homo*. Et in 6. Synodo generali act. 11. in Ep. Sophronii dicuntur Angeli esse ex Gratia Dei immortales, quia scilicet immortalitatem sicut & alia dona naturalia, ex gratuito Dei beneplacito acceperunt.

Secundo stricte, & magis proprie, pro solis illis donis supernaturalibus, quæ intuitu meritorum Christi Domini nobis conferuntur, quæ quidem magis proprie nomine Gratiæ nuncupantur, tum quia ut habetur in Epistola Patrum Africanorum ad Innocentium Papam (quæ est 95. inter Augustinianas) Apostolus Gratiā non nisi in ea significatione sumere solet, tum etiam, quia beneficia, quæ indignis, & immerentibus conferuntur, Gratiæ nomen longe potiori jure merentur, talia autem sunt beneficia nobis per Christi meritum collata.

Gratia vero modo illo posteriori sumpta multipliciter dividitur, 1. in Gratiā gratis datam, & Gratiā gratum facientem.

Gratia gratis data est (ut docet S. Th. 1. 2. q. 111.) per quam unus homo operatur alteri ad hoc, quod ad Deum reducatur, seu (quod idem est) quæ primo, & per se refertur ad salutem alterius. Et hujus Gratiæ novem species ab Apostolo enumerantur 1. Cor. 12. his verbis: *Alii quidem per Spiritum datur sermo sapientiæ, alii autem sermo scientiæ secundum eundem Spiritum, alteri fides in eodem Spiritu, alii Gratiā sanitatum in uno Spiritu, alii operatio virtutum, alii prophetia, alii discretio spirituum, alii genera linguarum, alii interpretatio sermonum*, quæ omnia fusc a S. Doctore explicantur ar. 4. ubi & observat,

Quasdam ex illis Gratiis dari ad perfectam, & accuratam mysteriorum cognitionem, quæ necessaria est ad alios erudiendos, qualis est Gratia sapientiæ, & scientiæ, non quidem acquisitæ, sed infusæ, & supernaturalis, Gratia item Fidei, non quidem prout significat ipsam Fidei virtutem, sed prout denotat excellentiam quandam, & eminentem ipsius Fidei certitudinem, qua homo aliquis efficitur idoneus ad instruendos, & confirmandos alios, vel etiam ad Hæreticos convincendos circa mysteria Religionis.

Alias vero dari ad expositionem, & explicationem earum rerum, quæ aliis ad salutem necessariæ sunt. Talis est Gratia linguarum, & interpretatio sermonum.

Alias denique ad efficaciter persuadendum ea, quæ exposita, & explicata sunt. Et ad hunc finem conceditur donum Prophetiæ, discretio spirituum, & virtus miraculorum, sive ad restituendam corporis valetudinem, & sic dicitur gratia sanitatum, sive ad alia miracula exterius facienda, & vocatur operatio virtutum.

3. Quamvis autem omnis, & quæcunque Gratia sit gratis data, ut ejus nomen sonat, ac proinde nomen illud Gratiæ gratis datæ sit nomen genericum, quod omnibus Gratiæ speciebus convenit; hæc tamen Gratiæ species, de qua nunc agimus, communiter Gratia gratis data

Voca-



vocatur, quia solet ignobiliori speciei nomen generis appropriari, e. g. nomen genericum animalis communiter brutis tribuitur.

4. Observandum est, hanc Gratiam, cum non ad propriam sanctificationem, sed tantum ad aliorum utilitatem concedatur, æque peccatoribus, ac justis tribui. Unde S. Matthæi 7. Christus Dominus dicit, in die iudicii multos impios, & reprobos sibi dicturos, *Domine, nonne in nomine tuo prophetavimus?* &c. Et S. Aug. l. 83. qq. 79. dicit, posse aliquem non modo peccatorem, sed etiam Infidelem prophetare, miracula facere, dæmonem expellere, in honorem nominis Christi Domini.

Gratia autem gratum faciens (de qua potissimum in hoc tractatu agendum nobis erit) ea est, quæ per se primo dirigitur, & ordinatur ad hominem, in quo est, sanctificandum, & amabilem ac gratum Deo reddendum. Et hæc longe dignior est, quam Gratia gratis data. Unde Apostolus loco cit. explicatis variis istius Gratiæ gratis datæ generibus, ad meliora æmulanda charismata, hoc est, ad Gratiam gratum facientem optandam, hortatur. Ideoque propter excellentiam, ac dignitatem sibi propriam, absolute, & simpliciter Gratia dicitur. Et subdividitur in Gratiam habitualement, & Gratiam actualem.

Gratia habitualis est ea, quæ per modum habitus, seu qualitatis permanentis divinitus infunditur, existitque in nobis, licet actu non operemur. Hujus habitualis Gratiæ mentio fit in variis Scripturæ locis, ut Isa. 31. *Requiescet super eum Spiritus Domini:* S. Joan. 14. *Ad ipsum veniemus, & mansionem apud eum faciemus.* 1. S. Joan. 3. *Omnis, qui natus est ex Deo, peccatum non facit: quia semen ipsius in eo manet.* Etenim quoniam *requiescere*, & *manere* sunt voces significantes habitualement, & durabilem existentiam, qua Deus in anima iusti maneat per aliquod donum speciale, eamque inhabitet, S. Aug. ep. 85. Gratiam illam vocat interioris hominis pulchritudinem, eamque asserit in parvulis quoque post Baptismum remanere, & S. Cyril. Alex. l. 4. in Isa. orat. 2. eandem Gratiam dicit esse ornatum animæ, illique insidere, ac inhaerere.

Gratia autem actualis ea est, quæ tribuitur per modum actus, seu operationis transeuntis, consistitque in piis moribus intellectus, & voluntatis, quos Deus in nobis excitat, illisque nos adjuvat vel ad bonum libere prosequendum, vel ad malum fugiendum. Et de hac plenius in sequentibus agendum erit.

## S E C T I O II.

*Quinam fuerint errores Pelagianorum circa Gratiæ necessitatem.*  
 1. **U**T Catholicæ Fidei veritas circa Divinæ Gratiæ necessitatem clarius effulgeat, discutiendum nobis est, quinam errores olim illi adversati fuerint, cumque inter alios Hæreticos Gratiæ Divinæ in-

fen-

senfos Pelagiani primas olim partes tenerent , de illorum erroribus hic nobis agendum est . De quibus quidem quoniam non levis hodie inter Theologos controversia est , nullum ad ejusmodi errores dignoscendos certius , ac facilius medium adhiberi posse existimavimus , quam si sedulo investigemus , & attente consideremus , quid in illis Hæreticis Ecclesia tanquam erroneum reprobaverit , id est , quid Concilia , & Pontifices Summi de Pelagii , & asseclarum ejus dogmatibus pronuntiaverint , quid in eorum dictis , aut scriptis condemnaverint , & quas veritates erroribus illorum oppositas Fide credendas definierint . Cum enim Fidei Catholicæ veritas sola Divina auctoritate constet , non argutiis , aut disceptationibus eruenda est , sed ex fontibus iis liquido haurienda , per quos illam ad nos Deus voluit derivari . Ut igitur ordine aliquo procedamus ,

2. Observandum , Pelagii , ejusque asseclarum errores in quatuor præsertim Conciliis , Carthaginensi , Milevitano , Carthaginensi altero , & Arausicano secundo proscriptos fuisse , & a quatuor potissimum Summis Pontificibus , Innocentio , Zosimo , Coelestino , & Gelasio condemnatos , & anathemate percussos . De quibus singillatim , ac breviter nobis agendum est .

Ac in primis nullam hic facimus mentionem Diospolitanae Synodi , quæ ante quatuor præfata Concilia contra Pelagium coacta est . Huic enim ipse Pelagius fictis , & simulatis verbis illusit , in eaque , occultatis potius , quam ejuratis erroribus , absolutus est , ut testatur S. Augustinus variis in locis , ac præsertim in lib. de gestis Pelagii , ubi acta illius Synodi fuse refert . Unde S. Hieron. Epist. 77. hanc Synodum miserabilem vocat .

### §. I.

*Quid de Pelagianorum erroribus censuerint Africana Concilia , Carthaginense , ac Milevitanum .*

1. **C**Um igitur ea , quæ Diospoli facta fuerant , in Africam ab Orosio Presbytero relata fuissent , simulque Gallorum quorundam Episcoporum litteræ adversus Pelagium ab eodem fuissent exhibitæ ; Concilium 68 Episcoporum Carthagine coactum est anno Christi 416. in quo rebus omnibus diligentius examinatis , & perspectis , decretum est , Pelagium , ejusque discipulum Coelestium , nisi errores suos palam , & ex animo ejurarent , anathemate feriendos esse , ut patet ex Epistola Episcoporum ipsius Synodi ad Innocentium Papam , quæ est inter Augustinianas 90. in qua quidem Epistola , postquam dixerunt , *Ideo hac illi intimare , ut statutis suis etiam Apostolicæ Sedis adhibeatur auctoritas* , ipsius Pelagii , ejusque asseclarum hæresim his verbis exponunt , *Isti , Pelagiani scilicet , asserunt , in eo Dei Gratiam deputandam esse , quod solum hominis instituit , crea-*

*creavitque naturam, quæ per propriam voluntatem legem Dei possit implere, &c. eandem legem ad Gratiâ pertinere, quod illam Deus in adiutorium hominibus dedit. Illam vero Gratiâ, qua Christiani sumus, nolunt omnino agnoscere, &c. Hominibus persuadere non cessant, ad operandam, perficiendamque justitiâ, & Dei mandata complenda, solam sibi humanam sufficere posse naturam, &c.*

Eodem anno in Africa congregatum est Concilium Milevitanum, cui interfuit S. August. cum 70. aliis Episcopis, in quo ad eundem Innocentium Papam ipse S. August. nomine totius Synodi scribens de Pelagianorum erroribus sic loquitur: *Isti dicunt, posse hominem in hac vita, præceptis Dei cognitis, ad tantam perfectionem justitiæ, sine adiutorio Gratiæ Salvatoris, per solum liberum voluntatis arbitrium pervenire, ut ei non sit jam necessarium dicere, Dimitte nobis debita nostra; illud vero, quod sequitur, Ne nos inducas in tentationem, non ita intelligendum, tanquam Divinum adiutorium poscere debeamus, ne in peccatum tentati decidamus, sed hoc in nostra positum esse potestate, & ad hoc solam sufficere voluntatem hominis.*

## §. II.

*Quale iudicium fuerit Innocentii Papæ super iisdem erroribus.*

1. **H**is acceptis Epistolis, Innocentius rescripsit ad supra dictorum Concilior. Patres, eorum sententiam confirmans, erroresque Pelagianorum condemnans; & in Epistola quidem ad Patres Concilii Carthaginensis, quæ numeratur inter Augustinianas 91. postquam dixit illos in eo, quod Apostolicam sedem consulebant, antiquæ traditionis exempla servare, de Pelagianorum erroribus sic loquitur: *Quid enim potest esse tam iniquum, tam barbarum, tam Christianis mentibus inimicum, quam huic denegare debere, quidquid in quotidiana Gratiâ consequeris, cui te ipse confiteris debere, quod natus es? & cui putas debere, quod vivis, quomodo te non putas illi debere, quod quotidianam ejus consequendo Gratiâ taliter vivis? Subjungit postea, illos negare, nos adiutorio indigere Divino, quasi ex nostra in totum possibilitate perfectos. Item Illos nescire, quod nisi magnis precibus Gratiâ in nos implorata descendat, nequicquam terrena labis, & mundani corporis vincere conemur errores; cum pares nos ad resistendum, non liberum arbitrium, sed Dei solum facere possit auxilium, &c. Addit, Deum quotidiana nobis præstare remedia, quibus nisi freti, confisque; nitamur, nullatenus vincere humanos poterimus errores. Necesse est enim, ut quo auxiliante vincimus, eo iterum non adjuvante vincamur. Et tandem concludit: Quisquis ergo huic assentiens videtur esse sententiæ, quod dicat, adiutorio nobis non opus esse Divino, inimicū se Catholice Fidei, & Dei beneficiis profitetur ingratum.*

2. In Epistola autem 93. ad Patres Concilii Milevitani, postquam similiter dixit, *Antiquæ regulæ formam toto semper orbe observatam hanc esse*



esse , ut super anxiiis rebus Sedes Apostolica consuleretur , & de Apostolico fonte responsa per omnes Provincias semper emanarent , præsertim quoties Fidei ratio ventilatur , de Pelagianis subjungit : Ecce homines , qui non posuerunt Deum adiutorem suum . Negantes enim auxilium Dei , inquiunt , hominem sibi posse sufficere , nec Gratia hunc egere Divina , qua privatus , necesse est , ut laqueis diaboli irretitus occumbat , dum ad omnia vitæ perficienda mandata , sola tantummodo libertate contendit . Addit postea : Quare Pelagium , Cœlestiumque , idest inventores vocum novarum , quæ , sicut dixit Apostolus , ædificationis nihilum , sed magis vanissimas consueverunt parere quæstiones , Ecclesiastica communione privari , Apostolici vigoris auctoritate censemus .

## §. I I I.

*Quid contra eosdem errores in altero Concilio Carthaginensi statutum fuerit .*

1. **D**Efuncto Innocentio , cum , ab ejus in Apostolica Sede successore Zosimo , Cœlestius , ejusque magister Pelagius variis , & subdolis artibus , nec non ficta , ementitaque professione , anathematis , quo eos Innocentius perculerat , absolutionem obtinere conarentur , Episcopi Africani n. 214. rursus Carthagine convenientes , anno Domini 418. contra præfatum Pelagium , ejusque asseclas Can. 8. condiderunt , qui licet ab aliquibus Concilii Milevitani supra citati esse dicantur , probabilius tamen est , ab isto Concilio Carthaginensi editos esse , ut constat ex Epistola Cœlestini Papæ ad Episcopos Galliæ infra citanda , in qua hujus Concilii nomine citantur , & confirmantur .

In illis autem Canonibus Patres Concilii sedulo collegerunt omnes Pelagianorum errores , quos jam ab Ecclesia damnatos , vel denuo damnandos esse judicaverunt , ut quivis scire distincte posset , quid in Pelagianis dogmatibus fugiendum , ac devitandum esset . Itaque postquam in duobus primis anathema dixerunt in eos , quia asserebant , Adamum , etiam non peccasset , moriturum tamen fuisse , aut qui infantibus Baptismum ad salutem necessarium esse , illosque originale peccatum ab Adamo contrahere negabant , in reliquis canonibus damnant eos , qui dixerint ,

2. *Gratiam Dei , qua justificamur per Jesum Christum , ad solam remissionem peccatorum valere , quæ jam commissa sunt , & non etiam ad adjutorium , ut non committantur .*

Item , *Eandem Gratiam Christi propter hoc tantum nos adjuvare ad non peccandum , quia per ipsam nobis revelatur , & aperitur intelligentia mandatorum , ut sciamus quid appetere , quid vitare debeamus , non autem per illam nobis præstari , ut quod faciendum cognoverimus , etiam facere diligamus , atque valeamus .*

Item ,

Item, Ideo Gratiā nobis justificationis dari, ut quod facere per librum jubemur arbitrium, facilius possimus implere per Gratiā, quanquam etiamsi gratia non daretur, non quidem facile, sed tamen possemus etiam sine illa implere Divina mandata.

Item, Eos, qui verba hæc S. Joannis Apostoli: Si dixerimus, quia peccatum non habemus, ipsi nos seducimus, & veritas in nobis non est; sic accipienda putaverint, ut dicant, propter humilitatem oportere dici, nos habere peccatum, non quod vere ita sit.

Item, Qui dixerint, in Oratione Dominica ideo dicere Sanctos, Dimitte nobis debita nostra, ut non pro seipsis hoc dicant, quia non est eis jam necessaria ista petitio, sed pro aliis, qui sunt in populo suo peccatores, ideoque hæc ab illis verba non veraciter, sed humiliter dici.

Hos autem Canones ad Zosimum Papam a Patribus Concilii transmissos, & ab ipso approbatos, & confirmatos fuisse testatur S. Prosper in Chronico ad annum 419. his verbis: Concilio apud Carthaginem habito 214. Episcoporum ad Papam Zosimum Synodalia decreta perlata sunt, quibus probatis per totum mundum hæresis Pelagiana damnata est.

#### §. I V.

*Quid super Pelagianorum, & Semipelagianorum erroribus edixerit Cælestinus Papa.*

1. **C**um igitur Pelagiana Hæresis toties proscripta, & damnata jam ubique fere extincta esset; nihilominus aliquot post annis in Urbe Massiliensi, aliisque deinde Galliæ partibus novi rursus errores circa gratiam exorti sunt, quorum auctores, licet a Pelagio recederent, Divinæ gratiæ necessitatem admittentes, quia tamen non satis ad Fidei veritatem accederent, ipsamque gratiam dicerent non pure gratis dari, sed intuitu alicujus bonæ dispositionis, ex. gr. boni alicujus desiderii, aut conatus ipsius voluntatis, ex solis arbitrii viribus elicitum, ideo Hæretici habiti sunt, dictique Semipelagiani.

Cumque illi præsertim S. Augustini tunc defuncti doctrinam de gratia, & libero arbitrio impeterent, multa in illum invidiosissime criminantes, Sancti Prosper, & Hilarius tanti viri memoriam tam indigne vellicari non ferentes, Cælestinum Papam adierunt, egeruntque cum illo, ut & Massiliensium frænaret audaciam, & S. Augustini doctrinam ab illorum calumniis vindicaret. Quod Cælestinus eorum votis annuens, & Ecclesiæ paci providere cupiens, præstitit in Epistola decretali, quæ incipit, *Apostolici verba præcepti*, quam ad Episcopos Galliæ transmisit, in qua increpatis Massiliensibus, & collaudato S. Augustino, ea ex ejus doctrina colligit, quæ a prædecessoribus suis probata, & definita ab omnibus recipi, & Fide Catholica credi deberent. Sic igitur loquitur:

2. *Necessarium fuit diligenter inquirere, quid Rectores Romana Ecclesiæ de Hæresi (Pelagiana scilicet) quæ temporibus eorum exorta fuisset,*  
ju-

judicaverint, & contra nocentissimos liberi arbitrii defensores quid de Gratia Dei sentiendum esse censuerint, ita ut etiam Africanorum Conciliorum quasdam sententias jungeremus, quas utique suas fecerunt Apostolici Antistites, & comprobarunt. Ut ergo plenius, qui in aliquo dubitant, instruantur, constitutiones Sanctorum Patrum compendio manifestemus indiculo. Quod si quis non nimium est contentiosus, agnoscat, omnium disputationum connexionem ex hac subditarum auctoritatum brevitate pendere, nullamque sibi contradictionis superesse rationem, si cum Catholicis credat, & dicat,

In praevaricatione Adæ omnes homines naturalem possibilitatem, & innocentiam perdidisse, & neminem de profundo illius ruinae per liberum arbitrium posse consurgere, nisi eum Gratia Dei miserantis erexerit.

Neminem esse per semetipsum bonum, nisi participationem sui illi donet, qui solus est bonus.

Neminem, etiam Gratia Baptismatis renovatum, idoneum esse ad superandas diaboli insidias, & ad evincendas carnis concupiscentias, nisi per quotidianum Dei adiutorium perseverantiam bonae conversationis acceperit.

Quod nemo, nisi per Gratiā, libero bene utatur arbitrio.

Quod omnia studia, & omnia opera, ac merita Sanctorum ad Dei gloriam, laudemque referenda sint, quia nemo aliunde ei placet, nisi ex eo, quod ipse donaverit.

Quod ita Deus in cordibus hominum, atque ipso libero coopereatur arbitrio, ut sancta cogitatio, pium consilium, omnisque motus bonae voluntatis ex Deo sit, quia per illum aliquid boni possumus, sine quo nihil boni possumus.

Illud etiam, quod inter Carthaginensis Synodi decreta constitutum est, quasi proprium Apostolicae Sedis amplectimur, quod scilicet 3. Capitulo definitum est, ut quicumque dixerit, Gratiā Dei, qua iustificamur per Jesum Christum Dominum nostrum, ad solam remissionem peccatorum valere, quae iam commissa sunt, non etiam ad adiutorium, ut non committantur, anathema sit. Adjungit demum ea, quae capitulo, seu can. 4. & 5. ejusdem Concilii Carthaginensis definita, & a nobis supra relata sunt. Ac denique sic concludit.

His ergo Ecclesiasticis regulis, & ex Divina sumptis auctoritate documentis, ita, adjuvante Domino, confortati sumus, ut omnium bonorum effectuum, atque operum, & omnium studiorum, omniumque virtutum, quibus ab initio Fidei ad Deum tenditur, Deum fateamur auctorem, & non dubitemus, ab ipsius Gratia omnia hominis merita proveniri, per quem fit, ut aliquid boni & velle incipiamus, & facere. Et paucis interjectis, Profundiores vero, difficilioreque partes occurrentium questionum, quas latius pertractarunt, qui Haereticis restiterunt, sicut non audemus contemnere, ita non necesse habemus astruere, quia ad confitendam Gratiā Dei, cujus operi, ac dignationi nihil subtrahendum est, satis sufficere credimus, quidquid secundum praedictas regulas Apostolicas



*licæ Sedis nos scripta docuerunt, ut prorsus non arbitremur Catholicum, quicquid apparuit præfixis sententiis esse contrarium.*

Hic solas opposuimus Fidei definitiones. Summorum vero Pontificum testimonia brevitatis gratia omisimus.

## §. V.

*Quid Gelasius Papa, quid item Concilium Arausicanum II. contra Pelagianorum, & Semipelagianorum reliquias decreverint.*

1. **C**Um igitur his Pontificum, Conciliorumque decretis penitus extincta videretur Hæresis Pelagiana cum omnibus suis reliquiis; nihilominus ex ejus veluti cineribus post plures annos scintillæ quædam rursus in aliquibus Dalmatiæ, & Italiæ partibus emerferunt temporibus Gelasii Papæ, qui hac de causa duas scripsit Epistolas ad Honorium Dalmatiæ Episcopum, in quibus confirmat quæcunque a Prædecessoribus suis contra hæresim Pelagii statuta fuerunt, & in Epist. circulari ad omnes Episcopos per Picenum tria capita Hæresis Pelagianæ tunc repullulantis refert, 1. scilicet parvulos nasci sine ullo peccato originali, 2. Gratiâ Christi ad salutem consequendam non esse necessariam, 3. denique illam secundum hominum merita conferri; quæ quidem capita iterum sub anathemate damnat.

Cumque insuper circa idem tempus Semipelagianæ turbas aliquas iterum in Galliis moverent; occasione illarum in civitate Arausicana congregatum est Concilium Provinciale 14. Episcoporum, quod Aranicanum II. dictum est, in quo eadem rursus contra Pelagianos, & Semipelagianos decreta sunt, quæ in præcedentibus Conciliis, & a præfatis Summis Pontificibus definita fuerant, quorum summa hæc est, gratiam interiorem Dei per Christum, idest Spiritus Sancti illuminationem, & inspirationem, quæ ex meritis Christi tribuitur, ita esse nobis necessariam, ut sine illa neque Deum invocare, neque a peccato purgari, neque affectum credendi concipere, neque ad Baptismum pervenire, neque externæ prædicationi Evangelii consentire, neque recte cogitare, aut pedes nostros a falsitate retinere, neque bonum aliquod opus æternæ vitæ meritorium exercere, aut in bonorum operum exercitio perseverare possimus.

Quas veritates postquam expressit viginti quinque canonibus, seu capitulis (quæ quidem capitula sibi ab Apostolica Sede transmissa fuisse, in illorum præfatione declarat) hanc subjungit conclusionem, in qua omnium illarum veritatum summam complectitur his verbis,

*Ac sic secundum supra scriptas Scripturarum sententias, vel antiquorum Patrum definitiones, hoc, Deo propitiante, & prædicare debemus, & credere, quod per peccatum primi hominis ita inclinatum, & attenuatum fuerit*  
libe-

*liberum arbitrium, ut nullus postea aut diligere Deum, sicut oportet, aut credere in Deum, aut operari propter Deum, quod bonum est, possit, nisi gratia eum, & misericordia Divina prævenerit.*

2. Ex his igitur Conciliorum, Pontificumque sententiis, & decretis constat, summam totius Hæresis Pelagianæ, reliquiarumque ejus hanc fuisse, ut scilicet 1. Hæretici illi omnem prorsus Dei Gratiam repudiaverint, asseruerintque, ad salutem æternam consequendam solas humani arbitrii sufficere vires.

Postea vero, ut Ecclesiæ damnationem effugerent, illos Gratiæ quidem necessitatem admisisse, sed fide & subdole nomine Gratiæ liberum arbitrium, naturamque, in qua conditi sumus, intelligentes.

Cumque sic fraus illorum patefceret, ut errorem tegerent, Gratiam Christi in legis notitia, Evangelicæ doctrinæ promulgatione, ipsiusque Christi Domini, ac Sanctorum exemplis, necnon in peccatorum remissione, & condonatione posuisse.

Cumque nihilominus adhuc urgerent Sancti Patres, ut non solum externum, sed etiam præsertim internum Gratiæ auxilium agnoscerent, illud tandem Scripturæ testimoniis convicti admiserunt, ita tamen, ut dicerent, Gratiam illam internam non esse absolute necessariam, sed tantum utilem ad bonum facilius operandum.

Denique cum ulterius adhuc urgerentur ad confitendam ipsius Gratiæ necessitatem, huic veritati tandem subscripserunt, sed simul etiam dixerunt, Gratiam illam internam non prævenire hominis voluntatem, sed potius ab illa præveniri, adeoque per aliqua bona desideria, aut aliquos pios affectus, & conatus humanæ voluntatis obtineri, Deumque illam Gratiam piorum illorum desideriorum, & affectuum intuitu tribuere, pertinaciter asseveraverunt.

3. E contrario autem constat, summam veritatum illarum, quas præfati Pontifices, & Concilia, tanquam Fide Catholica credendas definierunt, hanc esse,

Primo, solam hominis voluntatem, aliaque adjumenta externa legis, & Evangelii, ad salutem æternam consequendam, aut ad opera bona illius salutis meritoria facienda non sufficere.

Secundo, ad bona illa opera salutis æternæ meritoria exercenda necessariam esse internam Dei Gratiam, quæ in interiori illustratione intellectus, & pia voluntatis motione consistit.

Tertio, Gratiam illam Divinam non solum omnia illa opera bona, sed etiam omnes pios, & liberos voluntatis affectus, & conatus, quibus homo aliquid a Deo mereri potest, prævenire.

Quarto, illam Gratiam prævenientem pure gratis homini tribui, ac sine ullis meritis ex parte ipsius.

Quinto denique, Gratiam illam nihilominus intuitu meritorum Christi Domini hominibus tribui, ideoque Gratiam Christi vocari.

## S E C T I O III.

*De variis humanæ naturæ statibus.*

1. **P**ER status humanæ naturæ intelligimus varios modos, quibus se natura humana habuit, aut habere potuit, juxta Divinæ providentiæ dispositionem, in ordine ad finem suum ultimum consequendum.

Hoc posito, quinque præsertim status humanæ naturæ communiter a Theologis dignoscuntur, scilicet naturæ puræ, naturæ integræ, innocentis, seu justitiæ originalis, naturæ lapsæ sibi relicte, & naturæ lapsæ reparate. Quorum ultimus nunc reipsa existit, tertius initio creationis mundi extitit, tres vero alii, cum nunquam extiterint, aut extituri sint, considerantur ut pure possibiles. De singulis hic breviter aliquid adnotandum est.

Status puræ naturæ ille est, in quo ea solum haberet homo, quæ ipsi connaturalia sunt, puta facultates omnes naturales, & concursus Dei generalem tam conservationi, quam operationibus suis naturalibus necessarium, omnes etiam imperfectiones, & defectus pure naturales; careret vero, sicut peccato, ejusque omni reatu, sic etiam omni Gratia supernaturali, & auxiliis quibusvis etiam naturalis ordinis, sibi minime ratione naturæ suæ debitis. Circa hunc statum igitur

2. Dicendum 1. nullum unquam hominem in puris naturalibus aut creatum fuisse, aut extitisse.

Est de Fide contra Pelagium, qui ( ut refert S. Aug. lib. de peccat. orig. cap. 15. ) existimabat, hominem sine virtute, aut vitio, sine gratia, aut peccato, idest in puris naturalibus fuisse conditum.

Verum hic error refelli, & veritas opposita probari facile potest ex iis, quæ dicta sunt Tract. 4. ubi probatum est, primum hominem in statu Gratiæ sanctificantis fuisse conditum, illoque peccante posteros ejus omnes ordinaria generationis via propagatos in peccati originalis reatu concipi. Unde sequitur, nullum hominem in puris naturalibus aut creatum esse, aut unquam extitisse.

3. Dicendum 2. statum illum puræ naturæ, licet nunquam extiterit, esse tamen possibilem, Deumque potuisse ( si ita illi placuisset ) hominem in puris naturalibus creare.

Probat 1. ex Bulla Pii V. & Greg. XIII. quæ renovata fuit per Urbanum VIII. in Bulla, quæ incipit, *In eminenti*, data anno 1541. in qua damnantur hi duo articuli, scilicet, *Deum non potuisse talem ab initio creare hominem, qualis nunc nascitur, & falsam esse Doctorum sententiam, qui dicunt, primum hominem creari, & institui potuisse a Deo sine justitia naturali.* Et quamvis hi duo articuli ita damnati sint in præfatis Bullis, ut non sit plane evidens, an ideo quia falsi, & heretici, an

VERO



vero tantum quia temerarii , & scandalosi , ac proinde pacis , ac unitatis Ecclesiae inimici ; quovis tamen modo damnari dicantur , certe post Apostolicæ sedis iudicium hæ , & aliæ propositiones in illis Bullis reprobatae a nullo hodie propugnari possunt , quin se aut veritatis , aut saltem unitatis , & pacis Ecclesiae inimicum profiteatur .

Probatur 2. ex eo , quod manifestum est , Deum potuisse hominem sine peccato , & sine ullo Gratiae dono creare ; sine peccato quidem , cum illius auctor nec sit , nec esse possit , sine Gratia autem , quia si Deus hoc non posset , sequeretur , Gratiam illam simul esse Gratiam , & non esse ; esse ex hypothesi , non esse , quia hominis naturæ debita esset , quod ipsi Gratiae repugnat , ut patet ex ante dictis .

Objicies , si Deus posset hominem creare in puris naturalibus , sequeretur , illum auctorem esse concupiscentiæ , quæ ab Apostolo Rom. 7. vocatur peccatum , quia ( ut explicat Conc. Trid. sess. 5. can. 5. ) ex peccato est , & ad peccatum inclinatur , ac proinde Deum esse auctorem alicujus rei , quæ ad peccatum inclinaret .

Respondetur , Deum esse auctorem concupiscentiæ , in quantum est auctor facultatis sensitivæ in homine , ac propensionis , quam talis facultas habet in bonum sibi connaturale . Et hæc propensio dicitur inclinare ad peccatum , non quidem per se , & ex natura sua , sed per accidens , quatenus propensio illa in bonum sensibile rectæ rationis ordini aliquando repugnat , voluntatemque ad illius boni sensibilis fruitionem contra rationis ordinem pellicit . Hæc autem lucta partis inferioris in superiorem in puris naturalibus *non fuisset peccati supplicium* ( ut recte dicit S. August. lib. 3. de lib. arb. ) *sed proficiendi admonitio , ac perfectionis exordium* .

4. Jam quod spectat ad alios quatuor status , breviter dicimus , quod Status naturæ integræ ille est , in quo pars hominis superior Deo , ut auctori naturæ , ultimoque illius fini subiecta esset , & pars inferior , seu sensitiva superiori , seu rationi , ita ut , licet , quantum ex se est , appetitus sensitivus rationem prævenire , & contra illam insurgere posset , impediretur tamen per auxilia quædam naturalis ordinis ipsius hominis naturæ , & meritis indebita . Hunc autem statum possibilem esse patet ex eo , quod nullam secum invehit contradictionem , aut repugnantiam neque ex parte Dei , cuius bonitati maxime convenit hominem donis ejusmodi , licet indebitis , afficere , neque ex parte hominis , qui sic ad perfectionem naturæ suæ facilius comparandam , finemque ultimum sibi connaturalem assequendum juvaretur .

Status autem innocentiae , seu justitiæ originalis huic integræ naturæ statui superaddit Gratiam , ac reliqua dona supernaturalia , quæ homini in prima creatione a Deo collata sunt , de quibus Trac. 4. egimus .

Status naturæ lapsæ , ac sibi relicte ille est , in quem per peccatum primi hominis humana natura decidit , & in quo remansisset , nisi per

Divinam misericordiam ab illo liberata fuisset. Hunc autem statum possibilem esse hinc patet, quod potuisset Deus universę naturę humanę massam in eo peccati, & damnationis statu relinquere, in quo per peccatum primi hominis constituta est. Unde, quando de illius per Christi Gratiā reparatione Scriptura loquitur, dicit factam illam fuisse ex Dei charitate, benignitate, misericordia, &c.

Status denique naturę lapsę, & per Christum reparatę ille est, in quo nascimur, & in quo per Christi Gratiā a peccato liberari, & salutem consequi possumus. In illo autem statu, quamvis per Baptismum reatus omnis peccati originalis penitus tollatur, remanet nihilominus in baptizatis concupiscentia, seu fomes peccati. *Quæ cum ad ægonem relicta sit* (ut loquitur Conc. Trid. sess. 5. can. 5.) *nocere non consentientibus, sed viriliter per Christi Gratiā repugnantibus non valet, quinimo qui legitime certaverit, coronabitur.*

#### S E C T I O I V.

*An, & quæ ratione Gratia, quæ in statu innocentie primo homini collata fuit, diversa sit ab illa, quæ in statu naturæ lapsæ confertur.*

1. **C**ertum est 1. Gratiā sanctificantem in statu innocentie fuisse primo homini collatam, siue illam post creationem acceperit, siue quod probabilius est, in ea creatus fuerit, ut docet S. Th. 1. p. qu. 95. ar. 1. de qua re Tract. 4. sup. cit. egimus.

Certum est 2. Gratiæ actualis auxilium aliquod in statu innocentie fuisse homini necessarium, illumque solis arbitrii viribus juste vivere, & in iustitia perseverare non potuisse. Ita docet passim S. Aug. præsertim lib. de corrept. & grat. cap. 11. ubi dicit, primum hominem gratiam habuisse, in qua si permanere vellet, nunquam malus esset, & sine qua etiam cum libero arbitrio bonus esse non posset.

Certum est 3. in pluribus differre Gratiā status innocentie, quam aliqui vocant Gratiā sanitatis, a Gratia status naturæ lapsæ reparatæ, quam vocant medicinalem.

Ac in primis in eo, quod omnis Gratia medicinalis sit ex Christi Domini meritis, Gratia vero sanitatis ex illis non sit, si eorum sententia vera sit, qui existimant, Adamo non peccante, Filium Dei non fuisse incarnandum.

Deinde in eo, quod Gratia medicinalis amplior sit, & abundantior, quam Gratia sanitatis, juxta illud Christi Domini S. Jo. 10. *Ego veni, ut vitam habeant, & abundantius habeant.* Unde Apost. Rom. 5. dicit, quod, *Ubi abundavit delictum, superabundavit & gratia.* Ubi enim gravior est miseria, ibi amplior misericordia, ubi major inopia, ibi abundantior copia requiritur.

2. Præterea, Gratia sanitatis ad id tantum conferebatur, ut homo san-

sanctitatem, & innocentiam acceptam conservaret: Gratia vero medicinalis ad hoc, ut tum a variis, & gravissimis peccati originalis, & actualis ægritudinibus sanetur, tum ut sanatus a variis periculis, quæ sive interius, sive exterius occurrere possunt, præservetur, tum etiam ut in recuperata sanitate, & sanctitate proficiat, & usque in finem perseveret. Hancque tertiam utriusque Gratia differentiam fuse explicat S. August. lib. cit. de corrept. & grat.

Cum igitur hæc in confesso sint apud omnes, superest adhuc una difficultas hic solvenda, an scilicet Gratia sanitatis in eo præsertim differata Gratia medicinali, quod Gratia sanitatis homo, si vellet, dissentire posset, Gratia vero medicinali necessario assentiatur, nec ab illa dissentire possit.

Hanc utriusque illius Gratia differentiam affert Calvinus in Antidoto Conc. Trid. ad sess. 6. c. 5. ubi in Patres illius Concilii invehitur, quod dicentes, hominem in statu naturæ lapsæ posse Gratiam oblatam abjicere, & can. 4. posse illi dissentire, si velit, Gratia medicinali tribuerent, quod erat proprium Gratia sanitatis, ipsisque hac de causa Pelagianismi notam inurit.

Verum falsitas hujus dogmatis evidenter patebit ex dicendis infra c. 4. Unum hic tantum interim, aut alterum testimonium S. August. (cujus auctoritate Calvinus hoc suum dogma propugnare maxime conatur) afferemus, ad probandum, ex mente illius S. Patris Gratiam illam, quæ in statu naturæ lapsæ homini tribuitur, nullam ipsi ad agendum inferre necessitatem, ejusque voluntatem liberam, & indifferenter ad consentiendum Deo, vel dæmoni relinquere. Sic igitur loquitur S. ille Pater l. 50. hom. 12. *Cum per Dei adjutorium in potestate tua sit, ut non consentias diabolo, quare non magis Deo, quam ipsi obtemperare deliberas? &c. quare ad peccandum seducit Satanas, cum Deus posuerit in homine non consentire Satanae? &c. Dat quidem ille (diabolus scilicet) consilium, sed Deo auxiliante nostrum est vel agere, vel repudiare, quod suggerit. Et hom. 16. In tuo arbitrio Deus posuit, cui pares locum, Deo, an diabolo. Huic veritati subscripsit etiam S. Hieron. in c. 49. Isa. cum dixit, Dei vocare est, & nostrum credere, nec statim, si nos non credamus, impotens est Deus, sed potentiam suam nostro arbitrio derelinquit, ut juste voluntas premium consequatur. Et S. Fulgent. lib. de prædest. & grat. c. 9. ubi dicit, Deum inter se, & homines ita ordinasse, ut vocatione ipsius, bonorum principia sumeremus, vocati autem, & illuminati viam mandatorum ejus boni ingenii intelligentia nosceremus, & ea libero eligeremus, vel relinqueremus arbitrio. S. item Bern. ser. 5. in Quadrag. Potest, inquit, inimicus excitare tentationis motum, sed in te est, si volueris dare, seu negare consensum.*

3. Cum igitur in his S. Aug. aliorumque SS. Patrum testimoniis agatur de homine in statu naturæ lapsæ, de illoque dicatur, quod a Deo



adjutus & auxilio Gratiae praeventus, liber remaneat ad obtemperandum Deo, vel diabolo, ad consensum tentationi dandum, vel negandum, ad bonum eligendum, vel relinquendum; inde inferitur, secundum illorum mentem, Gratiam medicinalem aequae ac Gratiam sanitatis nullam inferre homini ad agendum necessitatem, illumque si velit, posse Gratiam illam sequi, vel abjicere, & illi consentire, vel dissentire: ac proinde fictitiam esse illam differentiam, quam Calvinus inter utranque Gratiam in odium Con. Trid. invehere conatus est.

## S E C T I O . V.

*An Gratia necessaria sit ad cognoscendum quodlibet verum.*

1. **N**on agimus hic de necessitate Gratiae habitualis sanctificantis. Certum est enim, sine illa quodlibet verum cognosci posse. Unde S. Aug. lib. 1. Retract. c. 4. retractavit id, quod dixerat l. 1. Soliloq. c. 1. Deum nonnisi mundos corde verum scire voluisse.

Quaestio igitur intelligi debet de necessitate Gratiae actualis ad cognoscendum quodlibet verum in statu naturae lapsae, de quo solo in hac Sectione agitur. Sunt autem veritates, quae ab homine cognosci possunt, in duplici differentia; aliae naturales, quae vel ex objectis sensibilibus cognosci, vel naturali discursu intelligi possunt; aliae supernaturales, ad quarum cognitionem neque per objecta sensibilia, neque per naturalem discursum perveniri potest. Rursum utriusque generis veritates sunt vel speculativae, vel practicae. Speculativae sunt earum rerum, quae tantummodo cognoscendae sunt, ut animam hominis esse immortalem, practicae vero illarum, quae non solum cognoscendae, sed etiam faciendae sunt, ut virtutem esse amplectendam. Hac distinctione supposita, pro quaestionis propositae resolutione

2. Dicendum 1. quamlibet veritatem speculativam naturalem, quae ex effectis, aut objectis sensibilibus deducitur, posse cognosci seorsum ab homine per solas naturae vires; absque ullo speciali Gratiae auxilio. Ita S. Thom. 1. 2. qu. 109. ar. 1.

Constat ex eo, quod talis cognitio non superat naturae vires, cum sit de objecto naturali per media naturalia cognoscendo. Unde & ipsi Ethnici Philosophi tam multa de rebus creatis perspecta naturaliter habuerunt, imo & de Deo ipso, juxta quod dicit Apost. Rom. 1. *Invisibilia Dei per ea, quae facta sunt, intellecta conspiciuntur*. Constat praeterea ex eo, quod S. Aug. l. 1. ad Simplician. qu. 2. ait, Deum in eligendis hominibus ad Gratiam salutarem, neque ingenium, neque scientiam, & doctrinam attendere. Unde sequitur, scientiam, & doctrinam ante omnem Gratiam haberi posse.

Objicies, multa esse in rebus naturalibus, etiam seorsum, ac distributive sumptis, quae a nobis cognosci nequeunt, v. g. quanam sint ultimae rerum differentiae, & similia.

Re-

Respondetur, quamplurima ex iis non cognosci revera de facto, quia eorum proprietates, vel effectus aliquando non satis apparent. Nos vero in conclusione egimus non de quibuscunque veritatibus naturalibus, sed de iis dumtaxat, quæ ex effectis, & objectis sensibilibus deducuntur. Adde etiam, multa ex iis naturaliter sciri posse, quæ tamen non cognoscuntur, quia non satis diligenter investigantur, & etiam multa sciri a quibusdam, quæ tamen putantur adhuc esse incognita.

Instabis, in Concil. Arausicano I. can. 9. dici, Divini muneris esse cognoscere veritatem.

Respondetur, Concilium ibi loqui de cognitione supernaturali, quæ conferat ad veram, & Christianam pietatem, ut patet ex canonibus præcedentibus, & consequentibus, non vero de naturali, de qua sola hic quæstio est.

3. Dicendum 2. veritates speculativas supernaturales non posse naturaliter ab homine cognosci, sed tantum per specialem Gratiā, ac revelationem Dei.

Probatur 1. ex Scriptura. 1. Cor. 7. *Misericordiam consecutus sum, ut sim fidelis.* Unde S. Aug. lib. de Grat. & lib. arb. c. 7. colligit, ipsam Fidem non haberi, nisi Deo miserante. Et c. 14. ex iis verbis Apost. ad Philip. 1. *Vobis donatum est, non solum ut in ipsum credatis, sed etiam ut pro illo patiamini,* idem S. August. recte infert, Dei donum esse æque in eum credere, ac pro eo pati.

Probatur 2. ex Conc. Trid. sess. 6. can. 3. ubi dicitur anathema ei, qui asseruerit, hominem per se, sine præveniente Spiritus sancti inspiratione, & adiutorio, credere posse, sicut oportet.

Porro ex his ultimis Concilii verbis colligitur, posse quidem hominem per solas naturæ vires assentiri veritatibus Fidei sibi exterius propositis, assensu quidem opinativo, ita ut ratio, propter quam illis assentitur, non sit Divina revelatio, sed motivum aliquod probabile, ut in Hæreticis contingere cernimus, quorum hic assentiendi modus proprius est; at vero iisdem veritatibus assentiri non posse, sicut oportet, id est assensu certo, & infallibili, auctoritate Dei revelantis innixo, sine ipsius Divinæ Gratiæ auxilio speciali.

4. Dicendum 3. hominem non posse per proprias vires ullam veritatem practicam supernaturalem cognoscere, posse tamen aliquas practicas naturales, licet non omnes. Assertio constat tribus partibus.

Prima satis constat ex iis, quæ pro secunda conclusione jam diximus, & confirmari potest ex Concil. Milevit. seu Carthagin. can. 4. ubi dicitur, *donum Dei esse scire, quid facere debeamus,* supple ad vitam æternam consequendam, de qua ibi loquitur Concilium.

Secunda assertionis pars probatur 1. ex Ap. Rom. 1. ubi dicit, Philosophos inexcusabiles fuisse, quia cum cognovissent Deum, non sicut Deum glorificaverunt. Unde sequitur, illos non tantum speculative cognovisse, unum esse Deum, sed & practice illum esse glorificandum

& colendum; alias si hoc invincibiliter ignorassent, fuissent excusabiles, cum ad culpam non deputetur (juxta S. Aug. l. 3. de lib. arb. c. 18.) quod quis invitus ignorat. Probat 2. ex eodem S. Aug. in Psalm. 57. ubi dicit, præceptum illud nostris cordibus ipsa veritatis manu scriptum esse, *Quod tibi fieri non vis, alteri ne feceris.*

Tertia denique pars assertionis constat tum ex humanæ mentis imbecillitate, tum ex difficultate, quæ plerunque occurrit ad discernendum bonum a malo in multis casibus particularibus, tum etiam ex contrariis passionibus, quibus tanquam nubibus mens obscuratur. Sæpe enim evenit, sentientem appetitum in objectum sibi conveniens, licet aliunde a recto rationis ordine alienum, vehementi motu abripi. Unde sequitur mentis languor, & obnubilatio, exhaustis per fomitis æstum animæ viribus, juxta illud Sap. 9. *Cogitationes mortalium timide, & incerta providentiæ nostræ. Corpus enim, quod corrumpitur, aggravat animam, & terrena inhabitatio deprimit sensum multa cogitantem.*

## S E C T I O VI.

*An possit homo velle, aut facere bonum aliquod sine Gratia.*

1. **Q**uæstio intelligenda est non de Gratia habituali, de qua sequenti Sectione agetur, sed de actuali, an scilicet homo bonum aliquod opus sine illius auxilio velle, aut facere possit. Pro cujus resolutione

Dicendum 1. neminem sine speciali Divinæ Gratiæ auxilio posse velle, aut perficere bonum aliquod opus, quod ad salutem æternam consequendam conferat. Est de Fide contra Pelagianos.

Probat 1. ex Script. 1. Cor. 15. *Gratia Dei sum id, quod sum.* Eph. 2. *Gratia enim estis salvati per Fidem.* Philip. 1. *Qui cæpit in vobis opus bonum, perficiet usque in diem Christi Jesu.* Plura alia Scripturæ testimonia pro confirmatione illius veritatis videri possunt passim in libris S. Hieron. ac S. August. contra præfatos Hæreticos conscriptis.

Probat 2. ex Conciliis Milevit., Carthag., Arausic., & ex Summis Pontificibus Innocentio, Zosimo, Cœlestino, & Gelasio, quorum auctoritates fuse retulimus sup. sect. 2. & præterea Conc. Trid. sess. 6. can. 1. 2. & 3. ubi anathema profertur in eum, qui dixerit, hominem posse sine Christi Gratia juste vivere, & vitam æternam promereri.

Probat 3. hac ratione, qua utitur S. Th. 1. 2. q. 109. ar. 5. quia actus perducentes ad finem, ipsi fini proportionati esse debent; atqui vita æterna est finis excedens naturæ humanæ proportionem; ergo actus ad eam perducentes, ipsius naturæ proportionem excedere debent, proindeque solis illius viribus, sine Divinæ Gratiæ auxilio fieri nequeunt.

2. Dicendum 2. probabile esse, quod homo per proprias arbitrii vires, cum solo generali Dei concursu, sine ullo Gratiæ actualis auxilio, ali-



aliquod bonum opus morale ( quod tamen nihil ad æternæ vitæ meritum conferat ) perficere possit , probabilius tamen esse , quod non possit , sed quod ad perficiendum quodcunque opus , quod sit ex omni parte moraliter bonum , tam ratione objecti , quam finis , & circumstantiarum , aliquo Divinæ Gratiæ auxilio indigeat . Hæc assertio duas habet partes .

In 1. dicimus , probabile esse , quod homo per proprias arbitrii vires possit aliquod opus bonum moraliter exercere , quia multi graves Auctores ita existimant , ut Magister sententiarum in 2. dist. 26. c. ult. S. Bonav. Scotus , Durandus , Cajet. Bellarm. Suar. Gammach. & alii plures , idque probant variis tum auctoritatibus , tum rationibus , quæ apud illos videri possunt .

In 2. vero assertionis parte dicimus , probabilius esse , hominem in statu naturæ lapsæ nullum opus ex omni parte moraliter bonum posse re ipsa efficere cum solo generali Dei concursu , sine speciali aliquo Gratiæ auxilio . Ita Greg. Ariminensis , Hispalensis , Capreolus , Petrus Sotus , & plures alii , quos citat , & sequitur Vasquez disp. 190.

Probatur 1. ex Scriptura , S. Joan. 15. ubi Christus Dominus dicit , *Sine me nihil potestis facere* , in quæ verba S. Aug. tract. 81. in Joan. *Sive ergo parum* , inquit , *sive multum sine illo fieri non potest , sine quo nihil fieri potest* . Et 2. Cor. 3. *Non sumus sufficientes cogitare aliquid ex nobis , quasi ex nobis , sed sufficientia nostra ex Deo est* . Atqui nullum opus moraliter bonum fieri potest , nisi bona aliqua cogitatio præcedat .

Probat. 2. ex Cœlestino Papa Ep. supra cit. ad Episcopos Galliæ , can. 9. ubi ait , omnem sanctam cogitationem , pium consilium , omnemque bonæ voluntatis motum ex Deo esse . Et ex Conc. Araus. II. can. 22. ubi dicitur , quod *nemo habet ex se , nisi mendacium , & peccatum* .

Probatur 3. ex S. Ambrosio lib. de vocat. Gen. cap. 3. ubi dicit , quod si Deus non operatur in nobis , nullius possumus participes esse virtutis . & c. 9. dicit , quod omne verbum bonum , & omne opus sanctum ministratio sit Spiritus sancti , sine quo nihil recte agatur . Et ex S. Aug. ser. 33. de verbis Apostoli , ubi loquens de auxilio Gratiæ Dei : *Prorsus* , inquit , *si defuerit , nihil boni agere poteris . Agis quidem , illo non adjuvante , libera voluntate ; sed male* .

Probatur 4. auctoritate S. Doctoris q. 14. de veritate , art. 14. ubi postquam dixit , sine Gratia habituali fieri posse aliquod virtutis opus , statim adjungit : *Sed si velimus Gratiæ Dei dicere , non aliquod habituale donum , sed ipsam misericordiam Dei , per quam interior motus mentis operatur , & exteriora ordinat ad hominum salutem , sic nec ullum bonum potest homo facere sine Gratia Dei* . Et 1. 2. q. 109. ar. 2. dicit , hominem posse quidem , etiam in statu naturæ corruptæ , per virtutem suam naturalem , aliquod bonum particulare agere , sicut ædificare domos , plantare vineas , & alia ejusmodi , non tamen totum bonum sibi connaturale , ita ut in nullo deficiat .

3. Probatur denique hac ratione deducta ex iis , quæ idem S. Doct. dixit ,

dixit, tum in corpore articuli, tum in responsione ad 1. Nullum unquam opus bonum morale homo deliberate vult, aut facit, quin aliqua præcedat deliberatio rationis, quæ semper ex aliqua prima cogitatione indeliberata pendet, quæ nisi occurrat, nunquam de tali bono faciendo deliberabit, nec proinde illud unquam faciet. Unde Aristoteles 2. S. Doctore ibidem citatus dicit, initium bonæ consultationis esse a bona fortuna, idest, non procedere ab ipsius hominis deliberata voluntate. Quod igitur talis ante omnem deliberationem in mente hominis exoriatur cogitatio, qua moveatur ejus voluntas ad aliquod bonum faciendum, ab ejus electione non pendet, neque id ex se præstare potest. *Nemo enim* (ut ait S. Aug. lib. de spiritu, & lit. c. 33.) *habet in potestate, quid ei veniat in mentem.* Unde sequitur, illud speciali Divinæ Providentiæ ordinationi adscribendum esse, respectu cujus nihil fortuito, & indeliberate accidere potest. Proindeque quoties aliquis bonum aliquod opus vult, & exequitur, illius initium speciali Divinæ beneficiæ auxilio semper adscribere tenetur. Quod quidem auxilium cum alias sit ipsi indebitum, neque ulla possit afferri ratio, cur hanc potius, quam aliam cogitationem ejus menti Deus immittere teneatur; recte, ac merito gratuitum, seu gratiæ Divinæ auxilium dici debet.

Confirm. ex eo; quod recte a Deo per Christi merita petimus, aut petere possumus Gratiā ad quodvis etiam minimum opus virtutis moralis exercendum; item recte ipsi Deo gratias agimus pro singulis virtutum moralium actibus per nos exercitis. Atqui, ut dicit S. Aug. Ep. 107. *Prorsus non oramus Deum, sed orare fingimus, si nos ipsos, non illum credimus facere, quod oramus: prorsus non agimus gratias Deo, sed agere fingimus, si unde illi gratias agimus, ipsum facere non putamus.*

Objicies illud Apostoli Rom. 2. *Gentes, quæ legem non habent, naturaliter ea, quæ legis sunt, faciunt.*

4. Respondetur varias esse hujus dicti Apostolici interpretationes, ac verissimam omnium illam videri, quam profert S. Aug. l. de Spirit. & lit. c. 26. S. Prosp. lib. cont. Collat. c. 12. S. Fulgent. lib. de Incarnat. c. 25. S. Thom. in illum locum, & alii, Apostolum ibi loqui de Gentilibus veri Dei cultoribus, & absque circumcisione, aliisque scriptæ legis ceremoniis bene operantibus, ac Divinam legem servantibus ex vera Fide in Deum, & auxilio Gratiae, quales fuerunt Melchisedech, Job, & alii. Quod autem eos dicit Apostolus naturaliter ea, quæ legis sunt facere: vult tantum illos id facere sine ulla lege scripta, qualis data fuerat Judæis, & propter quam se tantopere supra cæteras gentes efferebant, sed cum sola lege naturæ, quæ tamen non excludebat, imo ad sui observantiam Divinæ Gratiae auxilium requirebat.

Ex dictis colliges, sicut sine Divinæ Gratiae auxilio non potest homo ullum opus bonum facere, sic etiam illum nullam tentationem (quæ vera tentatio sit) posse perfecte, & per aliquod motivum moraliter bonum superare, cum utrobique sit par ratio. Poterit quidem sine Gra-

Gratia tentationi alicui leviori consensum denegare, eique resistere ex motivo aliquo indifferenti, v. g. illicitam aliquam voluptatem repudiare ex motivo tuendæ sanitatis, cui noxia est, sed ex motivo honesto, & bono, sine Gratia nunquam poterit, quia motivum illud bonum, cujuscunque virtutis sit, semper bonam aliquam cogitationem divinitus immissam præsupponit, ut ex supra dictis constat.

## S E C T I O VII.

*An possit homo sine Gratia habituali bonum aliquod opus exercere.*

1. **Q**uestionis sensus est, an sicut actualis Gratia, sic etiam habitualis ad quodlibet opus bonum exercendum necessaria sit, ac proinde an homo illa privatus, & in statu peccati mortalis existens, cum solo Gratiæ actualis auxilio, aliquod opus moraliter bonum exercere possit, sive opus illud sit quocunque modo æternæ vitæ meritorium, sive non sit, de qua re agetur c. 4. Pro cujus resolutione

Dicendum est, posse aliquod opus moraliter bonum fieri sine Gratia sanctificante, seu hominem in statu peccati mortalis posse aliquos actus moraliter bonos exercere.

Huic veritati, quæ de Fide est, opponitur error Joannis Hus, qui ut refert in Concilio Constantiensi sess. 15. assererat, extra statum Gratiæ sanctificantis nullum opus bonum fieri posse, & omnia peccatorum opera esse peccata. Quem etiam errorem secutus est Calvinus lib. 2. Instit. c. 3. Michael Bajus, qui articulo 35. ex iis, qui damnati sunt in Bulla superius relata, dixit, *Omne, quod agit peccator, aut factum peccati, aut peccatum esse.*

Refellitur hic error, & opposita veritas probatur 1. ex Scriptura, S. Luc. 11. ubi Christus Dominus alloquens Phariseos, quos ibidem dicit rapina, & iniquitate plenos esse, *Veruntamen, inquit, date elemosynam, & ecce omnia munda sunt vobis.* Et eodem capite dicit Christus, *Petite, & dabitur vobis, querite, & invenietis.* Quod autem illic non tantum justos, sed etiam peccatores alloquatur, constat ex iis, quæ subjungit: *Si ergo vos, cum sitis mali, nostis bona data dare filiis vestris, &c.* Et c. 18. Publicanus percutiens pectus suum, & orans justificationem impetrat.

Probatur 2. ex Concilio Constantiensi, in quo prædictus error damnatus est, & ex Concil. Trid. sess. 6. c. 6. ubi enumerantur varii actus virtutum, qui ab homine in peccato mortali existente, ex Divinæ Gratiæ auxilio exercentur, ut Fidei, timoris, spei, &c. quibus peccator ad justificationem recipiendam se disponit.

Probatur 3. ex S. Aug. Epist. 105. ubi in peccatoribus ante justificationem agnoscit virtutem, & meritum Fidei. *Nec ipsa, inquit, remissio peccatorum sine aliquo merito est, si Fides banc impetrat. Neque enim nullum est meritum Fidei.*

Pro-



Probatur 4. ex eo, quod multa sunt opera virtutum, puta religionis, temperantiæ, &c. ad quæ exercenda etiam peccatores legibus Ecclesiasticis obligantur, v. g. ad Missam diebus festivis audiendam, ad jejunium certis diebus servandum, &c. nec tamen legimus, Ecclesiam ullo canone, aut lege ejusmodi hominibus in peccato mortali existentibus injunxisse, ut antequam Missæ celebrationi interfint, aut jejunii observationem inchoent, de peccatis suis confiteantur, aut saltem perfectæ contritionis actu doleant, sicut injunxit iis, qui sacram Eucharistiam, aut alia Sacramenta essent suscepturi, vel eadem confecturi, aut aliis ministraturi. Quod tamen haud dubie fecisset, si nullum opus virtutis moraliter bonum a peccatoribus exerceri posse existimasset.

Objicies, Isa. c. i. dici, sacrificia, & quæcunque alia opera Religionis a peccatoribus exercita, esse Deo exosa, & abominanda.

Respondetur, non ideo præcise opera illa Judæorum fuisse Deo exosa, quia ipsi Judæi peccatores essent, sed quia illa ex prava intentione, & cum aliis vitiosis circumstantiis exercebant, ut patet ex his verbis, quæ immediate sequuntur: *Manus enim vestra plene sunt sanguine, & in die jejunis vestri invenitur voluntas vestra.*

2. Quæres an sicut absque Gratia sanctificante potest homo aliquid bonum opus exercere, sic etiam possit sine illa omnia Divinæ legis præcepta servare.

Respondetur, si de præceptis illis quæstio sit, quæ ad actus aliquos supernaturales exercendos obligant, quamvis aliqua eorum sine Gratia sanctificante impleri possint, omnia tamen, & singula non posse, cum aliqua ex iis sint, quorum observatio Gratiā sanctificantem in homine præsupponit, quale est præceptum de Eucharistia digne sumenda. Quod si de præceptis solius legis naturalis quæstio intelligatur, dicendum est, quamvis ab observationem cujuslibet illorum divisè sumpti Gratia sanctificans minime requiratur, sine illa tamen omnia legis naturalis præcepta collective sumpta saltem tempore aliquo diuturno servari non posse, proindeque hominem in statu peccati mortalis diu subsistere non posse, qui in alia peccata dilabatur. Ita S. Th. cit. q. 109. a. 4. & 8. ubi dicit, hominem non posse servare totam legem sine Gratia habituali sanante, seu sanctificante.

Et probatur ex eo, quod dicit Ap. Rom. 2. *Non auditores legis justi sunt apud Deum, sed factores legis justificabuntur*, quæ Apostoli verba S. Aug. l. de Spir. & lit. c. 26. sic intelligenda esse dicit: *Ut sciamus, aliter eos non esse factores legis, nisi justificentur, ut non justificatio factoribus accedat, sed ut factores legis justificatio præcedat.*

Hujus autem rei ratio alia non est, quam quod, si peccator in illo peccati mortalis statu fideliter cooperetur auxiliis Gratiæ actualis, quæ ipsi a Deo misericorditer subministrantur ad vincendas tentationes, quæ occurrunt, & exercenda bona opera moralia, quorum sese offert occasio, Deus pro sua ineffabili bonitate abundantiora illi Gratiæ suæ

præ-

præstabit auxilia, in eoque veræ compunctionis spiritum excitabit, qui secum Gratiā sanctificantem, vel per alicujus Sacramenti susceptionem, vel extra Sacramentum per actum veræ contritionis afferet. Unde infertur, neminem esse, qui notabili aliquo tempore torpescat in statu peccati mortalis, & non incidat in novum aliquod mortale peccatum. Si enim per illud tempus internis gratiæ auxiliis sibi a Deo ad servanda omnia legis Divinæ præcepta, & ad superandas tentationes occurrentes oblati fideliter cooperaretur, Deus haud dubie prædictum illi compunctionis spiritum immitteret, juxta suavem misericordiæ suæ dispositionem, quo efficaciter excitatus a peccato tandem resurgeret, & Gratiā sanctificantem consequeretur.

## S E C T I O VIII.

*An possit sine Fide aliquod opus moraliter bonum exerceri.*

1. **Q**uestionis sensus est, an sicut sine Gratia sanctificante, sic etiam sine ulla Fide supernaturali, sive habituali, sive actuali possit aliquod opus moraliter bonum exerceri, id est, an Infidelis, sive Hæreticus, sive Ethnicus, aliquod opus moraliter bonum facere possit. Pro cujus resolutione

Dicendum est, posse Infideles opera aliqua moraliter bona exercere. Ita S. Th. 2. 2. q. 10. a. 4.

Probatur 1. ex Scriptura, in qua laudantur aliqua opera Infidelium, tanquam bona, ut Exod. 1. laudantur obstetrices Ægyptiorum, quod Hebræorum masculis contra injustum Regis edictum pepercissent, & Act. 10. Cornelius Centurio adhuc Infidelis existens ( ut observat S. Th. sup. ) dicitur fecisse eleemosynas, & orationes obtulisse, quæ acceptæ Deo fuerunt.

\* Probatur 2. auctoritate Pii V. & Gregorii XIV. qui in Bullis suis contra Bajum hanc ejus propositionem condemnarunt: *Omnia opera Infidelium sunt peccata, & Philosophorum virtutes sunt vitia.*

Probatur 3. ex S. Chrys. hom. de Fide, & lege naturæ, ubi dicit, multos, qui Deum ignorant, bonis operibus florere, quamvis hæc opera ad salutem promerendam non sint ipsis utilia. Et ex S. Hier. in c. 1. ad Galat. ubi dicit, multos absque Fide, & Evangelio Christi, multa salubriter, & sancte perficere, v. g. parentibus obsequi, inopi manum porrigere, &c. Item ex S. Aug. l. de Spiritu, & lit. c. 26. ubi dicit, quod *Impiorum Deum verum neque veraciter, neque juste colentium quædam tamen facta legimus, vel novimus, vel audimus, quæ secundum justitiæ regulam non solum vituperare non possumus, verum etiam merito, recteque laudamus.* Et l. 5. de Civ. c. 15. dicit, Deum Romanis tam amplum Imperium dedisse in remunerationem bonarum virtutum, quæ in ipsis erant. Et Ep. 163. de Polemone loquens, quem dicit exhortatione Xenocratis ex luxurioso con-

continentem esse factum: *Quonquam ergo, inquit, non fuerit Deo acquisitus, sed tantum a dominata luxuria liberatus, tamen ne id ipsum quidem, quod melius in eo factum est, humano operi tribuerim, sed Divino.* Et quibusdam interjectis: *Polemon ergo, si ex luxurioso continens factus, ita sciret, cujus esset hoc donum, ut eum abjectis superstitionibus coleret, non solum continens, sed & veraciter sapiens, & salubriter religiosus existeret.*

2. Neque dicas, his, & similibus locis apud S. Augustinum agi de operibus Infidelium, quæ fuerunt quidem bona ex objecto, seu (ut ipse loquitur) ex officio, sed non ex fine.

Respondetur enim, opera illa, quæ ut bona referuntur, & laudantur a S. Aug. citatis locis, fuisse bona non tantum ex objecto, & officio, sed etiam ex fine, alioquin si mala fuissent ex fine, seu si ob pravam aliquem finem facta fuissent, simpliciter, & absolute mala fuissent, adeoque peccata, unde sequeretur, Deum peccata remunerare, ad peccata facienda juvare, peccata esse dona Dei, quod absurdum est, & nullatenus dici debet.

Objic. 1. illud Apost. Ro. 14. *Omne, quod non est ex Fide, peccatum est.*

Respondetur, per fidem hoc loco non intelligi Fidem Theologicam, sed dictamen conscientie, ut ex contextu verborum Apostoli evidens est. Ibi enim agit de novis Christianis, qui conscientia reclamante, cibos manducabant, quos vetitos credebant, quia in lege Mosaica vetiti erant, illosque monet conscientiam illam erroneam deponere, alias si dum illis vescuntur, credant, sibi hoc licitum non esse, dicit, illos peccatum committere, quia omne, quod fit contra conscientie persuasionem, peccatum est.

Objicies 2. S. Aug. variis in locis aperte docere, ab Infidelibus nulla opera bona præstari.

Respondetur, illis in locis Sanctum illum Patrem velle tantum, quod Infideles raro exercent opera, quæ vere bona sint, propter defectum intentionis, quæ in illis ut plurimum prava erat, ac vitiosa, quamvis alioquin ex auxilio Gratiæ Divinæ, qua excitabantur, recta esse potuissent. unde l. de Spir. & lit. c. 27. loquens de Gentilium operibus dicit, quod, *si discutiantur, quo fine fiant, vix invenientur, qui justitiæ debitam laudem mereantur*, ubi particula *Vix* indicat aliqua Infidelium opera, quamvis rarissime, ex recta intentione processisse; vel si absolute aliquando neget, ab Infidelibus opera ulla bona exerceri, illum intelligi debere de operibus bonis æternæ vitæ meritoriis, unde libro 4. cont. Julianum c. 3. Scito, inquit, *nos illud tantum dicere bonum hominis, per quod solum potest ad æternum Dei donum, regnumque perducī.*

3. Objicies 3. ex ante dictis constare, nullum opus moraliter bonum sine Divinæ gratiæ auxilio fieri posse; atqui nullum gratiæ Divinæ auxilium in Infidelibus ante Fidei perceptionem reperitur.

Respon.



Respondetur, falsum esse nullum Gratiae auxilium Infidelibus dari ante Fidem. Docet enim aperte S. Aug. l. de Grat. Christi c. 24. Regem Assuerum Infidelem peculiari Gratiae Divinae auxilio excitatum fuisse ac adjutum, ut furorem deponeret, & mansuetudinem sectaretur. Et supra ex eodem S. Aug. vidimus, Polemonem Infidelem dono Divinae Gratiae ex luxurioso continentem esse factum: & capite sequenti probabitur, omnibus omnino hominibus, ac proinde etiam Infidelibus, antequam Fidem recipiant, imo etsi nunquam illam recipiant, Gratias ex Christi Domini meritis dari ad salutem sufficientes.

\* Porro super hac quaestione utiliter legi poterit B. Francisci Salesii Episcopi Genevensis Liber Secundus de Amore Dei praesertim c. 11. ubi non minus pie, quam erudite docet, & probat, Deum varia Gratiae suae dona Infidelibus ante donum Fidei elargiri, ut illos scilicet ad istud accipiendum praepararet, & disponat, & si fideliter cooperentur, ut tandem illis eximium illud Fidei donum tribuat.

## S E C T I O XI.

*An homo in Gratiae habitualis sanctificantis statu indigeat aliquo Gratiae actualis auxilio ad operandum bonum, & ad finalem perseverantiam consequendam.*

1. **Q**uestionis sensus est, an homo in Gratiae habitualis sanctificantis statu constitutus, praeter habitus supernaturales Fidei, Spei, & Charitatis, aliarumque virtutum, quae ipsam Gratiam sanctificantem comitantur (ut dicetur infra) indigeat aliquo Gratiae actualis auxilio, ut possit bonum operari, tentationes occurrentes superare, & in illo Gratiae sanctificantis statu usque ad finem vitae perseverare. Pro cuius resolutione

Dicendum 1. hominem justum, seu Gratia sanctificante praeditum non posse absque novo Gratiae actualis auxilio opera exercere aeternae vitae meritoria. Ita S. Th. q. 109. a. 9.

Prob. 1. ex Conc. Arausicano V. can. 10. ubi dicitur, baptizatos omnes, accepta per Baptismum Gratia, posse quidem, & debere ea, quae ad salutem pertinent, adimplere, sed Christo auxiliante, & cooperante. Et ex Conc. Trid. sess. 6. c. 16. ubi dicitur, Christum Jesum, tanquam caput in membra, & tanquam vitem in palmites, in ipsos justificados jugiter virtutem influere, quae virtus bona illorum opera semper antecedit, comitatur, & subsequitur. Haec autem solum de justorum operibus aeternae vitae meritoriis intelligi debent.

Probatur 2. ex S. Aug. lib. de grat. & lib. arb. c. 6. ubi sic loquitur: *Necessarium est homini, ut Gratia Dei non solum justificetur impius, id est ex impio fiat justus, cum redduntur ei bona pro malis, sed etiam cum fuerit jam justificatus ex Fide, ut ambulet cum illo in Gratia, & incumbat super ipsam, ne cadat.*

Pro-

Probatur 3. ex eo, quod habitus non movent potentiam, nec illam ad operandum juvant, nisi prius ab ipsa potentia applicentur ad operandum; naturalis autem potentia hominis non potest per se ipsam habitum supernaturalem applicare ad operandum, nisi ipsa prius excitetur a Deo, cum initium omnis boni operis ex Deo sit, ut ex ante dictis constat.

2. Dicendum 2. neque etiam posse hominem in statu Gratiæ sanctificantis existentem ullum cuiuscunque virtutis opus bonum exercere absque aliquo Gratiæ actualis auxilio. Ita S. Th. loc. cit.

Probatur 1. ex can. 9. sup. cit. Concilii Arausiaci, ubi dicitur, quod quoties bona agimus, Deus in nobis, atque nobiscum, ut operemur, operatur. & can. 10. dicit, adjutorium Dei etiam renatis, ac sanctis esse semper implorandum.

Probatur 2. eadem ratione, qua sup. sect. 6 ostendimus, non posse hominem ex solis naturæ viribus sine Gratiæ actualis auxilio ullum opus moraliter bonum exercere. Ratio enim illa id æque probat de homine in statu Gratiæ sanctificantis existente, cum in tali statu nullum virtutis actum possit exercere, nisi tales in ejus mente oriantur cogitationes, quibus moveatur voluntas ad illius virtutis actum exercendum; hæ autem cogitationes, cum omnem deliberationem præveniant, ex sola Dei misericordia provenire censendæ sunt, ac proinde Christi Domini Gratiæ adscribi debent.

Dicendum 3. non posse hominem in statu Gratiæ usque in vitæ suæ finem perseverare absque speciali Divinæ Gratiæ auxilio. Ita S. Th. supra art. 10.

Constat ex ante dictis. Cum enim homo sine auxilio Gratiæ actualis nullam tentationem vincere, nec ullum bonum opus exercere possit, a fortiori sequitur, nec posse sine speciali Gratiæ auxilio in accepta justitia usque in vitæ finem perseverare, cum perseverantia illa obtineri nequeat, nisi per exercitium bonorum operum, & victoriam tentationum occurrentium, ut fuse docet, & explicat Conc. Trid. sess. 6. c. 13. Et c. 22. anathema profert in eum, qui dixerit, justificatum sine speciali Dei adjutorio in accepta justitia perseverare posse. Eodem sensu dixit Coelestinus Papa in Ep. ad Episcopos Galliæ can. 6. *Neminem, etiam Baptismatis Gratia renatum, idoneum esse ad superandas diaboli insidias, nisi per quotidianum Dei adjutorium perseverantiam bonæ conversationis accipiat.* Quod optime explicat S. Hier. Ep. ad Ctesiphontem adver. Pelag. c. 3. his verbis: *Non sufficit mihi, quod semel Gratiā mihi donavit, nisi semper donaverit; peto, ut accipiam, & cum accepero, rursus peto, avarus sum ad accipienda Dei beneficia, nec ille deficit in dando, nec ego satior in accipiendo.*

3. Dices, contingere posse, ut aliquis statim post acceptam justificationem ex hac vita decedat, in quo casu nullum speciale Gratiæ actualis auxilium illi ad perseverandum necessarium est.

Respon-

Respondetur, in tali casu posse quidem hominem perseverare ab aliquo novo gratiæ actualis auxilio, sed non sine novo, & indebito favore, ac dono Divinæ misericordiæ, quo fit, ut ex hac vita in eo statu subtrahatur, & ex variis, & maximis salutis amittendæ periculis singulari Dei beneficio eruatur, juxta quod dicitur Sap. 4. *Raptus est, ne malitia mutaret intellectum ejus, aut ne fictio deciperet animam illius. Placita enim erat Deo anima illius. Propter hoc properavit illum educere de medio iniquitatum.*

Quæres, an homo in gratia sanctificante constitutus possit cum auxilio gratiæ omnia, & singula peccata venialia devitare.

Respondetur 1. certum esse, quodlibet peccatum veniale divisive sumptum posse ab homine justo cum ordinario gratiæ auxilio devitari, posse item tot, & tanta, tamque specialia gratiæ auxilia homini justo a Deo communicari, ut eorum beneficio vitam ab omni prorsus veniali peccato immunem ducat. Hoc enim re ipsa factum esse in Sanctissima Virgine MARIA, universa tenet Ecclesia, ut patet ex Conc. Trid. sess. 6. can. 23.

Respondetur 2. si quæstio sit, an homo justus cum illis gratiæ auxiliis, quæ communiter justis dantur, omnia, & singula peccata venialia per totum vitæ tempus evitare possit, illum id non posse.

Hoc enim expresse definitum est in citato canone 23. Conc. Trid. in quo damnatur, qui dixerit, hominem justificatum posse in tota vita peccata omnia, etiam venialia, vitare, nisi ex speciali Dei privilegio. Id enim probat S. August. Epist. 89. qu. 1. ex his orationis Dominicæ verbis, *Dimitte nobis debita nostra. Omnibus enim, inquit, necessaria est Oratio Dominica, quam etiam ipsis Apostolis suis Dominus dedit, ut unusquisque Deo dicat: Dimitte nobis debita nostra. Cui enim hac in oratione verba necessaria non fuerint, ipse hic sine peccato vivere pronunciandus est, quales si aliquos futuros Dominus prævideret, meliores utique, quam extiterunt ejus Apostoli, aliam orationem illos doceret.*

## C A P U T II.

### De Gratia sufficienti.

#### S E C T I O I.

*Quid sit Gratia præveniens, excitans, & operans.*

1. **A**D faciliorem eorum, quæ de Gratia sufficienti dicturi sumus, intelligentiam, prius hic explicandæ sunt variae species, seu acceptiones ipsius gratiæ actualis.

Alia siquidem est gratia excitans, alia adjuvans. Utriusque mentio fit Apoc. 3. *Ecce sto ad ostium, & pulso en gratia excitans: si quis aper-*  
*Med. Theol. Pars I. V rue.*



uerit, introibo ad illum, & cenabo cum illo, & ipse mecum, in gratia adjuvans. Et in Conc. Trid. sess. 6. ca. 5. Ut qui per peccatum a Deo averfi erant, per ejus excitantem, atque adjuvantem Gratiā ad convertendum se ad suam ipsorum justificationem, eidem Gratiā libere assentiendo, & cooperando disponantur.

Alia item gratia operans, alia cooperans. De operante loquitur Apost. Philipp. 2. Deus est, qui operatur in nobis velle, & perficere. De cooperante 1. Cor. 15. Abundantius omnibus laboravi, non ego, sed Gratiā Dei mecum. De utraque loquitur S. August. lib. de grat. & lib. arb. c. 17. Deus, inquit, cooperando in nobis perficit, quod operando incipit. Et paulo post. Sine illo enim vel operante, ut velimus, vel cooperante, cum volumus, ad bona pietatis opera nihil valemus.

Alia denique gratia præveniens, alia comitans, & alia subsequens. De præveniente dicitur Ps. 58. Misericordia ejus præveniet me. De comitante Ps. 72. Tenuisti manum dexteram meam, & in voluntate tua deduxisti me. De subsequente vero Ps. 22. Misericordia tua subsequetur me omnibus diebus vitæ meæ. De his etiam tribus mentio fit in Conc. Trid. sess. 6. can. 16. ubi dicitur, Christum Dominum in ipsos justificados influere virtutem, quæ bona illorum opera antecedit, comitatur, & subsequitur. Jam aliquid de singulis dicamus.

2. Gratia excitans, quæ eadem est cum præveniente, & operante, ( ut recte observat Gammach. in 2. 2. q. 111. c. 3. ) & ratione tantum ab illis distinguitur, nihil est aliud, quam motus aliquis bonus tam intellectus, quam voluntatis in nobis a Deo sine nobis productus, quo nos excitat vel ad bonum libere prosequendum, vel ad malum fugiendum.

Dicitur in primis, *motus*, quia non consistit in dono ullo habituali, sed in auxilio aliquo actuali, ut constat ex ante dictis, & ex dicendis adhuc patebit.

Dicitur *motus intellectus*, quia consistit in pia cogitatione, & illustratione intellectus, ut constat ex Concilio Arausicano II. can. 7. & Trident. sess. 6. cap. 5. ubi gratia illa, de qua nunc loquimur, vocatur illuminatio.

Dicitur præterea *motus voluntatis*. Illa enim gratia excitans comprehendit non tantum sanctas cogitationes, & illustrationes intellectus, sed etiam repentinos, & indeliberatos motus voluntatis, puta delectationis, timoris, & similes. Unde dicitur in Concilio Arausicano can. 7. Spiritum Sanctum dare suavitatem in credendo, & consentiendo veritati.

Dicitur etiam, *motus illos intellectus, & voluntatis in nobis a Deo produci*, quia Deus illos in nobis efficit, idque non solum, quatenus in eos influit per veram actionem physicam, verum etiam, quia soli Deo, ejusque gratuite misericordiae tribuendum est, quod in nobis exorti sint, cum in nostra potestate non fuerit, ut orientur,

ut

ut constat ex iis, quæ cap. præced. dicta sunt. Unde S. Aug. lib. 1. ad Simplicianum qu. 2. *Vocanti Deo recte tribuitur, quod bene volumus, nobis vero tribui non potest, quod vocamur.*

3. Dicitur denique, *præfatos motus in nobis sine nobis fieri*, quia quamvis fiant in nobis physice, & vitaliter in eos influentibus in genere causæ efficientis (quod constat ex eo, quod ejusmodi gratiæ excitantis motus passim in Scripturis, & apud Sanctos Patres exprimuntur per actus vitales intellectus, & voluntatis) fiunt tamen sine nobis libere operantibus, cum omnem deliberationem, ac libertatis usum præveniant, ut patet ex ante dictis, & ex ipsamet experientia, qua constat, in nostra potestate non esse, ut hi motus in nobis vel oriantur, vel non oriantur, licet postquam exorti sunt, liberum nobis sit ipsos vel continuare, vel interrumpere. Nemo (inquit S. August. lib. de Spir. & lit.) *habet in potestate, quid veniat in mentem, sed consentire, vel dissentire voluntatis est.*

Ex dictis patet, qua ratione eadem gratia dicatur præveniens, excitans, & operans. Dicitur enim præveniens, quatenus non solum omne meritum nostrum, sed etiam omnem libertatis usum prævenit. Dicitur excitans, quatenus potentias animæ nostræ excitat, & per modum suasionis impellit ad bonum, vel retrahit a malo. Unde S. Aug. 1. de Spir. & lit. c. 34. *Suasionibus*, inquit, *agit Deus, ut velimus, & credamus.* Dicitur denique operans, quatenus operatur in nobis, ut velimus, seu consentiamus, inclinando, & movendo voluntatem ad volendum, si re ipsa consensum obtineat, si non. Qui enim alteri aliquid suadere nititur, dicitur operari, & laborare, ut alter id velit, & præstet, si persuadeatur ille, si non persuadeatur.

## SECTIO II.

*Quid sit Gratiæ adjuvans, cooperans, comitans, & subsequens.*

1. **G**Ratia adjuvans, quæ & cooperans, vel comitans dicitur, illa est secundum S. August. lib. de Grat. & lib. arb. cap. 17. *per quam Deus volentibus cooperatur perficiens*, seu per quam Deus, cum volumus bonum, aut illud exequimur, nos ad illud volendum, & exequendum adjuvat, ac nobiscum cooperatur.

Cum autem difficillimum sit explicare, quid sit illud, per quod Deus ad id nos adjuvat, ac nobiscum cooperatur; hinc factum est, ut Theologi super hac re in varias sententias distracti sint. Nos in re valde abstrusa, aliorum omissis sententiis, id, quod nobis probabilissimum visum est, breviter proponemus.

Dicimus 1. probabile esse id, quod asserunt aliqui Doctores, gratiam scilicet excitantem, & operantem posse aliquando habere veram rationem gratiæ adjuvantis, seu cooperantis, tunc nimirum, cum sic allicit voluntatem ad consentiendum, ut re ipsa consentiat.

V a

Hoc

Hoc constat ex eo, quod gratia illa, quæ causat consensum nostrum liberum, est gratia adjuvans, seu cooperans. Ad gratiam enim cooperantem nihil aliud requiritur, quam ut sit gratia, & ut nobiscum operetur. Atqui talis est aliquando gratia operans, quia est vera gratia, ut ex ante dictis constat; & quando voluntas illi consentit, ac bonum operatur, est causa moralis ipsius consensus, & boni operis, quod fit. Omnis enim impulsio, exhortatio, suasio (qualis est gratia operans, ut supra diximus) vi cuius voluntas sic allicitur ad aliquid boni bene volendum, & faciendum, ut re ipsa velit, & faciat, est causa moralis efficiens ipsius volitionis, & operis, quod fit. Hinc S. Augustinus variis in locis ascribit consensum nostrum liberum in bonum Gratiæ operanti tanquam causæ, quæ illum efficit, ut lib. 1. de prædest. SS. c. 19. *Deus, inquit, operatur in cordibus hominum vocatione illa secundum propositum suum, ut non inaniter audiant, sed eo audito convertantur.*

Est autem hic advertendum, etiam si supradicti Doctores dicant, gratiam excitantem, & operantem esse quoque posse adjuvantem, & cooperantem, illos tamen hæc duo confundere, quasi sit idem esse gratiam operantem, & cooperantem, excitantem, & adjuvantem. Hoc enim tantum intendunt, eandem entitatem gratiæ dici posse operantem, & cooperantem varia consideratione; operantem quidem, quatenus illam in nobis Deus sine nobis producit, & ut sic vim habet in actu primo efficiendi consensum liberum nostræ voluntatis, sive illum in actu secundo efficiat, sive non efficiat, cooperantem vero, quatenus re ipsa moraliter in eum influendo, ipsum simul cum nostra voluntate in actu secundo causat, & efficit.

2. Dicimus 2. quemlibet supernaturalem habitum virtutum infusarum posse quoque habere rationem gratiæ cooperantis.

Est enim donum aliquod supernaturale naturæ nostræ minime debitum, quodque primam originem ex pura Dei misericordia ducit, ac physice concurrat simul cum voluntate ad operationes supernaturales, quas ut eliceremus, ab ipsa gratia operante excitati sumus.

Dicimus 3. influxum supernaturalem, quo Deus physice nobiscum concurrat ad consensum nostrum liberum, & opera bona, veram, & propriam rationem habere gratiæ cooperantis.

Est enim donum aliquod Dei, naturæ nostræ minime debitum, ac proinde mere gratuitum, per quod cum volumus (ut ait S. Aug. 1. de grat. & lib. arb. c. 7.) & sic volumus, ut faciamus, Deus nobiscum operatur, ac proinde veram gratiæ cooperantis rationem obtinet.

Jam quod spectat ad gratiam subsequenter, omissis variis ejus acceptionibus, quæ passim apud Theologos videri possunt,

Dicimus, per illam intelligi posse gratiam illam, quæ liberum nostrum consensum in bonum subsequitur, interius excitando ad bonum opus exequendum, cum ejus exequendi opportunitas exhibetur,



betur, & ad illius boni executionem, si consentiat voluntas, concurrento. Unde S. Fulgentius ad Monimum cap. 11. *Prævenit, inquit, Deus, & donat homini bonam voluntatem, deinde subsequitur benevolentem, operando in illo boni operis facultatem.*

Hinc patet, gratiam subsequentem nihil in re differre ab operante, & cooperante, sed tantum in eo, quod aliquam priorem gratiam tam operantem, quam cooperantem præsupponit.

## S E C T I O III.

*An detur aliqua Gratia sufficiens.*

1. **P**Ræter supra relatas, & explicatas gratiæ actualis divisiones, superest adhuc una, in qua major difficultas reperitur, qua scilicet ipsa gratia excitans, seu operans subdividitur in sufficientem, & efficacem. Quæ antequam explicetur, observandum est, nomen gratiæ sufficientis bifariam sumi apud Theol. 1. generice, prout convenit gratiæ tam efficaci, quam inefficaci. 2. specificè, prout est species quædam ipsius gratiæ sufficientis generice sumptæ, ac ipsi gratiæ efficaci opponitur, eique tanquam imperfectiori speciei nomen genericum attribuitur.

Gratia sufficiens generice sumpta est ea, quæ vires homini sufficientes præbet ad bene operandum, quamque, si velit, abjicere potest, sive de facto illam abjiciat, sive illi assentiatur, & cooperetur. Eo sensu gratiæ sufficientis nomen tam efficaci, quam inefficaci tribui potest. Unde gratia illa, quæ S. Paulo divinitus concessa est, & per quam tentationes superabat, ac salutem operabatur, quæque proinde efficax erat, sufficiens nominatur 2. Cor. 12. *Sufficit tibi gratia mea.* Et S. Prosper l. de vocatione Gentium cap. 10. Gratiam, quæ salutem re ipsa operatur, sufficientem vocat. Gratia sufficiens specificè sumpta est ea, quæ homini præbet quidem vires ad bene operandum, seu cum qua potest homo bene operari, quamvis re ipsa non bene operetur, defectu liberæ cooperationis.

2. Gratia vero efficax ea est, cum qua ita potest homo bene operari, ut etiam re ipsa bene operetur.

Jam circa ipsam sufficientem gratiam, sive generice, sive specificè sumptam, duæ sunt præcipuæ difficultates a nobis solvendæ. Prima est, utrum in statu naturæ lapsæ Deus talem hominibus det gratiam excitantem, & operantem, cui consensum præbere, vel negare, & quam recipere, vel abjicere possint, si velint, imo quam de facto aliquando abjiciant, illique dissentiant. Secunda est, an talis gratia sufficiens detur omnibus hominibus adultis, sive Fidelibus, sive Infidelibus.

Circa primam duæ sunt sententiæ erroneæ, & ab Ecclesia proscriptæ, quæ licet inter se valde oppositæ videantur, in eo tamen conveniunt, quod gratiam illam sufficientem dari negent.

Prima sententia est Pelagianorum, qui ( ut supra vidimus ) cum existimarent, voluntatem hominis sibi ipsi sufficere ad bonum quodlibet operandum, & ad salutem consequendam, ideo negabant, ullam dari gratiam internam sufficientem, quæ voluntatis humanæ insufficientiam suppleret.

Verum hujus sententiæ falsitas plenissime constat ex iis, quæ de gratiæ necessitate capite præcedenti dicta sunt.

Secunda sententia est Lutheri, Calvini, aliorumque Hæreticorum hujus temporis asserentium, in statu naturæ lapsæ nullam nobis dari gratiam sufficientem, quæ talis sit, ut voluntas illi dissentire, eamque abjicere possit; ac proinde omnem gratiam actualem, quæ datur in hoc naturæ lapsæ statu, esse semper efficacem, hoc est habere semper effectum illum, ob quem datur, & quamvis nullam voluntati inferat violentiam, illi tamen afferre, seu imponere consentiendi necessitatem, ita ut non coacte quidem, sed tamen necessario consentiat.

Ita Lutherus in lib. de servo arbitrio, ubi sic loquitur: *Necessario operamur, sive bonum, sive malum, necessario, inquam, non vero coacte.* Et ut apertius adhuc explicet mentem suam, utitur hac comparatione: *Humana voluntas ( inquit ) in medio posita est, ceu jumentum, si insederit Satban, vult, & vadit, quo vult Satban; si insederit Deus, vult, & vadit, quo vult Deus.*

Et Calvinus l. 2. instit. cap. 3. ubi sic loquitur: *Voluntatem movet Gratia, non qualiter multis sæculis traditum est, & creditum, ut nostræ postea sit electionis motioni illius aut obtemperare, aut refragari, sed illam efficaciter afficiendo.*

Et lib. contra Pighium: *Nego ( inquit ) Gratiam sic nobis offerri, ut nostræ postea sit optionis vel obtemperare, vel refragari: nego tantum in hoc dari, ut imbecillitatem nostram subsidio suo adjuvet. Neque enim efficere Deum in nobis testatur Paulus, ut possimus bene velle, sed hoc quoque ipsum, ut velimus. Proinde efficaciter formari voluntatem nostram constituo, ut Spiritus Sancti ductum sequatur necessario.*

Et in antidoto Concilii Trident. ad sess. 6. invehitur idem Hærefarcha in Patres illius sancti Concilii, quod dicant, homines gratiæ libere assentiri, & gratiam posse abjicere, ipsique posse dissentire, si velint, contenditque eos in hoc hallucinari, & falli, nec cognoscere discrimen præcipuum inter gratiam, quæ data fuerat Adæ in statu innocentiae, & gratiam, quæ in statu naturæ lapsæ confertur, quod nempe hæc necessitatem imponat voluntati, illa vero nullam necessitatem imposuisset, sed voluntatem liberam, & indifferentem reliquisset ad assentiendum, vel dissentiendum. Quod quidem multis probare nititur, ac præsertim variis D. August. testimoniis partim truncatis, partim in sensu falso, & ab illius S. Doctoris mente prorsus alieno explicatis. Ac insuper Doctores almæ Facultatis Sorbonicæ tanquam Sophistas, & Pelagianos sugillat, eo quod gratiam sufficientem in statu naturæ lapsæ

lapsæ dari assererent, cui posset homo dissentire, si vellet, illique de facto aliquando dissentiret.

Tertia igitur, & vera sententia illa est, quæ asserit, homini etiam in statu naturæ lapsæ dari Gratiam sufficientem, talem, ut illam possit abjicere, si velit, illique dissentire, & de facto aliquando illam abjiciat, illique dissentiat.

Quoniam vero hæc sententia gravioris alicujus momenti merito esse judicatur, ex eaque plurimæ aliæ Theologicæ veritates pendent, idcirco probationem illius paulo fusiore proponemus, eamque majoris facilitatis gratia in plures paragraphos dividemus.

§. I.

*Gratiam sufficientem, quæ in statu naturæ lapsæ homini datur, talem esse, ut illi resistere possit, & de facto aliquando resistat, probatur ex variis Scripturæ locis.*

1. **I**nnumera sunt fermæ Scripturæ testimonia, quæ ad id probandum faciunt: nos hic aliquot tantum illustriora seligemus.

Primum petitur ex Isa. cap. 3. ubi Deus de Judæis conquerens, sic loquitur: *Quid est, quod ultra facere debui vineæ meæ, & non feci? an quod expectavi, ut faceret uvas, & fecit labruscas?* Quo loco parabolice referuntur multa Gratiæ auxilia Judæis a Deo collata, ut bonorum operum fructus producerent. Est autem evidens, Gratiâ illas effectum suum non habuisse, proindeque Judæos illis assentiri noluisse. Neque dicas, solius externæ Gratiæ ibi fieri mentionem, puta legis Mosaicæ, &c. Cum enim externa illa adjumenta sola non sufficiant ad bene operandum, sine Gratia interiori; si hanc Deus ipsis non contulisset, quorsum diceret se expectasse, ut opera bona facerent, cum ad id facultatem sufficientem non haberent?

Secundum petitur ex cap. 1. Proverb. *Vocavi, & renuistis, extendi manum meam, & non fuit, qui aspiceret, despexistis omne consilium, & in reproptiones meas neglexistis,* quibus verbis manifeste conqueritur Deus, internas Gratiâs vocantes, & excitantes fuisse neglectas, ac despectas.

Tertium ex cap. 11. S. Matth. ubi Christus Dominus sic loquitur: *Vae tibi Corozain, vae tibi Bethsaida: quia si in Tyro, & Sidone factæ fuissent virtutes, quæ factæ sunt in vobis, olim in cilicio, & cinere poenitentiam egissent,* quibus verbis aperte significatur, datam fuisse gratiam harum civitatum incolis, per quam converti potuerunt, & tamen noluerunt. Neque dicas, Christum Dominum hic solum loqui de miraculis, & signis exterioribus, quia Pelagianum esset dicere, quod Tyrii, & Sidonii solis exterioribus signis, & miraculis sine interioris Gratiæ auxilio converti potuissent. Ergo de his solis Christus Dominus ibi non loquitur, sed simul de internis Gratiæ auxiliis, quæ cum aliis exterioribus miraculorum adjumentis collata Judæis fuerant,



quæque ipsi ex voluntatis suæ pravitate abjecerant, licet talia essent, ut Idololatræ ipsi, & omni vitiorum genere perditii homines, iisdem acceptis, non solum ad poenitentiam converti potuissent, sed etiam re ipsa conversi fuissent.

2. Quartum ex his Christi Domini verbis S. Matth. cap. 23. *Quoties volui congregare filios tuos, & noluisti?* ubi observandum est, illos qui noluerunt, habuisse Gratiam ad volendum sufficientem, qua potuerunt velle, alioquin non diceret Christus Dominus, *Volui congregare filios tuos, & noluisti*. Quomodo enim voluit, & ita voluit, ut de nolentibus conqueratur, si eos, quos sciebat per se non posse velle, non juvit, quantum necessarium erat, ad hoc ut possent velle?

Quintum ex cap. 7. Act. ubi S. Stephanus Judæos alloquens, *Vos, inquit, semper Spiritui Sancto resistitis*. Quid est autem aliud Spiritui Sancto resistere, quam ejus Gratia reluctari?

Sextum denique ex Rom. 2. *Ignoras, quoniam benignitas Dei ad poenitentiam te adducit? secundum autem duritiam tuam, & impœnitens cor thesaurizas tibi iram*. Per quid vero benignitas Dei ad poenitentiam nos adducit, nisi per Gratia interioris auxilia? quomodo autem impii thesaurizant sibi iram secundum duritiem suam, & impœnitens cor, nisi Gratia illi resistendo?

## §. II.

*Eadem sententia Conciliorum auctoritate probatur.*

1. **E**X tribus præsertim Conciliis nostræ sententiæ veritas probari potest.

Primum est Concilium Valentinum c. 2. ubi dicitur, *Malos non ideo perire, quia boni esse non potuerunt, sed quia boni esse noluerunt*. Unde sequitur, Gratiam malis conferri, qua boni esse possint, cum ex se ipsis, & sine illa tales esse non possint, sed Gratiam ab iis repudiari, quod boni esse nolint.

Secundum est Concilium Senonense celebratum anno 1528. paulo ante Tridentinum, in cujus decreto 15. expressis verbis definitum habetur, *Tale non esse Dei trahentis auxilium, cui resisti non possit*, quod postea probat iisdem ferme Scripturæ locis, quæ parag. præcedenti relata sunt; additque: *Frustra certe Stephanus Judæos duræ cervicis, & incircumcisi cordis argueret, qui semper Spiritui Sancto resisterent, frustra Paulus Thessalonicenses admoneret, Spiritum ne extinguerent, si Divinis inspirationibus homines inevitabiliter raperentur*.

2. Tertium denique est Conc. Trid. sess. 6. cap. 5. ubi dicit, peccatores per excitantem, atque adjuvantem Gratiam, ad convertendum se ad suam ipsorum justificationem, eidem Gratia libere assentiendo, & cooperando, disponi, ita ut, tangente Deo cor hominis per Spiritus Sancti illuminationem, neque homo ipse nihil omnino agat, inspirationem  
illam

*illam recipiens , quippe qui illam & abjicere potest , neque tamen sine gratia Dei movere se ad justitiam coram illo libera sua voluntate possit .* Et can. 4. anathema profert in eum , qui dixerit , *liberum arbitrium a Deo motum , & excitatum non posse dissentire , si velit .* Ex quibus Concilii verbis sic possumus argumentari : Gratia illa vocans , & excitans , de qua loquitur Concilium , talis est , ut sufficiat homini ad convertendum se , & ad bonum operandum ; atqui ex mente Concilii potest homo ejusmodi gratiam abjicere , si velit , etiam tunc , cum per eam actualiter a Deo excitatur , & movetur , illique dissentire ; ergo ex Concilii mente potest homo gratiam sufficientem abjicere , illique dissentire .

## §. III.

*Probatur eadem sententia ex Sanctis Patribus .*

1. **E**X innumeris fere Sanctorum Patrum testimoniis , quæ hic afferri possent , aliquot illustriora proferemus .

In primis S. Chrys. hom. 7. in Jo. *Gratia Dei*, inquit, *in omnes diffusa est, omnibus se facilem exhibet, omnes pari honore advocat : qui autem ejus munere frui negligunt, hanc suam cecitatem sibi ipsis imputent .*

Et S. Leo Papa serm. 2. in solemnitate Epiphaniæ , *Si dona Dei*, inquit, *non irrita fecerimus, per ea, quæ dedit, merebimur accipere, quod promisit .* Ergo secundum illius mentem , dona Dei , per quæ meremur , id est , auxilia gratiæ excitantis irrita facere possumus .

Et S. Ambrosius serm. 8. in Psalm. 18. *Plena est*, inquit, *terra misericordia Domini .* Si quis autem non credit in Christum , generali beneficio ipse se fraudat , ut si quis , clausis fenestris , radios Solis excludat , non ideo Sol non ortus est omnibus , quia calore ejus ipse se fraudavit , sed quod Solis est , prærogativam suam servat , quod imprudentis est , communis a se lucis gratiam excludit .

2. Et S. August. Epist. 54. ad Macedonium : *Pertinet*, inquit, *ad nos, ut boni simus, accipere, & habere id, quod dat is, qui de suo bonus est, quo quisque neglecto, de suo malus est .* Ergo ex illius mente id negligere , & abjicere possumus , quod Deus dat , ut boni simus . Et lib. 2. Act. cum Felice Manichæo cap. 8. *Non est ergo indignum*, inquit, *ut Deus dicat : Ite in ignem æternum, iis, qui per liberum arbitrium misericordiam ejus respuerunt .* Lib. ad Simplicianum qu. 2. dicit, quod Esau vocatione Dei contempta , reprobus factus est . Et lib. de natur. & grat. cap. 63. *Non tibi*, inquit, *deputatur ad culpam, quod invitatus ignoras, sed quod negligis querere, quod ignoras, neque quod vulnerata membra non colligis, sed quod volentem sanare contemnis .* Neque dicat aliquis , ideo hominem dici contemnere Deum sanare volentem , quia vocationi externæ non obtemperat . Vocatio enim illa , & Gratia externa nullatenus hominem sola sanare potest , nisi  
ad sit

adit etiam interna . Unde S. August. lib. de Spir. & lit. cap. 4. *Doctrina illa, inquit, quæ mandatum accipimus continenter, recteque vivendi, litera est occidens, nisi spiritus adsit vivificans.*

Denique & S. Prosper lib. de vocat. Gen. c. 26. *Gratia Dei, inquit, in omnibus justificationibus principaliter præminet, suadendo exhortationibus, movendo exemplis, terrendo periculis, incitando miraculis, dando intellectum, inspirando consilium, corque ipsum illuminando, & Fidei affectionibus imbuendo.* Et aliquibus interjectis subjungit: *Quæ opitulatio per innumeros modos, sive occultos, sive manifestos, omnibus adhibetur, & quod a multis refutatur, ipsorum est nequitia, quod autem a multis recipitur, & Gratia est Divina, & voluntatis humana.*

#### §. IV.

##### *Solvuntur objectiones.*

1. **P**rima petitur ex illis Apostoli verbis 1. Cor. 4. *Quis te discernis?* quibus declarat non esse in hominis potestate se ab aliis discernere in iis, quæ ad salutem spectant, sed id solius Dei proprium. Atqui si posset homo gratiæ Divinæ consentire, vel dissentire, posset etiam per arbitrii sui vires se ab aliis discernere.

Respondetur, id non sequi, quia quamvis, cum homo a gratia dissentit, hoc per solius arbitrii libertatem, seu potius pravitatem faciat, quando tamen illi consentit, id non arbitrii sui viribus, sed Gratia Divinæ ascribere debet, quia per illam excitatur, & juvatur ad hoc, ut ipsi consentiat, & nisi ab illa excitaretur, & juvaretur, nullo modo consentire posset. Unde semper Divinæ Gratia debitorem se totius boni, quod agit, agnoscere debet, nec ullo modo in se gloriari, quasi per illum consensum se ab aliis discernat. Quod fuse explicat Sanctus Franciscus Episcopus Genevensis lib. 4. Divini Amoris, c. 6. ubi ad id exprimendum utitur similitudine sicariorum, & Tyrannorum, qui illis se vitam immerito, ac sine ulla ratione donare arbitrantur, quibus necem non inferunt; sic (inquit) ridiculum, imo impium esset, existimare voluntatem hominis inspirationi, ac Gratia Divinæ virtutem operandi, ac efficaciam tribuere, eo quod resistantia sua illam ejus virtutem, ac efficaciam non impediat. Possumus quidem ejus efficacie obicem ponere, sed non hanc illi tribuere; Gratia siquidem hanc suam virtutem, & efficaciam haurit e sola Divina bonitate, ex qua ortum ducit, non ab humana voluntate, ad quam juvandam adhibetur.

Adde, quod ad illum consensum eliciendum longe semper potiores sunt Divinæ Gratia, quam arbitrii humani partes. Cum enim liberum hominis arbitrium per peccatum a Deo aversum sit, & longe proclivius ad malum, quam ad bonum; hinc fit, ut numquam amplectatur bonum, nisi Gratia potentissima adjuvetur. Quando autem quis aversus est a re  
ali-



aliqua, quam tamen amplectitur, cum fortissime suadetur, licet possit suasioni reluctari, tum suadenti potius, quam agenti ascribi solet effectus. Et hæc est doctrina S. Aug. l. de prædest. Sanct. c. 5. *Quisquis, inquit, audet dicere, Habeo ex meipso Fidem, non ergo accepi, profecto contradicit huic apertissimæ veritati Apostoli dicentis: Quis te discernit? &c. non quia credere, vel non credere non sit in arbitrio voluntatis, sed in electis præparatur a Domino voluntas.*

Secunda obiectio est, Gratiam illam sufficientem, cui dicimus posse ab homine resisti, eandem prorsus esse cum Gratia possibilitatis, quam admittebant Pelagiani, & contra quam tamen S. Augustinus toto libro de Gratia Christi invehitur, ut veritati Orthodoxæ contrariam.

Respondetur, Gratiam sufficientem, quam hic propugnamus, longe diversam esse ab illa Gratia possibilitatis, quam admittebat Pelagius. Primo enim per Gratiam possibilitatis intelligebat Gratiam externam legis, & Evangelicæ doctrinæ, nos vero internam illam esse profiteamur. Deinde Pelagius assererat, Gratiam illam possibilitatis esse tantum necessariam secundum quid, id est ad facilius operandum, nos vero dicimus, illam absolute, & simpliciter necessariam esse ad bene operandum. Tertio Pelagius per Gratiam possibilitatis existimabat omnimodam bene agendi virtutem ita homini conferri, ut ad volitionem, ac operationem boni nulla præterea Gratia necessaria illi esset, sicque bonum ipsum propria, & sola arbitrii sui virtute vellet, & operaretur; nos autem sic dicimus voluntatem excitari ad hoc, ut possit bonum facere, & operari, ut necessarium præterea sit Gratiam illi cooperari, eamque adjuvare, dum vult, & operatur. Quarto denique Pelagius existimabat, soli arbitrio libero deferendum esse totum illud bonum, quod vellet, & operaretur; nos vero quamvis soli voluntati ascribendum dicamus, quod voluntas possit Gratiæ resistere, & de facto aliquando resistat; si tamen Gratiæ consentiat, id asserimus ascribendum esse tum Divinæ Gratiæ, tum humanæ voluntati, sed multo magis adhuc Divinæ Gratiæ, quam humanæ voluntati, ut ex ante dictis constat.

2. Quod autem hæc esset Pelagii mens, constat tum ex dictis c. r. tum ex iis, quæ habet S. Aug. lib. de grat. Christi c. 27. quæ hic referemus, quoniam sunt observatu dignissima. Si, inquit, concesserit nobis Pelagius non solam possibilitatem in homine, etiam si nec velit, nec agat bene, sed ipsam quoque voluntatem, & actionem, id est, ut bene velimus, & bene agamus, quæ non sunt in homine, nisi quando vult, & bene agit, si, ut dixi, concesserit, etiam ipsam voluntatem, & actionem divinitus adjuvari, & sic adjuvari, ut sine illo adiutorio nihil bene velimus, & agamus, eamque esse Gratiam Dei per Jesum Christum Dominum nostrum, in qua nos sua, non nostra justitia justos facit, ut ea sit vera nostra justitia, quæ nobis ab illo est: nihil de adiutorio Gratiæ Dei (quantum arbitror) inter nos controversiæ relinquetur.

## S E C T I O IV.

*An cuilibet homini detur Gratia sufficiens ad salutem.*

1. **Q**Uæstio de solis adultis intelligenda est, de infantibus enim agetur postea. Illius igitur sensus est, an cuilibet adulto detur gratia sufficiens ad bene operandum, & ad salutem per bona opera consequendam. Pro cuius resolutione

Dicendum est, Deum cuilibet homini adulto, sive Fideli, sive Infideli, sive prædestinato, sive reprobato dare gratias sufficientes & ad bene operandum, & ad salutem per bona opera consequendam.

Hujus assertionis veritas probatur ex Scriptura. Prov. 1. *Sapientia foris prædicat, in plateis dat vocem suam, in capite turbarum clamitat, in foribus portarum urbis profert verba sua, dicens: Usquequo parvuli diligitis infantiam, & stulti ea, quæ sunt sibi noxia, cupient, & imprudentes odibunt scientiam? Convertimini ad correptionem meam, et proferam vobis spiritum meum, & ostendam vobis verba mea, ex quibus verbis aperte colligitur, Divinam gratiam undequaque diffundi, & ad omnium corda penetrare, omnesque per illam sufficienter admoneri, & excitari ad bonum. Et Sap. 11. Misereris omnium, Domine, quia omnia potes, & dissimulas peccata hominum propter penitentiam. Diligis enim omnia, quæ sunt, & nihil odisti eorum, quæ fecisti. Quomodo autem Deus misereretur omnium, & parceret omnibus, si non daret saltem iis auxilium, quo converti ad poenitentiam possent, si vellent? S. Jo. 1. Erat lux vera, quæ illuminat omnem hominem venientem in hunc mundum, quæ verba de luce interioris gratiæ intelligunt SS. Patres, ac nominatim S. Chrys. & Cyrill. in illum Evangelii locum, & etiam S. Aug. infra citandus.*

\* 2. Probatur 2. auctoritate duorum Conciliorum, Senonensis, & Coloniensis.

In Senonensi quidem can. 15. dicitur, quod *Gratia semper in promptu est, & quod ne momentum quidem prætereat, in quo Deus non stet ad ostium, & pulset, cui qui aperuerit, intrabit ad illum, & cænabit cum illo.*

In Coloniensi vero par. 7. c. 32. dicitur, quod *quanquam nemo convertatur ad Dominum, nisi tractus per Patrem: attamen nemo hic excusationem prætexere debet, quod non trabatur, quia Deus semper stat ad ostium pulsans, nimirum per internum, & externum verbum commonens, ut convertamur a via nostra pessima.*

Prob. 3. ex SS. Patribus. S. Dion. in Coel. Hier. c. 9. ubi dicit, *Immensum, & infinitum Divini luminis pelagus semper paratum esse, & patere omnibus ad participandum. S. Chrys. hom. 7. in S. Jo. Gratia, inquit, in omnes diffusa est, non Judæum, non Gentilem, non Græcum, non Barbarum, non Scytham, non liberum, aut servum, non virum, aut mulierem, non senem, aut juvenem fugit, & dedignatur, omnibus eadem est,*

est, omnibus se facilem exhibet. S. Ambr. l. 2. de Abel, & Cain c. 3. Omnibus, inquit, opem sanitatis detulit, ut quicumque perierit, mortis suae causas sibi ascribat, qui curari noluit, cum remedium haberet, quo posset evadare. S. Aug. l. 1. de Gen. cont. Manich. c. 3. ubi explicans sup.cit. S. Jo. verba: (*Erat lux vera, quæ illuminat omnem hominem*) Illud, inquit, lumen non irrationabilium animalium oculos pascit, sed pura corda eorum, qui Deo credunt, & ab amore visibilium rerum, & temporalium se ad ejus præcepta servanda convertunt, quod omnes homines possunt, si velint, quia illud lumen illuminat omnem hominem venientem in hunc mundum; quod confirmat lib. 1. Retract. c. 50.

Paulus Orosius denique (ut plurimos alios omittamus, prolixitatis evitandæ gratia) qui S. Aug. discipulus fuit, cujusque opera, & studio sanctus ille Pater ad Pelagianam Hæresim profligandam plurimum usus est, in Apologetico de arbitrii libertate contra Pelagium non longe ante medium, sic loquitur: *Mea semper hæc est fidelis, atque indubitata sententia, Deum adjutorium suum, non solum in corpore suo, quod est Ecclesia, cui specialia ob credentium Fidem Gratiæ suæ dona largitur, verum etiam universis in hoc mundo degentibus, propter longanimitatem suam, æternamque clementiam, subministrare, idque speciatim, quotidie, per tempora, per dies, per momenta, per atomos, & cunctis, & singulis. Et aliquibus interjectis sic concludit: Ex quo evidentissime declaratum esto, nemini hominum deesse Dei adjutorium, præsertim cum & Seducitor adsistat, & insit infirmitas.*

Probatur 4. auctoritate S. Th. lib. cont. Gent. c. 159. ubi sic loquitur: *Cum hoc sit in potestate liberi arbitrii impedire Divinæ Gratiæ receptionem, vel non impedire, non immerito in culpam imputatur ei, qui impedimentum præstat Gratiæ receptioni. Deus enim, quantum in se est, paratus est omnibus Gratiam dare; vult enim, omnes homines salvos fieri, & ad agnitionem veritatis venire, ut dicitur 1. Tim. 2. sed illi soli gratia juvantur, qui in se impedimentum non præstant.*

Et in c. 6. Jo. Cor humanum ex se ad inferiora tendens, non potest sursum elevari, nisi tractum, si vero non elevatur, non est defectus ex parte trahentis, qui, quantum in se est, nulli deficit, sed est propter impedimentum ejus, qui non trahitur, &c. Deus enim omnibus ad trahendum manum porrigit, quantum in se est, &, quod plus est, non solum attrahit manum recipientis, sed etiam aversos a se convertit, &c. Ex quo ergo Deus paratus est dare omnibus Gratiam, & ad se attrahere, non imputatur ei, si aliquis non accipiat, sed ei, qui non accipit.

3. Probatur 5. tum ex eo, quod diximus in tractatu præcedenti, Christum pro omnibus salvandis mortuum esse, & seipsum redemptionem pro omnibus dedisse, quod aliter intelligi non potest, nisi in quantum omnibus media ex se ad salutem sufficientia morte sua est promeritus, tum etiam ex eo, quod Sectione sequenti dicemus.

Observandum est autem, quamvis nemo sit, cui auxilium Gratiæ defit,

fit,



fit, illud tamen omnibus non æqualiter dari. Aliis siquidem majus, aliis minus confertur.

Hoc manifeste constat ex variis Scripturæ locis. Ps. 147. *Non fecit taliter omni nationi.* S. Matth. 13. *Vobis datum est nosse mysteria Regni Dei, ceteris autem in parabolis.* Et satis constat, ante Christi adventum longe uberiora Gratiæ auxilia Judæorum præ aliis populis habuisse, ut testatur locus Psalmi citatus, & certum est, Christianis longe potiora ejusdem gratiæ beneficia, quam Turcis, & aliis Infidelibus conferri. Cujus rei alia ratio afferri non potest, quam illius voluntas, qui dividit singulis prout vult, quique potest ex eadem massa facere vas, aliud quidem in honorem, aliud vero in contumeliam.

## S E C T I O V.

*An Deus velit omnes homines salvos fieri.*

1. **M**agnam hujus quæstionis solutio lucem dabit iis, quæ præcedenti Sectione dicta sunt. Si enim vere sit in Deo voluntas, ut omnes homines salvi fiant, sequitur, ut iisdem sufficientia ad salutem Gratiarum auxilia præbeat, cum aliter intelligi non possit, quod ei talis voluntas insit, cum bene velle Dei respectu creaturarum nihil aliud sit, quam benefacere. Ad faciliorem autem propositæ quæstionis resolutionem

Notandum est, duplicem in Deo voluntatem a Theologis distinguere, ut tractatu 3. c. 4. dictum est, antecedentem scilicet, & consequentem. Hujus Divinæ voluntatis distinctionem agnoverunt SS. Patres, ut constat ex eo loco citato, & adhuc plenius ex infra dicendis constabit. Antecedens illa est, qua Deus, secundum nostrum concipiendi modum, aliquid ex se vult ante prævisionem cooperationis creaturarum liberarum. Consequens vero, qua faciendum aliquid decrevit, prævisis creaturarum liberarum bonis, vel malis actionibus.

Certum est autem, Deum non velle voluntate illa consequente omnes homines salvos fieri, imo velle plurimos illorum a salute excludi, quos scilicet prævidit per voluntatis pravitatem peccaturos, & in peccato morituros. De voluntate igitur antecedente proposita quæstio intelligenda est, an scilicet Deus ab eterno veram habuerit voluntatem salvandi omnes homines, ipsisque, vi illius voluntatis, gratias ad salutem sufficientes conferendi, ea conditione, ut qui gratis illis recte uterentur, ad salutem pervenirent, qui autem non uterentur, a salute exciderent. Pro cuius resolutione

2. Dicendum est, Deum antecedenti voluntate eo sensu, qui supra explicatus est, velle omnes homines salutem consequi.

Prob. 1. ex Script. 1. ad Timoth. 2. *Obsecro, inquit Apostolus, fieri obsecrationes, orationes, &c. pro omnibus hominibus, &c. Hoc enim bonum*

bonum est, & acceptum coram Deo, qui omnes homines vult salvos fieri, & ad agnitionem veritatis venire. Ubi observandum est ex mente Apostoli, Deum velle omnes illos homines salvos fieri, pro quibus hortatur fieri orationes. Atqui hortatur, ut orationes fiant pro omnibus omnino hominibus, nullo excepto. Unde sequitur, Deum etiam omnes homines, nullo prorsus excepto, velle salvos fieri; ea tamen conditione, ut ipsi homines media ad salutem consequendam præparata amplectantur, iisque recte utantur. Sic enim hunc locum explicat S. Damasc. l. 2. de Fide c. 29. & S. Th. 1. p. q. 19. ar. 6. ad 1. Eodem sensu dixit S. Petrus Ep. 2. c. 3. *Deus non vult aliquos perire, sed omnes ad pœnitentiam reverti.* Et Ezech. c. 33. ipse Deus loquens: *Vivo ego, dicit Dominus Deus, nolo mortem impii, sed ut convertatur impius a via sua, & vivat;* super quæ verba Tertull. l. de poenit. c. 4. *O beatos nos, inquit, quorum causa Deus jurat! o miserrimos, si nec juranti Domino credimus!*

Prob. 2. ex S. Ambr. l. de Paradiso c. 8. *Venerat, inquit, Dominus omnes salvos facere, quare etiam circa impios suam debuit ostendere voluntatem: & ideo nec proditorium debuit præterire, ut adverterent omnes, quod in electione etiam proditoris sui servandorum omnium insigne præstendit.* Et S. Chryl. in 2. ad Cor. c. 1. *Imitare Deum tuum, si omnes ille vult salvos fieri; merito pro omnibus oportet orare.* Et homil. 1. in Ep. ad Ephes. distinguit in Deo voluntatem primam, & secundam, hoc est, antecedentem, & consequentem, dicitque, voluntatem primam Dei esse, ut non pereant omnes, qui peccaverunt, voluntatem secundam, ut pereant, qui pravitate resurgere noluerunt. Denique ex S. Damasc. l. 2. de Fide. c. 29. ubi dicit, Deum primario quidem velle omnes homines salvari, ac regni sui compotes esse, illos creasse, ut bonitatis ipsius sint participes, ac nihilominus iis, qui peccant, poenam Inferni velle, prius illud quidem voluntate antecedente, seu beneplacito, quod ex ipsa manat, posterius vero voluntate consequente, seu permissione, quæ ex nostro vitio ortum ducit.

3. Objicies, sanctos August. Prosp. & alios, qui Divinæ Gratiæ veritatem contra Pelagianos propugnaverunt, locum supra relatam ex Ep. 1. ad Tim. c. 2. ita exponere, ut sensus illius sit, Deum eatenus velle, omnes homines salvos fieri, quatenus vult, ut ex omnibus hominum nationibus, conditionibus, ætatibus aliqui salvi fiant, vel quatenus nullus salvatur, quem Deus salvum fieri non velit, cæterum illos negare, quod Deus velit, omnes homines salvos fieri.

Respondetur, illos negare quidem, Deum velle, omnes homines salvos fieri voluntate consequente, quod verissimum est, non vero voluntate antecedente, alias sibi ipsis contradicerent. S. Aug. enim l. de vera Relig. c. 65. sic loquitur: *Placuit Auctori suo, ut non interiret, quicquid a Deo per Verbum factum est.* & l. de Spir. & lit. c. 33. *Vult autem Deus, omnes homines salvos fieri, & ad agnitionem veritatis venire*

non sic tamen, ut eis liberum adimat arbitrium, quo vel bene, vel male utentes, justissime judicentur. S. Prosper vero in responsione ad objectiones Vincentianas 2. sic loquitur: Sincerissime credendum est, atque profitendum, Deum velle, ut omnes homines salvi fiant: siquidem Apostolus, cujus illa est sententia, sollicitè præcipit (quod in omnibus Ecclesiis piissime custoditur) ut Deo pro omnibus supplicetur, ex quibus, quod multi pereunt, pereuntium est meritum, quod multi salvantur, salvantis est donum. Et in responsione ad capitula Galorum c. 7. Qui dicit, quod non omnes homines Deus velit salvos fieri, sed certum numerum prædestinatorum, durius loquitur, quam loquendum est de altitudine inscrutabili Gratiæ Dei, qui & omnes homines vult salvos fieri, & ad agnitionem veritatis venire.

## S E C T I O VI.

\* *Deſurne Gratia ſufficiens ad mandata Dei ſervanda omnibus illis, qui ea ſervare tenentur, & peccant non ſervando.*

1. **Q**Uamvis hujus quæſtionis reſolutio ex iis, quæ in præcedentibus Sectionibus dicta ſunt, ſatis intelligi poſſit, ac poſito, quod Deus velit omnes homines ſalvos fieri, iisque ad ſalutem conſequendam media, & gratiæ auxilia ſufficientia tribuat, inde manifeſte ſequatur, gratiam illis ſufficientem tribui ad ſervanda mandata, cum eorum obſervatio ad ſalutem conſequendam neceſſaria ſit; quia tamen Hæretici nonnulli in tam aperta luce cæcutiunt, jugumque Domini, quod ex ſe maxime leve, ac ſua-ve eſt, aggravare nituntur, ac mandata ejus, quæ deſiderabilia eſſe, & dulciora ſuper mel, & favum teſtatur Propheta, importabilia tamen, & impoſſibilia eſſe contendunt, ideo viſum eſt in hac Sectione propoſitæ quæſtionis elucidationem juxta Fidei Catholicæ normam proponere.

Lutherus lib. adver. Latom. & Calvin. in Antidot. Concil. Trid. ad c. 12. ſeſſ. 6. negant, ejusmodi gratiam ad obſervanda Divina mandata omnibus dari, contenduntque, aliqua Divina mandata eſſe hominibus aliquibus obſervatu impoſſibilia, ac deeſſe illis gratiam, qua poſſibilia fiant. Addit vero Calvinus l. 2. Inſtit. cap. 5. præcepta illa Divina, etſi obſervatu impoſſibilia ſint, fruſtra tamen non eſſe hominibus impoſita, eo quod per illa homines admoneantur infirmitatis ſuæ, intelligantque melius, quanta ſit gratiæ neceſſitas, & etiam in die Judicii reddantur inexcusabiles.

Sed contra illos duos Hæreſiarchas dicendum eſt, gratiæ ſufficientis auxilium ad mandata Divina ſervanda tribui omnibus illis, qui ad illa ſervanda obligantur, & non ſervando peccarent.

Probatur 1. auctoritate Scripturæ. Deut. 30. *Mandatum hoc, quod ego præcipio tibi (Inquit Deus) non ſupra te eſt, neque procul poſitum, ſed juxta*



*juxta te est sermo valde in ore tuo, & in corde tuo, ut facias illum. Matth. 11. ubi Christus Dominus loquens de lege sua: Jugum, inquit, meum suave est, & onus meum leve. Et S. Jo. Epist. 1. c. 5. testatur, quod mandata ejus gravia non sunt. Dicit autem vete non posset, mandata Dei non esse gravia, aut jugum ejus esse suave, ac leve, si vires, & auxilia gratiæ necessaria non tribueret ad mandata illa servanda, quæ hominibus imposuit.*

*Probatur 2. auctoritate Concilii Arausici II. can. 25. ubi hæc habentur: Hoc etiam secundum Fidem Catholicam credimus, quod accepta per Baptismum gratia, omnes baptizati, Christo auxiliante, & cooperante, quæ ad salutem pertinent, possint, & debeant, si fideliter laborare voluerint, adimplere.*

*Et Conc. Trid. sess. 6. c. 11. Nemo temeraria illa, & a Patribus sub anathemate prohibita voce uti debet, Dei præcepta homini justificato ad observandum esse impossibilia. Deus enim impossibilia non jubet, sed jubendo monet & facere quod possis, & petere quod non possis, & adjuvat ut possis. Et c. 18. Si quis dixerit, Dei præcepta homini etiam justificato, & sub Gratia constituto esse ad observandum impossibilia, anathema sit.*

*Prob. 3. auctoritate SS. Patrum S. Cypriani lib. de Baptismo: Et quod agendum est, scimus, & quod scimus, facere possumus. S. Bas. in regulis brevior. resp. 176. ubi loquens de præcepto dilectionis inimicorum, quod est haud dubie difficillimum, Non præcepisset, inquit, hoc Deus, qui bonus, ac justus est, nisi etiam facultatem, qua id faceremus, largitus fuisset. S. Hier. in c. 5. S. Matth. Sciendum est, Christum impossibilia non præcipere, sed perfectæ. Et l. 1. cont. Pelagianos: Fatemur, possibilia Deum dedisse mandata, ne ipse auctor injustitiæ sit, si exigit fieri, quod fieri non potest. S. Ennodii Episcopi Ticinensis l. 2. Ep. 19. Inter homines ille a rectitudinis affectu discordat, qui a subditis exigit, quod eis in potestate non tribuit: hoc de Deo, qua conscientia sentiatur, advertite. S. Odonis Cluniacens. l. 2. collat. n. 13. Naturæ fragilitatem opponimus Deo, quasi nesciat ille, quales nos fecit, & oblitus nostræ humane fragilitatis imposuerit homini mandata, quæ facere non possit. O cæcam vesaniam! o profanam temeritatem! dupliciter quippe Deum videmur incusare. Neque enim justus, qui posse dedit, impossibile aliquid imperare potest; neque qui pius est, hominem damnare pro iis, quæ vitare non potest. Et quomodo staret, quod ipse perhibet: Jugum meum suave est? Hanc itaque neque justo iniquitatem, neque pio crudelitatem ascribamus.*

*Prob. 4. auctoritate S. August. qua tamen ad patrocinium erroris sui præfati Hæresiarchæ, eorumque sequaces præcipue abuti solent. Ille igitur S. Doct. l. 2. de pecc. merit. & remiss. c. 6. sic loquitur: Dubitare non possum, nec Deum aliquid impossibile homini præcepisse, nec Deo ad opitulandum, & adjuvandum, quo fiat, quod jubet, impossibile aliquid esse, ac per hoc, quin homo, si velit, esse possit absque peccato, adjutus a Deo. Et in Ps. 56. Non imperaret hoc Deus, ut face-*

remus, si impossibile iudicaret, ut ab homine fieret. Et in l. de nat. & grat. c. 43. Non igitur Deus impossibilia jubet, sed jubendo monet & facere quod possis, & petere quod non possis. Et c. 63. Quis peccat in eo, quod caveri nullo modo potest? peccatur autem, igitur caveri potest. Et c. 69. Eo ipso, quo firmissime creditur, Deum justum, & bonum impossibilia non potuisse præcipere, hinc admonemur, & in facilibus quid agamus, & in difficilioribus quid petamus. Denique ser. 61. de temp. Nec Deus impossibile aliquid potuit imperare, quia justus est, nec damnaturus est hominem pro eo, quod non potuit vitare, quia pius est.

Ex quo ultimo S. August. testimonio hoc argumentum conficitur, quo nostra assertio probatur. Id, quod neque justitiæ, neque pietati convenit, dici de Deo nullatenus debet; atqui neque justitiæ convenit impossibile aliquid præcipere, nec pietati acerbissimis suppliciis hominem cruciare pro eo, quod vitare non potuit, quod nulli tyranno, quantumvis crudeli, & immani, unquam venit in mentem; ergo de Deo dici non debet, quod impossibilia homini præceperit, aut quod hominem æternis poenis puniat pro eo, quod vitare non potuit. Unde consequens est, mandata Dei non esse homini impossibilia, illique sufficientem gratiam dari ad mandata illa exequenda, quando illa exequi tenetur, & non exequendo peccaret.

Porro ut hujus nostræ assertionis veritas adhuc evidentior fiat, observandum est, illam vel de hominibus justis, vel de iis, qui sunt in statu peccati, intelligi posse. Si de justis, id apertissime constat tum ex omnibus, quæ in ejus probationem allata sunt, tum maxime ex supra cit. Conc. Trid. auctoritate, ubi id expressis verbis definitum est. Si vero de iis, qui sunt in statu mortalis peccati, id etiam patet tum ex S. Augustino, cujus rationes æque probant de peccatoribus, atque de justis, tum ex auctoritate Concilii Arausicanæ definientis, secundum Fidem Catholicam credendum esse, omnes baptizatos, Christo auxiliante, & cooperante, quæ ad salutem pertinent, posse, & debere, si fideliter laborare velint, adimplere. Cum enim inter baptizatos plurimi reperiantur peccati mortalis labe inquinati, non est dubium, quin mens Concilii fuerit, etiam illos in ejusmodi statu peccati ea, quæ ad salutem pertinent, posse, & debere, si Christo auxilianti fideliter cooperari voluerint, adimplere, ac proinde gratiam illis sufficientem tribui ad servanda Divina mandata, quando non servando peccarent.

Verum hæc eadem nostræ assertionis veritas quoad peccatores plenius adhuc constabit ex iis, quæ sequenti Sectione dicturi sumus.

## C A P U T VII.

*Detur peccatoribus obduratis auxilium Gratiæ sufficiens ad conversionem.*

1. **Q**uæritur, an peccatoribus obduratis, quamdiu in præsentis vitæ statu

statu manent, Deus aliqua gratiæ auxilia tribuat, quibus converti ad poenitentiam possint.

Quidam Theologi existimant, quamvis Deus ordinarie omnibus gratiam sufficientem largiatur, illum tamen aliquando eam quibusdam peccatoribus denegare, ob gravissima quædam ab ipsis patrata crimina. Ita Tostat. in c. 4. Exod. q. 12. Medina l. 3. de recta Fide c. 1.

Alii vero (quod longe probabilius est) asserunt, nulli peccatori, quantumlibet horrenda, & atrocia flagitia commiserit, quandiu tamen in hac vita degit, sufficientia auxilia gratiæ a Deo denegari. Ita D. Th. 3. p. q. 86. ar. 1. Alensis 3. p. q. 69. Dominicus Soto in 4. dist. 15. q. 1. Petrus Soto in 4. dist. 15. q. 1. Vega lib. 13. de justific. c. 12. Malder. 1. 2. q. 111. a. 3. Gammachæus ad eandem qu. & plures alii.

\* Prob. 1. ex Script. Act. 6. ubi S. Stephanus sic Judæos alloquitur: *Dura cervice, & incircumcisis cordibus, vos semper Spiritui sancto resistitis.* Illi autem, quos sic alloquebatur, obdurati erant, & excecati voluntarie, ut satis patet ex iis, quæ ibi dicuntur, & tamen excitabantur interius a Spiritu sancto, alioquin non dicerentur ei semper resistere. Rom. 2. *Ignoras, quoniam benignitas Dei ad poenitentiam te adducit? secundum autem duritiam tuam, & impoenitens cor thesaurizas tibi iram &c.* Quibus verbis exprimitur, Deum non desinere sollicitare identidem peccatores ad poenitentiam etiam eos, qui corde duro, & impoenitenti ejus gratiæ resistunt, & resistendo sibi iram thesaurizant. S. Matth. 11. *Venite ad me omnes, qui laboratis, & onerati estis* (hoc est, peccatis ingentibus gravati, & oppressi, ut explicat S. Hieron. in eum locum, & S. Aug. ser. 11. de verb. Dom. c. 7.) *& ego reficiam vos.* S. Petri 2. c. 3. *Patienter agit Deus propter vos, nolens aliquos perire, sed omnes ad poenitentiam reverti.*

2. Prob. 2. ex S. August. cit. ser. c. 13. *De nulla, inquit, desperandum est, siue intus, siue foris fuerit, siue in Ecclesia, siue extra Ecclesiam, quandiu patientia Dei ad poenitentiam adducit, nec de hac vita rapit impium.* Item S. Fulgent. Epist. 7. c. 8. *Sicut Medico nostro nulla est incurabilis plaga, ita nec in aliquo vulnere, nec in aliquo tempore celestis potest deficere medicina.*

\* Prob. 3. ex S. Th. 3. p. q. 86. a. 1. ubi sic loquitur: *Dicere, quod aliquod peccatum sit in hac vita, de quo aliquis poenitere non possit, erroneum est, quia per hoc tolleretur libertas arbitrii, & derogaretur virtuti Gratiæ, per quam moveri potest cor cujuscunque peccatoris ad poenitendum.*

Et ibid. q. 52. a. 6. ad 3. *Homines, quandiu vivunt, possunt ad Fidem, & Charitatem converti, quia in hac vita non sunt homines confirmati in bono, vel in malo, sicut post exitum ex hac vita.*

Et q. 24. de verit. a. 11. cor. *Nemo potest ita esse in hac vita obstinatus in malo, quin ad suam liberationem cooperari possit.* Atqui sine gratiæ auxilio peccatores obdurati neque poenitere, neque converti, neque ad suam liberationem cooperari possunt. Ergo si secundum mentem S.



Doct. ista possunt, sequitur ex ejusdem mente, ut illis gratia etiam in illo obdurationis, & obstinationis statu non desit.

Prob. 4. ex eo, quod si ob aliquod peccatum Deus gratiam omnem sufficientem peccatori subtraheret, sequeretur, quod peccator de tali peccato poenitere non posset, cum id ex solis arbitrii viribus non possit. Atqui S. Th. 3. p. q. 36. asserit, erroneum esse, si dicatur, aliquod esse peccatum in hac vita, de quo quis poenitere non possit. Unde sequitur, quemlibet peccatorem, quando in hac vita degit, de quolibet peccato suo poenitere posse, proindeque Deum gratiæ auxilium illi necessarium non denegare.

3. Observandum est autem, auxilium illud gratiæ non adesse quidem omnibus momentis cuilibet homini. Neque enim id naturæ humanæ conditio patitur, ut scilicet semper actu aliquam bonam cogitationem in mente, aut pium affectum in voluntate experiatur. Neque etiam id necessarium est ad hoc, ut quis dicatur habere auxilium gratiæ sufficiens ad poenitendum, aut bene agendum; sed sufficit; ut opportunis temporibus ad hoc excitetur, & adjuvetur, juxta quod dicitur Ps. 9. Deum esse adiutorem in opportunitatibus. Unde quamvis non omnibus momentis, creberrima tamen, & (ut loquitur Innocentius Papa in Epist. ad Concil. Carthag.) *quotidiana Deus præstat remedia*. Ideoque recte dicit Apost. Hebr. 4. *Adeamus cum fiducia ad thronum Gratiæ ejus, ut misericordiam consequamur, & gratiam inveniamus in auxilio opportuno*.

Objicies 1. obdurationem peccatoris in subtractione gratiæ consistere, juxta quod dicit S. Aug. Epist. 105. *Non obdurat Deus impertiendo malitiam, sed non impertiendo gratiam*. Ergo ex illius mente peccatori obdurato nulla amplius gratia tribuitur.

Respondetur, obdurationem duplicem esse, unam absolutam, alteram secundum quid. Prior consistit in subtractione cujusunque gratiæ, & talis est obduratio dæmonum, & damnatorum. Posterior vero in subtractione gratiæ alicujus specialis, qua efficaciter cor peccatoris moveretur, quamvis semper aliquod ei gratiæ auxilium sufficiens tribuatur, quo posset converti, si vellet, licet de facto propter pravitatem voluntatis non convertatur. Priori autem modo nulli quantumvis maximo peccatori, quando in hac vita degit, gratia subtrahitur, ut ex ante dictis patet, sed tantum posteriori.

\* Quo sensu dixit S. Aug. l. de peccat. merit. & remiss. Scio, Domine, ad correptionem meam non pertinere, quod minus abs te adjuvor.

Objic. 2. varia Scripturæ loca, in quibus dicuntur peccatores non posse converti, credere, &c. ut S. Jo. 12. ubi de Judæis dicitur, quod *non poterant credere, quia dixit Isaias, excæcavit oculos eorum*, &c. unde sequitur, sufficientem gratiam illis defuisse ad hoc, ut credere possent.

Respondetur, his verbis Scripturam significare solum aut maximam in agendo difficultatem, quæ quasi quædam moralis impossibilitas dici solet,

let, aut impossibilitatem consequentem, quia scil. Deus prœviderat fore, quod quamvis illis signis externis, & Gratiis internis excitarentur ad Fidem, minime tamen ex pravitate voluntatis crederent. Atque ita S. Aug. tr. 53. in Jo. exponit hunc locum: *Propterea, inquit, non poterant credere, quia hoc Isaias dicit: hoc autem Propbeta prœdixit, quia hoc Deus futurum prœscivit. Quare autem non poterant? cito respondeo, quia nolebant. Malam quippe eorum voluntatem prœvidit Deus.*

Observant etiam recte aliqui Doctores, fieri interdum posse, ut peccatores ipsi obdurati in statum adeo miserabilem voluntatis suæ pravitate decendant, ut inde resurgere, imo & tentationes aliquas sibi a Damone illatas vincere nullatenus possint, neque ad id gratiam ullam sufficientem habeant, Deo sic permittente, & iusto illis hanc gratiam in peccatorum punitionem subtrahente. Quod quamvis ita sit, nihilominus tamen Deus pro sua ineffabili clementia aliquam aliam gratiam sufficientem semper illis tribuit, ut & status sui miseriam agnoscere, & gratiæ Divinæ auxilium optare, & invocare possint. Quod si convenienter faciunt, Deus haud dubie illis aderit, ac gratiæ suæ auxilium opportuno tempore præstabit. Unde Conc. Trid. sess. 6. c. 11. hanc S. Augustini sententiam ex ejus lib. de natur. & grat. c. 47. refert, & approbat, *Deus impossibilia non jubet, sed jubendo monet & facere quod possis, & petere quod non possis, & adjuvat ut possis.* Ex quo sequitur, quod quamvis aliquando desit gratia bene operandi, nunquam tamen deest gratia postulandi, & impetrandi auxilii Divini.

Dices, frustra induratos Deum orare. Nam, ut refertur 2. Machab. 9. Rex Antiochus Deum oravit, nec tamen fuit misericordiam consecutus. Similiter Hebr. 12. de Esau dicitur, quod non invenit penitentiae locum, quamvis cum lacrymis eam requisivisset.

Respondetur, peccatores obduratos non frustra Deum orare, quando convenienter orant, hoc est cum recta intentione, & ex vero poenitentiae motivo; quando vero eorum oratio ex prava aliqua intentione procedit, aut cum vitioso aliquo motivo conjungitur, tunc verum esse, frustra illos orare. Orabat quidem Antiochus Divina ictus plaga, sed doloris solatium, non peccati remedium querens; plangebatur Esau primogenita sibi erepta, non vero peccata in Deum a se commissa. Et ideo minime mirum videri debet, si neuter illorum a Deo exauditus est.

## SECTIO VIII.

\* *An vere dici possit, etiam parvulis absque Baptismo decedentibus dari media ad salutem sufficientia.*

1. **A**D faciliorem questionis propositæ resolutionem notandum primo, cum varia sint, & multiplicia media, quibus Deus homines ad beatum finem consequendum adjuvat, illa censeri ad salutem suffi-

sufficientia, quæ secundum proprium cuiusque statum ad finem illum consequendum apta sunt.

Notandum 2. infantes ante rationis usum ex se ipsis quidem nullos virtutum actus exercere posse, quibus ad finem illum ultimum tendere valeant, esse tamen capaces recipiendæ gratiæ sanctificantis, quæ veluti veste nuptiali induti ad coenam nuptiarum Agni admitti possint. Quæ quidem gratia secundum legem Dei ordinariam non alio modo illis infundi potest, quam per Baptismum, quem cum non possint suscipere nisi per ministerium alterius; hinc sequitur, media illa ad salutem sufficientia, quæ parvulorum statui conveniunt, in eo differre ab aliis mediis, quæ cuivis adulto congruunt, quod hæc pendeant a libero consensu, & libera acceptatione recipientis, qui gratias internas, & alia salutis consequendæ media oblata potest, si velit, recipere vel repudiare, illa vero, quæ infantili statui apta sunt, non pendent a libero consensu infantium, sed a voluntate, ac ministerio aliorum, qui media illa ipsis applicare possunt, & debent.

His observationibus præsuppositis, quamvis aliqui Theologi existiment parvulos absque Baptismo decedentes carere mediis ad salutem sufficientibus, quæ quidem illorum opinio iis, quæ de gratia sufficienti diximus, nullo modo præjudicat, cum quæstiones de illa propositæ de solis adultis communiter intelligantur; nihilominus veritati magis consentaneum videtur dicere, etiam parvulis absque Baptismo decedentibus, siue id ex parentum negligentia, aut culpa eveniat, siue ex alia quacunque causa, Deum, quantum ex parte sua requiritur, media ad salutem sufficientia præparasse, ac providisse.

Ratio est, quia Deus media eorum statui apta, & congrua, & ex se ad salutem sufficientia ipsis providit, & præparavit, cum Baptismi Sacramentum pro illis eque ac pro omnibus aliis instituit, & præterea destinavit Baptismi ministros, quorum opera hoc Sacramentum ipsis conferri posset: disposuit etiam causas naturales, quarum vi, & efficacia fieret, ut in lucem ederentur; præceptum etiam parentibus, & aliis imposuit, ut in lucem editos baptizarent, aut baptizari curarent.

Quod si ex incuria parentum, aut culpa ministrorum, aut defectu causarum naturalium inter se concurrentium, sequæ invicem impediendum contingat, eos non baptizari, nihil aliud inde sequitur, nisi Deum extraordinario aliquo providentiæ suæ modo illis non adfuisse, ut ejusmodi effectus impediret.

Porro hæc ratio clarior adhuc, & evidentior hoc exemplo fiet. Si Rex aliquis plurimos ex subditis suis captivos ab hostibus detentos redimere vellet, nihil melius & amplius ad hunc finem præstare posset, quam pretium redemptionis singulorum auctorum in propria uniuscujusque illorum manu consignare, ut prout quisque vellet, sese illud solvendo in libertatem asserere posset, pretium vero redemptionis infantium, & aliorum usu rationis carentium in manu parentum, aut pro-



pinquorum, & ipsis deficientibus in manu omnium aliorum deponere, ut sic per ministerium illorum ab ejusmodi captivitate liberarentur. Sane quamvis postea accideret, ut parentum, vel aliorum incuria, aut culpa pretium illud non solveretur, ac sic infantes illi captivi remanerent, nullus tamen esset, qui non agnosceret, Regem illum, quantum ex se est, media ad redemptionem infantium illorum apta, & sufficientia præparasse, ac providisse.

Ex hoc exemplo, quod satis per se clarum est, nec alia magis speciali applicatione indiget, quivis intelligere potest, quam vere dictum a nobis sit, Deum etiam parvulis absque Baptismo decedentibus media ad salutem consequendam necessaria præparasse, ac providisse.

## C A P U T III.

*De Gratia efficaci.*

## S E C T I O I.

*Quid sit Gratia efficax, & qua ratione a sufficienti distinguatur.*

1. **O**bservandum est 1. duobus modis Gratiam dici posse efficacem. Primo late, in quantum apta est ex se consensum voluntatis simul cum ipsa efficere, nisi pravitas illius obster, quo sensu quælibet gratia sufficiens, etiam ea, quæ respuitur, & cui resistitur, dici potest efficax, quia ex se apta est ad illum voluntatis consensum eliciendum, quamvis re ipsa ob ejus resistantiam non eliciat.

Secundo stricte, prout non solum potest elicere consensum nostræ voluntatis, sed etiam illum re ipsa elicit. Et de Gratia efficaci tali modo spectata nobis hic agendum est.

Hoc enim constat ex Scriptura. Ezech. 36. *Spiritum meum ponam in medio vestri, & faciam, ut in præceptis meis ambuletis.* Non dicit solum, ut possitis ambulare, sed ut de facto ambuletis. Philip. 2. *Deus est, qui operatur in nobis & velle, & perficere.* Et ex Conc. Araus. V. can. 6. ubi dicitur, per infusionem, & inspirationem Spiritus sancti fieri in nobis, ut credamus, velimus, &c. Et ex S. Aug. lib. de grat. & lib. arb. cap. 16. *Certum est, inquit, nos facere, cum facimus; sed ille facit, ut faciamus, præbendo vires efficacissimas voluntati, qui dicit: Faciam, ut in justificationibus meis ambuletis.* His observatis,

Quod spectat ad primam quæstionis partem, duæ sunt præcipuæ circa naturam gratiæ efficaci Theologorum sententiæ.

2. Prima dicit, Gratiam efficacem esse motionem quandam, & impulsione a Deo voluntati creatæ impressam, qua sic impellitur, ut ab ejus vi physice ad agendum prædeterminetur, ita ut non possit non agere, nec motioni, aut impulsioni resistere.

Verum refellitur hæc sententia ex iis, quæ Sectione sequenti dicemus, cum ostendemus, gratiam efficacem talem esse, ut quam-

vis infallibiliter illi voluntas assentiatur, possit tamen non assentiri, sed illam possit abjicere, si velit.

Secunda sententia docet, Gratiam efficacem nihil aliud esse, quam illustrationem, ac inspirationem, seu persuasionem internam divinitus immissam, quæ talis est, ut per eam infallibiliter inducatur creata voluntas ad hoc, ut velit, & operetur bonum.

Hæc sententia, quam ut veriore amplectimur, probatur ex S. Augustino variis in locis, in quibus manifeste docet, Gratiam illam, quæ nos facit operari, in inspirationibus, & suasionibus internis consistere, præsertim lib. de Spir. & lit. cap. 34. ubi sic loquitur: *Suasionibus agit Deus, ut velimus, & ut credamus.* Et paulo post: *His quando agit Deus cum anima rationali, ut ei credat (neque enim credere potest quolibet libero arbitrio, si nulla sit suasio, vel vocatio, cui credat) profecto & ipsum velle credere Deus operatur in homine.* Et lib. de peccat. merit. cap. 17. *Noluit homines, inquit, facere quod justum est, sive quia latet, an justum sit, sive quia non delectat, &c. ut autem innotescat, quod latebat, & suave fiat, quod non delectabat, Gratia Dei est.*

Quod spectat ad secundam quæstionis propositæ partem, in quo scilicet gratia efficax a gratia sufficiente differat, dicendum est, gratiam sufficientem sumptam pro gratia illa, quæ vires homini sufficientes ad operandum præbet, sive re ipsa operetur, sive non, ab efficaci aliter non differre, nisi tanquam genus a specie, ut satis constat ex iis, quæ supra dicta sunt. Si vero gratia sufficiens sumatur pro gratia illa, quæ, licet sufficienter homini vires præbeat ad bene operandum, nunquam tamen infert operationem, non quidem defectu virtutis sufficientis ad eam inferendam, sed defectu creatæ voluntatis, quæ cum libera sit, non vult ei cooperari; eo sensu gratia sufficiens, seu inefficax distinguitur ab efficaci (de qua nunc agimus) 1. in eo, quod gratia efficax semper major est gratia sufficiente in ratione doni, cum longe sit accipienti utilior, & melior. 2. in eo, quod efficacia gratiæ est a solo Deo, tanquam a propria causa; inefficacia vero gratiæ est a sola creata voluntate, quæ gratiæ ipsi consensum deneget, & sic eam inefficacem reddit. Unde S. Prosp. lib. 2. de vocat. Gent. cap. 26. *Quod Gratia, inquit, a multis respuitur, ipsorum est nequitia, quod vero suscipitur, & Gratia Divina est, & voluntatis humane.*

Verum ad clariorem hujus distinctionis intelligentiam, quæres, utrum ex duobus hominibus æquali gratia præventis, & excitatis contingat aliquando, aut contingere possit, ut unus gratiæ consentiat, altero non consentiente, proindeque ut æqualis gratia in uno efficax sit, in altero vero sufficiens tantum, seu inefficax.

Respondetur 1. Illum, qui consentit, majorem semper, absolute loquendo, gratiam accipere, non solum in ratione doni, ut supra diximus,

mus, sed etiam in ratione entitatis ipsius Gratiae, cum ipsum consensum accipiat, atque adeo Gratiae adjuvantis, & cooperantis donum, quo caret is, qui non consentit.

Respondetur 2. si de sola Gratia excitante sermo sit, seclusis omnibus aliis, multos graves Theologos existimare, fieri posse, ut ex duobus æquali prorsus Gratia præventis, & excitatis, unus consentiat, alter vero dissentiat. Ita Ruardus Taperus ar. 7. contra Lutherum, Bell. 1. 6. de lib. arb. c. 15. & plures alii, quibus merito adungere possumus Franciscum Salesium Episc. Genevensis lib. 1. Divini Amoris cap. 10. ubi explicans iudicium, quod vocat comparationis, de quo in variis Evangelii locis mentio fit, illud in eo faciendum esse dicit, quod aliqui æqualibus, imo maioribus Gratiae auxiliis præventi, & excitati, Divinae nihilominus misericordiae consensum negaverint, alii æqualibus, imo minoribus Gratiae auxiliis excitati, inspirationem Divinam secuti fuerint, & ad poenitentiam conversi.

\* Hujus autem secundae responsionis veritas constat 1. ex his Christi Domini verbis Matth. 11. *Vae tibi Corozaim, vae tibi Bethsaida, quia si in Tyro, & Sidone factae fuissent virtutes, quae factae sunt in vobis, olim in cilicio, & cinere poenitentiam egissent.* Quae quidem exprobratio ut justa sit, & rationabilis, supponit Tyrios, & Sidonios fuisse consensuros, & poenitentiam acturos, si habuissent idem auxilium, aut par illi, quod Judæi respuerunt, par, inquam, non solum quoad externa miracula, & virtutes, verum etiam quoad Gratiam internam, sine qua impossibile est converti ad salutarem poenitentiam.

Constat 2. ex Conc. Trid. sess. 6. ca. 5. & can. 4. ubi dicitur, liberum hominis arbitrium a Deo motum, & excitatum ita consentire Gratiae excitanti, ut possit dissentire, si velit, & illam abjicere. Quod si quis potest uni & eidem Gratiae dissentire æque, ac consentire eodem tempore, poterit etiam diversis temporibus modo consentire, modo dissentire eidem, aut pari auxilio Gratiae: poterit & alius eidem, aut pari auxilio Gratiae dissentire, cui iste consentit.

## S E C T I O II.

*In quo proprie consistat ipsius Gratiae efficacia.*

1. **V**ariae sunt super hac quaestione Theologorum sententiae. Quidam enim (ut in præcedenti Sectione dictum est) efficaciam Gratiae in impulsione quadam, & prædeterminatione physica ipsius voluntatis constituunt.

Alii efficaciam illam volunt esse tantum moralem, ac sitam esse in aliqua vi intrinseca prædeterminandi, non tamen physice, sed moraliter tantum, ipsam voluntatem.

Alii in suavitate, ac delectatione quadam interiori, quae voluntatis consensum infallibiliter & insuperabiliter eliciat:

Alii



Alii in contemperatione quadam, & congruitate ipsius Gratiæ cum ingenio, indole, affectionibus, & aliis dispositionibus hominis, qui Gratiæ consentit.

Quidam efficaciam Gratiæ collocant quidem in prædicta congruitate, non tamen præcise, sed ut subest scientiæ Dei, quam mediam, seu conditionalem vocant.

Sunt denique, qui paulo cæteris audentiores asserunt, Gratiam efficacem formaliter, ut talem, constitui per consensum liberum, quem simul cum voluntate efficit, ita ut ab illo consensu formaliter efficax denominetur.

Nos in quæstione difficillima, & abstrusissima, quid maxime secundum Catholicæ Fidei principia tenendum nobis videatur, tribus sequentibus propositionibus breviter aperiemus.

2. Prima est, certum esse, Gratiam illam, quæ efficax dicitur, non tantum præstare, ut humana voluntas velle, & operari possit, sed etiam efficere, ut re ipsa velit, & operetur, idque infallibiliter, (& ut loquitur S. Aug.) indeclinabiliter, insuperabiliter, ac invictissime.

Hoc constat ex variis ipsius S. Augustini testimoniis, præsertim l. de corrept. & grat. c. 12. ubi sic loquitur: *Subventum est infirmitati voluntatis humanae, ut Divina Gratia indeclinabiliter, & insuperabiliter ageretur.* Et paulo post dicit, *ipsam Gratiam efficere in hominibus, ut Deo donante invictissime, quod bonum est, vellent, & hoc deferere invictissime nollent.*

Secunda est, cum hac infallibili, indeclinabili, insuperabili, ac invictissima Gratiæ efficacia stare nihilominus semper salvam, & illibatam voluntatis humanæ libertatem, ita ut possit semper homo Gratiam illam, quam recipit, & cui consentit, abjicere, illique dissentire, si velit.

Hoc satis constat ex ante dictis, & confirmari denuo potest ex illis Apostoli verbis 2. Corin. 6. *Hortamur vos, ne in vacuum Gratiam Dei recipiatis*, ex quibus sequitur, eandem posse in vacuum recipi, hoc est abjici, & repudiari, & in vacuum non recipi, hoc est in voluntate consensum operari, alias frustra hortaretur Apostolus, ne in vacuum Gratia reciperetur, si in vacuum recipi non posset. Et ex Conc. Trident. loco supra sæpius citato ex c. 5. sess. 6. ubi expressis verbis dicit, hominem Gratiam illam, cui libere assentitur, & cooperatur, posse abjicere si velit: quod & can. 4. iterum repetit. Addere possumus insuper & ipsius S. Augustini testimonium lib. 2. cont. Pelagium c. 84. ubi sic loquitur: *Si tibi proponam quæstionem, quomodo Deus Pater attrahit ad Filium, quos in libero dimisit arbitrio, fortassis eam difficile soluturus es. Quomodo enim attrahit, si dimittit, ut quis, quod voluerit, eligat? & tamen utrumque verum est.* Ac etiam supra cit. D. Francisci Salesii, qui in præfato l. 2. c. 12. dicit, *Voluntatem nostram, cum motionem Divina Gratiæ sequitur, æque libere illi consentire, atque libere eidem dissentire, quando illam abjicit: atqui quando voluntas Gratiæ dissentit, posset illi consentire,*

tire, si vellet; ergo secundum illius mentem, quando eidem gratiæ consentit, ita consentit, ut illi etiam dissentire possit, si velit.

Tertia denique est, si quærat, quomodo hæc duo adeo inter se opposita simul convenire possint, ut & gratia invictissime, & voluntas liberrime operetur, & quæ sit illa Divinæ gratiæ virtus adeo mirabilis, quæ sine ulla humanæ libertatis læsione effectum suum infallibiliter sortiatur;

Nihil certius, ac melius respondere possumus, nisi quod ille solus novit, qui id efficit, neque aliquid ulterius inquirere necessarium est. Hoc ipse S. August. profitetur lib. de Grat. Christi cap. 24. Fateamur, inquit, interna, atque occulta, mirabili, ac ineffabili potestate operari in cordibus hominum non solum veras revelationes, sed etiam bonas voluntates. Et Epist. 107. Gratiam efficacem dicit esse, Vocationem altam, ac secretam. Et lib. de Spir. & lit. c. 34. Cur, inquit, illi ita suadeatur, ut persuadeatur, alteri autem non ita? duo sola occurrunt, quæ respondere mihi placet: O altitudo divitiarum sapientiæ, & scientiæ Dei! quam incomprehensibilia sunt judicia ejus, & investigabiles viæ ejus! & Nunquid est iniquitas apud Deum? Cui responsio ista displicet, quærat doctiores, sed caveat, ne inveniat præsumptores. Quare merito hic profiteri possumus, quod idem Sanctus Pater Ep. 3. ad Volusianum alia occasione dixit, Demus, Deum aliquid posse, quod nos fateamur investigare non posse. Et certe videtur hæc quæstio una esse ex illis occurrentibus, quas profundiores, difficilioreque appellat Coelestinus Papa in Epist. ad Episcopos Galliæ, quasque (ut ejusdem Pontificis verbis utamur) latius pertractarunt ii, qui Hereticis restiterunt, & adhuc hoc die pertractant illi, qui in Theologicis palæstris exercentur, ac proinde sicut illas non audemus contemnere, sic etiam non necesse habemus adstruere, cum ad cognitionem, & confessionem Divinæ Gratiae, cujus operi, ac dignationi nihil subtrahendum est, sufficere possint ea, quæ hic secundum Ecclesiæ regulas, & Sedis Apostolicæ definitiones explicata sunt.

## C A P U T IV.

*De Gratia effectibus, ac in primis de justificatione.*

## S E C T I O I.

*In quo proprie, & formaliter consistat hominis justificatio.*

1. **S**ensus quæstionis est, quidnam sit, quod proprie, & formaliter efficiat hominem coram Deo justum, & sanctum, & in quo vera, & formalis ejus justitia consistat. Pro cujus resolutione

Dicendum 1. justitiam illam, & sanctitatem, quæ vere, & formaliter nos justos efficit, non esse favorem aliquem extrinsecum Dei,

Dei, sed donum aliquod supernaturale nobis inhærens, quo vere, & formaliter iusti dicimur, & sumus.

Huic veritati, quæ de Fide est, varii Hæreticorum opponuntur errores. Quidam enim dixerunt, nos formaliter iustos esse per ipsammet essentialem Dei iustitiam, alii per Christi iustitiam nobis imputatam, alii per solam extrinsecam peccatorum condonationem.

Hi errores, & si qui sunt alii similes, damnati sunt in Conc. Trid. sess. 6. cap. 7. & simul nostræ assertionis veritas definita, & explicata his verbis: *Unica formalis causa* (nostræ justificationis scilicet) *est iustitia Dei, non qua ipse iustus est, sed qua nos iustos facit, qua videlicet ab eo donati renovamur spiritu mentis nostræ, & non modo reputamur, sed vere iusti nominamur, & sumus, &c. dum ejusdem sanctissimæ passionis merito, per Spiritum Sanctum charitas Dei diffunditur in cordibus eorum, qui iustificantur, atque ipsis inhæret.*

Hujus autem controversiæ status (ut recte observat Bellarm. l. 2. de justificat. c. 1.) revocari potest ad hanc unicam quæstionem, utrum scilicet formaliter iusti efficiamur per iustitiam aliquam in nobis inhærentem. Si enim partem affirmantem probaverimus, consequens erit, nos neque sola essentiali Dei iustitia, aut ipsius Christi iustitia nobis imputata, neque etiam sola extrinseca peccatorum condonatione, sed aliquo alio dono supernaturali nobis inhærente vere, & formaliter iustificari. Quod ut probemus

Observandum est, nos hic sumere nomen iustitiæ, non prout significat specialem illam virtutem moralem, quæ jus suum unicuique reddit, sed prout in Scripturis frequentissime, præsertimque in Epist. S. Pauli accipitur, scilicet pro rectitudine illa interna, quæ homo bene, ac recte ordinatur erga Deum. A qua iustitia sic intellecta derivatur nomen justificationis, quod quidem, si sumatur in fieri, denotat translationem hominis a statu peccati ad statum iustitiæ, & sanctitatis, quo sensu accipitur in Conc. Trid. sess. 6. c. 4. si vero sumatur in facto esse, significat terminum illius translationis, qui est, hominem esse iustum, & erga Deum recte se habere. Hac observatione supposita,

2. Assertionis nostræ veritas probatur 1. ex Scriptura. Rom. 5. *Sicut per inobedientiam unius hominis peccatores constituti sunt multi, ita per unius obeditionem iusti constituentur multi.* Sicut igitur per inobedientiam Adami constituti sumus iniusti, non sola iniustitia ejus nobis imputata, sed iniustitia aliqua nobis vere intrinseca, & inhærente, ut probavimus tract. 4. ubi de peccato originali egimus; ita ex mente Apostoli per obeditionem Christi constituimur, & efficiamur iusti, non sola iustitia Christi nobis imputata, sed per iustitiam nobis intrinsecam, & inhærentem. Et 1. Cor. 6. *Et hæc quidem fuistis, sed abluti estis, sed sanctificati estis, sed iustificati estis,* ubi Apost. explicans, quid sit hominem esse iustificatum, dicit, idem esse ac ablutum, & sanctificatum esse. Et ad Tit. 3. justificationem dicit esse regenerationem, renovationem, effu-



effusionem Spiritus Sancti, quæ verba de sola justitiæ imputatione, vel extrinseca peccatorum condonatione explicari nequeunt, sed aliquid longe majus significant, ac proinde de dono aliquo supernaturali nobis inhærente intelligi debent.

Probat 2. ex Conc. Trid. sess. 6. can. 11. *Si quis dixerit, homines justificari vel sola imputatione justitiæ Christi, vel sola peccatorum remissione, exclusa Gratia, & Charitate, quæ in cordibus eorum per Spiritum Sanctum diffundatur, atque illis inhæreat; aut etiam Gratiam, qua justificamur, esse tantum favorem Dei, anathema sit.*

Probat 3. ex S. Aug. qui variis in locis, & nominatim in Epist. 85. ad Consentium, justitiam, & sanctitatem vocat interioris hominis pulchritudinem; unde sequitur, illam esse ipsi intrinsecam, & inhærentem. Et enarratione in Ps. 98. *Laudemus, inquit, & exaltemus illum, qui fecit ipsam justitiam, quam habemus. Ipse in nobis fecit. Quis enim in nobis fecit justitiam, nisi qui nos justificavit?*

3. Objicies 1. hæc verba Ps. 31. *Beati, quorum remissæ sunt iniquitates, & quorum tecta sunt peccata: beatus vir, cui non imputavit Deus peccatum*, ex quibus colligunt Hæretici peccatorem eatenus justificari, quatenus peccatum illi a Deo non imputatur.

Respondetur, Sanctos Patres hunc locum longe alio sensu intelligere, & explicare, quam faciant Hæretici. Quod ut evidens fiat, aliquot illius loci explicationes ex illis colligemus, & breviter hic afferemus. S. Justinus Martyr in Dialogo cum Tryphone prope finem, *Beatus, inquit, cui non imputabit Dominus peccatum, hoc est, cui pœnitenti Deus peccata remittet, non sicut predicatis, vosmetipsos fallentes, & alii quidam vestri similes asseverant, quod, etiamsi peccatores fuerint, modo Deum noverint, non imputabit eis Dominus peccatum*. S. Hier. in illum Psalmi locum, postquam sic illum explicavit, *Beati quorum peccata per confessionem a Domino diluuntur, immediate subjungit: Remittuntur peccata per Baptismum, teguntur per charitatem, non imputantur per martyrium*. S. August. in enarrat. 2. in eundem Psal. *Beati quorum remissæ sunt iniquitates, & quorum tecta sunt peccata, idest, quorum peccata abolita sunt*. Et paucis interjectis, *Deus tegat vulnera, non tu. Nam si tu tegere volueris erubescens, medicus non curabit. Medicus tegat, & curet. Emplastro enim regit, & sub regmine medici sanatur vulnus*.

Objicies 2. 1. Cor. 1. dici, Christum factum esse nobis a Deo justitiam, & redemptionem, unde videtur sequi nos per ipsammet Christi justitiam nobis imputatam justificari.

Respondetur cum distinctione. Si enim dicatur, Christum esse redemptionem, & justitiam nostram in genere causæ meritoriae, verum est: si autem in genere causæ formalis, falsum, & a veritate prorsus alienum, ut ex supra dictis constat.

4. Dicendum 2. donum illud supernaturale animæ inhærens, per quod

quod formaliter iusti efficimur, esse ipsammet Gratiā habitua-  
lem, sic dictam, quod animæ inhæreat per modum habitus.

Probatur 1. ex eo, quod ( ut supra dictum est ) Apostolus de dono illo loquens dicit, illud diffundi in cordibus nostris, nos illo ungi, quæ verba melius, & aptius intelligi non possunt, quam de Gratia habitualiter inhærente.

Probatur 2. auctoritate Concilii Viennensis Clementina 1. ubi dicitur, opinionem illam Theologorum, quæ asserit, in Baptismo virtutes, & Gratiā informantem quoad habitum conferri, tanquam probabiliorem, & dictis Sanctorum Patrum magis consonam, & concordem, sacro approbante Concilio, esse amplectendam.

Probatur 3. ex SS. Patribus, quorum verba non nisi de Gratia habituali proprie intelligi possunt. S. Dionys. Ecclesiast. Hier. par. 1. c. 2. dicit, per sacræ dilectionis operationem statum in nobis Divinum effici. S. Basil. lib. de Spiritu Sancto c. 26. explicans, quomodo Spiritus Sanctus per Gratiā inhabitet in homine, *Sicut, inquit, cernendi vis est in oculo sano, sic, & operatio Spiritus in anima purgata, &c. Et quemadmodum ars est in eo, qui nactus est illam; ita Spiritus in eo, qui recipit, semper quidem præsens, at non perpetuo orans.* Et S. Cyril. Alex. l. 4. in Isa. ora. 2. *Formatur, inquit, in nobis Christus, Spiritu Sancto nobis quandam formam per sanctificationem, & iustitiam imprimentem. Sic enim in animis nostris elucet character substantiæ Dei, ac Patris reformans Spiritu Sancto nos per sanctificationem in ipsam.*

Probatur 4. hac ratione: Homo denominatur iustus, non solum quando actu operatur, sed etiam quando nihil actu agit, v. g. quando dormit, & hæc denominatio non est extrinseca, sed intrinseca, & ex consequenti per Gratiā inhærentem, quæ proinde habitualis esse debet. Præterea etiam ipsi infantes per Baptismum iustificantur, per susceptionem veræ, & internæ Gratiæ, atqui ejusmodi Gratia actualis esse non potest, cum ipsi infantes nullius motionis actualis in Deum capaces sint; ergo Gratia illa, per quam iustificantur, debet esse permanens, & habitualis.

Quæres, an hujus secundæ assertionis veritas de Fide sit.

Respondet Philippus Gaumachæus ad quæst. 120. cap. 1. quamvis de Fide sit, hominem iustificari per aliquam Gratiā, quæ habet veram entitatem realem in anima iusti, ut ex ante dictis constat; non esse tamen prorsus ex Fide certum, an Gratia illa iustificans sit verus habitus, quamvis proxime ad Fidem accedat, nec nisi maxima temeritate negari possit. Licet enim Concilium Viennense supra relatam veritatem illam non definiat, tanquam Fide certam, illam tamen approbat, & amplectendam dicit, tanquam Sanctorum doctrinæ magis consonam, & concordem.

## S E C T I O II.

*Quinam sint effectus Gratiae habitualis sanctificantis.*

1. **I**Nter plurimos alios ipsius Gratiae habitualis effectus, qui a Sanctis Patribus, & Doctoribus enumerantur, septem sunt praecipui, quos hic breviter explicabimus.

Primus est remissio peccatorum, quae statim, ac animae Gratia infunditur, esse desinant, & penitus ab ea delentur.

Probatur 1. ex Scriptura. Ezech. 36. *Effundam super vos aquam mundam, & mundabimini ab omnibus inquinamentis vestris.* Psal. 50. *Lavabis me, & super nivem dealbabor.* Et Rom. 8. *Nihil ergo damnationis est iis, qui sunt in Christo Jesu.*

Probatur 2. ex Conc. Trid. sess. 5. can. 5. ubi profert anathema in eum, qui dixerit, per Gratiam, quae in Baptismate confertur, non tolli totum id, quod veram, & propriam peccati rationem habet.

Probatur 3. ex S. Greg. Nazianz. orat. in sanctum Baptisma, ubi dicit, Baptismi Gratiam uniuscujusque hominis peccatum purgare, & maculas omnes peccati prorsus abstergere. Quod & testatur S. Ambros. lib. de initiandis c. 7. & S. Aug. lib. 1. cont. duas Epist. Pelagianorum c. 12. ubi dicit, Gratiam in Baptismo collatam dare omnium indulgentiam peccatorum, auferre crimina, &c.

Secundus Gratiae effectus est naturae sanitas. Cum enim peccatum sit languor, & morbus maximus, illo sublato, sequitur naturae sanitas, juxta quod dicitur Psal. 102. ubi postquam Psalmista sic locutus est, *Benedic anima mea Domino, &c.* qui propitiatur omnibus iniquitatibus tuis, adjungit immediate postea, *Qui sanat omnes infirmitates tuas.* Et eadem ratione S. Matth. 9. Christus Dominus se medicum esse declarat his verbis: *Non est opus valentibus medicus, sed male habentibus.*

2. Observandum est autem, sanitatem illam, quam confert Gratia, in eo consistere, non quod per illius infusionem eximatur homo ab omnibus illis infirmitatibus, quas per peccatum originale contraxit, cum in baptizatis remaneat semper concupiscentia, seu fomes peccati, sed quod per Gratiam infirmitates illae, quae mortem animae inferunt, omnino curentur. Quamvis autem aliae quaedam infirmitates ex originali peccato contractae in homine justificato remaneant, quidquid tamen in illis vere, & proprie nocivum est, hoc per Gratiam auferitur, quod Conc. Trid. sess. 5. can. 5. declarat his verbis: *Manere autem in baptizatis concupiscentiam, vel somitem, haec sancta Synodus facetur, & sentit, quae cum ad agonem relicta sit, nocere non consentientibus, sed viriliter per Christi Gratiam repugnantibus, non valet; quinimo qui legitime certaverit, coronabitur.*

Tertius effectus est decor, & pulchritudo quaedam spiritualis ipsius



pius animæ, ut habetur in Catechismo Conc. Trid. p. 2. c. 11. Est autem Gratia qualitas Divina in anima inherens, ac veluti splendor quidam, & lux, quæ animarum nostrarum maculas omnes delet, ipsasque pulchriores, & splendidiores efficit. Unde S. Aug. tract. 9. in 1. Ep. S. Joannis inquit: *Anima nostra fœda est per iniquitatem; amando Deum pulchra efficitur; quantum in te crescit amor, tantum crescit pulchritudo.* Porro ex hac pulchritudine animæ sequitur

Quartus effectus est reddere hominem Deo gratum, & dilectum Psal. 145. *Dominus diligit justos.* Sap. 4. *Placita erat Deo anima illius.* Et S. Hieron. in cap. 10. Danielis, ad illa verba, *vir desideriorum*, dicit in alia versione haberi, *virum desiderabilem*, eo quod omnis Sanctus habens in se animæ pulchritudinem, amabilis, & desiderabilis Domino efficitur.

Quintus Gratiæ effectus est hominem justum efficere filium Dei adoptivum. Unde Apost. Rom. 8. Gratiâ Christi vocat Spiritum adoptionis. Et S. Joan. Epist. 1. c. 3. *Videte, inquit, qualem charitatem dedit nobis Pater, ut filii Dei nominemur, & simus.* Et in Catechismo Conc. Trid. par. 4. cap. 9. dicitur, Baptismum ideo Sacramentum regenerationis ab Apostolo vocari, quia per Gratiâ in eo collatam nascimur ex Deo, tanquam ejus filii. Et S. Th. q. 114. a. 4. dicit, per eandem gratiam hominem Divinæ naturæ consortem fieri, ac in filium Dei adoptari. Ex qua adoptione, ut ibidem asserit S. Th. sequitur

3. Sextus gratiæ effectus, scilicet jus ad vitam æternam, idque titulo hæreditatis. Si filii (inquit Aposto. Rom. 8.) & hæredes, hæredes quidem Dei, cohæredes autem Christi. Psal. 36. *Justi autem hæreditabunt terram.* Illud autem jus ad æternam gloriam eatenus effectum suum obtinebit, si homo justus usque ad extremum vitæ in statu Gratiæ perseveret.

Septimus denique Gratiæ effectus est dignitas, & valor, qui ex ipsa gratia derivatur in actiones bonas, & meritorias hominis justî, ratione cujus potest per illas de condigno ejusdem gratiæ, & gloriæ augmentum promereri. Unde Conc. Trid. sess. 6. c. 16. docet, vitam æternam duplici titulo justis usque in finem vitæ in justitia perseverantibus esse reddendam, hæreditatis scilicet, & mercedis. Hanc enim ut hæreditatem obtinent infantes post Baptismi susceptionem ante rationis usum ex hac vita decedentes, cum nullius meriti capaces sint: eandem vero tum ut hæreditatem, tum ut mercedem justî adulti recipiunt, qui præter jus adoptionis ad illam, etiam bonorum operum meritis se illa dignos reddiderint, & sic usque in finem vitæ perseveraverint. Verum de illo septimo gratiæ effectû plenius capite sequenti agetur.

## SECTIO III.

*An simul cum habituali Gratia aliqui virtutum habitus  
in anima infundantur.*

1. **S**upponimus ex S. Th. 1. 2. q. 57. & seqq. duo esse virtutum genera, acquiritarum scilicet, & infusarum. Acquisitæ dicuntur illæ, quarum habitus per earundem actus acquiruntur, de quibus Philosophi in Ethicis agere consueverunt. Infusæ vero illæ dicuntur, quarum habitus non producuntur per actus, sed divinitus infunduntur. Virtutes autem illæ infusæ duplicis adhuc sunt generis. Quædam enim sunt Theologicæ, sic dictæ, quod Deum, tanquam objectum suum immediatum respiciant, quales sunt Fides, Spes, & Charitas. Aliæ vero sunt morales, quæ in eo præsertim ab acquisitis differunt, quod morales virtutes acquisitæ finem aliquem rectæ rationi naturali convenientem duntaxat spectent, infusæ vero ad altiore, & supernaturalem actus suos dirigant.

Supponimus 2. præter illas virtutes morales infusas, dari etiam aliquos alios habitus supernaturales, qui communiter vocantur dona Spiritus sancti, de quibus agit S. Th. qu. 68. ar. 1. ubi docet, dona illa differre a virtutibus infusis in eo, quod animam perficiunt ad hoc, ut efficiatur prompte mobilis ab inspiratione Divina, seu a Spiritu sancto, ad actiones quasdam virtutum exequendas. His præsuppositis, pro quæstionis propositæ resolutione

Dicendum 1. simul cum gratia virtutum Theologicarum, Fidei, Spei, & Charitatis habitus in animam infundi.

Hæc veritas expresse habetur in Concil. Trident. sess. 6. c. 7. his verbis: *Unde in ipsa justificatione, cum remissione peccatorum, hæc omnia simul infusa accipit homo per Jesum Christum, cui inseritur, Fidem, Spem, & Charitatem, &c.*

2. Dicendum 2. simul cum gratia habitus virtutum moralium supernaturalium, quæ ad communem statum Christianorum pertinent, in animam infundi.

Prob. 1. ex c. 8. Sap. ubi dicitur, Sapientiam Divinam docere sobrietatem, & prudentiam, & iustitiam, & virtutem. Atqui Sapientiam Divinam, seu Deum docere illas virtutes nihil est aliud, quam eas infundere, ut dicitur in Conc. Milevit. seu potius Carthag. c. 4.

Prob. 2. ex SS. Patribus, qui simpliciter asserunt, hominem, dum in gratia Dei est, omnibus præditum esse virtutibus, quas, cum ab eadem gratia excidit, infeliciter amittit. Unde S. Hier. præfatione in Threnos Jeremiæ, de anima in peccatum lapsa loquens, *Non auri, inquit, & argenti metallo, sed virtutibus radiabat, ablata sunt hæc omnia, nudata est domus Dei cunctis ornamentis suis.* Et S. Aug. tract. 8. in Ep.

1. S. Joannis, enumeratis variis virtutibus, quæ in anima iusti reperiuntur, dicit, illas esse ad instar exercitus, Christumque Dominum in interiori homine habitantem, virtutibus illis quasi ministris suis uti. Et in Catechismo Conc. Trid. par. 2. c. 2. hæc verba habentur: *Huic autem Gratiae additur nobilissimus omnium virtutum comitatus, quæ in animam cum Gratia divinitus infunduntur. Quare cum Apostolus scribens ad Titum ait, Salvos nos fecit per lavacrum regenerationis Spiritus Sancti, quem effudit in nobis abunde per Jesum Christum Salvatorem nostrum, S. Augustinus hæc verba explanans: effudit abunde) Nimirum, inquit, ad remissionem peccatorum, & copiam virtutum.*

Diximus in assertione, virtutes illas infundi, quæ ad communem Christianorum statum pertinent. Certum est enim, virtutes quasdam eximias, & singulares, quæ ad statum illum non sunt necessariae, in justificatione simul cum gratia omnibus non conferri, ut patet de continentia virginali, de qua loquens Apostolus 1. Cor. 7. *Unusquisque, inquit, proprium donum habet ex Deo.*

Notandum est, virtutum illarum infusarum habitus non conferre facilitatem in operando, cum formaliter non expellant malos habitus contrarios, qui ante justificationem in statu peccati contracti sunt, sed tribuere solum voluntati novam potestatem ad actus sibi proprios exercendos. Unde minime mirum videri debet, si aliquando peccatores recenter justificati difficultatem in exercendis illis actibus experiantur; quæ tamen difficultas ab ipsis superari potest auxilio tum ipsarum virtutum infusarum, tum etiam gratiarum actualium, quæ nunquam illis desunt.

Dicendum 3. præter supra dictas virtutes Theologicas, & morales, dona etiam Spiritus sancti simul cum gratia in animam infundi.

Constat ex Conc. Trident. sess. 6. c. 7. ubi dicit, *Justificationem non esse solam peccatorum remissionem, sed sanctificationem, & renovationem interioris hominis per voluntariam susceptionem Gratiae, & donorum.* Id etiam docet S. Th. sup. q. 68. ar. 2. ubi dicit, dona illa Spiritus Sancti esse homini ad salutem necessaria, quoniam ad hunc finem, qui prorsus supernaturalis est, & omnem ejus facultatem longe supergreditur. præter omnia supra dicta, indiget adhuc peculiari motionem, & ductu Spiritus sancti, juxta illud Psal. 142. *Spiritus tuus bonus deducet me in terram rectam.*

In quo elucet admirabilis prorsus, & magnifica Dei erga homines benignitas, & misericordia, qui naturæ nostræ adeo fragili, & imbecilli tot & tanta gratiæ suæ adminicula, & auxilia providit, ut nos elevet, & deducat ad finem illum sublimem, & supernaturalem, propter quem creati, & redempti sumus.

Dices, multos esse idiotas, & simplices, qui, quamvis sint in statu gratiæ, illis tamen donis carere videntur, ut dono sapientiæ, scientiæ, &c.

Respon-



Respondetur, dona illa infundi quoad habitus, quorum actus varii sunt pro varietate conditionum, & statuum, in quibus Spiritus sanctus per illa dona unumquemque iustum ad sequendum instinctum suum disponit in iis, quæ statui suo competunt, ut salutem æternam consequatur. Unde nullus est adeo idiota, & simplex, qui, si gratia sanctificante præditus sit, non habeat lumen sapientiæ, & scientiæ infusum, quatenus sibi necessarium est, ut ad finem supernaturalem in omnibus suis actibus dirigatur. Imo experientia satis constat, idiotas, & simplices in gratia Dei constitutos, quamvis nullo ingenii acumine, nulla scientia, aut humana sapientia præditi sint, in iis tamen, quæ ad salutem spectant, interiore lumine dirigi, quo carent illi, quos sapientes, & prudentes huius sæculi vocat Apostolus, qui in temporalibus negotiis maxime perspicaces, in rebus ad æternam salutem spectantibus cæci sunt, & quasi iudicio, ac ratione destituti. Unde dicit Apost. 1. Cor. 1. *Videte, fratres, vocationem vestram, quia non multi sapientes secundum carnem.* Et S. August. lib. 8. Confess. cap. 8. *Surgunt indocti, & cælum rapiunt, & nos cum doctrinis nostris sine corde volutamur in carne, & sanguine.*

## S E C T I O IV.

*An Gratia habitualis a charitate distincta sit.*

1. **C**ertum est ex ante dictis, charitatem a gratia habitualis sanctificante nunquam esse disjunctam, proindeque illum, qui gratiam habitualement accipit, etiam charitatis habitum sibi infusum recipere. Sed controversum est inter Doctores, an gratia, & charitas sint a parte rei quid unum, an vero illarum habitus realiter inter se sint distincti.

Dux sunt autem super hac quæstione Theologorum sententiæ.

Alii enim existimant, realiter inter se distingui, & gratiam quidem in ipsa animæ substantia, tanquam in proprio subiecto, sedem habere, charitatem vero in voluntate; & per charitatem nos diligere Deum, per gratiam nos a Deo diligere.

Alii vero asserunt, gratiam, & charitatem unum, eundemque esse habitum, nec ab invicem, nisi ratione distingui. Ita Bellar. l. 1. de grat. & alii.

Hujus autem secundæ sententiæ (quam ut probabiliorem amplectimur) veritas probatur 1. ex Conc. Trid. sess. 6. cap. 7. ubi quamvis super hac quæstione (cum ad fidem minime pertineat) nihil definire voluerit, satis aperte tamen indicavit, cui sententiæ magis faveret. Postquam enim dixit, unicam formalem causam nostræ justificationis esse iustitiam Dei, non quia ipse iustus est, sed quia nos iustos facit, explicans postea, quænam sit illa iustitia, dicit,

peccatorem justum fieri, dum passionis Christi merito, per Spiritum Sanctum charitas Dei diffunditur in cordibus eorum, qui justificantur, atque ipsis inhæret. Ubi nullius alterius gratiæ justificantis, præter quam charitatis, mentionem facit.

Prob. 2. ex S. August. lib. de nat. & grat. cap. ult. ubi sic loquitur: *Charitas inchoata, inchoata justitia est, charitas perfecta, perfecta justitia est, charitas magna, magna justitia est, charitas perfecta, perfecta justitia est.* Et S. Bernard. lib. de modo bene vivendi cap. 4. *Timor sanctus introducit in mentem hominis perfectam charitatem, perfecta autem charitas perfecta est sanctitas.*

Quærent hic aliqui, an sicut habitualis, sic etiam actualis charitas formaliter hominem sanctificet, an v. g. actus perfectæ contritionis ex vero charitatis motivo elicitus per se formaliter hominem justificet.

Respondetur 1. certum esse, quacunque ratione id fiat, sive formaliter, sive meritorie, sive alio quovis modo, actum perfectæ contritionis, seu charitatis peccata delere, hominemque justificare. Id enim expresse definitum est in Conc. Trid. sess. 14. cap. 4. ubi dicit, contingere aliquando, contritionem charitate perfectam esse, hominemque Deo reconciliare, priusquam Sacramentum poenitiæ actu suscipiatur.

Respondetur 2. probabilissimum esse, etiam formaliter, per ipsummet actum charitatis hominem justificari, proindeque peccata omnia deleri, cum (ut ait S. Doct. 2.2. q. 27. a. 4. ad 3.) per actum quemlibet perfectum charitatis aversio a Deo formaliter tollatur, & anima immediate Deo jungatur vinculo spiritualis unionis. Unde dicitur 1. S. Jo. 4. quod *Qui manet in charitate, in Deo manet, & Deus in eo.* Et S. Bern. ser. 83. in Cant. dixit, *Charitatis actum esse, spiritualis conubii animæ cum Deo non solum contractum, sed etiam amplexum.*

## S E C T I O V.

*An aliquæ dispositiones ad justificationem requirantur, & quæ.*

1. **S**upponimus tanquam certum ex Fide, solum Deum esse causam principalem efficientem justificationis. Hoc enim constat ex Script. Job. 14. *Quis potest facere mundum de immundo conceptum semine? nonne tu, qui solus es?* Isa. 43. *Ego sum, qui deleo iniquitates tuas.* Unde sequitur, ex pura, & gratuita Dei misericordia pendere justificationem hominis, illumque proinde non alio modo posse justificationem consequi, nisi eo quem ipse Deus illi præscripsit. Hoc præsupposito, pro quæstionis propositæ resolutione,

Dicendum 1. Deum, ut hominem adultum justificet, aliquas ab illo dispositiones, seu bonos aliquos motus liberi arbitrii exigere, ad quos tamen illum gratiæ actualis auxilio excitat, & adjuvat. Ita S. Th. q. 113. a. 3.

Prob.

Prob. 1. ex Script. quæ innumeris prope in locis hortatur peccatores ad poenitentiam, ad timorem Dei, & alios similes actus virtutum, ut per illos ad peccatorum remissionem accipiendam se disponant.

Prob. 2. ex Conc. Trident. sess. 6. cap. 6. ubi explicat varios actus virtutum, per quos peccator ad justificationem disponitur, & c. 9. ubi profert anathema in eum, qui dixerit, nulla ex parte necesse esse, ut impius ad justificationis gratiam consequendam voluntatis suæ motu præparetur, ac disponatur.

Prob. 3. ex his verbis S. Aug. ser. 16. de verb. Dom. c. 11. *Qui fecit te sine te, non justificat te sine te; fecit nescientem, justificat volentem.*

Objicies, in Conc. Arausicano II. can. 4. dici Deum, ut a peccato purgemur, voluntatem nostram non expectare.

Respondetur, verum esse, quod Deus non expectat voluntatem nostram, ut primam gratiam vocantem, & excitantem tribuat, a qua incipit nostra justificatio, falsum autem esse, postquam Deus peccatorem gratia sua excitavit, ut poeniteat, illum ejus voluntatem non expectare, ut ei tribuat peccati remissionem, gratiamque justificantem ei infundat. Et hunc esse Concilii sensum indicant verba sequentia, quibus dicit, Ut purgari velimus, per Spiritus Sancti infusionem, & operationem in nobis fieri.

Dicendum 2. primam ex dispositionibus in adulto requisitis ad justificationem, esse Fidem. Ita S. Th. 1. 2. q. 113. a. 4. & 5.

Probatur ex eo, quod dicit Apost. Hebr. 11. *Sine Fide impossibile est placere Deo. Credere enim oportet accedentem ad Deum, &c.*

Deinde ex Conc. Trid. sess. 6. c. 8. ubi Fides dicitur esse *humana salutis initium, & fundamentum, ac radix omnis justificationis.*

Et S. August. lib. de prædest. Sanct. c. 7. *Fides, inquit, prima dicitur, ex qua cetera impetrantur.* Et ex S. Cyrillo Jerosol. Catechesi 1. ubi dicit, Fidem esse quasi oculum, & lampadem ad viam salutis inveniendam.

2. Observandum est autem, Fidem illam, quam dicimus ad justificationem requiri, non esse fiduciam, seu confidentiam, qua credit homo, sua peccata sibi esse a Deo remissa (ut falso dicunt Hæretici) sed esse Fidem illam, qua veritatibus a Deo revelatis assentimur. Unde Scriptura describens Fidei actum ad justificationem necessarium explicat illum per assensum datum veritatibus a Deo revelatis, non vero per fiduciam de peccatorum commissorum obtenta remissione. S. Jo. 20. *Hæc scripta sunt, ut credatis, quia Jesus est Filius Dei, & ut credentes vitam habeatis in nomine ejus.* Et Ecclesia etiam nullam aliam a baptizandis Fidem exigit, quam eorum, quæ in Symbolo continentur.

Dicendum 3. Fidem solam non sufficere, sed præter illam, aliarum quoque virtutum actus, tanquam dispositiones ad justificationem consequendam requiri.

Hoc constat ex eo, quod Scriptura ad peccatoris justificationem,



timoris, spei, poenitentiae, aliarumque similium virtutum actus, æque ac Fidei requirit, ut mox dicetur.

Ad objectiones autem Hæreticorum solvendas, hoc unum advertere sufficiat, nusquam haberi in Scripturis, fidem solam justificare. Dicit quidem Apostolus variis in locis, nos justificari ex Fide, quod verissimum est, cum sit initium, ac radix omnis justificationis, sed non dicit, nos ex sola Fide justificari.

3. Dicendum 4. præter Fidem quinque alias dispositiones ordinarie concurrere ad justificationem, ut habetur in Conc. Trident. sess. 6. c. 6. scilicet Divinae justitiæ timorem, spem veniæ ex Divina misericordia, dilectionem Dei, qua ipse propter se, & super omnia diligatur, & ex illius dilectionis motivo odium, ac detestationem peccati, ac propositum novæ vitæ, observationisque mandatorum, nec non suscipiendi Baptismi in eo, qui nondum baptizatus est. Idem dicendum est de Poenitentię Sacramento, si homo baptizatus sit.

Jam quod spectat ad timorem Divinae justitiæ, dicit Concilium, peccatores illo utiliter concuti, quod adversus Lutherum declaravit, qui docuit, timorem illum esse peccatum, ut patet ex Bulla condemnationis articulorum ipsius a Leone X. factæ, & ex can. 8. ejusdem sess. 6. Conc. Trid. ubi anathema dicitur ei, qui hoc docuerit.

Hæc autem veritas, præter ipsius Concilii, ac Summi Pontificis auctoritatem, probari potest, & error oppositus refelli ex Script. Prov. 14. *Timor Domini fons vitæ*. Eccl. 1. *Timor Domini expellit peccatum*. Et 1.2. Reg. c. 12. Nathan Propheta comminatione poenarum Davidem ad poenitentiam cohortatus est. Et S. Matth. 3. S. Joannes Baptista idem fecit erga Judæos. Et Christus Dom. S. Luc. 12. hortatur ad timendum eum, qui postquam corpus occiderit, animam potest mittere in gehennam. Unde patet, quam vere dixerit Conc. Trid. sess. 14. c. 4. timorem illum gehennæ esse donum Dei, & impulsus Spiritus Sancti, non adhuc quidem inhabitantis, sed tantum moventis, quo poenitens adjutus viam sibi ad justitiam parat. Ut autem hæc melius intelligantur,

4. Observandum est, timorem illum servilem duplici modo concipi posse, 1. quando quis a peccato abstinet, vel bonum aliquod facit, eo tantum fine, ut effugiat poenam, & ita dispositus est, ut nisi timeret poenam, nec malo abstineret, nec bonum faceret, & sic fuga poenæ sit quasi ultimus finis, quem sibi proponit in faciendo bono, vel abstinendo a malo: & hic timor malus est. 2. quando aliquis abstinet quidem a malo, vel bonum aliquod facit, ut poenam effugiat, sed ita, ut fuga, & devitatio poenæ sit tantum finis proximus, non vero ultimus, quo ad abstinendum a malo, vel ad bonum faciendum moveatur, atque ita dispositus sit, ut quamvis poenam evitare posset, non tamen propterea vellet aut malum committere, aut bonum, quod sibi faciendum est, omittere: & hic timor bonus est, atque utilis, ac de illo intelligenda sunt ea, quæ supra diximus.

Quod

Quod spectat ad spem, certum quoque est ex Scriptura, illam requiri ad justificationem. Ps. 31. *Sperantem in Domino misericordia circumdabit.* Prov. 28. *Qui sperat in Domino, sanabitur.*

De dilectione Dei similiter constat ex his Christi Domini verbis S. Luc. 7. *Remittuntur ei peccata multa, quoniam dilexit multum.*

De odio etiam, & detestatione peccati, patet ex innumeris prope Scripturæ locis, hanc præsertim dispositionem ad peccatoris justificationem requiri, sicut & propositum novæ vitæ, observationis mandatorum, ac suscipiendi Sacramenti sive Baptismi, sive Pœnitentiæ, ut plenius dicetur in tractatu de Sacramentis.

Dices, ex Concilio Tridentino supra, solam contritionem perfectam sufficere ad peccatoris justificationem, unde sequitur, illarum virtutum actus ad eam minime requiri.

Respondetur concedendo antecedens, & distinguendo consequens, non requiri, ut illarum virtutum actus explicite semper eliciantur, conceditur, non requiri, ut saltem virtualiter, & implicite, negatur. In actu enim perfectæ contritionis omnium illarum virtutum actus virtualiter, & implicite continentur. Nam qui vere dolet Deum offendisse, eo quod illum perfectè, & summe diligat, is & virtualiter in Deum credit, & timet illum, si non timore servili, certe reverentiali, & filiali & sperat in eum, quem summe bonum agnoscit, & in posterum vult illi obsequi, & omnia præstare, quæ ipsi placita esse cognoscit.

## S E C T I O VI.

*An gratis habitualis, seu charitas, augeri, vel minui, vel amitti possit.*

**Q**uod spectat ad primam quæstionis propositæ partem, dicendum est, gratiam habituales, seu charitatem posse in hac vita augeri. Ita S. Thom. 2. 2. q. 24. a. 4.

Constat in primis ex Scriptura. Prov. 4. *Iustorum semita, quasi lux splendens, crescit usque in perfectam diem:* & Apoc. 22. *Qui iustus est, justificetur adhuc, & qui sanctus est, sanctificetur adhuc.* Deinde ex Conc. Trident. sess. 5. c. 10. ubi dicit, *Justificator in ipsa iustitia per Christi Gratiam accepta, cooperante Fide, bonis operibus crescere, atque magis justificari.*

Observandum est autem, gratiæ habitualis, seu charitatis augmentum non fieri instar aliarum virtutum acquiratarum, quæ quidem, sicut per actus producuntur, sic etiam per eosdem augentur, & intenduntur. Cum enim gratiæ, seu charitatis habitus non producat per actus, sed a Deo infundatur, augmentum illius a solo Deo est, tanquam a causa efficiente, non vero ab actibus bonis hominis justificati, nisi quatenus per illos ipsius gratiæ, & charitatis augmentum promeretur, ut capite sequenti dicemus.

Quod spectat ad secundam quæstionis propositæ partem , dicendum est , Gratiâ habitualement , seu charitatem minui non posse . Ita S. Th. sup. art. 10.

Quod probatur ex eo , quod si minueretur , hoc fieret vel per cessationem ab actibus ipsius charitatis , vel per aliquos actus sibi contrarios ; sicut & in virtutibus acquisitis , quæ utroque illo modo minuuntur , quia conservatio cujusque rei dependet a sua causa , virtutis autem acquisitæ causa sunt ipsius actus , unde illis cessantibus , vel aliis contrariis advenientibus , paulatim minuitur ipsius virtutis habitus , ac tandem totaliter corrumpitur . Hoc autem in Gratia , seu charitate locum non habet . Cum enim charitatis habitus neque producat , neque augeatur per actus , hinc fit , ut ( præcise loquendo ) per actuum cessationem directe non minuat . Neque etiam per actus contrarios , seu per peccata . Peccatum enim , si mortale sit , non minuit , sed totaliter charitatis habitum corrumpit , ut mox dicetur , si autem veniale sit , habitum charitatis non minuit . Si enim minueret , vel effective , vel meritorie minueret : non effective , quia ipsi charitati non opponitur , neque etiam meritorie ; qui enim delinquit in minori ( aut ait S. Doct. ) non meretur detrimentum in majori , neque Deus se ab homine magis avertit , quam homo avertat se ab ipso . Quod quamvis verum sit , recte tamen monet S. Doct. ibidem , aliquo sensu dici posse , per peccata venialia , vel per cessationem ab exercitio bonorum operum indirecte minui Gratiâ , vel charitatem , in quantum minuitur fervor ejus , & homo magis , ac magis disponitur ad totalem ipsius corruptionem .

Quod denique ad tertiam quæstionis propositæ partem attinet , certum est , gratiam posse amitti .

Constat ex Script. 1. Ezech 18. *Si averterit se justus a justitia sua , & fecerit iniquitatem , omnes justitiæ ejus non recordabuntur .* Et experientia nimis funesta compertum est , justitiam , & gratiam non solum posse amitti , sed etiam de facto fere ab omnibus amitti , ac paucissimos esse , imo pene nullos , qui gratiam in Baptismo acceptam usque in finem vitæ retineant , quique Poenitentiae remedio non indigeant .

## S E C T I O VII.

*An aliquis certo scire possit , se esse justificatum .*

1. **Q**uæstionis sensus est , an aliquis certus esse possit certitudine Fidei , cui proinde non possit subesse falsum , se esse justificatum , ac in statu gratiæ habitualis sanctificantis constitutum . Pro cujus resolutione

Dicendum 1. neminem debere , nec posse credere certo , se esse justificatum .

Est de Fide contra Calvinum , qui l. 3. Inst. c. 2. §. 16. & sequentibus , & in



& in Antidoto Concil. Trid. ad c. 13. & 1. sess. 6. asserit, quemlibet Fidelem non solum esse certum de sua justificatione, sed etiam teneri ad credendum, se per Christi iustitiam sibi imputatam esse justificatum.

Refellitur hic error, & veritas nostræ Fidei probatur 1. ex Scriptura. Eccl. 9. *Nescit homo, utrum amore, an odio dignus sit.* Psal. 18. *Delicta quis intelligit? ab occultis meis munda me, Domine,* ex quo loco S. Hieronym. l. 1. adversus Pelagianos probat, iustorum nemini plane cognitum esse, sitne absque peccatis, an non. Et 1. Cor. 4. *Nihil mihi conscius sum, sed non in hoc justificatus sum.*

Probatur 2. ex Concil. Trident. sess. 6. c. 9. ubi expresse habetur, quod, *Sicut nemo pius de misericordia Dei, de Christi merito, deque Sacramentorum virtute, & efficacia dubitare debet, sic quilibet, dum seipsum, suamque propriam infirmitatem, & indispositionem respicit, de sua Gratia formidare, & timere debet, cum nullus scire valeat certitudine Fidei, cui non potest subesse falsum, se Gratiam Dei esse consecutum.*

Probatur 3. ex S. August. serm. 23. de verbis Domini, Fortasse, inquit, *tu nihil inveneris in conscientia tua, invenit ille qui melius videt.* Et S. Bernard. serm. 3. de Adventu, *Accedit ad sollicitudinis cumulum, & pondus timoris, quod, cum & meam, & proximi conscientiam servare necesse sit, neutra mihi satis est nota; utraque abyssus est imperscrutabilis; utraque mihi nox est.*

Porro id sapientissime a Deo factum esse, ut de propria justificatione nullam habeant homines (quandiu in hac mortali vita degunt) certitudinem, inde constat, quod (ut ait S. August. l. de corrept. & Grat. cap. 15.) *In hoc loco tentationis tanta est infirmitas, ut etiam possit superbiam generare securitas.*

Dicendum 2. quamvis secundum legem ordinariam nemo scire certo possit, se esse in statu gratiæ sanctificantis, id tamen extraordinarie per specialem revelationem divinitus factam posse cognosci, ut de facto SS. Virgo id cognovit, cum ab Angelo audivit, *Ave Gratia plena, Dominus tecum,* item S. Magdalena, cum Christus Dominus illi dixit, *Remittuntur tibi peccata tua,* & etiam omnes Sancti Apostoli, ut docet S. Th. q. 24. de verit. art. 49.

Dicendum 3. posse etiam quemlibet iustum, citra omnem revelationem, habere certitudinem aliquam moralem, seu conjecturalem de sua justificatione, signisque quibusdam, & verisimilibus argumentis atque conjecturis probabiliter cognoscere, se esse in statu gratiæ, in quibus tamen, qualiacumque sint, nullus absolute debet conquirere, neque in seipso confidere, vel gloriari, *Quoniam* (ut recte monet Conc. Trident. sess. 6. c. 16.) *omnis hominum vita non humano iudicio examinanda, & iudicanda est, sed Dei, qui illuminabit abscondita tenebrarum, & manifestabit consilia cordium, & tunc laus erit unicuique a Deo.*

*An possit homo aliquid a Deo mereri.*

1. **O**bservandum est, nos hic non sumere nomen meriti late, prout etiam aliquando in malam partem accipitur, ut 2. Paralip. c. 19. *Iram Domini merebaris*, sed stricte, & proprie, prout significat actionem liberam, honestam, & bonam, quæ mercede aliqua, & præmio digna est, qua in significatione dicitur Eccl. 16. *Omnia misericordia faciet locum unicuique, secundum meritum operum suorum.* Hac observatione supposita, pro quæstionis propositæ resolutione

Dicendum est, hominem posse vere, & proprie aliquid a Deo mereri.

Est de Fide contra Calvinum, & ejus asseclas, qui nomen Meriti communiter rejiciunt, tanquam Divinæ gratiæ, ac misericordiæ injuriosum, ac superbiam, & præsumptionem redolens. Verum, quam falso id dicant, & ut potius desidiæ suæ, ac socordiæ, quam ut Dei gloriæ consulant, ex iis, quæ mox dicemus, patebit. Nostræ igitur assertionis veritas

Probatur 1. ex pluribus Scripturæ locis, in quibus mentio fit mercedis a Deo justis reddendæ, propter bona illorum opera, ut S. Matth. 5. *Cum persecuti vos fuerint propter nomen meum, gaudete, & exultate, quia merces vestra multa est in cælo.* 1. Cor. 3. *Unusquisque propriam mercedem accipiet secundum laborem suum.*

Probatur 2. ex Conc. Araus. can. 18. *Debetur merces bonis operibus, si fiant, sed Gratia, quæ non debetur, præcedit, ut fiant.* Et ex Concil. Trident. sess. 6. c. 16. *Bene operantibus usque in finem, & in Deo sperantibus proponenda est vita æterna, & tanquam Gratia filiis Dei per Christum Jesum misericorditer promissa, & tanquam merces ex ipsius Dei promissione bonis ipsorum operibus, & meritis fideliter reddenda.*

Probatur 3. ex SS. Patribus, qui unanimi consensu bonis justorum operibus merendi vim inesse docent, ut S. Cyprianus lib. de unitate Ecclesiæ post medium, *Justitia, inquit, opus est, ut promereri quis possit Deum, præceptis ejus, ac monitis obtemperandum est, ut accipiant merita nostra mercedem.* S. Aug. Ep. 105. *Nonnulla, inquit, sunt plane, quia justis sunt, sed ut justis fierent, merita non fuerunt.*

Objicies 1. S. Luc. cap. 17. *Cum feceritis omnia, quæ præcepta sunt vobis, dicite, quia servi inutiles sumus.*

Respondetur, nos esse servos inutiles (ut explicat S. Ambr. lib. 8. in S. Luc.) si consideremus id, quod facimus, prout a nobis tantum est, sed non, ut est a Christo in nobis per Gratiâ suam operan-

rante, vel, ut explicat Beda in hunc locum, nos esse servos inutiles respectu Dei, cum nihil illi utilitatis accedat ex operibus nostris, quamvis per ejus misericordiam, & gratiam opera illa bona nobis sint valde utilia, & proficua.

Objicies 2. ex Isa. 64. *Facti sumus immundi omnes nos, & ut pannus menstruatae omnes justitiae nostrae.*

Respondetur, Prophetam illic loqui, non in persona justorum, sed Judæorum, qui cum peccatis in anima sordescerent, merito dicere poterant, justitias suas, id est legis externas observationes, immundas esse, & sordidas in conspectu Dei, cum (ut Christus dixit) quæ de corde exeunt, ea sint, quæ coinquinant hominem. Ita hunc locum explicat S. Hieronymus in Commentariis in illud Prophetæ caput.

## S E C T I O II.

*An meritum recte dividatur in meritum de condigno,  
& meritum de congruo.*

1. **P**er meritum de condigno intelligunt Theologi meritum illud, quod mercede, ac præmio ex se dignum est, & cui proinde ex quadam justitia debetur merces, ac præmium; per meritum autem de congruo illud, quod, quamvis mercede non sit ex se dignum, illi tamen ex decentia quadam, & congruitate debetur. Hac observatione supposita,

Dicendum 1. Justos posse de condigno aliquid a Deo mereri.

Probat. 1. ex iis Scripturæ locis, in quibus dicitur, justos per bona opera fieri dignos præmio, & remuneratione. Sap. 3. *Deus tentavit illos, & invenit eos dignos se.* S. Matth. 10. *Dignus est operarius mercede sua.* Apoc. 3. *Ambulabunt mecum in albis, quia digni sunt.* Item ex iis, in quibus dicitur, Deum bonis justorum operibus reddere mercedem ex quadam justitia. S. Matth. 20. *Quod justum fuerit, dabo vobis.* Hebr. 6. *Non est injustus Deus, ut obliviscatur operis vestri.* Ad Timoth. 4. *Bonum certamen certavi, &c. in reliquo reposita est mihi corona justitiæ, quam reddet mihi Dominus in illa die justus Judex, non solum autem mihi, sed & iis, qui diligunt adventum ejus,* quæ Apostoli verba Concilium Trident. supra de mercede bonis justorum operibus debita, & a Deo reddenda explicat.

Probatur 2. ex SS. Patribus, qui passim Deum erga justos debitorem esse dicunt, ut S. Cypr. l. de eleemosyna, *Præclara, inquit, ac divina res, salutaris operatio, quæ promeretur Christum judicem, & Deum computat debitorem.* S. Ambr. l. 7. in S. Luc. *Reddes ergo, Domine, quod debes; beati, quibus es debitor.* S. Hieron. Ep. ad Helvidiam cap. 1. *Quanta beatitudo pro parvis magna recipere, & Deum habere debitorem!* Et S. Aug. serm. 6. de verbis Apostoli, *Possumus ita Deum alloqui tanquam debitorem, eique dicere, Redde, quod promissisti, quia fecimus, quod jussisti.* Obji-



Objicies, inter Deum, & creaturam nullam esse posse justitiam, neque Deum posse esse unquam debitorem ulli creaturæ fieri.

2. Respondetur, hoc verissimum esse, si creatura præcise secundum se consideretur, non item, si quatenus homo justus est membrum vivum Christi Dom. & ex ejus merito, ac virtute operatur. Et quamvis etiam ea ratione inter Deum, & hominem non possit esse justitia strictè sumpta; est tamen inter utrumque vera aliqua ratio justitiæ late sumptæ, qualis est inter patrem, & filium, dominum, & servum.

Dicendum 2. dari etiam meritum de congruo.

Probatur ex iis Scripturæ locis, in quibus aliquid a Deo Peccatoribus dari dicitur intuitu aliquorum bonorum operum, ut Exod. 1. refertur de obstetricibus Ægyptiorum, & Act. 10. de Cornelio Centurione. Certum est autem, peccatores nihil a Deo posse de condigno mereri, ut Sectione sequenti dicetur; unde sequitur, meritum illorum esse tantum de congruo.

### S E C T I O III.

*Quanam conditiones requirantur ad meritum ex parte illius, qui meretur.*

1. **Q**uestio intelligenda est de merito de condigno, quod proprie, & simpliciter meritum dicitur. Et pro illius resolutione

Dicendum est, duas potissimum conditiones requiri ex parte illius, qui meretur. Prima est, ut sit in statu Gratiæ sanctificantis, secunda, ut sit in statu viæ. Ita communiter omnes.

Primæ conditionis necessitas probatur 1. ex Scriptura S. Joan. 15. *Sicut palmes non potest ferre fructum a semetipso, nisi manserit in vite, sic nec vos, nisi in me manseritis.* Et 1. Cor. 13. *Si distribuero in cibos pauperum omnes facultates meas, charitatem autem non habuero, nihil mihi prodest.*

Probatur 2. ex Concilio Trident. sess. 6. cap. 16. ubi meritum dicitur esse fructus justificationis, diciturque, sine unione cum Christo, ac virtute, quam in justificados influit, bona illorum opera meritoria esse non posse.

Probatur 3. ex S. Greg. lib. 2. Moral. c. 8. ubi dicit, quod *non Abel ex muneribus, sed ex Abel munera oblata placuerunt*, quasi dicat, Deum prius intueri personam, quam munera, & opera ejus, illaque ipsi accepta esse non posse, nisi persona offerentis, vel operantis ipsi grata, & accepta sit.

2. Secundæ conditionis necessitas constat 1. ex Scriptura S. Jo. 9. *Venit nox (mortis tempus scilicet) quando nemo potest operari*, Galat. 6. *Dum tempus habemus, operemur bonum.* Eccles. 11. *In quocunque loco ceciderit lignum, ibi erit.*

Constat 2. ex S. Hier. in c. 6. 1. ad Cor. *Tempus, inquit, sementis est*  
vita

*vita present, quam currimus; cum vita ista transierit, operandi tempus auferetur. Et S. Aug. in Enchir. c. 110. Nemo, inquit, speret, quod hic neglexerit, cum obierit, apud Deum promereri.*

Ratio autem hujus conditionis alia non est, quam ipsius Dei voluntas, qui constituit, ut merita omnia morte finirentur; alias, si ita voluisset, Beati etiam in coelo mereri potuissent, cum status beatitudinis merito non repugnet, ut patet in Christo Domino.

S E C T I O IV.

*Quanam conditiones requirantur ex parte actus meritorii.*

1. **D**Uæ sunt præsertim conditiones, quæ ex parte actus requiruntur ad hoc, ut sit meritorius.

Conditio prima est, ut sit liber non tantum a coactione, sed etiam a necessitate. Quod hæc conditio requiratur ex parte actus,

Probat. 1. ex Scriptura, Eccl. 31. ubi de homine justo bene operante hæc dicuntur, *Qui probatus est in illo, & perfectus est, erit illi gloria æterna; qui potuit transgredi, & non est transgressus, facere mala, & non fecit; ideo stabilita sunt bona illius in Domino.* Et 2. Cor. 6. ubi Apost. loquens de eleemosyna, ad quam Fideles hortabatur, dicit. *Unusquisque prout destinavit in corde suo, non ex tristitia, aut ex necessitate.*

Probat. 2. ex SS. Patribus, qui unanimiter hanc in bonis operibus conditionem requirunt, ut S. Justin. mart. Apolog. 1. circa medium, ubi de bonis justorum operibus loquens, *Neque enim, inquit, quidquam horum laude dignum esset, nisi utranque in partem convertere, & quasi flectere se possent.* S. Iren. l. 4. c. 11. *Qui operantur bonum, gloriam, & honorem percipient, quoniam operati sunt bonum, cum possent illud non operari.* Tertull. l. 2. contra Marcion. c. 4. *Tota libertas arbitrii concessa est homini, ut sui dominus constanter occurreret & bono sponte servando, & malo sponte vitando, &c.* Caterum nec boni, nec mali merces jure pensaretur ei, qui aut bonus, aut malus necessitate inventus fuisset. S. Hier. l. 2. cont. Jovin. *Liberi arbitrii nos condidit Deus, nec ad virtutes, nec ad vitia necessitate trahimur, alioquin ubi necessitas, nec corona, nec damnatio est.* Quam illius sententiam referens, & approbans S. Aug. lib. de nat. & Grat. c. 5. *Quis, inquit, non agnoscat, quis non toto corde suscipiat, quis taliter conditam humanam neget esse naturam? sed in recte faciendo ideo nullum est vinculum necessitatis, quia libertas est charitatis.* S. Bernard. lib. de Grat. & lib. arbit. non longe post initium, *Ubi necessitas, inquit, ibi libertas non est, nec meritum.*

2. Probatur 3. ex eo, quod ad demeritum, seu peccatum requiritur, ut peccantis voluntas libera sit non solum a coactione, sed etiam a necessitate; ergo a contrario ad meritum bene operantis voluntas nullam in agendo non modo coactionem, sed etiam necessitatem pati debet.

debet. Consequentia patet, cum utrobique sit par ratio. Antecedens probatur ex S. Aug. lib. de duabus animabus, ubi dicit c. 11. *Neminem vituperatione, suppliciove dignum esse, qui id non faciat, quod facere non potest.* Additque, *Nonne ista cantant & in montibus pastores, & in theatris Poetae, & indocti in circulis, & docti in bibliothecis, & magistri in scholis, & Antistites in sacris locis, & in orbe terrarum genus humanum?* Et in lib. de liber. arb. c. 18. *Quis enim peccat in eo, quod nullo modo caveri potest? peccatur autem? caveri igitur potest?*

3. Secunda conditio requisita ex parte ipsius actus, ad hoc ut sit meritorius, est, ut sit bonus, & honestus tam ex parte objecti, quam finis, & aliarum circumstantiarum, idest, ut actus ille habeat objectum bonum, & honestum, & fiat propter finem bonum, ac Deo gratum, ac in ipsum Deum vel actualiter, vel saltem virtualiter referatur, nec ulla prava circumstantia vitietur.

Hujus conditionis necessitas constat ex eo, quod in Scripturis retributio, merces, & corona promittuntur tantum operibus bonis. Id etiam expresse habetur in Conc. Trid. sess. 6. ca. 16. & can. 31. & 32. Unde S. Aug. lib. de Grat. & lib. arb. c. 6. *Quae mala sunt, inquit, non coronat Deus.* Quod autem opera illa bona nulla mala circumstantia vitari debeant, patet ex eo, quod si aliqua tali circumstantia vitarentur, desinerent esse bona, & honesta cum juxta commune Philosophorum axioma, bonum sit ex integra causa, malum ex quocunque defectu, quod fusius explicabitur in tractatu de actibus humanis.

Addunt aliqui Doctores tertiam conditionem ex parte ipsius actus, ad hoc ut sit meritorius, nimirum ut a charitate sit elicitus, aut saltem imperatus. Quamvis autem verum sit, actus illos, qui a charitate eliciuntur, vel imperantur, esse maxime meritorios praeter actibus aliarum quarumcunque virtutum; nihilominus Divinam largitatem, ac benignitatem magis commendat sententia illorum, qui existimant, conditionem hanc, licet optimam, minime tamen esse necessariam ad meritum. Quam proinde ut probabiliorem amplectimur, asserimusque cuivis operi bono, & honesto hominis justis, quamvis non eliciatur ex motivo, vel imperio charitatis, inesse veram, & propriam rationem meriti, dummodo conditiones omnes supra explicatae illi adsint.

Probatur haec sententia 1. ex iis omnibus Scripturae, & SS. Patrum testimoniis, quae prope innumera sunt, in quibus excitantur, & adjuvantur homines ad opera misericordiae, aliarumque virtutum exercenda, nulla facta mentione, quod ex motivo, vel imperio charitatis fieri debeant, asseriturque, bonis illis operibus reddendam esse a Deo mercedem.

4. Probatur 2. ex Conc. Trid. sess. 6. ca. 16. ubi postquam dixit, Christum Dominum in justificatos jugiter influere virtutem, idest Gratiam actualem, quae bona eorum opera antecedit, comitatur, & subsequitur,



tur, addit postea : *Nil deesse ipsis justificatis, quominus operibus illis, quæ in Deo* ( hoc est in statu Gratiæ habitualis sanctificantis, seu charitatis, per quam Deo unimur, & in ipso manemus : *sunt facta, Divinæ legi plene satisfecisse, & æternam vitam promeruisse censeantur.*

Ex quibus Concilii verbis constat, bonis operibus, quæ per Gratiæ actualis auxilium, & in statu Gratiæ sanctificantis sunt, nihil deesse, quominus sint meritoria. Atqui talia sunt opera bona iustorum, quæ conditiones supra explicatas habent. Fiunt enim in statu Gratiæ sanctificantis, ut supponimus : sunt etiam per auxilium Gratiæ actualis, ut cap. 1. docuimus. Ergo talia opera sunt meritoria, nec ulterius requiritur, ut a charitate eliciantur, aut imperentur.

5. Confirmari potest eadem sententia ex can. 24. ejusdem sess. ubi anathema profertur in eum, qui dixerit, *Iustitiam acceptam non conservari, atque etiam augeri coram Deo per bona opera.* Ubi duo advertenda sunt. Primum est, iustitiam seu Gratiam sanctificantem augeri per bona opera, non physice, sed tantum meritorie, ut supra diximus, ac proinde, quando Concilium dicit, iustitiam, seu Gratiam augeri per bona opera, idem esse, ac si diceret, hominem justum per bona opera, ipsius iustitiæ, & Gratiæ augmentum promereri. Secundum est, Concilium loqui de quibuscunque operibus bonis indistincte, & indefinite, ut recte observavit S. Franciscus Salesius in tractatu Divini Amoris l. 3. c. 2. Unde ( ut idem monet ) ubi nihil excipitur, nihil distinguendum est ; proindeque ipsius Concilii verba intelligi debent de quibuscunque iustorum operibus, dummodo ex omni parte bona sint, qualia sunt illa, quæ supradictas conditiones habent, quæ haud dubie juxta Concilii mentem sunt vere meritoria.

Probat 3. hac ratione ducta ex supra relatis Concilii verbis : Iisdem operibus potest homo justus mereri, quibus potest Divinæ legi satisfacere. Atqui potest homo justus Divinæ legi satisfacere per opera moraliter bona, etiamsi non fiant ex motivo, vel imperio charitatis. Quis enim dixerit, hominem justum v. g. eleemosynam graviter, aut extreme indigenti erogantem ex motivo obedientiæ, quia Deus sic fieri præcepit, non satisfacere Divino præcepto, quo eleemosyna in tali casu facienda præscribitur ? Ergo si per illud opus moraliter bonum Divinæ legi satisfacit, quamvis illud non eliciat ex motivo, vel imperio charitatis, per idem opus bonum etiam mereri poterit.

6. Quæres, an præter supra dictas conditiones, tam ex parte operantis, quam ex parte operis, requiratur insuper pactum, vel promissio ex parte ipsius Dei.

Respondetur affirmative cum S. Doct. q. 14. a. 1. ad 3. ubi dicit, actionem nostram non habere rationem meriti, nisi ex præsuppositione Divinæ ordinationis.

Constat ex Scriptura, in qua bonorum operum merces dicitur reddi ex promissione Dei. S. Jac. 1. *Cum probatus fuerit, accipiet coronam vitæ,*

*vita, quam repromisit Deus diligentibus se. Et ex S. Aug. in Ps. 86. Debitorem, inquit, Dominus ipse fecit se non accipiendo, sed promittendo. Accedit & hæc ratio, quia reddenti acceptum non debetur merces, nisi ex promissione remunerantis; atqui quando aliquis bonum operatur, Deo reddit, quod ab illo accepit. Unde Coelestinus Papa in Ep. ad Episcopos Galliarum: Tanta est, inquit, bonitas Dei erga homines, ut nostra velit esse merita quæ sunt ipsius dona.*

Ex dictis colliges, quinque conditiones requiri ad hoc, ut opus aliquod sit de condigno meritorium. Prima est, ut is, qui meretur, sit in statu viæ, secunda, ut sit in statu Gratiæ sanctificantis, tertia, ut liber sit ab omni coactione, & necessitate, quarta, ut opus, quod exercet, sit omni ex parte bonum, & honestum, quinta denique, ut intercedat pactum, & promissio ex parte ipsius Dei de mercede pro huiusmodi opere bono retribuenda. Ad hoc autem, ut opus sit meritorium de congruo, secunda, & quinta conditio minime requiruntur, sed sufficit status viæ, libertas operantis, ac bonitas, & honestas operis.

## S E C T I O V.

*Quanam res cadant sub meritum.*

1. **Q**uæstio intelligenda est de rebus illis, quas quis sibi mereri potest. De iis enim, quas alteri potest mereri, agetur Sectione 7. Et pro illius resolutione

Dicendum 1. neminem de condigno, vel congruo posse sibi primam Gratiam actualem promereri.

Hæc veritas, quæ de Fide est, constat tum ex Scriptura. 2. Timo. 1. *Vocavit nos vocatione sua sancta, non secundum opera nostra, sed secundum propositum suum, & Gratiam*, tum ex Conc. Trid. sess. 6. c. 5. ubi dicit, *Justificationis exordium in adultis a Deo, per Jesum Christum præveniente Gratia, sumendum esse, hoc est ab ejus vocatione, qua nullis eorum existentibus meritis vocantur*, tum etiam ex iis omnibus, quæ c. 1. contra Pelagianos, & Semipelagianos allata sunt.

Dicendum 2. hominem in statu peccati mortalis non posse ullis bonis operibus de condigno mereri primam Gratiam justificantem, posse tamen de congruo.

Quod non possit de condigno, constat ex Scriptura, Rom. 3. *Justificati gratis per Gratiam ipsius, id est Christi, quæ verba expendens Conc. Trid. sess. 6. c. 8. Gratis, inquit, justificari dicimur, quia nihil eorum, quæ justificationem præcedunt, sive Fides, sive opera, ipsam justificationis Gratiam promeretur, de condigno scilicet.*

Quod autem peccator Gratiæ actualis auxilio præventus possit de congruo primam Gratiam sanctificantem promereri, constat ex Scriptura Dan. 4. ubi Propheta Nabuchodonosorem infidelem, & peccatorem alloquens, *Peccata, inquit, tua eleemosynis redime.* Et ex S. Aug. Epist.

Epist. 89. q. 4. *Si dives Epulo pauperis ulcerosi misertus fuisset, mereretur & ipse misericordiam.* Et Epist. 105. jam alias citata: *Neque, inquit, ipsa remissio peccatorum sine aliquo merito est, si Fides hanc impetravit. Neque enim nullum est Fidei meritum.*

2. Dicendum 3. hominem in statu gratiæ sanctificantis constitutum posse ipsius gratiæ augmentum de condigno promereri. Ita S. Th. q. 114. a. 8. Probatur ex Conc. Trident. sess. 6. can. 32. ubi profert anathema in eum, qui dixerit, *Hominem justificatum bonis operibus non vere mereri augmentum gratiæ*, quæ illius verba de vero, & proprio dicto merito, quale est meritum de condigno, intelligenda sunt, non autem de congruo, quod non nisi improprie meritum dicitur.

Probatur præterea ex eo, quod ejusmodi justorum bonis operibus nihil desit ad hoc, ut sint augmenti ipsius gratiæ de condigno meritoria. Sunt enim, ut supponimus, opera ex omni parte bona, libere ab homine viatore, & justo exercita, & præterea ejusmodi operibus gratiæ augmentum Deus promisit S. Jo. 14. *Si diligitis me, mandata mea servate, & ego rogabo Patrem, & alium Paracletum dabit vobis.* Illis enim verbis, dum Spiritus sanctus justis promittitur, augmentum ipsius gratiæ promitti intelligendum est, ut docet S. Aug. tract. 74. in S. Joan. *Restat, ut intelligamus, Spiritum Sanctum habere illum, qui diligit, & diligendo mereri, ut plus habeat, & plus habendo diligit.*

Dicendum 4. hominem justum sibi reparationem post lapsum non posse de condigno promereri.

Constat ex iis verbis Ezech. 18. *Si averterit se justus a justitia sua, & fecerit iniquitatem, omnes justitiæ ejus quas fecerat, non recordabuntur.* Ex quibus recte inferunt Theologi, omnia hominis justii merita mortificari, & extingui per peccatum mortale superveniens; nemo autem meretur per opera, quæ mortificata, & extincta sunt. Præterea nusquam Deus promisit, se quibuscunque justii operibus hanc concessurum gratiam, ut si justus ille peccatum aliquod mortale committat, ipsi tempus poenitendi & gratiam efficacem a peccato resurgendi concedat, quæ tamen promissio necessaria esset ad hoc, ut de condigno illam promereri posset.

3. An autem id saltem de congruo mereri possit, valde dubium, & incertum est. Quamvis enim quidam Theologi hoc asserant, alii tamen probabilius negare videntur, quia ( ut ex ante dictis patet ) omnia prorsus merita hominis justii per peccatum mortale, quod committit, extinguuntur; unde, quandiu in statu illo peccati remanet, nullum prorsus effectum habere possunt.

Dicendum 5. hominem justum non posse de condigno finalem in statu gratiæ perseverantiam ullis operibus bonis promereri. Ita S. Th. supra a. 9.

Constat 1. ex eo, quod dicit Apostolus, omnes, & quoscunque Justos alloquens Philip. 2. *Cum metu, & tremore salutem vestram*



*peramini*: metu autem illo, ac timore amplius non indigeret, qui finalem perseverantiam de condigno semel meritus esset.

Constat 2. ex Conc. Trid. sess. 6. c. 13. ubi dicit, neminem sibi certi aliquid absoluta certitudine circa perseverantiam suam posse polliceri; posset autem is, qui perseverantiam illam de condigno meritus esset.

Constat 3. ex eo, quod nulla in Scripturis habetur Dei promissio de dono perseverantiæ infallibiliter in ullius boni operis compensationem tribuendo per modum mercedis; quin potius vetat nos de perseverantia esse securos 1. Cor. 10. *Qui se existimat stare, videat, ne cadat.* Apoc. 3. *Tene quod habes, ut nemo accipiat coronam tuam.*

Quæres, an saltem de congruo justus finalem in Gratia perseverantiam mereri possit.

Respondetur affirmative, quia quamvis Deus illam tanquam alicujus operis mercedem non promiserit, est tamen ejus infinitæ bonitati valde congruum, ut illam justo humiliter, & obnixè petenti tribuat; alias, si illius perseverantiæ donum justus nulla ratione mereri posset, frustra pro illo impetrando Deum oraret. Quare, cum saluberrimum sit, & consultißimum homini justo quotidie donum perseverantiæ illius finalis a Deo postulare, indicium est, quod possit illam aliquo pacto promereri, & impetrare. Unde S. August. lib. de bono persever. cap. 17. *Restat, inquit, in his bonis usque in finem perseverantia, quæ frustra quotidie a Deo poscitur, si non eam Dominus per Gratiam suam in illo, cujus orationem exaudit, operatur.*

Dicendum 6. bona temporalia, quatenus ad vitam æternam consequendam necessaria sunt, cadere posse sub meritum condignum hominis justii. Ita S. Th. supra art. 10.

Prob. ex eo, quod qui potest mereri finem, potest etiam mereri media necessaria ad illum finem; atqui justus salutem æternam de condigno mereri potest, ut constat tum ex ante dictis, tum ex iis, quæ Sectione sequenti dicentur; ergo poterit etiam de condigno mereri bona illa temporalia, quatenus sibi necessaria sunt ad vitam æternam consequendam, id est poterit mereri, ut Deus speciali providentia ita disponat rerum exteriorum ordinem, ut conatus viri justii necessarius ad bona illa temporalia obtinenda suum effectum assequatur.

4. Hinc sequitur, bona temporalia non dari justis secundum proportionem, & quantitatem meritorum, sicut ipsis tribuuntur bona spiritualia ipsius Gratiae, sed prout magis, vel minus ipsis conducunt ad salutis æternæ consecutionem. Unde fit, ut multi justii relinquuntur in extrema paupertate, alii e contra divitiis affluant, alii in statu quasi medio consulant, Deo pro sua providentia ita disponente, prout unicuique videt magis expedire ad salutem.

Quod si de iis bonis temporalibus præcise, & secundum se consideraris quæstio sit, dicendum est, illa non cadere sub meritum de condigno, cum ut sic re vera bona non sint, sed res indifferentes, quibus

quibus homo bene, vel male uti potest, ac proinde ad quæ Christi Gratia (quæ est omnis meriti principium) non ordinatur, posse tamen cadere sub meritum de congruo; unde S. Augustinus passim in lib. 1. de Civ. Dei dicit, Deum virtutes antiquorum Romanorum variis bonis temporalibus compensasse.

SECTIO VI.

*An Justus de condigno mereri vitam æternam possit.*

1. **N**egant Hæretici hujus temporis, affirmant e contrario Catholici, quorum sententia, ut certissima, & Fide credenda, Prob. 1. ex Script. S. Matth. 5. *Beati, qui persecutionem patiuntur propter justitiam, quoniam ipsorum est Regnum Cælorum. Et ibidem, Merces vestra copiosa est in cælis. Rom. 2. Reddet unicuique secundum opera ejus, iis quidem, qui secundum patientiam boni operis, gloriam, & honorem, & incorruptionem querunt, vitam æternam.*

2. Prob. 2. ex Conc. Trid. sess. 6. c. 16. ubi dicit, vitam æternam tanquam mercedem ex ipsius Dei promissione bonis justorum operibus, & meritis esse fideliter reddendam. Et can. 32. anathema profertur in eum, qui dixerit, justificatum bonis operibus non vere mereri vitam æternam, & ipsius vitæ æternæ (si tamen in Gratia decesserit) consecutionem, atque etiam gloriæ augmentum.

Prob. 3. ex S. Basil. or. in initium Proverbiorum, *Omnes, inquit, qui viam Evangelicam incedimus, mercatores sumus, per opera mandatorum nobis possessionem cælestium comparantes, quibus verbis cum dicat, bona opera esse veluti pretium, quo gloria cælestis emitur, hinc sequitur, illa esse vere digna, quæ tali gloria compensentur, ac proinde illius de condigno meritoria. Et S. Aug. Epist. 105. ad Sixtum, Sicut, inquit, merito peccati, tanquam stipendium, redditur mors, sic merito justitiæ, tanquam stipendium, vita æterna.*

Probatur 4. ex eo, quod in bonis justorum operibus reperiuntur omnes conditiones necessariæ ad promerendum de condigno vitam æternam. Sunt enim opera libere ab homine justo, & viatore facta, & ex omni parte bona, ut supponimus; & talibus operibus Deus pro mercede vitam æternam pollicitus est, juxta quod dicit Apost. 1. Timoth. 4. *Pietas ad omnia utilis est, promissionem habens vitæ, quæ nunc est, & futura. Et Tit. 1. In spem vitæ æternæ, quam promisit, qui non mensitur, Deus.*

Objicies, variis Scripturæ locis dici, gloriam æternam dandam esse justis hominibus ex Dei misericordia; ergo non ex justitia, nec proinde illam justos de condigno mereri.

Respondetur, illorum Scripturæ locorum, quæ a S. Augustino diligenter expenduntur tum in citata Ep. 105. tum in l. de corr. & grat.

c. 13. duas afferri expositiones. Una est, gloriam æternam ex Divina misericordia justis tribui, non quod non sit vera merces meritorum, sed quia ipsa justorum merita ex Dei misericordia, & gratia ortum ducunt: Altera est, quia justī ex hac vita decedentes semper Divina indigent misericordia, ut æternæ vitæ mercedem percipiant. Nullus est enim adeo justus, qui in multis non offendat, quique peccata venialia non committat, sine quibus (ut ait S. Aug.) nulli vivunt, & pauci vitam finiunt. Unde Divina indigent misericordia, ut illorum remissionem percipiant, & sic ad æternæ vitæ fruitionem perveniant.

Addere possumus, vitæ æternæ mercedem recte dici ex Divina dari misericordia, quia Deus, secundum commune Theologorum axioma, justos semper remunerat supra condignum, & ipsius gloriæ coelestis merces quorumcunque operum meritum longe exsuperat. Unde S. Basilii in illud Psalm. 114. *Convertere anima mea in requiem tuam. Proposita est, inquit, æterna requies iis, qui legitime in hac vita decertarint, quæ non secundum operum debitum, ac meritum retribuitur, sed juxta magnificentiam Dei, iis, qui in ipsam speraverunt, exhibetur.* Et S. Fulgentius lib. 1. c. 10. ad Monimum rationem reddens, cur vita æterna dicatur Gratia, cum sit merces meriti, dicit id esse, quia non solum donis suis Deus dona sua reddit, sed etiam, quia tantum ibi Gratia Divina retributionis exuberat, ut incomparabiliter, atque ineffabiliter omne meritum quantumvis bonæ, & ex Deo datæ humanæ voluntatis, atque operationis excedat.

Quæres hic obiter, in quo consistat vita illa, & beatitudo æterna, quam justī bonis operibus promerentur. Pro illius quæstionis resolutione

3. Dicendum 1. vitam illam, & beatitudinem æternam proprie, & formaliter consistere in actionibus intellectus simul, & voluntatis, quibus Beati Deum, prout in se est, clare vident, perfecte amant, illoque perfruuntur.

De actione intellectus constat ex Scriptura. Ps. 83. *Videbitur Deus Deorum in Sion.* 1. Jo. 3. *Videbimus eum, sicuti est.* 1. Cor. 13. *Videmus nunc per speculum in enigmate, tunc autem facie ad faciem.* Item ex S. Ambr. l. 2. c. 2. Offic. *Scriptura posuit vitam æternam in cognitione Divinitatis.* S. August. lib. 1. de Trinit. c. 10. *Christus tradet Regnum Deo Patri, quando perducet credentes ad contemplationem Dei, ubi est finis omnium bonarum actionum.*

De actione autem voluntatis constat ex eadem Script. Ps. 35. *Inebriabuntur ab ubertate domus tuæ, & torrente voluptatis tuæ potabis eos,* S. Matth. 5. *Beati, qui esuriunt, & sitiunt justitiam, quoniam ipsi saturabuntur;* vera autem saturitas proprie respicit appetitum, & voluntatem, & in coelesti beatitudine tantum reperitur. Et ita hunc locum exponit S. Hier. c. 32. Item ex S. Aug. l. 1. de Doctr. Christ. c. 30. *Summa hæc est merces, ut fruamur Deo.* Et l. 22. de Civ. c. ult. *Ibi (in coelesti beatitudine scilicet) vocabimur, & videbimus, videbimus, & amabi-*



*mabimus, amabimus, & laudabimus, ecce quod erit in fine; sine fine. Nam quis alius est noster finis, nisi pervenire ad Regnum, cujus nullus est finis? Et S. Bern. Epist. 28. Sicut in hac vita initiat Fides, & desiderium, ita in alia consummat visio, & amor.*

3. Dicendum 2. ad complementum illius beatitudinis pertinere quoque ipsius corporis resurrectionem, & glorificationem.

Quod corpora sint resurrectura, constat ex Script. Job. 19. *In novissimo die de terra surrecturus sum, & rursum circumdabor pelle mea.* 1. Cor. 15. *Canet enim tuba, & mortui resurgent incorrupti.*

Quod autem justorum corpora sint glorificanda, constat ex eo, quod dicit Apostolus ibidem: *Seminatur corpus animale, surget corpus spirituale, seminatur in corruptione, surget in incorruptione, seminatur in ignobilitate, surget in gloria.*

Porro hæc corporum glorificatio in eo consistit, quod corpora redi-viva Sanctorum, insignia quædam, & præclara ornamenta Ecclesiæ habitura sint, quæ communiter dotes gloriæ vocantur, & quatuor præsertim numerantur a Doctoribus, scilicet Impassibilitas, ratione cujus nulla unquam molestia, aut dolore afficientur, ut dicitur Apoc. 21. *Mors ultra non erit, neque luctus, neque clamor, neque dolor.* Claritas, qua luce quadam excellentissima radiabunt. S. Matth. 13. *Fulgebunt iusti sicut Sol.* & Philip. 3. *Reformabit corpus humilitatis nostræ, configuratū corpori claritatis suæ.* Agilitas, qua corpus ab onere, quo nunc premitur, liberabitur, & facillime in quameunque partem pro libito moveri ita poterit, ut ea motione nihil celerius esse queat. Ita docet S. Aug. l. 3. de Civ. c. 18. & 20. & l. 22. c. 11. & S. Hier. in c. 40. Isai. Unde ab Apostolo dicitur 1. Cor. 15. *seminatur in infirmitate, surget in virtute.* Subtilitas denique, qua fiet, ut corpus animæ imperio perfecte, & omnimode subjiciatur, eique ad nutum præsto sit, quod ex supra citatis Apostoli verbis colligitur, *seminatur corpus animale, surget spirituale.* Quæ quidem verba non sic intelligenda sunt, quod Sanctorum corpora in resurrectione futura sint æthereæ, aut aereæ aut auræ, & spiritui similia, ut quidam olim arbitrati sunt, contra quos agit S. Hieron. Ep. 61. ad Pammachium; sed quia, quamvis corpora Beatorum vera carne consent, ut ibidem probat, perfectæ subtilitatis dote prædita erunt, per quam dotem perfectissime spiritui subjicientur, ideoque corpus Sanctorum ab Apostolo spirituale futurum esse dicitur.

4. Dicendum 3. præter supra dictæ beatitudinis dona, quæ omnibus Beatis (licet inæqualiter pro meritorum inæqualitate) communia erunt, tria insuper specialia gloriæ præmia quibusdam Sanctorum bonis operibus esse a Deo constituta, quæ communiter aureolæ vocantur, quasi parvæ coronæ aureæ, non quod simpliciter in se maxime non sint, sed quod in comparatione ipsius essentialis beatitudinis sint exiguæ. Hæ autem tres aureolæ conceduntur ob tres insignes victorias, quas iusti aliqui præ aliis in hac vita reportaverint, contra carnem

quidem per continentiam virginalem, contra mundum verò, sustinendo opprobria, & persecutiones mundi usque ad mortem propter Deum, contra diabolum denique, per sapientiam, & doctrinam, qua non tantum a se, sed etiam ab aliis ignorantiae, & infidelitatis tenebras, in his, quæ ad salutem spectant, propulsaverint. Diabolus enim tenebrarum Princeps dicitur, & continuo decipere, & in errorem homines mittere nititur. Et sic hæ tres aureolæ Virginibus, Martyribus, & Doctoribus competunt. Et de Virginibus quidem specialis mentio fit Apoc. 14. ubi dicitur, quod ii, qui cum mulieribus non sunt coinquinati, sequuntur Agnum, quocumque ierit, & canticum novum cantant, quod alii cantare non possunt. De Martyribus autem ejusdem lib. c. 7. dicitur, quod ii, qui venerunt ex magna tribulatione, & laverunt stolas suas in sanguine Agni, amicti sunt stolis albis, & palmas in manibus gestant. De Doctoribus denique Daniel. 12. dicitur, quod qui ad iustitiam erudiunt multos, fulgebunt, quasi stellæ in perpetuas æternitates: & Matth. 5. dicitur, quod is, qui fecerit, & docuerit, magnus vocabitur in Regno Cœlorum.

3. Dicendum 4. beatum in fruitione gloriæ æternæ semper mansurum, ac gloriam illam ejus fore æternam. Est de Fide.

Constat ex eo, quod beatitudo illa passim in Evangeliiis, & aliis sacræ Scripturæ libris vocatur vita æterna. Etenim æterna non esset, nec dici posset, si aliquando amittenda esset. Eadem veritas definita est ab Ecclesia in 6. Synodo generali in Epist. Sophronii, quæ actione 11. lecta, actione 13. recepta, & approbata est, & in Concilio Lateranensi sub Innocentio III. c. *Firmiter*, Quare S. August. lib. 12. de Civit. cap. 20. vocat turpem eorum stultitiam, qui putant, Sanctorum beatitudinem aliquando esse desitutam.

## SECTIO VII.

*An unus possit alteri mereri primam Gratiam, & alia dona ad salutem necessaria.*

1. **Q**Uæstio intelligi debet de puro homine. Certum est enim, Christum Dominum potuisse ratione unionis hypostaticæ de condigno pro aliis mereri, & de facto nobis quascunque Gratias fuisse promeritum, ut in tractatu de Incarnatione diximus. Intelligi etiam debet secundum legem Dei ordinariam, & posito rerum statu, qui nunc est, quia nihil repugnat, si Deus ita vellet, talem, ac tantam Gratiam puro homini concedi, ut accedente præsertim Dei pacto, & promissione, non tantum sibi, sed etiam aliis mereri aliquid de condigno posset. Hac observatione præmissa, pro quæstionis propositæ resolutione,

Dicendum 1. purum hominem nullam posse Gratiam alteri de condigno promereri. Ita S. Thom. q. 114. a. 6.

Probat 1. ex eo, quod dicitur 1. Corinth. 5. & passim in aliis Scripturæ

pturæ locis , unumquēque recepturum , prout egerit ipse , non alter pro eo . Unde S. Hieron. in c. 25. S. Matth. *Unusquisque* , inquit , *pro operibus suis mercedem accipiet* . Et S. August. tract. 102. in S. Jo. explicans hæc Christi Domini verba , *Si quid petieritis Patrem in nomine meo , dabit vobis* : *Exaudiuntur* , inquit , *omnes Sancti pro seipsis , non autem pro omnibus exaudiuntur vel amicis , vel inimicis suis , vel quibuslibet aliis , quia non utcumque dictum est , Dabit , sed Dabit vobis* .

2. Dicendum 2. posse unum alteri primam Gratiam , aliaque dona de congruo promereri .

Constat 1. ex Scriptura . Job 42. *Job servus meus orabit pro vobis ; faciem ejus suscipiam , ut non vobis imputetur stultitia* . S. Jacob. 5. *Orate pro invicem , ut salvemini* .

Constat 2. ex praxi universæ Ecclesiæ , in qua hæc pia consuetudo semper viguit , ut Fideles pro invicem orarent . Unde S. Aug. ser. 90. de diversis c. 20. *Si martyr Stephanus non orasset , Ecclesia Paulum hodie non haberet* .

Observandum est autem , unum alteri primam Gratiam sanctificantem , aut illius augmentum non aliter mereri , etiam de congruo , posse , nisi in quantum meretur illi Gratias actuales , aut alia media , quibus ad illam Gratiam , aut ejus augmentum disponatur . Ut autem ejusmodi sequatur effectus , opus est , ut is , qui pro altero mereatur , opus illud bonum , quo meretur , saltem interpretative referat ad hunc finem . Requiritur etiam præterea , ut is , ad cujus Gratiam opus illud bonum dirigitur , nullum ejus effectui obicem ponat .

Porro cum hoc meritum ( sicut diximus ) quadam solum congruentia , & convenientia , non vero ulla Dei promissione innitatur , fieri etiam aliquando potest , ut effectum suum non consequatur , cum possint esse aliæ rationes , ob quas magis conveniens sit , ut Deus bona illa non conferat , quæ unus alteri impetrare , ac promereri intendit . Unde apud Jerem. c. 31. dicebat Deus : *Si steteris Moyses , & Samuel coram me , non est anima mea ad populum istum* .

Atque hætenus de Gratia Divina , ejusque effectibus ad ipsius Gratiæ , omniumque ejus effectuum Auctoris , & largitoris majorem gloriam .



**C**um ab eo tempore, quo prima hujus *Medullæ Theologicæ* editio in lucem prodiit, duæ Constitutiones in materia Fidei a Summis Pontificibus Innocentio X. & Alexandro VII. emanaverint, quibus quinque Propositiones ex libro Cornelii Jansenii Episcopi Yprensis, qui inscribitur (Augustinus) excerptæ, tanquam hæreticæ damnatæ sunt, aliæque insuper Rescripta Apostolica ad Episcopos Gallicanos missa, necnon variæ ipsorum Episcoporum Gallicanorum Epistolæ tum ad præfatos Summos Pontifices, tum ad alios Episcopos diversis temporibus super eadem materia directæ fuerint, in quibus omnibus plurima continentur, quæ ad veritates Catholicas, præsertim in materia Gratiæ, elucidandas maxime conferre possunt; idcirco visum est non modo pergratum, sed & perutile, ut non dicam aliquo pacto necessarium Lectori Catholico veritatum Theologicarum studioso fore, si præfatas Constitutiones, & Epistolæ ad calcem hujus tractatus de Gratiâ subjungeremus, ut ex iis novam lucem, novumque robur haurire queat, tum ad novas æque, ac veteres Hæreses circa Gratiâ Christi dignoscendas, ac profligandas, tum ad Fidem Catholicam ab omni errore illibatam dilucidius, ac firmitus profitendam.

## RELATIO GALLICANORUM EPISCOPORUM

### AD PONTIFICEM MAX. INNOCENTIUM X.

**B**EATISSIME PATER.

Majores causas ad Sedem Apostolicam referre solemnibus Ecclesiæ mos est, quem Fides Petri nunquam deficiens perpetuo retineri pro jure suo postulat. Æquissimæ huic legi obsequentes, de gravissimo circa Religionem negotio Sanctitati Tuæ scribendum esse censuimus. Decennium est, ex quo vehementissimis turbis Gallia magno nostro moerore commovetur, ob librum posthumum, & doctrinam Reverendissimi Cornelii Jansenii Yprensis Episcopi. Tales quidem motus sedari oportebat tum Concilii Tridentini auctoritate, tum Bullæ illius, qua Urbanus VIII. felicitis memoriæ adversus Jansenii dogmata pronuntiavit, & Decreta Pii V. & Gregorii XIII. in Bajum edita confirmavit. Atque hujus quidem Bullæ veritatem, ac robur novo diplomate vindicasti. Sed quia nulli singillatim propositioni certa censuræ nota inusta fuit, locus etiamnum aliquis quorundam cavillis, & effugio relictus est. Intercludendum autem penitus speramus, si, ut precamur S. T. quid in hac re sentiendum sit, clare, distincteque definiat. Obtestamur ergo, ut has præsertim Propositiones, de quibus disceptatio periculosior, ac contentio ardentior est. S. T. expendat, & perspicuam, ac certam de unaquaque sententiam ferat.

Prima, Aliqua Dei præcepta hominibus justis volentibus, & conan-

ti-

tibus, secundum præsentes, quas habent, vires, sunt impossibilia, deest quoque iis gratia, qua possibilia fiant.

Secunda, Interiori Gratiae in statu naturæ lapsæ nunquam resistitur.

Tertia, Ad merendum, vel demerendum in statu naturæ lapsæ non requiritur in homine libertas a necessitate, sed sufficit libertas a coactione.

Quarta, Semipelagiani admittebant prævenientis Gratiae interioris necessitatem ad singulos actus, etiam ad initium Fidei, & in hoc erant hæretici, quod vellent, eam Gratiam talem esse, cui posset humana voluntas resistere, vel obtemperare.

Quinta, Semipelagianum est dicere, Christum pro omnibus omnino hominibus mortuum esse, ac sanguinem fudisse.

Experta est nuper Beatitudo Tua, quantum Apostolicæ Sedis in gemini Ecclesiæ Capitis errore profligando valuerit auctoritas, continuo sedata est tempestas, atque ad Christi vocem, & imperium venti, & mare obediunt. Quamobrem flagitamus, Beatissime Pater, ut clara, firmaque de propositionum istarum sensu prolata sententia, cui Reverend. ipse Jansenius morti proximus opus suum subjecit, caliginem omnem discutias, animos fluctuantes componas, dissidia prohibeas, Ecclesiæ tranquillitatem, splendoremque restituas. Dum hæc spes mentibus nostris affulget, Sanctitati tuæ multos, & prosperos annos, sæculaue, & beatissimam æternitatem Rex sæculorum immortalis adjiciat, optamus, ac vovemus.

Subscripserunt Episcopi octogintaquinque.

## CONSTITUTIO

*SS. in Christo P. ac D. N. Innocentii Papæ X. qua declarantur, & definiuntur quinque Propositiones in materia Fidei.*

**INNOCENTIUS EPISCOPUS**

Servus Servorum Dei.

*Universis Christifidelibus Salutem, & Apostolicam Benedictionem.*

**C**Um occasione impressionis libri, cui titulus *Augustinus Cornelii Jansenii Episcopi Yprensis*, inter alias ejus opiniones orta fuerit, præsertim in Galliis, controversia super quinque ex illis; complures Galliarum Episcopi apud nos institerunt, ut easdem Propositiones nobis oblatas expenderemus, ac de unaquaque earum certam, & perspicuam ferremus sententiam.

*Tenor*

*Tenor vero præfatarum Propositionum est, prout sequitur.*

Prima, Aliqua Dei præcepta hominibus iustis volentibus, & conantibus, secundum præsentem, quas habent, vires, sunt impossibilia, deest quoque illis Gratia, qua possibilia fiant.

Secunda, Interiori Gratiae in statu naturæ lapsæ nunquam resistitur.

Tertia, Ad merendum, & demerendum in statu naturæ lapsæ non requiritur in homine libertas a necessitate, sed sufficit libertas a coactione.

Quarta, Semipelagiani admittebant prævenientis Gratiae interioris necessitatem ad singulos actus, etiam ad initium Fidei, & in hoc erant hæretici, quod vellent, eam Gratiam talem esse, cui posset humana voluntas resistere, vel obtemperare.

Quinta, Semipelagianum est dicere, Christum pro omnibus omnino hominibus mortuum esse, aut sanguinem fudisse.

Nos, quibus inter multiplices curas, quæ animum nostrum assidue pulsant, illa in primis cordi est, ut Ecclesia Dei nobis ex Alto commissa purgatis pravarum opinionum erroribus, tuto militare, & tanquam navis in tranquillo mari, sedatis omnium tempestatum fluctibus, ac procellis, secure navigare, & ad optatum salutis portum pervenire possit:

Pro rei gravitate, coram aliquibus S. R. E. Cardinalibus ad id specialiter sæpius congregatis, a pluribus in sacra Theologia Magistris easdem quinque Propositiones, ut supra, nobis oblatas, fecimus singillatim diligenter examinari, eorumque suffragia tum voce, tum scripto relata mature consideravimus, eisdemque Magistros, variis coram nobis actis Congregationibus, prolixè super eisdem, ac super earum qualibet differentes audivimus.

Cum autem ab initio hujusmodi discussionis ad Divinum implorandum auxilium multorum Christifidelium preces, tum privatim, tum publice indixissemus, postmodum iteratis eisdem ferventius, ac per nos sollicitè implorata Sancti spiritus assistentia, tandem Divino Numine favente, ad infra scriptam devenimus declarationem, & definitionem.

Primam prædictarum Propositionum, Aliqua Dei præcepta hominibus iustis volentibus, & conantibus, secundum præsentem, quas habent, vires, sunt impossibilia; deest quoque illis Gratia qua possibilia fiant, *temerariam, impiam, blasphemam, anathemate damnatam, & hæreticam declaramus, & uti talem damnamus.*

Secundam, Interiori Gratiae in statu naturæ lapsæ nunquam resistitur, *hæreticam declaramus, & uti talem damnamus.*

Tertiam, Ad merendum, & demerendum in statu naturæ lapsæ non requiritur in homine libertas a necessitate, sed sufficit libertas a coactione, *hæreticam declaramus, & uti talem damnamus.*

Quartam, Semipelagiani admittebant prævenientis Gratiae interioris necessitatem ad singulos actus, etiam ad initium Fidei: & in hoc erant



rant hæretici, quod vellent, eam Gratiā talem esse, cui posset humana voluntas resistere, vel obtemperare, *falsam, & hæreticā declaramus, & uti talem damnamus.*

Quintam, Semipelagianum est dicere, Christum pro omnibus omnino hominibus mortuum esse, aut sanguinem fuisse, *falsam, temerariam, scandalosam, & intellectā eo sensu, ut Christus pro salute dumtaxat Prædestinatorum mortuus sit, impiam, blasphemā, contumeliosam, Divinæ pietati derogantem, & hæreticā declaramus, & uti talem damnamus.*

Mandamus igitur omnibus Christifidelibus utriusque sexus, ne de dictis Propositionibus sentire, docere, prædicare aliter præsumant, quam in hac præsentī nostra declaratione, & definitione continetur, sub censuris, & poenis contra Hæreticos, & eorum fautores in iure expressis.

Præcipimus pariter omnibus Patriarchis, Archiepiscopis, Episcopis, aliisque locorum Ordinariis, necnon Hæreticæ pravitatis Inquisitoribus, ut contradictores, & rebelles quoscunque per censuras, & poenas prædictas, cæteraque juris, & facti remedia opportuna, invocato etiam ad hoc (si opus fuerit) auxilio brachii sæcularis, omnino coerceant, & compescant. Non intendentes tamen per hanc declarationem, & definitionem, super prædictis quinque Propositionibus factam, approbare ullatenus alias opiniones, quæ continentur in prædicto libro Cornelii Jansenii.

Datum Romæ apud S. Mariam majorem, anno Incarnationis Dominicæ 1653. prid. Kal. Junii, Pontificatus nostri anno nono.

## RESCRIPTUM

SS. D. N. INNOCENTII PAPÆ X.  
ad universos Archiepiscopos, & Episcopos Galliæ.

INNOCENTIUS PAPA X.

**V**enerabiles Fratres, Salutem, & Apostolicam benedictionem. Recte, atque ordine fecit Fraternitatum vestrarum pietas, quæ cum in Ecclesiis istis Propositionum, de quibus ad nos scripistis, occasione turbas ingentes excitari cerneret, ascendit ad locum hunc sanctum, quem elegit Dominus, ut Catholicam super his veritatem a nobis quæreretur. Nos igitur post longam accurati examinis indaginem, & preces luminum Patri Deo enixe porrectas, quid sentiendum sit de Propositionibus illis, declaravimus, ac definivimus hac Constitutione, quam cum his litteris ad vos mittimus. Ex ea sententiam Orthodoxæ Fidei in gravi hoc negotio a nobis audietis, nec dubitamus, quin futura sit cum populis Christianis salutaris, tum summopere grata insigni zelo Fraternitatum vestrarum, quibus benedictionem Apostolicam peramanter impartimur.

Da.

Datum Romæ apud S. Mariam Majorem, sub annulo Piscatoris, die 31. Maji 1653. Pontificatus nostri anno nono.

## E P I S T O L A

Archiepiscoporum, & Episcoporum Galliarum in Parisiensi  
urbe Congregatorum

SANCTISSIMO PATRI INNOCENTIO X.  
Summo Pontifici.

BEATISSIME PATER.

Optata pervenit ad nos tandem Constitutio illa, qua Vestre Sanctitatis auctoritate, quid sentiendum sit de controversis quinque Propositionibus, quæ sunt excerptæ e Cornelii Jansenii Yprensis Episcopi Libris, perspicue decernitur. Excitatae in Belgio contentiones flagrabant etiam in Galliis, & latissimum incendium per universas Ecclesiae partes minabantur, ni pesti grassanti, & certissimam perniciem allaturæ obstitisset Beatitudinis vestre indefessum studium, & ex alto petita potestas, quæ sola acerrimam illam animorum collisionem compescere poterat. Agebatur de re magni momenti, de aditu scilicet ad salutem per necessaria Christianæ Gratiae præsidia, & humanæ voluntatis adjumentis illis excitatæ, ac fortæ conatu libero, atque de Divina Christi pietate, ac beneficentia in universum genus humanum. Hujus doctrinæ lucem recentioris illius Auctoris disputationibus obscuratam pristino nitori restituit, juxta veterem Fidei regulam, ex Scripturis, & antiqua Patrum traditione in Conciliis olim, & nuper auctoribus Summis Pontificibus constitutam, prolatam a Sanctitate Vestra, postulantis compluribus Galliarum Episcopis Decretum. Quo in negotio illud observatione dignum accidit, ut quemadmodum ad Episcoporum Africæ relationem, Innocentius I. Pelagianam hæresim damnavit olim, sic ad Gallicanorum Episcoporum consultationem, hæresim ex adverso Pelagianæ oppositam, Innocentius X. auctoritate sua proscripserit. Enimvero vetustæ illius ætatis Ecclesia Catholica, sola Cathedræ Petri communione, & auctoritate fulta, quæ in Decretali Epistola Innocentii ad Africanos data elucebat, quamque dein Zosimi altera ad universos orbis Episcopos Epistola subsecuta est, Pelagianæ hæresis damnationi absque cunctatione subscripsit. Perspectum enim habebat, non solum ex Christi Domini nostri pollicitatione Petro facta, sed etiam ex actis priorum Pontificum, & ex Anathematismis adversus Apollinarium, & Macedonium nondum ab ulla Synodo Oecumenica damnatos a Damaso paulo antea jactis, Judicia pro sancienda Regula Fidei a Summis Pontificibus lata, super Episcoporum consultatione  
(live

(sive suam in actis relationis sententiam ponant, sive omittant, prout illis collibuerit) Divina æque, ac summa per universam Ecclesiam auctoritate niti, cui Christiani omnes ex officio, ipsius quoque mentis obsequium præstare teneantur. Ea nos quoque sententia, ac Fide imbuti, Romanæ Ecclesiæ præsentem, quæ in Summo Pontifice Innocentio X. viget, auctoritatem debita observantia colentes, Constitutionem Divini Numinis instinctu a B. V. conditam, nobisque traditam ab Illustrissimo Athenarum Archiepiscopo Nuntio Apostolico, & promulgandam curabimus in Ecclesiis, ac Dioccesibus nostris, atque illius executionem apud Fideles populos urgebimus. Neque vero poenæ deerunt adversus temerarios illius violatores, quæ a jure Hæreticis infliguntur, quibus juxta Constitutionis tenorem, & Breve Sanctitatis Vestræ nobis directum, contumaces omnes, nullo conditionum, vel statuum discrimine facto, perstringemus; præsertim cum Galliis ad Episcopos in solidum isthæc cura pertineat, ubi nullos Hæreticæ pravitatis Inquisitores constitui patitur mos antiquus ex jure communi profectus. Sane spondere possumus Beatitudini Vestræ, nihil fore, quod Decreto Apostolico, nostræque in eo exequendo solitudini moram afferre possit, præcipue cum Piissimus, ac Christianissimus Rex noster, cui Breve Apostolicum una cum exemplo Constitutionis Illustrissimus Nuntius tradidit, interpellato quoque Regiæ Majestatis præsidio, Nos ad illius Decreti executionem, Edicto suo ad nos dato pro ea, quam debet Ecclesiæ constitutis, tuitione, constanter hortetur, & Magistratibus universis, atque cæteris sibi subditis, tum ad vim arcendam, tum ad amputandas, quæ forte possent ab Hæreseos reis excitari, de foro competenti, cavillationes, præcipiat, quatenus executionem illam omni studio, & opera juvent, atque tueantur. Quare cum Rex coelestis hac in causa foederatum habeat Regem terrarum (si fas ita loqui cum Xysto III.) Sanct. V. per Petræ soliditatem, jam contusis veritatis hostium animis, securos ab omni externa perturbatione de nova hæresi triumphos ager. Porro nos Innocentio X. cujus ore Petrus locutus est, ut Leoni I. acclamabat quarta Synodus, hanc Divinam lauream gratulati, sacros inter Ecclesiæ Fastos, quod olim de Synodis Oecumenicis fieri solitum, Constitutionem istam ab eo editam lubentes ex animo reponemus; cui optatissimam in longæva vita felicitatem adprecantur, qui sunt cum ea, qua par est, veneratione

BEATISSIME PATER,

SANCTITATIS VESTRÆ

Devotissimi, & addictissimi filii Cardinales, Archiepiscopi, & Episcopi Galliæ in Parisiensi urbe congregati.

Parisiis die 15. Julii 1653.

ALLA



## ALIA EPISTOLA

Archiepiscoporum, & Episcoporum Galliarum in Parisiensi  
urbe congregatorum

SS. PATRI INNOCENTIO X. PONT. MAX.

BEATISSIME PATER.

Post promulgatam ab universis Galliarum Episcopis Sanctitatis Vestre Constitutionem, qua quinque Propositiones e libro Cornelii Jansenii Yprensis Episcopi excerptæ damnantur, nihil aliud expectandum videbatur, præcipue a Gallis, qui in Sede Apostolica colenda semper potiores fuerunt, quam ut pura, & non fucata concordia in veræ Fidei unitatem omnium animi conspirarent. Sed dissidiorum Auctor tam singulare, & piis omnibus summopere expetendum bonum Gallis invidit; quodque palam obtinere non poterat, nempe ut a debita Sedi Apostolicæ reverentia per apertum Constitutionis editæ contemptum recederetur, callidis molitionibus ad simplicium, & incautorum mentes subvertendas aggredi tentavit. Quare ad munus Episcopale pertinere putavimus, recens excitatas a Clericis numero paucis contentiones definitione nostra compescere, qua Constitutionis Apostolicæ integra executio, quæ nobis commissa est, adversus alienas a vero illius sensu expositiones sanciat. Et veteri Fidei deposito, cujus custodia Cathedræ Petri a Christo concedita est, partem adimere tentant, Decreti Apostolici majestatem ad fictas controversias dirimendas turpiter dejiciendo. Quinque etenim Propositiones Decreto illo proscriptas damnare se quoque profitentur, sed alio plane sensu, quam qui a Jansenio traditus, & explicatus est, ad quem Propositiones illas nullatenus pertinere constantissime asserunt. Hac arte restaurandis disputationibus iisdem sibi locum apertum relinquere parant, & redivivæ litis prolixam materiam. Quare ut his incommodis præverteretur, & Constitutioni auctoritas sua constaret, atque sincera ejus executio sequeretur, Nos in hac urbe Parisiensi congregati censuimus, & per Epistolam encyclicam his literis adjunctam declaravimus, Propositiones illas, & opiniones esse Cornelii Jansenii, & in sensu ejusdem Jansenii a S. V. damnatas disertis, & manifestis verbis. Quam enim auctor ille usurpatione privata novam doctrinam sub specie veteris inducebat, necessum fuit, ut Apostolica Sedes, judicio lato, ex publica, & antiqua Ecclesiæ traditione refelleret, ne Christianæ Fidei doctrina, pravis ab illo Scriptore ad testimonia veterum Patrum, quos laudat, adhibitis interpretationibus obrueretur. Nihil quippe aliud egit Constitutione sua Innocentius X. quam ut auctoritatis suæ præsidio antiquam Fidem muniret (Vinc. Lirin. Commen. 1. c. 27. & 32.) non di-

cendo

*cendo novus, sed dicendo novus*; juxta receptas in Scholis Theologiæ locutiones, quibus Jansenius quoque utitur. Eo pacto B. V. liquido explicuit, atque confirmavit regulam Fidei de Gratia, & libero arbitrio, quam ex parte prius assertam adversus Manichæos, quod attinet ad arbitrii libertatem, postea Decessores vestri Innoc. I. & Zosimus (Aug. l. 2. Retr. c. 50. *cooperantibus Africanorum Conciliorum litteris*) contra Pelagianos plene constabiliverant, quamque deinde Coelestinus I. ac Concilium Arausicanum, juxta capitula a Sede Apostolica transmissa, & superiori sæculo Tridentinum sollicitè, atque diligenter enucleatam definiverant. Quapropter & Constitutionem ordine Canonico latam, atque genuino in sensu intellectam, quem litteræ istæ patefaciunt, devotissimo obsequio nos suscipere testamur: præterea vero daturos operam profitemur, ne quis curæ nostræ subditus impune contraria vestris definitionibus docere, scribere, aut loqui præsumat, poenis in Hæreticos a jure decretis alioquin a nobis statim puniendus. Ex qua concordia omnium sententia subscriptionibus nostris firmata, B. V. facile intelliget, nulli e Collegio nostro propositum fuisse, ut aliquid dignitati Constitutionis adversum proferret, aut scriberet, quinimo destinatum esse nobis plenissima veneratione Sacram B. Petri Sedem, & Sanctitatem Vestram colere, qui prosperos, & felices annos vovent, qui sunt cum ea, qua par est, observantia,

BEATISSIME PATER,

SANCTITATIS VESTRÆ

Devotissimi, & addictissimi filii Cardinales, Archiepiscopi, & Episcopi Galliarum in Parisiensi urbe congregati.

Parisiis die 28. Martii 1654.

### ALIA EPISTOLA

Archiepiscoporum, & Episcoporum Galliarum in Parisiensi urbe congregatorum.

Reverendissimis, ac Religiosissimis D. D. Archiepiscopis, & Episcopis, per Gallias, Fratribus observandissimis,

*Cardinales, Archiepiscopi, & Episcopi Parisiis agentes salutem in Christo, & felicitatem.*

**Q**UOD B. quondam Augustino, & aliis Concilii Carthaginensis, & Milevitani Patribus, magnis illis Divinæ Gratiæ defensoribus, assertoribusque contigit, idem nunc prorsus evenisse nobis videtur. Sperabant illi, sed frustra, post Librum quendam, cujus Auctor, scriptorque fuerat Pelagius, ab Innocentio I. Papa (S. Aug. Ep. 5. & 95.) *anathematizatum, & damnatum, Pelagianos non ausuros ulterius de Gra-*

*Gratia illa perversa, & pernicioſa ſentiendo, loquendoque, pectora fidelis, & ſimpliciter Chriſtiana turbare, ſed tanti Præſulis auctoritati ceſſuros. Et ſpes quoque nobis erat, homines eos, qui ſe Cornelii Janſenii Yprenſis Episcopi amatores, ſectatoresque proſitentur, poſt ejus ab Innocentio X. anathematizatas, & damnatas quinque opiniones, deſituros tandem ab omni motu, atque cum ſuo ille Decreto (Matth. 8.) imperaſſet ventis, futuram in Eccleſia tranquillitatem magnam. Sed contra plane, quam expectatum a nobis fuerat, accidit: mirarique ſatis non poſſumus, poſt æquiſſimam, ſanctiſſimamque Conſtitutionem illam, qua Beatiſs. Pater Innocentius X. prædictas quinque Propositiones damnavit, & iis quidem verbis, quibus nihil dici poteſt expreſſius, nihil clarius, homines illos affirmare, imo & perſuadere aliis velle res duas vanas omnino, & inanes, alteram, quinque illas Propositiones non eſſe Janſenii, alteram, damnatas eſſe eo in ſenſu, qui ad Janſenium nihil pertineat. Poteſt enim quicquam eſſe abſurdius, quam tueri id velle, cui refellendo, revincendoque nihil opus ſit multis rationibus, nihil diſquiſitione, etiam mediocri, aut levi, ſed ſola Pontificiæ Conſtitutionis, quæ per ſeipſam rem totam aperte dirimit, lectione? Et quidem cum ejusmodi ſint duæ res illæ, ut multis videri poſſint ipſæ per ſe, & ſponte ſua ruituræ, atque adeo ſpernendæ prorsus, & negligendæ; Nobis tamen, quibus compertum eſt, eas (1. Tim. 1. Corinth. 8. Matth. 13.) ignorantibus, infirmisque non paucis eſſe offendicula, quibuſque pro muneris noſtri ratione id præſertim incumbit, ut tollamus omnia ſcandala de Regno Dei, viſum fuit occurrendum eſſe huic malo, comprimendumque mature hoc virus, quod jam aliquos occupavit. Quod ut fieret accuratius, & pro ea, qua par erat, gravitate, dignitateque, quotquot in hac urbe Regni primaria negotiorum Eccleſiaſticorum cauſa fuimus, Cardinales, Archiepiſcopi, Episcopi, collecti in unum cenſuimus, hoc, quicquid eſt rei, committendum eſſe curæ, ac diligentiæ Illuſtriſſimorum, Reverendiſſimorumque Fratrum noſtrorum Archiepiſcoporum Turonenſis, Ebrodunenſis, Rothomagenſis, Tholoſani, & Episcoporum Eduenſis, Montalbanenſis, Redonenſis, Carnotenſis, ſic tamen, ut quicquid inter ſe ipſi legiſſent, obſervaiſſent, ſenſiſſent, referrent ad nos. His vero ex ipſa Conſtitutionis lectione, atque inſuper ex opere Janſeniano, quod etiam, quantum ad quinque illas propositiones attinet, ſtudioſe legerunt, expenderuntque (quanquam ſola per ſe ad id ſufficiat Conſtitutio) maniſeſtum, & perſpectum fuit, illas quinque propositiones vere eſſe Janſenii, & damnatas eſſe in vero, ac proprio verborum ſenſu, & eo plane, quo a Janſenio traduntur, & explicantur. Atque cum id ipſa ad nos, ſcilicet in unum rursus congregatos retuliſſent, & a nobis quoque idem cognitum, & exploratum fuiſſet, declaravimus, & hoc noſtro Judicio declaramus, rem plane ita ſe habere, & nullum dubitandi eſſe locum, quare & eos, qui quinque illas Propositiones tuerentur, aut*

pro-



probant, vere esse ex eorum numero, quos Innocentius X. sua illa in Constitutione vocat *contradictores*, & *rebelles*, & quos vult a Patriarchis, & Archiepiscopis, & Episcopis per censuras & pœnas contra Hæreticos, & eorum fautores in jure expressas, ceteraque juris, & facti remedia opportuna, invocato etiam ad hoc, si opus fuerit, auxilio brachii secularis, omnino coerceri, & compesci. Id vero nos omnes, quantum in nobis quidem erit, effecturi sumus, rogamusque, quotquot hinc absunt, Gallicani Cleri Dilectissimos, & religiosissimos Fratres nostros, ut idem quoque pro virili præstent, ut sic idem omnes sentiamus secundum Jesum Christum (Rom. 15.) & unanimes, atque uno ore honorificemus Deum, & Patrem Domini nostri Jesu Christi (1. Cor. 10.) & ædificemus Ecclesiam Dei, atque adeo nos ipsos, & eos, qui nos audiunt, curæque nostræ sunt ab ipso commissi, salvos faciamus.

Parisiis die 28. Martii 1654.

## ALIUD RESCRIPTUM

SS. D. N. Innocentii Papæ X. ad Cardinales, Archiepiscopos, & Episcopos Cleri Gallicani in Comitibus generalibus congregatos.

## INNOCENTIUS PAPA X.

**D**ilecti Filii nostri, ac venerabiles Fratres, salutem, & Apostolicam benedictionem. Ex literis, quas a vobis die 28. Martii proxime elapsi ad Nos datas a venerabili Fratre Episcopo Lodevensi accepimus, jucundum sane accidit, probari Nobis luculentius vestræ pietatis zelum in iis partibus obeundis, quas nos omnibus Pastoralis officii Administris injunximus, ut qua par est obedientia ubique servari enixe curent Constitutionem nostram, qua die 31. Maji anni 1553. damnavimus in quinque Propositionibus Cornelii Jansenii doctrinam ejus libro contentam, cui titulus *Augustinus*. Atque ideo placet auctam exinde in vos benevolentiam nostram hoc itidem locupletissimo literarum nostrarum testimonio palam fieri majoribus etiam in dies argumentis vobis præclarius constitutam, ac simul vos, dilecti Filii nostri, & venerabiles Fratres, ac cæteros quoscunque regni istius Episcopos hortamur quam vehementer in visceribus Christi Jesu, ut studio, & conatu prorsus unanimi conspirantes in Domino in id sedulo operam detis, quod opportunius, validiusque contulerit ad executionem stabiliendam, ac firmandum penitus usum ejusdem nostræ Constitutionis, nostrique identidem Decreti, quo sanctionem ipsam necessario consequentes, die 23. Aprilis 1654. libri quoque de ea re editi damnantur. Id vero si vos una, & constanter exequamini, piæ so-

*Medul. Theol. Pars I.*

A a

lici-

licitudinis zelum, quo sanctæ huic Sedi, ac Nobis egregie obsequuti hætenus estis, insigni profecto meritum incremento cumulabitur, ac sponte propensam in vos Pontificiam voluntatem excitabitur majorem in modum ad benevolentissimos erga vos sensus Apostolicæ charitatis, qua interim vobis ex animo benedicimus.

Datum Romæ apud Sanctam Mariam Majorem, sub annulo Piscatoris, die 29. Septembris 1654. Pontificatus nostri anno decimo.

## E P I S T O L A

Archiepiscoporum, & Episcoporum Galliæ in generalibus Cleri Gallicani Comitibus congregatorum.

SS. PATRI ALEXANDRO VII.  
PONT. MAX.

BEATISSIME PATER.

Non obscura sunt Divini Numinis consilia, cur Beatitudinem Vestram ad Episcopatus apicem, id est, Apostolicæ Sedis Principatum, suffragantibus omnium votis, evexerint. Intererat quippe rei Christianæ, ut is unitatem Ecclesiæ his difficillimis temporibus regeret, qui pietate sua, cœleste præsidium Fidelium gregi promereri posset, atque prudentia sua æque, ac constantia, fluctus illos superare, quibus Petri navis, cujus clavo feliciter tenendo admotus est, atrociter concutitur. Nos sane, qui a Christo Domino in partem sollicitudinis vocati sumus, ministerio nostro id egimus superioribus annis, apud felicis memoriæ Innocentium X. ut Constitutionem ederet, qua motus in Galliis excitati, ob Jansenii Yprensis quondam Episcopi doctrinam certis capitibus comprehensam, compescerentur. Promulgatum a Gallicanis Episcopis decretum studiose amplexi sunt Fideles populi, demptis paucis, qui de Jansenii doctrina nihil constitutum fuisse palam cum simularent, intimis animorum sensibus ex illius damnatione urebantur. Horum cavillationes sine mora comprimendas rati, iudicio suo decreverunt religiosissimi Episcopi, quinque Propositiones illas ad Jansenium pertinere, ejusque opiniones fuisse proscriptas. Quam suam sententiam cum retulissent ad eundem Pontificem Maximum, illam humanissimis verbis non solum probavit, sed auctoritatis Apostolicæ pondere de integro confirmavit, Brevi dato ad hunc Cleri Gallicani Coetum, qui tunc propediem cogendus erat, nisi moræ quædam obstitissent. Porrodum conventum agimus, primum nobis studium fuit tuendæ Religionis, quam ab infestis Calvinianæ hæreseos sectatorum molitionibus vindicare curavimus, impetrato a clementia Christianissimi nostri Regis edicto, quo nefarios illorum conatus repressum iri

nobis merito pollicemur. Priorem curam excepit alia illi germana, ob erroris societatem, de profliganda Janseniana doctrina, Brevis Apostolici majestate, quod frequenti coetu legi, promulgari, in acta redigi, omniumque subscriptionibus muniri decrevimus. Eadem sane mentis alacritate illud suscepimus, qua Concilii Africani Patres ab ipsis expetitam Zosimi Epistolam amplexi sunt, quæ Pelagii, atque Coelestii errores, quos clanculum propugnabant, peremptorio Decreto prostravit. Iisdem artibus grassantur novæ sectæ discipuli, ac præterea, ut a capitibus suis fulminis Apostolici amoliantur ictum ( licet obfirmato animo quinque Propositiones Jansenio iterum abjudicent ) ad Facti quæstionem, in qua Ecclesiam falli posse docent, controversiam deducere nituntur. Quas ingeniorum versutias vera, prudentique verborum complexione infregit Breve Apostolicum, quod tricis illis syllabarum ad umbratiles scholarum disputationes relegatis, decisionisque auctoritate ad juris quæstionem restricta doctrinam Jansenii, quam opere illo suo explicuit, in Propositionum confixarum materia, Pontificia Constitutione damnatam fuisse declarat. At enim ut se damnationi subducant, celeberrimum beati Augustini nomen obtendunt, cujus doctrinæ se profitentur esse sectatores, repudiato etiam, si res eorum ita ferant, ipso Jansenio. Hujus tamen pravæ, & detortæ, quas ad Doctores egregii locos adhibet, interpretationes amplectuntur; sicque magistrum illum optimum a Coelestino laudatum, dum verbis colunt, adultero sensu violant. Quod a nobis adnotari oportuit in actis de Brevis promulgatione confectis, ut eorum calliditatibus ireretur obviam, quibus incautorum, & simplicium animis illudunt, ac si Augustinum assererent ipsi, a cujus tamen sententia pertinaciter discedunt, quæ per Constitutionem de iis, quæ sunt regulæ Fidei adversa, latam constabilita est; sicque in priorem illam fulguriti Janseniani erroris damnationem recidunt. Totam videremur debellati hostis gloriam in Decessorem refudisse, nisi constaret orbi Christiano, quis tunc fuisset particeps curarum, & præcipuus rerum administer, quem Patens optimus ad laudis ex hoc egregio facinore partæ communionem adscivisset. Decoris istius pars maxima pertinet ad Sanctitatem Vestram, quæ quidem cum suis nunc auspiciis res Ecclesiæ universæ inexhausta sollicitudine gerat, illud augere perget meditata, & uberiore, si opus sit, Catholici dogmatis illustratione. Nos sane officio nostro non deerimus, nec reliqui Episcopi, quos encyclica Epistola monuimus de rebus in hoc Conventu actis, fideque in iis, quæ nobis gerenda videntur in Provinciis, ut Fideles omnes, obsequio suo, & usu, Constitutionem firment, poenis alioquin a jure decretis adversus Hæreticos Episcopali iudicio coercendi. Finita est causa rescriptis Apostolicis; utinam finiat & error, si licet verbis Augustini vota nostra concipere, quorum compotes erimus, si Alexandri VII. Pontificis Maximi Sanctitas,



juxta veterem ritum, Divino nomini illa consecraverit, a quo vicissim longævitatē Beatitudini Vestræ studiosissime postulant, qui sunt cum ea, qua par est, reverentia, & veneratione,

## BEATISSIME PATER

Obsequentissimi, & devotissimi Filii vestri  
Cardinales, Archiepiscopi, Episcopi, &  
Ecclesiastici viri in generalibus Cleri Gal-  
licani Comitibus congregati.

*Die 2. Septembris 1656.*

## CONSTITUTIO

SS. in Christo P. ac D. N. D. Alexandri Papæ VII. super quinque  
Propositionibus ab Innocentio X. damnatis.

ALEXANDER EPISCOPUS,  
Servus Servorum Dei

*Universis Christi Fidelibus Salutem, & Apostolicam  
Benedictionem.*

**A**D sacram B. Petri Sedem, & universalis Ecclesiæ regimen inscrutabili Divinæ Providentiæ dispositione, nullis nostris suffragantibus meritis, evecti, nihil nobis antiquius ex munere nostri debito esse duximus, quam ut sanctæ Fidei nostræ, ac sacrorum dogmatum integritati, tradita nobis a Deo potestate, opportune consuleremus.

Ac licet ea, quæ Apostolicis Constitutionibus abunde fuerunt definita, novæ decisionis, seu declarationis accessione nequaquam indigeant, quia tamen aliqui publicæ tranquillitatis perturbatores illa in dubium revocare, vel subdolis interpretationibus labefactare non verentur, ne morbus iste latius divagetur, promptum Apostolicæ auctoritatis remedium censuimus non esse differendum. Emanavit siquidem alias a fel. record. Innocentio X. Prædecessore nostro Constitutio, declaratio, & definitio tenoris, qui sequitur, videlicet,

Innocentius Episcopus servus servorum Dei, universis Christi Fidelibus Salutem, & Apostolicam Benedictionem. Cum occasione Impressionis libri, cui titulus *Augustinus Cornelii Jansenii Episcopi Iprensis*, inter alias ejus opiniones orta fuerit, præsertim in Galliis, controversia super quinque ex illis, complures Galliarum Episcopi apud Nos insisterunt, ut easdem Propositiones nobis oblatas expendere, ac de unaquaque earum certam, & perspicuam ferremus sententiam.

*Tenor*

*Tenor vero præfatarum Propositionum est, prout sequitur.*

Prima, Aliqua Dei præcepta hominibus justis volentibus, & conantibus, secundum præsentem, quas habent vires, sunt impossibilia; deest quoque iis Gratia, qua possibilia fiant.

Secunda, Interiori Gratiae in statu naturæ lapsæ nunquam resistitur.

Tertia, Ad merendum, & demerendum in statu naturæ lapsæ non requiritur in homine libertas a necessitate, sed sufficit libertas a coactione.

Quarta, Semipelagiani admittebant prævenientis Gratiae interioris necessitatem ad singulos actus, etiam ad initium Fidei, & in hoc erant Hæretici, quod vellent, eam Gratiam talem esse, cui posset humana voluntas resistere, vel obtemperare.

Quinta, Semipelagianum est dicere, Christum pro omnibus omnino hominibus mortuum esse, aut sanguinem fudisse.

Nos, quibus inter multiplices curas, quæ animum nostrum assidue pulsan, illa in primis cordi est, ut Ecclesia Dei nobis ex Alto commissa, purgatis pravarum opinionum erroribus, tuto militare, & tanquam navis in tranquillo mari, sedatis omnium tempestatum fluctibus, ac procellis, secure navigare, & ad optatum salutis portum pervenire possit.

Pro rei gravitate, coram aliquibus S. R. E. Cardinalibus ad id specialiter sæpius congregatis, a pluribus in sacra Theologia Magistris, easdem quinque Propositiones, ut supra nobis oblatas fecimus singillatim diligenter examinari, eorumque suffragia, tum voce, tum scripto relata mature consideravimus, eosdemque Magistros variis coram nobis actis Congregationibus, prolixè super iisdem, ac super earum qualibet differentes audivimus.

Cum autem ab initio hujuscemodi discussionis, ad Divinum implorandum auxilium multorum Christi Fidelium preces, tum privatim, tum publice indixissemus, postmodum iteratis eisdem ferventius, ac per nos sollicitè implorata Sancti Spiritus assistentia, tandem Divino Numine favente, ad infra scriptam devenimus declarationem, & definitionem.

Primam prædictarum Propositionum, Aliqua Dei præcepta hominibus justis volentibus, & conantibus secundum præsentem, quas habent vires, sunt impossibilia; deest quoque illis Gratia, qua possibilia fiant, *temerariam, impiam, blasphemam, anathemate damnatam, & hæreticam declaramus, & uti talem damnamus.*

Secundam, Interiori Gratiae in statu naturæ lapsæ nunquam resistitur, *hæreticam declaramus, & uti talem damnamus.*

Tertiam, Ad merendum, vel demerendum in statu naturæ lapsæ non requiritur in homine libertas a necessitate, sed sufficit libertas a coactione, *hæreticam declaramus, & uti talem damnamus.*

Quartam, Semipelagiani admittebant prævenientis Gratiae interioris necessitatem ad singulos actus, etiam ad initium Fidei; & in hoc erant Hæretici, quod vellent, eam Gratiam talem esse, cui posset humana voluntas resistere, vel obtemperare, *falsam, & hæreticam declaramus, & uti talem damnamus.*

Quintam, Semipelagianum est dicere, Christum pro omnibus omnino hominibus mortuum esse, aut sanguinem fuisse, *falsam, temerariam, scandalosam, & intellectam eo sensu, ut Christus pro salute dumtaxat prædestinatorum mortuus sit, impiam, blasphemam, contumeliosam, Divinae pietati derogantem, & hæreticam declaramus, & uti talem damnamus.*

Mandamus igitur omnibus Christi Fidelibus utriusque sexus, ne de dictis Propositionibus sentire, docere, prædicare aliter præsumant, quam in hac præsentis nostrae declaratione continetur, sub censuris, & poenis contra Hæreticos, & eorum fautores in jure expressis.

Præcipimus pariter omnibus Patriarchis, Archiepiscopis, Episcopis, aliisque locorum Ordinariis, necnon Hæreticæ pravitatis Inquisitoribus, ut contradictores, & rebelles quoscunque per censuras, & poenas prædictas, cæteraque juris, & facti remedia opportuna, implorato etiam ad hoc (si opus fuerit) auxilio brachii sæcularis, omnino coerceant, & compescant.

Non intendentes tamen per hanc declarationem, & definitionem super prædictis quinque Propositionibus factam approbare ullatenus alias opiniones, quæ continentur in prædicto libro Cornelii Jansenii. Datum Romæ apud S. Mariam Majorem, anno Incarnationis Dominicæ 1653. pridie Kal. Julii, Pontificatus nostri anno nono.

Cum autem, sicut accepimus, nonnulli iniquitatis filii prædictas quinque Propositiones, vel in libro prædicto ejusdem Cornelii Jansenii non reperiri, sed fictæ, & pro arbitrio compositas esse, vel non in sensu ab eodem intento damnatas fuisse, asserere magno cum Christi Fidelium scandalo non reformident, Nos, qui omnia, quæ hac in re gesta sunt, sufficienter, & attente perspeximus, utpote qui ejusdem Innocentii Prædecessoris jussu, dum adhuc in minoribus constituti Cardinalatus munere fungeremur, omnibus congressibus interfuimus, in quibus Apostolica auctoritate eadem causa tractata est ea profecto diligentia, qua major desiderari non posset, quamcunque dubitationem super præmissis in posterum auferre volentes, ut omnes Christi Fideles in ejusdem Fidei unitate sese contineant, ex debito nostro Pastoralis officii, ac matura deliberatione præinsertam Innocentii Prædecessoris nostri Constitutionem, declarationem, & definitionem harum serie confirmamus, approbamus, & innovamus, & quinque illas Propositiones, ex libro præmemorati Cornelii Jansenii Ypensis Episc. cui titulus est, *Augustinus*, excerptas, ac in sensu ab eodem Cornelio intento da-

mna-



mnatas fuisse declaramus, & definimus, & uti tales, inusta scilicet eadem singulis nota, quæ in prædicta declaratione, & definitione unicuique illarum singillatim inuritur, iterum damnamus.

Ac eundem librum sæpe dicti Cornelii Jansenii, cui titulus, *Augustinus*, omnesque alios tam manuscriptos, quam typis editos, & si quos forsan in posterum edi contigerit, in quibus prædicta ejus Cornelii Jansenii doctrina, ut supra damnata defenditur, vel astringitur, aut defendetur, vel astringetur, damnamus itidem, atque prohibemus, Mandantes omnibus Christi Fidelibus, ne prædictam doctrinam teneant, prædicent, doceant, verbo, vel scripto exponant, vel interpretentur publice, vel privatim, palam, vel occulte imprimant, sub pœnis, & censuris contra Hæreticos in jure expressis ipso facto, absque alia declaratione incurrendis.

Præcipimus igitur omnibus Venerabilibus Fratribus nostris Patriarchis, Primatibus, Metropolitanis, Archiepiscopis, Episcopis, cæterisque locorum Ordinariis, ac Hæreticæ pravitatis Inquisitoribus, & Judicibus Ecclesiasticis, ad quos pertinet, ut præinsertam Innocentii Prædecessoris Constitutionem, declarationem, & definitionem, juxta præsentem nostram determinationem ab hominibus observari faciant, ac inobedientes, & rebelles prædictis pœnis, aliisque juris, & facti remediis, invocato etiam, si opus fuerit, brachii sæcularis auxilio, omnino coerceant.

Datum Romæ apud S. Mariam Majorem, anno Incarnationis Dominicæ 1656. 17. Kalend. Novembris, Pontificatus nostri anno secundo.

## ALIA EPISTOLA

Archiepiscoporum, & Episcoporum Galliæ in generalibus Cleri Gallicani Comitiis congregatorum.

SANCTISSIMO PATRI ALEXANDRO VII.  
Pontifici Maximo.

BEATISSIME PATER.

Ad Petri Sedem per nos accurrit Ecclesia Gallicana, tuoque obsequens Decreto, qua par est, vigilantia, & labore, sollicitè curat, ut proscripta jampridem a Sanctitate Tua Jansenii dogmata procul e Galliæ finibus exulent. Ad eam enim novimus referri debere, ut agebat Innocentius I. quod per totum mundum possit in omnibus Ecclesiis in commune prodesse. Quod præcipue locum habet in his, quæ spectant ad exequendum Apostolicum Rescriptum tam salutare Reipublicæ Christianæ, quam tibi magnificum, quo quin-

A a 4

que

que Propositiones e Jansenio excerptas prolocutus es damnatas esse a Decessore tuo in sensu ab hoc auctore intento . Jamdudum Montium tuorum altitudo primos Divini Solis excipiens radios coruscabat in illo Eminentissimorum Purpuratorum Procerum cœtu, e quibus Dominus illuminat tanquam a montibus æternis, & turbantur insipientes corde, unde ascitus es a Decessore tuo, ut doctissimus Fidei nostræ mystes, ad efferenda ex divinis Ecclesiæ adytis Fidei dogmata, & ad enucleandos hæreticos, qui in Jansenio latebant, sensus . Scimus, te Summi hujus Pontificis consiliorum, & curarum fuisse participem, tuam opem in hoc negotio valde fuisse probatam, teque non minus feliciter, quam strenue laborasse, ita ut sicut quondam Prosper de studio Africanorum Conciliorum in profliganda hæresi Pelagiana dicebat, tua industria discussæ artes, virisque relictum sit hæretici sensus . At postquam supra montem illum, qui est in vertice montium, ascendisti, ut evangelizares Sion, vox Domini in manu forti, quippe dedit Deus vocis suæ vocem virtutis in tua Beatitudine, locuta est, sicuti potestatem habens, clamavit, & quasi tuba exaltavit vocem suam, ad retundendos omnes impetus Jansenianæ sectæ . Hoc patuit, cum incipientes Summi Pontificii tui curas onerasti ad exquirendas omnes hujus hæreticæ pravitatis versutias, edita tua Constitutione, quam Episcopi Gallicani in posterioribus Comitibus officio suo incumbentes, summa erga tuum Apostolatum reverentia receperunt ( quem Valentinianus Divinæ Fidei principatum appellat ) & Fidem explicatam in illis quinque Propositionibus non a te inventam, sed tibi a Deo creditam, cujus exaltatio fuit provectio, propriis subscriptionibus firmaverunt, & ab omnibus Episcopis, eorumque mandato ab omnibus Presbyteris & inferioris gradus Clericis tam exemptis, quam non exemptis, firmandam censuerunt . Ad quod remedium excitati sunt per Apostolicum Breve, quo Innocentius X. eos hortatus est, ut sedulo studio, conatuque prorsus unanimi conspirantes, in Domino, darent operam in id, quod opportunius, validiusque conferret ad executionem stabiliendam, firmandumque penitus usum suæ Constitutionis . Ita ex præcepto sanctissimi Pontificis illius egerunt, nulla alia meliori data via, qua dicta Constitutio ipso usu roboraretur . Et hoc ex instituto Majorum, qui ad vindicandam veram Fidem, sanctionibus summorum Pontificum, & decretis Conciliorum subscribebant . Sic Ecclesiæ unius institutionis jura commiscebant, ut pateret, ex Irenæo, Christianos omnes unius esse labii, atque unius oris . Ita contra Hæreticos portabant Fidem Chirographo munitam, quæ, Joanne dicente, *vincit mundum* . Ex illo Ecclesiæ more Leo II. sextæ Synodi subscriptionem omnibus Episcopis imperat, ut secundum ejus Epistolæ verba, omnis Episcopus, cum Dominus ad judicandum venerit, confor-

tem se Apostolicæ Sedis per suæ manus signaculum demonstret. Idem quoque Pontifex se omnium subscriptiones ad Petri confessionem depositurum pollicetur, ut mediante Petro, Christo ipsi offerantur. Hoc idem statuit Conc. Trident. & ad densandam (ut Tertull. agebat) disciplinam, omnibus etiam Presbyteris, & Clericis Fidem definitam scripto profiteri, & damnatas hæreses anathematizare præcipit, ad abradendam omnem penitus Hæreticorum cavillationem. His prudentissime statutis, Episcopi Gallicani Apostolicæ Sedis auctoritate muniti, scuto Fidei, & Catholicæ veritatis lorica protecti, repentino veluti exciti classico, conglobatis agminibus visi sunt in causa Fidei opitulari, ut impia secta, propugnante Sanctitate Vestra, in æternum prostrata succumberet, sicut habetur in Epistola Concilii Mediolanensis ad Leonem. Sed veluti si totus orbis Christianus esset in securitatem compositus, exploso & exustulato errore Vaticani fulmine, vis horum statutorum aliquatenus imminuta est per non usum, plurimis non subscribentibus, neque de subscriptione requisitis, acribus initiis, incurioso fine. Omnia in speciem pacata videbantur. Sed quibus compositis rebus nulla spes, omne in turbido consilium, lingua sua coeperunt concinnare dolos, & veluti si æternum sacramentum Jansenio dicturi essent, exquisierunt novos sinus, & ad novos sensus illarum Propositionum vocabula traxerunt. Ita novarum rerum avidi nihil intentatum reliquerunt, ut Fides hæc quasi dubia tractaretur, & damnatæ clarissimis verbis Jansenii Propositiones redivivis conatibus excitarentur. Solertes sibi videri volunt, omnia verba Jansenii ad aliquem sensum Catholicum futiliter detorquentes, quanquam tui observantiam imitentur, contumaciæ propiores. Interim sermo eorum, sicut cancer, serpit, scinditque populum Christianum studia in contraria diversis incitamentis. Hæc indicia non aspernati sumus, neque volumus alere dubitatione, aut cunctatione bellum. Quapropter, Beatissime Pater, nobis visum est, sociatis laboribus, conjunctisque viribus, tuam exequi Constitutionem, atque aliam Decessoris tui, sicque hanc luem ab Ecclesia procul depellere. Insistentes igitur vestigiis decreti ultimorum Comitiorum Cleri nostri, te audimus loquentem sapientiam inter perfectos, & volumus servare, quæ ad pacem sunt Jerusalem, ut commendat Coelestinus. Et, ut continuo præstetur assensus dictæ Constitutioni ab omnibus Clericis, quin ab ipsis etiam Episcopis subscriptionem duximus requirendam, sub poenis in tuo Diplomate expressis. Et si qui sunt, qui aliter se gerant, quod absit, aut qui aliqua novarum rerum, vel occultæ Societatis suspitione laborent, reos læsæ Fraternitatis reputamus, & innodatos poenis, quæ de Ecclesiasticis regulis, & Canonum promulgatæ sunt disciplinis, adversus Episcopos negligentes, vel dolose agentes in negotio inquirendæ hæreticæ pravitatis.

Ency-



Encyclicam quoque ad omnes misimus, quæ certiores eos de his omnibus faciat, & quid deceat in hac causa Catholicæ unitatis, ac veritatis Sacerdotes ex Constitutionis tuæ præscripto. Optamus vero, ut omnes nobiscum choros gaudii celebrent de profligato Jansenii dogmate sub tanti Pontificis auspiciis, eodem voto, quo Patres olim Concilii Chalcedonensis in relatione ad Pulcheriam Augustam. Te enim novimus Montem illum Domini, ad quem confluunt omnes, id est ea propensione feruntur, qua flumina per alveos suos; ad te ita fluimus, ita ferimur pondere amoris, & observantiæ in te nostræ, cum hæ partes præcipuæ sint Ecclesiæ Gallicanæ, debitam Apostolicæ Sedi exhibere reverentiam; te solum suspicimus tanquam montem coagulatum, montem pinguem, & in-  
 clamamus attendentes gregi nostro, super quem Spiritus Sanctus posuit nos regere Ecclesiam Dei, *Ut quid suspicamini montes coagulatos?* Nullum quippe novimus montem coagulatum, quam Apostolicum, ubi doctrina coelestis, sicut lac parvulis, bene autem valentibus tanquam solidus cibus ministratur. In hoc Monte nos ipsi pascimur, ut ait D. August. ad populum suum, *Pascimus vos, pascimur vobiscum.* Et quia in eo Dominus docet, statuimus ibi, secundum verba Tertulliani, finem quærendi, stationem credendi, expunctionem inveniendi. Tuam ergo auctoritatem nobis fore præsto speramus adversus eos, qui omnem curiositatis libidinem effundunt post definitam Fidei doctrinam, nec ad Marciani dictum attendunt, quo ait: *Cum quis post acceptam Fidei veritatem aliquid amplius querit, mendacium querit.* In te autem velut in Petri successore nostrum omnium fortitudo firmata est, cum ad consultationem nostram responsum ab Apostolica Sede manavit adversus scientiam falsi nominis, quæ in D. Augustini doctrinam invaserat, atque ejus nomine circumferebatur. Causa hæc jam finita, si aliqua novitas iterum emerferit, indiget tantum in solatium defensione tua, ut Flavianus de hæresi Eutychiana ad Leonem scribebat. Exurgat veritas, & de sua patientia erumpat tuo munita præsidio, quæ jandudum abscondi erubescerat, adhibita charitate mansuetudinis. Adhibeat S. T. charitatem severitatis, jaculare fulmina ex altissima tua specula adversus scientiam extollentem se supra scientiam Dei, dum nos totius Ecclesiæ Gallicanæ vires colligemus, atque instructa acie depugnabimus sub tuis auspiciis, & Christianissimi Regis tutela, cui non solum Regium, sed etiam Sacerdotalem animum in hoc negotio inesse gaudemus, & gaudere S. T. novimus eodem sensu, quo Leo de Theodosii Augusti animo in Eutychiana hæresi obruenda loquebatur. Enituit enim in hacce Janseniana lue procul eliminanda non solum Regis, Reginæque matris pietas singularis, sed etiam Eminentiss. Cardinalis Julii Mazarini zelus, ac studium, quo virus hoc ne latius serperet, vel crescendo noceret, in  
 aula

aula Regia, totoque Regno vias omnes illi præclufit. Tot, tantisque suffulta præfidiis Ecclefia Gallicana, terribilis, ut caſtrorum acies ordinata, fiſtit ſe Sanctitati Tuæ, cujus armata fulmine non minus certos, quam glorioſos in proſtiganda hac nova hæreſi ſperat triumphos. Hæc confociatis in unum animis, viribuſque noſtrum omnium, diſjunctos in contrarias partes paucorum ſenſus ad veram, germanamque Fidei normam revocare conabitur, & firmiſſimam ſupra petram, vel angularem Chriſti lapidem fundata, inter varias inſultantium Novatorum procellas immota, ac in æternum duratura, victrixque gloriabitur. Nos interim, Beatiffime Pater, tuam demirati gloriam, earumque ſplendorem virtutum, quas Pontificalis in Te Dignitas non peperit, ſed invenit, Divinam proſuſis votis implorabimus clementiam, ab eaque prolixam Sanctitatis Tuæ publico bono ſoſpitem depoſcemus, eadem ſemper animi propenſione, qua ſumus,

BEATISSIME PATER,

o

Obſequentiſſimi, ac devotiſſimi Filii, ac ſervi  
veſtri, Archiepiſcopi, Epifcopi, & alii Ec-  
cleſiaſtici Viri in Comitibus generalibus Cleri  
Gallicani Pariſiis congregati.

*Pariſiis die 20. Februarii 1661.*

R E S C R I P T U M

SS. D. N. Alexandri Papæ VII. ad Cardinales, Archiepiſco-  
pos, Epifcopos Cleri Gallicani in Comitibus  
generalibus congregatos.

A L E X A N D E R P A P A V I I.

**D**ilecti Filii noſtri, venerabiles Fratres, ac dilecti Filii, Salu-  
tem, & Apoſtolicam benediſtionem. Literas veſtras accepi-  
mus datas die 20. Februarii, eaſque non minus veræ pietatis, &  
in hanc Sedem illuſtribus obſervantiæ notis diſtinctas, quam ſacræ  
ſapientiæ, & inſignium Patrum ſententiis validas. Ex his proſecto  
magna cum animi lætitia cognovimus, quam vigili, & præſtanti  
zelo ſtudeatis cum tuendæ puritati doctrinæ, quam de fontibus  
Salvatoris hauſtam Ecclefia Romana communicat, tum pernicioſis  
novitatum zizaniis ex agro Dominico Diœceſum veſtrarum evel-  
lendis. Tam præclaram erga Sedem Apoſtolicam obſequii gloriam  
ut

ut incorruptam usque retineatis, admonere, tantarum virtutum injuria sane foret. Veruntamen, quod vestra sponte facitis, ut in opus tam salutare Jansenismi radicitus extirpandi sedulo incumbatis, pro Pontificii debiti sollicitudine, vos etiam, atque etiam hortari non desinimus. Sed hujus mali vivacitas numquam penitus extinguetur, nisi contra contumaces ad poenas præscriptas in Constitutione fel. record. Innocentii X. & in alia nostra, serio procedatur. Porro autem omnia diligenter curata, eo facilius, & expeditius fluent, quo Charissimi in Christo Filii nostri Regis Christianissimi magis enituit in hac ipsa sanctæ Fidei causa pietas, ac Religio. In reliquo, Vos omnes, dilecti Filii nostri, venerabiles Fratres, & dilecti Filii, eximia paternæ charitatis voluntate complectimur, & Pontificium Patrocinium, ubi usus esse poterit, benigne pollicemur. Sed omnia melius etiam Venerabilis Frater Archiepiscopus Cæsareæ Nuncius noster edisseret. Interim Apostolicam benedictionem unicuique vestrum peramanter imper-  
timur.

Datum Castri Gandulphi sub Annulo Piscatoris, die 16. Maji 1661. Pontificatus nostri anno septimo.



# I N D E X

## ERRORUM FIDEI

Veritatibus adversantium, qui passim in hac  
prima Medullæ Theologicæ parte  
referuntur, & refelluntur.

### *Circa ipsius Fidei virtutem.*

**H**Elchēsaitæ dicebant, licitum esse, instante persecutione, Fi-  
dem exterius negare, etiam addito juramento, & sufficere,  
si tunc in animo retineatur. *tract. 1. cap. 1. sect. 5.*

Erasmus arbitratus est, posse aliquem errorem in sacris libris re-  
periri, & Sanctos Evangelistas interdum memoria lapsos esse.  
*sup. cap. 2. sect. 1.*

Idem in dubium revocavit, an Symbolum Fidei fuerit ab Apo-  
stolis conditum. *ib. sect. 5.*

Calvinistæ dicunt, Scripturas esse cuivis apertas, & ad intelligen-  
dum facillimas. *sup. sect. 3.*

Iidem profitentur, se libros Scripturæ canonicos a non canonicis  
dignoscere, non tam communi Ecclesiæ consensu, quam inte-  
riori testimonio, & suasionem Spiritus Sancti. *sup. cap. 3. sect. 1.*

Manichæi dicebant, vana superstitione teneri Christianos in eo,  
quod Fides illis imperaret ante rationem, seque prius velle per  
rationem cognoscere, ut postea, si liberet, crederent. *sup. cap. 3.  
sect. 2.*

### *Circa Ecclesiam.*

**V**icleffus, & Calvinistæ solos prædestinatos, Lutherani, &  
Confessionistæ solos justos ad Ecclesiam Christi in terris per-  
tinere asserunt, Anabaptistæ vero illam ex solis perfectis constare  
volunt. *sup. cap. 2. sect. 4.*

### *Circa Deum.*

**G**ilbertus Porretanus assererat, Sapientiam, Justitiam, & reli-  
qua Divina Attributa esse ab ipso Deo, & ab ejus Essentia  
realiter distincta. *tract. 2. cap. 2. sect. 1.*

Aetius,

**Aetius, & Eunomius**, nullam conceptus, & rationis distinctionem inter Attributa Divina admittere volebant, sed permiscebant, & confundebant omnia, quæ in ipsa etiam Sacra Scriptura de Attributis Divinis dicebantur. *ibid.*

**Anthropomorphitæ** asseriebant, Deum esse corporeum. *eod. tract. cap. 2. sect. 2.*

**Vvicleffus** contendebat, quamlibet creaturam posse dici Deum, Servetus vero eo vesaniæ profectus est, ut diceret, Deum in lapide, v. gr. esse vere, & proprie lapidem, in trunco, truncum. *ib. sect. 3.*

### *Circa prædestinationem, & reprobationem.*

**Vvicleffus** ajebat, omnia, quæ a Deo præscita sunt, ex absoluta necessitate evenire. *tract. 2. cap. 3. sect. 1.*

**Calvinus** per horrendam blasphemiam Deum auctorem peccati faciebat, contendebatque, illum non modo permittere, sed & positive velle peccatum. *eod. tract. cap. 4. sect. 1.*

**Origenes** existimabat, animas ante mundum corporeum creatas fuisse, & Deum prædestinare, vel reprobare intuitu operum bonorum, vel malorum, quæ ab illis animabus facta fuerant, antequam corporibus unirentur. *eod. tract. 5. sect. 2.*

**Pelagiani** asseriebant, homines a Deo prædestinari intuitu bonorum operum, quæ per solas naturæ vires ab ipsis fiebant, illosque per ejusmodi bona opera Gratiam prædestinationis promereri. *ib.*

**Semipelagiani**, licet faterentur, homines sine Gratia Christi salutem consequi non posse, existimabant tamen, Deum decrevisse ab æterno Gratiam illam hominibus conferre intuitu aliqujus boni desiderii, seu conatus propriæ voluntatis per solas naturæ vires elicitæ. *ibid.*

**Iidem Sempelagiani** contendebant, parvulos, qui post Baptismum susceptum moriuntur, antequam ad annos discretionis perveniant, prædestinatos fuisse propter bona opera, quæ facturos illos, si diutius vixissent, Deus prævidit. *ibid.*

**Calvinus** asserit, Deum ante prævisionem cujuscunque peccati, non tantum exclusisse aliquos a coelesti gloria, sed etiam efficaci voluntate eos ad poenam æternam deputasse, ideoque non modo gratiis ad salutem necessariis eos privare, sed & peccandi necessitatem iis injicere, quam evadere nequeant. *ibid.*

### *Circa visionem Dei, & statum beatitudinis.*

**Eunomius** non minus impie, quam stolide jactabat, se clare, & perfecte Essentiam Dei in hac vita cognoscere. *tr. 2. cap. 6. sect. 1.*

Arme-

Armeni negabant, ab ullo intellectu creato Divinam Essentiam, prout in se est, clare cognosci posse. *ibid.*

Calvinistæ contendunt, non nisi post communem resurrectionem Beatos in cœlo Dei visione fruituros. *ib. sect. 2.*

Millenarii visionis illius fruitionem differabant adhuc mille annis post resurrectionem communem, quibus existimabant, Christum in terris cum Sanctis regnaturum, antequam ad beatitudinis, seu beatificæ visionis fruitionem eos deducat. *ib.*

Begardi Hæretici negabant, intellectum creatum indigere ullo lumine gloriæ ad Essentiam Divinam intuitive videndam. *ib. sect. 3.*

Calvinistæ asserunt, Sanctos beatos nostras, quæ ad illos diriguntur, orationes nullo modo in cœlo cognoscere. *ib. sect. 5.*

Jovinianus contendebat, nullam esse inter Sanctos beatos five in ratione meriti, five in ratione præmii inæqualitatem. *ib. sect. 6.*

### *Circa mysterium Sanctissimæ Trinitatis.*

SAbellius assererat, unam tantum esse in Deitate Personam, quæ pro diversis officiis diversa nomina sortiretur. *tract. 3. cap. 1. sect. 2.*

Gilbertus Porretanus dicebat, relationes, quæ sunt inter Divinas Personas, ab ipsa Divina Essentia distingui realiter, esseque illi velut assistentes, & affixas. *ib.*

Arrius dicebat, Filium in Divinis nec Deum esse, nec genitum ex substantia Patris, nec proinde esse consubstantialem, sed esse creaturam non ab æterno, sed in tempore, ante alias tamen creaturas productam. *ib. cap. 2. sect. 2.*

Macedonius negabat, Spiritum Sanctum esse Deum, dicebatque, illum esse substantiam aliquam spirituales, superiorem omnibus aliis, creatam a Patre per Filium. *ib. sect. 5.*

Græci contendunt, Spiritum Sanctum a solo Patre procedere, non vero a Filio. *ibid.*

### *Circa Creationem.*

SImon Magus, Menander, & alii quidam veteres Hæretici dicebant, mundum hunc visibilem non a Deo, sed ab Angelis fuisse conditum. *tract. 4. cap. 1. sect. 1.*

Marcion docebat, materiam primam esse ex se, proindeque non fuisse a Deo productam. *ibid.*

Manichæi asseriebant, res omnes corporeas non a Deo bono, sed a Deo malo fuisse productas. *ibid.*

Tertullianus censebat, animas esse corporeas, & generari ab animabus parentum, sicut corpora a corporibus. *cap. 4. sect. 1.*

Ori-



Origenes existimabat, animas durante corporum formatione fuisse a Deo creatas. *ibid.*

*Circa Sanctos Angelos custodes.*

**C**alvinus negavit, Angelos custodes singulis hominibus attribui, contenditque cum blasphemia, illam sanctorum Angelorum custodiam, quam Ecclesia Fidelibus credendam proponit, non aliud esse, quam falsum commentum. *cap. 3. sect. 3.*

*Circa statum damnatorum.*

**O**rigenes censebat, Dæmonum, & damnatorum poenas aliquando finem habituras esse, ipsosque tam dæmones, quam damnatos de peccatis suis aliquando acturos esse poenitentiam. *cap. 3. sect. 5.*

*Circa peccatum originale.*

**P**elagiani negabant, pueros ullum originale peccatum contrahere, asseriebantque, tales homines nasci post peccatum Adami, quales ante illius peccatum nati fuissent, & æque tunc morti obnoxios futuros fuisse, etiam Adamo non peccante, quam nunc sunt, ipsumque Adamum universo generi humano per peccatum obfuisse, non peccati ipsius propagatione, sed exemplo, quatenus scilicet imitati sunt eum, qui postea peccaverunt. *cap. 5. sect. 3.*

Matthias Illyricus asseruit, peccatum originale esse substantiam quandam a dæmone factam, quæ sit ipsius dæmonis essentialis imago, quæ quidem post peccatum primi hominis ita unicuique animæ impressa est, ut illam totam substantialiter corruperit, & in imaginem ipsius diaboli transformaverit. *cap. 5. sect. 3.*

Lutherus, & Calvinus censuerunt, peccatum originale nihil aliud esse, quam concupiscentiam, seu inordinationem potentiarum inferiorum animæ, quæ reos nos facit æternæ damnationis. *ibid.*

Calvinus docuit, unum ex effectibus peccati originalis esse extinctionem liberi arbitrii, ita ut post peccatum Adami non amplius habeat homo liberam boni, vel mali electionem, sed quicquid bene, vel male operatur, illud necessario operetur, quamvis non coacte operetur. *cap. 5. sect. 4.*

Pelagiani asseriebant, parvulos absque Baptismo decedentes, æternam nihilominus beatitudinem consecuturos. *cap. 5. sect. 5.*

*Cir-*

*Circa Myſterium Incarnationis.*

**N**estorius prædicabat, Beatissimam Virginem Mariam purum hominem peperisse, proindeque nec ejus Filium Deum, nec ipsam Dei Genitricem dici debere. Addebat, Personam Divinam Verbi unitam fuisse postea Filio Mariæ, non quidem substantialiter suam communicando hypostasim, sed tantum accidentaliter, in quantum scilicet Verbum Divinum illi nomen, ac dignitatem suam impertivit, ut nimirum Deus, & Dei Filius diceretur, & ut talis adoraretur. *tract. 5. cap. 1. sect. 4.*

Eutyches e contra, cum nimio zelo, & absque sufficienti scientia adversus hunc errorem moveretur, in alterum extremum errorem huic oppositum delatus est. Asserebat enim, post Incarnationem Verbi non modo unam in Christo esse Personam, sed unam quoque solummodo remansisse naturam, sive per compositionem utriusque naturæ Divinæ, & humanæ, sive per conversionem alterius in alteram. Dicebat præterea, Divinitatem Verbi in Christo non modo dici posse, sed re vera fuisse passam, mortuam, & sepultam. *ibid.*

Hæretici Ubiquistæ contendunt, humanam naturam Verbo Divino hypostatice unitam eo sensu intelligi debere, quod omnis plenitudo, & ( ut loquuntur ) energia Divinitatis Verbi sit ipsi humanitatis realiter communicata, & ita in eam transfusa sit, ut Christus etiam secundum humanitatem, & quatenus homo, dicatur esse omnipotens, æternus, ubique præsens. Unde & Ubiquistæ dicti sunt. *cap. 2. sect. 3.*

Cerdon, & Manichæus asserebant, Christum Dominum non habuisse verum, & naturale corpus, sed phantasticum, & apparens. *ead. cap. sect. 4.*

Apollinaris contendebat, Verbum Divinum assumpsisse carnem sine anima, & ipsius Verbi Divinitatem fuisse instar animæ rationalis in carne assumpta. *ibid.*

Quidam Concionator Barcinonensis docuit, sanguinem Christi fuisse in ejus morte ab ipsa Divinitate separatum. *ibid.*

Severiani asserebant, Corpus Christi non fuisse vere passibile, aut vulnerabile cum aliquo sensu doloris. *ibid. sect. 6.*

Agnoitæ asserebant Christum diem Judicii ignorasse. *ibid. sect. 7.*

Monothelitæ contendebant, unam tantum fuisse in Christo voluntatem, Divinam scilicet, nullamque in eo fuisse voluntatem humanam. *cap. 6. sect. 1.*

Jovinianus, & Helvidius negabant, sanctissimam Mariam Matrem Dei post partum Virginem permansisse. *cap. 7. sect. 1.*

Petrus Abailardus titulum Redemptoris hominum Christo Domino proprie competere negabat. *ead. cap. sect. 3.*

Calvinus articulum Symboli de Christi descensu ad Inferos eo sensu intelligi debere dixit, quod Christi anima in desperationem inciderit, & poenas damnatorum ad tempus pertulerit. *cap. 7. sect. 4.*

### *Circa Gratiam Christi.*

**P**elagius, & ejus sectarii omnem Christi Gratiam primo repudiaverunt, asserueruntque, ad salutem æternam consequendam solas sufficere humanæ voluntatis vires.

Postea vero, ut Ecclesiæ damnationem effugerent, Gratiæ necessitatem admiserunt, sed fictæ, & subdole nomine Gratiæ liberum arbitrium, naturamque, in qua conditi sumus, intelligentes.

Cumque fraus illorum patefceret, ut errorem tegerent, Gratiam Christi in legis notitia, Evangelicæ doctrinæ promulgatione, ipsiusque Christi Domini, ac Sanctorum exemplis, necnon in peccatorum remissione, & condemnatione posuerunt.

Postea cum urgerentur, ut non modo externum, sed etiam præsertim internum Gratiæ auxilium agnoscerent, illud tandem Scripturæ testimoniis convicti admiserunt, ita tamen, ut dicerent, Gratiam illam internam non esse absolute necessariam, sed tantum utilem ad bonum facilius operandum.

Denique cum omnes supradicti errores damnati fuissent, eorum successores dicti Semipelagiani Gratiæ internæ necessitatem agnoverunt, sed simul etiam dixerunt, eam non prævenire hominis voluntatem, sed potius ab illa præveniri, ac per bona desideria, & pios aliquos effectus, & conatus humanæ voluntatis obtineri, Deumque primam Gratiam internam intuitu piorum illorum desideriorum, & affectuum tribuere. *tract. 6. cap. 1. sect. 2. §. V.*

Idem Pelagius dicebat, hominem in puris naturalibus sine ulla Gratia, aut justitia originali fuisse creatum. *ib. sect. 3.*

Calvinus asseruit, hanc esse differentiam inter Gratiam sanitatis, seu status innocentie propriam, & Gratiam medicinalem, quæ in statu naturæ lapsæ hominibus confertur, quod Gratiæ sanitatis homo, si vellet, dissentire posset, Gratiæ vero medicinali necessario assentiatur, nec ab illa dissentire, aut eam abjicere possit, seu impedire, quominus habeat effectum suum, ob quem data est. *ib. sect. 4.*

Joannes Hus assererat, extra Gratiæ sanctificantis statum nullum opus bonum fieri posse, & omnia peccatorum opera mala esse. *ib. sect. 7.*

Lutherus dixit, timorem omnem Divinæ Justitiæ esse vitiosum, & malum. *cap. 4. sect. 5.*

Calvinus asseruit, quemlibet Fidelem non modo de sua justificatione



tione certum esse, sed & teneri ad credendum, se esse justificatum per Christi iustitiam sibi imputatam. *eod. cap. 4. sect. 7.*  
Calvinus, & ejus sectarii nomen Meriti rejiciunt tanquam Divinae Gratiae injuriosum, negantque, hominem, quantumlibet justum, & sanctum, ullis bonis operibus vitam æternam promereri posse. *cap. 5. sect. 1. & 6.*

Observabit Lector, præter errores hic recensitos, alias quamplurimas veritates Fide Divina credendas tum in hac prima, tum etiam in secunda hujus Operis parte passim explicari, & probari, ex quibus plurimarum aliarum hærescon, quarum in hoc Indice nulla mentio fit, refutatio poterit intelligi.

# I N D E X

## RERUM PRÆCIPUARUM,

Quæ in hac prima Medullæ Theologice parte continentur.

*Quæ quidem in eum ordinem digestæ sunt, ut quicquid de unaquaque notatu dignum variis in locis sparsim continetur, sub uno veluti aspectu positum reperiatur.*

### *Adoratio.*

**Q**Uæ sit differentia inter laudem, honorem, & adorationem. *tract. 5. cap. 8. sect. 1. num. 1.*

Quænam requirantur ad completum adorationis actum. *ibid.*

Quotuplex sit adoratio. *ibid.*

Quid sit adoratio *latræ*, quid duliæ. *ibid. n. 2.*

Quænam adoratio Christo Domino debeatur. *ibid. n. 3.*

### *Angelus.*

Quid nomine Angeli intelligatur. *tr. 4. cap. 2. initio.*

An Angeli existant. *ibid.*

Quandonam Angeli creati sint. *ibid. sect. 1.*

Utrum de Fide sit, Angelos simul cum mundo corporeo fuisse creatos. *ibid. n. 3.*

Ubinam Angeli creati sint. *sect. 2.*

An Angeli sint omnino incorporei. *sect. 3.*

Quid de apparitionibus Angelorum in forma corporea sentiendum sit. *ibid. n. 3.*

An Angeli sint incorruptibiles, & immortales. *ibid. n. 4.*

Quid de loco Angelorum sentiendum sit. *sect. 4. n. 1.*

Quænam sit formalis ratio, per quam Angelus in loco aliquo esse dicatur. *ibid.*

Quid de motu Angelorum sentiendum sit. *ibid. n. 2.*

An Angeli possint res alias a se movere localiter. *ibid. n. 3.*

## I N D E X.

### *Cognitio Angelorum.*

- Quid de cognitione Angelorum sentiendum sit. *sect. 5. n. 1.*  
Quomodo Angeli seipsos cognoscant. *ibid.*  
An ad alias res cognoscendas speciebus aliquibus indigeant. *ibid.*  
*n. 2.*  
An species illas ab objectis accipiant. *ibid. n. 3.*  
An Angeli semper actu cognoscant ea, quæ cognoscunt. *ibid. n. 5.*  
An aliquo discursu utantur. *ibid.*  
Quasnam res Angeli cognoscant. *sect. 6. n. 1.*  
An cognoscant res futuras, & occultas cordium cogitationes. *ibid.*  
*n. 2.*  
An cognoscant res supernaturales. *ibid. n. 4.*

### *Voluntas Angelorum.*

- An Angeli præditi sint libero arbitrio. *sect. 7. n. 1.*  
An habeant liberum arbitrium inflexibile. *ibid. n. 2.*

### *Loquutio Angelorum.*

- An Angeli inter se loquantur. *sect. 8. n. 1.*  
Quomodo Angeli inter se loquantur. *ib. n. 2.*  
An uti possint vocibus corporeis in corporibus assumptis. *ibid.*  
Quæ sit differentia inter locutionem, & illuminationem Angelorum. *ibid.*

### *Ordines Angelorum.*

- An sint plures Angeli numero distincti. *sect. 9. n. 1.*  
An Angeli inter se specie distinguantur. *ibid.*  
An sint plures ordines inter Angelos, & quot. *ib. n. 2.*  
An distinctio ordinum in Angelis sit a natura, vel a gratia. *ibid.*  
*n. 3.*

### *Meritum Sanctorum Angelorum.*

- An Angeli creati sint in statu beatitudinis supernaturalis. *cap. 3.*  
*sect. 1. n. 1.*  
An sint creati in statu gratiæ. *ibid.*  
An boni Angeli beatitudinem æternam fuerint promeriti. *ib. n. 2.*  
Quanto tempore Angeli fuerint in statu merendi. *ibid. n. 5.*

### *Beatitudo Sanctorum Angelorum.*

- Quisnam sit status sanctorum Angelorum in gloria. *sect. 2. n. 1.*  
An beati Angeli possint in beatitudine proficere. *ibid.*



## I N D E X.

An possint beatitudinis accidentalis incrementum aliquod accipere.  
*ib. n. 2.*

### *Officia Sanctorum Angelorum erga homines.*

An Angeli a Deo mittantur ad homines. *sect. 3. n. 1.*

Quinam ex Angelis mittantur. *ibid.*

An cuique homini adsit Angelus tutelar. *ibid.*

An sint Angeli tutelares Regnorum, Provinciarum, &c. *ibid. n. 3.*

An sint aliqui singulis rerum speciebus præpositi. *ibid.*

Quænam sint officia sanctorum Angelorum erga homines. *ibid. n. 4.*

### *Angeli mali, seu Dæmones.*

An sint aliqui Angeli mali, & a Deo reprobati. *cap. 3. sect. 1. n. 2.*

Quinam Angeli peccaverint, & quot. *ibid. n. 3.*

An superbia fuerit peccatum malorum Angelorum. *ibid.*

In quo posita fuerit superbia Angelorum peccantium. *ibid. n. 4.*

An Angeli mali statim post peccatum suum in Infernum sint detrusi. *sect. 4. n. 1.*

An aliqui dæmones Dei permisso super terram divagentur. *ibid.*

An dæmones sint alicujus doloris susceptibiles. *ibid.*

An dæmones ab igne Inferni torqueantur, & qua ratione. *ib. n. 2.*

An dæmonum pœnæ futuræ sint æternæ. *ibid. n. 3.*

Qua ratione pœnæ æternæ juste dæmonibus infligantur, cum eorum peccatum fuerit momentaneum. *ibid. n. 4.*

Quænam sit dæmonum conditio quoad intellectum, & voluntatem. *sect. 5.*

Quomodo homines a dæmonibus impugnentur. *sect. 6.*

### *Anima humana.*

An cujusque hominis anima immediate a Deo creata sit. *tr. 4. c. 4. sect. 1. n. 1.*

An anima humana sit substantia pure spiritualis. *ibid. n. 2.*

An anima humana sit immortalis. *ibid. n. 3.*

### *Beatitudo æterna.*

In quo formaliter consistat beatitudo. *tract. 6. c. 5. sect. 6. n. 3.*

An ad complementum beatitudinis requiratur corporis glorificatio. *ibid.*

Quænam sint dotes corporis glorificati. *ibid.*

Quænam sint aureolæ Beatorum. *ibid. n. 4.*

An beatitudo futura sit æterna. *ibid. n. 5.*

*Vide infra tit. (Visio beatifica)*

## I N D E X.

### *Cælum Empyreum.*

An sit de Fide, Cælum, quod dicitur Empyreum, existere. *tract.*  
4. c. 2. *sect.* 2. n. 2.

### *Christus Dominus.*

An Christus dici debeat Dei Servus, aut Filius adoptivus. *tract.*  
5. c. 3. *sect.* 3. n. 1.

An Christus sit Rex, & quæ sit ejus Regia potestas. c. 7. *sect.* 8.

An sit Judex, & qua ratione judiciaria potestas illi competat. *sect.* 9.

An Christus sit caput Angelorum, & hominum. *sect.* 10.

An, & qua ratione Christus sit Sacerdos. *sect.* 11.

An, & qua ratione Christus sit Redemptor, & Mediator, *sect.* 12.

### *Christi sanctitas, & Gratia.*

Per quam Gratiam Christi humanitas sanctificata fuerit. c. 4. *sect.*  
1. n. 1.

An Christus indiguerit aliqua Gratia actuali. *ibid.* n. 3.

An habuerit Gratias gratis datas. *ibid.*

An Gratia in illo incrementum aliquod acceperit. *ibid.*

An in Christo fuerint virtutes infusæ, & quæ. *sect.* 2. n. 1. & 2.

An in eo fuerint dona Spiritus Sancti. *ibid.* n. 3.

### *Christi scientia.*

Qualis fuerit scientia Christi. c. 5. *sect.* 1. n. 1.

An in Christo fuerit scientia aliqua acquisita. *ibid.* n. 2.

Ad quas res se extenderit scientia Christi. *sect.* 2.

### *Christi voluntas, & meritum.*

An voluntas Christi fuerit libera. c. 6. *sect.* 1. & 2.

An Christus potuerit peccare. *ibid.* n. 3.

Qua ratione actiones Christi fuerint meritoriae. *sect.* 3.

An fuerint infiniti valoris ad merendum. *ibid.* n. 2.

Quandonam Christi meritum inceperit, & desierit. *ibid.*

Per quam actionem Christi completum fuerit opus Redemptionis.  
*ibid.* n. 4.

An Christus sibi aliquid meruerit, & quid. *sect.* 4. n. 1.

Quid nobis Christus meruerit. *ibid.* n. 1. & 2.

An Christus Angelis Gratiae, & gloriæ dona promeruerit. *ibid.* n. 4.

An Christus pro omnibus hominibus redimendis mortuus fuerit.  
*sect.* 5. n. 1. 2. 3.

An Christus singulis hominibus applicaverit merita sua. *ibid.* n. 3.

## I N D E X .

An Christus Patrem oraverit , & adhuc oret . *sect. 6. n. 1.*

An Christi oratio fuerit semper exaudita . *ibid. n. 2.*

### *Christi Domini vita , mors , resurrectio .*

An activum principium conceptionis Christi fuerit virtus supernaturalis Divina . *c. 7. sect. 1. n. 1.*

An Corpus Christi eodem instanti , quo conceptum fuit , fuerit etiam Divina virtute perfecte organizatum . *ibid. n. 2.*

An Christus a primo instanti conceptionis usum rationis , & liberi arbitrii perfectum habuerit . *ibid.*

An Christus tempus , & locum nativitatis sibi delegerit . *ibid.*

An conveniens fuerit , Christum a Joanne baptizari , & a damone tentari . *sect. 3. n. 1.*

An Christus doctrinam suam miraculis confirmare debuerit . *ibid. n. 2.*

An miracula Christi sufficientia fuerint ad Divinitatem ejus comprobendam . *ibid.*

Quid passio , & mors Christi nobis contulerit . *sect. 4. n. 1.*

An in morte Christi Divinitas ejus fuerit ab humanitate separata . *ibid. n. 2.*

An corpus Christi in morte corruptum fuerit . *ibid.*

Quomodo intelligi debeat descensus Christi ad Inferos . *sect. 5. n. 1.*

Ad quæ Inferorum loca Christus descenderit . *ibid. n. 2.*

Quid Christus apud Inferos egerit . *ibid.*

An Christus propria virtute a mortuis surrexerit . *sect. 6. n. 1.*

Cur Christus in corpore glorioso vulnerum cicatrices retinere voluerit . *ibid.*

An Christi corpus resurgendo clausum sepulchrum penetraverit . *ib.*

Qua ratione Christi resurrectio dicatur causa nostræ resurrectionis . *ibid. n. 2.*

An Christus propria virtute cælos ascenderit . *sect. 7. n. 1.*

Ad quosnam cælos Christus ascenderit . *ibid.*

Quo sensu Christus dicatur sedere ad dexteram Patris . *ibid. n. 2.*

### *Crux Christi .*

Quis honor , & cultus cruci Christi , aut ipsius crucis imagini deferri debeat . *sr. 3. c. 8. sect. 4. n. 6.*

### *Creatio .*

An Deus sit causa efficiens rerum omnium . *tract. 4. c. 1. sect. 1.*

An solius Dei proprium sit creare . *sect. 2. n. 2.*

An creatura tanquam causa instrumentalis possit simul cum Deo concurrere ad creationem alicujus rei . *ibid. n. 3.*

An



## I N D E X.

An aliquæ creaturæ fuerint, aut esse potuerint ab æterno. *sect. 3.*  
An, & qua ratione homo dicatur a Deo creatus. *c. 4. sect. 1. n. 1.*  
Quomodo dicatur homo creatus ad imaginem, & similitudinem  
Dei. *ib. n. 4.*

## D E U S .

Quibus rationibus probari possit, Deum esse. *tr. 2. c. 1. sect. 1.*  
Quomodo probari possit, non esse nisi unum Deum. *sect. 2.*  
An possit aliquod nomen Deo imponi. *sect. 3. n. 1.*  
Quænam nomina affirmativa, aut negativa Deo tribui possint.  
*ib. n. 3.*  
An, & qua ratione Attributa Dei inter se, & ab ejus Essentia  
distinguantur. *cap. 2. sect. 1.*  
An Divina Essentia in sua simplicitate omnium rerum perfectio-  
nes contineat. *sect. 3.*  
Quam ratione rerum omnium creatarum perfectiones sint in  
Deo. *ib. n. 2.*  
An Deus sit immutabilis. *sect. 4.*  
An Deus sit æternus. *sect. 5.*  
Qua ratione æternitas sit solius Dei propria. *ib. n. 2.*  
An, & qua ratione Deus sit ubique præsens. *sect. 6.*  
An Deus sit in omni genere perfectionis infinitus. *sect. 7.*

## Scientia Dei .

An sit in Deo scientia, & qualis illa sit. *c. 3. sect. 1.*  
Quæ sit differentia inter scientiam Divinam, & humanam. *ibid.*  
*n. 2.*  
Quodnam sit objectum scientiæ Divinæ. *sect. 2.*  
Qua ratione Deus cognoscat futura contingentia libera. *sect. 3.*  
An, & qua ratione Deus cognoscat futura conditionata. *sect. 4.*  
An sint in Deo rerum creatarum Idææ. *sect. 5.*

## Voluntas Dei .

An sit in Deo voluntas, & qualis. *c. 4. sect. 1.*  
Quænam sit illa, quæ in Deo dicitur voluntas signi, aut bene-  
placiti, item voluntas antecedens, & consequens, absoluta,  
& conditionata. *ib. n. 2. & 3.*  
Quænam sint objecta Divinæ voluntatis. *sect. 2. n. 1.*  
An Deus velit malum poenæ, vel culpæ. *ib. n. 2. & 3.*  
An, & qua ratione voluntas Dei sit libera. *sect. 3.*  
Quænam sit Divinæ voluntatis virtus, & omnipotentia. *sect. 4.*  
*num. 1.*  
An sit in Deo impotentia non posse mori, non posse peccare,  
&c. *ib. n. 2.*

*Med. Theol. Mor. Pars I.*

B b 5

An,

## I N D E X.

An, & qua ratione in Divina voluntate sit odium, amor, iustitia, misericordia, &c. *sect. 5.*

An sit in Deo providentia, & ad quæ se extendat. *sect. 6.*

### *Ecclesia.*

Quænam sit vera Ecclesia. *tr. 1. c. 2. sect. 4.*

Quibus notis vera Ecclesia dignosci possit. *ib. n. 3.*

### *Episcopus.*

An unusquisque Episcopus dici debeat caput sue Ecclesie. *tr. 5. c. 7. sect. 10. n. 4.*

### *Fides, & ejus necessitas.*

Quid sit Fides, & quotuplex. *tr. 1. c. 1. sect. 1. n. 1.*

An Fides ad salutem necessaria sit necessitate præcepti. *sect. 2.*

Quotuplex sit præceptum Fidei. *ib. n. 3.*

An Fides ad salutem necessaria sit necessitate medii. *sect. 3.*

Qua ratione ignorantia mysteriorum Fidei dici possit vincibilis infidelibus. *ib. n. 3.*

An explicita Fides mysteriorum aliquorum sit necessaria. *sect. 4.*

Qua ratione adulti teneantur ad habendam Fidem explicitam. *ib. n. 2.*

An externa Fidei confessio sit necessaria ad salutem. *sect. 5.*

An præceptum obligans ad externam Fidei confessionem sit affirmativum. *ib. n. 1.*

Quo tempore præceptum illud obliget. *ib. n. 2.*

An liceat aliquando Fidem occultare. *ib. & n. 3.*

### *Objectum materiale Fidei.*

Quodnam sit objectum materiale Fidei. *c. 2. sect. 1.*

An objecta Fidei creverint successu temporis. *sect. 7.*

An eadem Fides fuerit in Patriarchis ante Christi adventum, & in Apostolis, & in aliis Christianis. *ib. n. 1.*

An Concilia, & Summi Pontifices condiderint novos articulos Fidei. *ib. n. 2.*

### *Objectum formale Fidei.*

Quodnam sit objectum formale Fidei. *cap. 3. sect. 1.*

An suprema, & infallibilis Dei veritas sit objectum formale Fidei. *ib. n. 2.*

An actualis revelatio pertineat ad rationem objecti formalis Fidei. *ib. n. 3.*

An Divina revelatio debeat esse obscura, & inevidens. *sect. 2.*

An objectum Fidei possit sciri, aut sensibus percipi. *ib. n. 3.*

An revelatio Divina debeat esse publica. *sect. 3.*

An Fidei Divinæ possit subesse falsum. *sect. 5.*

An

## I N D E X.

- An veritates Fidei sint evidenter credibiles. *sect. 6.*  
Quæ sint rationes illius credibilitatis. *sect. 7.*  
Quodnam sit illud, in quod ultimo Fides resolvitur. *sect. 8.*  
Quomodo actus fidei sit in praxim redigendus. *sect. 9.*

### Gratia.

- Quid nomine Gratia intelligendum sit. *tr. 6. cap. 1. sect. 1.*  
Quotuplex sit Gratia. *ib.*  
Quid sit gratia gratis data. *ib. n. 3.*  
An gratia gratis data æque peccatoribus, ac justis tribuatur. *ib. n. 4.*  
Quid sit gratia gratum faciens. *ib.*  
Quid sit gratia habitualis, quid actualis. *ib.*  
Quid sit gratia præveniens, excitans, operans. *cap. 2. sect. 1.*  
Quid sit gratia adjuvans, cooperans, concomitans, & subsequens. *sect. 1.*

### Gratia necessitas.

- An gratia aliqua actualis necessaria sit ad cognoscendum quodlibet verum. *sect. 5.*  
An possit homo facere, aut velle aliquod bonum sine gratia actuali. *sect. 6.*  
An possit homo tentationem ullam perfecte vincere absque gratia actuali. *ibid. n. 4.*  
An possit homo sine Gratia habituali aliquod bonum opus exercere. *sect. 7.*  
An possit sine fide aliquod bonum opus exerceri. *sect. 8.*  
An homo in Gratia sanctificantis statu indigeat aliquo Gratia actualis auxilio ad operandum bonum. *sect. 9.*  
An possit in tali statu gratia perseverare absque speciali aliquo Gratia auxilio. *ib. n. 2.*  
An possit in tali statu omnia, & singula peccata venialia devitare. *ib. n. 3.*

### Gratia sufficiens.

- Quid nomine Gratia sufficientis intelligatur. *cap. 2. sect. 3. n. 3. 1.*  
Detur Gratia aliqua sufficiens. *ib. n. 2.*  
An cuilibet homini detur gratia sufficiens ad salutem. *sect. 4.*  
An Deus velit, omnes homines salvos fieri. *sect. 5.*  
Detur gratia sufficiens ad mandata Dei servanda omnibus, qui ea servare tenentur, & peccant non servando. *sect. 6.*  
Detur etiam peccatoribus obduratis sufficiens auxilium Gratia ad conversionem. *sect. 7.*

An



## I N D E X .

An vere dici possit , etiam parvulis absque Baptismi perceptione decedentibus dari media sufficientia ad salutem . *sect. 8.*

### *Gratia efficax .*

Quid sit gratia efficax , & qua ratione a sufficiente distinguatur . *cap. 3. sect. 1.*

Utrum ex duobus æquali gratia præventis , & excitatis , contingat aliquando , aut contingere possit , ut unus gratiæ consentiat , alter minime . *ib. n. 4.*

In quo proprie consistat efficacia gratiæ . *sect. 2.*

### *Hæresis .*

Quid sit Hæresis , & quinam Hæretici censeri debeant . *tr. 1. cap. 4. sect. 3. n. 1.*

Quenam pertinacia faciat Hæreticum . *ib. n. 3.*

An ille censendus Hæreticus , qui scienter , & deliberate de aliqua Fidei veritate dubitat . *ib.*

Quanam ratione dignosci possit , an doctrina aliqua sit Hæretica . *sect. 4. n. 1.*

Quanam sit differentia inter propositionem hæreticam , erroneam , schismaticam , suspectam , temerariam , scandalosam , piarum aurium offensivam , &c. *ib. n. 2.*

Qua ratione quivis Theologus de doctrina aliqua , seu propositione in materia Fidei iudicium ferre possit . *ib. §. 5.*

### *Imagines Christi , & Sanctorum .*

Quæ sit differentia inter Imaginem , & idolum . *tract. 5. cap. 8. sect. 4. n. 1.*

An sacrarum Imaginum usus sit licitus . *ib. n. 2.*

An sacræ Imagines sint a nobis venerandæ , & quo cultu . *ib. n. 4.*

### *Incarnatio Verbi Divini .*

Quid nomine Incarnationis Verbi Divini intelligi debeat . *tr. 5. cap. 1. sect. 1.*

Quibus argumentis mysterii Incarnationis veritas contra Ethnicos , Judæos , & Hæreticos propugnari possit . *sect. 2. 3. & 4.*

An Incarnatio Verbi Divini fuerit conveniens . *sect. 5.*

An fuerit ad reparationem generis humani necessaria . *sect. 6.*

An si primus homo non peccasset , Filius Dei incarnatus fuisset . *sect. 7.*

An sola Filii Persona humanam naturam assumpserit . *cap. 2. sect. 2.*

An post duarum in Christo naturarum unionem , manserit proprietatum utriusque naturæ distinctio . *sect. 3.*

Quæ-

## I N D E X.

Quænam humanæ naturæ partes a Filio assumptæ fuerint. *sect. 4.*  
Quo ordine assumptæ fuerint. *sect. 5.*

An Filius Dei aliquos defectus corporis assumpserit, & quos. *sect. 6.*

An Christus in anima sua aliquos defectus habuerit. *sect. 7.*

An in Christo inter utranque naturam Divinam, & humanam aliqua proprietatum communicatio admittenda sit. *cap. 3. sect. 1.*

Quænam observanda sint in illa proprietatum communicatione. *sect. 2. & 3.*

### *Infidelitas.*

An infidelitas eorum, qui nihil unquam de Fide audierunt, nec audire potuerunt, sit peccatum. *tr. 1. cap. 4. sect. 1.*

Quot sint species Infidelitatis. *sect. 2.*

### *Innocentia, seu Justitiæ originalis status.*

Qualisnam fuerit conditio primi hominis in statu Justitiæ originalis, sive quoad intellectum, sive quoad voluntatem. *tr. 4. cap. 4. sect. 2. & 3.*

An in illo statu appetitus inferior fuerit rationi perfecte subditus. *sect. 3. n. 2.*

An in illo statu animantia omnia fuissent homini subdita, & obtemperantia. *ibid. n. 3.*

An Justitia originalis fuerit habitus aliquis simplex, an plurimorum habituum supernaturalium complexio. *ibid.*

An primus homo Justitiam in posteros transfudisset, si non peccasset. *ibid. n. 4.*

An in illo statu homo fuisset immortalis. *sect. 4. num. 1.*

An arbor vitæ virtutem habuisset conferendi immortalitatem. *ibid. n. 1.*

### *Justificatio.*

In quo proprie consistat hominis justificatio. *tr. 6. cap. 4. sect. 2. num. 1.*

An justificatio sit solummodo aliquis Dei favor pure extrinsecus. *ibid.*

An sit donum aliquod supernaturale nobis inhærens. *ibid. n. 2.*

An donum illud inhæreat animæ per modum habitus. *ibidem n. 4.*

Quinam sint effectus justificationis. *sect. 2.*

An simul cum gratia habituali justificante aliqui virtutum supernaturalium habitus in animam infundantur. *sect. 3. n. 1. & 2.*

An præter virtutes, dona etiam Spiritus Sancti simul cum gratia habituali sanctificante infundantur. *ibid. n. 3.*

An

## I N D E X.

An gratiæ sanctificantis habitus sit a charitatis habitu distinctus. *sect. 4.*

An charitas actualis per se hominem formaliter iustificet. *ibid. num. 3.*

Quænam dispositiones ad justificationem requirantur. *sect. 5.*

An in adultis bonus aliquis usus liberi arbitrii ad justificationem prærequiratur. *ibid.*

An fides prærequiratur necessario ad justificationem. *ibid. n. 2.*

An aliquarum aliarum virtutum actus ad justificationem prærequirantur, & quarum. *ibid. n. 3.*

An gratia habitualis, seu habitus charitatis possit augeri. *sect. 6.*

An augmentum illud producat per actus, & an sit a solo Deo. *ibid.*

An gratia, seu charitas possit minui, vel amitti. *ibid.*

An aliquis certo scire possit, se esse iustificatum. *sect. 7.*

### Liberum arbitrium.

Quotuplex sit libertas. *tr. 2. cap. 4. sect. 3. n. 1.*

Quæ sit differentia inter libertatem naturæ, gratiæ, & gloriæ. *ibid.*

An necessitas obstet libertati arbitrii. *tr. 5. c. 6. sect. 2. n. 2. & 3.*

An indifferentia tam quoad specificationem, quam quoad exercitium actus, sit ad rationem liberi arbitrii necessaria. *ibid. num. 1.*

Qua ratione libertas voluntatis humanæ cum infallibilitate præscientiæ Divinæ possit concordari. *tr. 2. cap. 3. sect. 3.*

### Maria Virgo.

An sanctissima Virgo Maria vere, & proprie sit, & dici debeat Mater Dei. *tr. 5. cap. 1. sect. 4. & cap. 8. sect. 3. n. 5.*

An, & qua ratione maternitatem illam promeruerit. *ibid. n. 5.*

An in partu, & post partum Virgo permanserit. *cap. 7. sect. 1.*

An omnis doloris expers in partu fuerit. *ibid. n. 3.*

An nullum unquam actuale peccatum commiserit. *cap. 8. sect. 3. n. 1.*

An peccati originalis maculam ullam contraxerit. *ibid.*

An omnibus Sanctis, & Angelis gratia, & sanctitate excelluerit. *ibid.*

An sit, & dici debeat omnium creaturarum Regina, & Domina. *ibid. n. 5.*

An singulari, & maxima veneratione præ omnibus Sanctis colenda sit. *ibid. n. 6.*

### Meritum.

An possit homo aliud a Deo mereri. *tr. 6. cap. 5. sect. 1.*

Quid sit mereri de condigno, vel de congruo. *sect. 2.*

Quæ-



## I N D E X.

Quænam conditiones requirantur ex parte ejus, qui meretur. *sect. 3.*

Quænam ex parte actus meritorii. *sect. 4. n. 1.*

An requiratur, ut sit a charitate elicitus, vel imperatus. *ibid. n. 3.*

An ad meritum requiratur pactum, vel promissio ex parte Dei. *ibid. n. 6.*

Quænam res cadant sub meritum. *sect. 5.*

Possitne justus sibi promereri reparationem post lapsum. *ibid. n. 2.*

Possitne sibi mereri finalem in Gratia statu perseverantiam. *ib. n. 3. & 4.*

Possintne bona temporalia cadere sub meritum. *ib. n. 5.*

Possitne justus de condigno vitam æternam mereri. *sect. 6.*

Possitne unus justus alteri primam gratiam, & alia media ad salutem necessariam mereri. *sect. 7.*

### *Naturæ status variis.*

Quot naturæ status communiter a Theologis numerentur. *tr. 6. cap. 1. sect. 3.*

Quis sit status puræ naturæ, & an in eo creatus aliquis fuerit, aut creari potuerit. *ib. n. 2.*

Quis sit status naturæ integræ. *ib. n. 4.*

Quis status innocentia, seu justitiæ originalis. *ibid.*

Quis status naturæ lapsæ sibi relictae. *ib.*

Quis status naturæ lapsæ per Christum reparatae. *ib.*

### *Nomen sanctissimum Jesu Christi.*

Quæ sit dignitas, & excellentia nominis Jesu. *tr. 5. cap. 7. sect. 2. n. 2.*

Quid significet *Jesus*, quid *Christus*. *ibid.*

### *Paradisus terrestris.*

An Paradisus terrestris fuerit locus aliquis corporeus. *tr. 4. cap. 4. sect. 4. n. 2.*

An Paradisus terrestris adhuc extet. *ib.*

### *Peccatum originale.*

Quodnam fuerit peccatum primi hominis. *tr. 4. cap. 5. sect. 1.*

An fuerit unum, vel multiplex. *ib.*

An peccatum superbiae fuerit primum, & præcipuum peccatum primi hominis. *ib. n. 3.*

An peccatum primi hominis traducatur in omnes ejus posteros. *sect. 2.*

Quid sit proprie peccatum originale. *sect. 3.*

An consistat in privatione Justitiæ originalis. *ib. n. 3.*

Quinam sint effectus peccati originalis in hac vita. *sect. 4.*

Quo-

## I N D E X.

Quo sensu dicatur natura humana per peccatum originale corrupta. *ib. n. 2.*

An dolores, morbi, & mors sint effectus peccati originalis. *ib. n. 3.*

Quinam sint effectus peccati originalis in futura vita. *sect. 5.*

Quo in statu tuturi sint parvuli cum solo peccato originali decedentes. *ib. n. 2. & 3.*

### *Pelagiani, & Semipelagiani.*

Quinam fuerint Pelagianorum errores circa gratiæ necessitatem. *tr. 6. cap. 1. sect. 2.*

Quid super Pelagianorum erroribus censuerint Africana Concilia, Carthagenie, ac Milevitanum. *ibid. §. 1.*

Quale fuerit iudicium Innocentii Papæ super iisdem erroribus. *ib. §. 2.*

Quid contra eosdem errores in altero Concilio Carthagenensi fuerit statutum. *ib. §. 3.*

Quid super Pelagianorum, & Semipelagianorum erroribus Papa Cœlestinus edixerit. *ib. §. 4.*

Quid Gelasius Papa, quid item Concilium Arausicanum secundum contra Pelagianorum, & Semipelagianorum reliquias decreverint. *ib. §. 5.*

Quæ sit summa totius Pelagianæ hæresis, & reliquarum ejus, necnon veritatum contra illam hæresim ab Ecclesia definitarum. *ib. n. 2. & 3.*

### *Pontifex Romanus.*

An Pontificis Romani auctoritas in iis, quæ ad Fidem spectant, sit medium certissimum ad doctrinam orthodoxam dignoscendam, eamque ab heterodoxa, & hæretica secernendam. *tr. 1. cap. 4. sect. 4. §. 4. n. 1.*

An quivis Christianus teneatur in iis, quæ ad Fidem spectant, Romani Pontificis iudicio assentiri, & decretis obtemperare. *ib. n. 2.*

An illi, qui Apostolicæ Sedis iudicio in materia Fidei damnati sunt, pro Hæreticis haberi debeant. *ib. n. 3.*

An Pontifex Romanus sit caput totius Ecclesiæ. *tr. 5. cap. 7. sect. 4. n. 1.*

### *Prædestinatio.*

Quid sit prædestinatio. *tr. 2. cap. 5. sect. 1.*

An Deus aliquos prædestinaverit. *sect. 2. n. 1.*

An detur aliqua causa prædestinationis ex parte prædestinati. *ib. n. 2.*

An detur causa aliqua reprobationis ex parte reprobi. *ib. n. 4.*

An solum peccatum originale sit causa reprobationis positivæ. *sect. 3.*

An

## I N D E X.

An prædestinatio ad gloriam sit ante, vel post prævisa merita & *sect. 4.*

Quis sit ordo Gratiarum, & donorum in Divina prædestinatione. *ib. n. 3.*

Quinam sint effectus prædestinationis, & reprobationis. *sect. 6.*

An prædestinatio a prædestinato cognosci possit. *sect. 7.*

### *Reliquiæ Sanctorum.*

An reliquiis Sanctorum honor aliquis deferri debeat. *tr. 5. cap. 8. sect. 4. n. 5.*

Quo cultu honorandæ sint Reliquiæ Sanctorum. *ib. n. 6.*

Quæ sit differentia cultus, qui Reliquiis, & qui sacris imaginibus defertur. *ibid.*

### *Revelatio.*

An revelationes privatæ sufficiant ad rationem Fidei. *tr. 1. cap. 3. sect. 3.*

Quomodo dignosci possit, an revelationes privatæ sint a Deo, necne. *sect. 4.*

### *Salutatio Angelica.*

Quis sit sensus verborum Salutationis Angelicæ. *tr. 5. c. 7. sect. 3. num. 7.*

### *Sancti.*

Quis cultus Sanctis in cælo beatis deferendus sit. *tr. 5. cap. 8. sect. 2. n. 1.*

An Sancti sint a nobis invocandi, & pro nobis intercedant. *ib. n. 2.*

Quomodo Sancti in cælo cognoscant orationes nostras. *ib. n. 4.*

### *Satisfactio.*

An purus homo possit pro peccatis aliorum condigne Deo satisfacere. *tr. 5. cap. 1. sect. 6. n. 1.*

An Christus de condigno satisfecerit pro peccatis hominum. *ib. n. 3.*

### *Scriptura Sacra.*

Quinam libri Sacræ Scripturæ habendi sint Canonici. *tr. 1. cap. 2. sect. 1.*

Quænam editio Scripturæ pro authentica haberi debeat. *sect. 2.*

Quid de editione Hebraica, Chaldaica, Syriaca, Græca, & Latina tenendum sit. *ib. n. 2.*

Ad quem pertineat definire verum Scripturæ sensum. *sect. 3.*

An in Scriptura reperiatur aliqua contradictio, vel falsitas. *cap. 3. sect. 5. n. 2.*

### *Symbolum Fidei.*

An fuerit necessarium condi Symbolum Fidei. *tr. 1. cap. 2. sect. 6.*

An Symbolum Fidei fuerit ab Apostolis conditum. *ib. n. 2.*

An alia Symbola fuerint ab Ecclesia edita, & quæ. *ib. n. 3.*

An teneantur adulti omnes scire Symbolum Fidei. *cap. 1. sect. 4. n. 5.*

*Theo-*



## I N D E X.

### *Theologia.*

Quid sit Theologia, & quodnam ejus objectum. *quest. 1. proximal.*  
Ex quibus locis argumenta Theologica deducantur. *quest. 2.*  
Quænam sit certitudo conclusionis Theologicæ. *quest. 3.*  
Quænam dispositiones ad studia Theologica requirantur. *quest. 4.*

### *Traditio.*

An præter Scripturas aliquæ Traditiones admittendæ sint. *tr. 1.*  
*cap. 2. sect. 5. num. 1.*  
Quid nomine Traditionis intelligatur. *ibid.*  
Quænam sint Traditiones Divinæ, & Apostolicæ. *ib. n. 2.*  
Qua ratione Traditiones Ecclesiasticæ differant ab Apostolicis. *ib.*  
*n. 3.*

### *Trinitatis Mystrium.*

An Mystrium SS. Trinitatis naturali ratione cognosci possit. *tr.*  
*3. cap. 1. sect. 1.*  
An sint plures in Deo Personæ inter se distinctæ, & quot. *sect. 2.*  
An sint aliquæ Processiones in Personis Divinis, & quot. *sect. 3.*  
An conveniat Personæ Divinæ procedere ab alia. *ib. n. 2.*  
Quodnam sit principium immediatum Divinarum Processionum. *ib.*  
*n. 3.*  
An sint aliquæ relationes reales inter Personas Divinas, & quot.  
*sect. 4.*  
An sint aliquæ notiones in Personis Divinis, & quæ. *sect. 5.*  
Quænam nomina Primæ Personæ convenient. *cap. 2. sect. 1.*  
Quid Fides Catholica doceat de secunda Persona. *sect. 2.*  
Qua ratione Filius dicatur Patri consubstantialis. *ib. n. 3.*  
Cur Filii Processio dicatur, & vere sit generatio, Spiritus Sancti  
non item. *sect. 3.*  
Quo sensu secunda Persona dicatur Verbum. *sect. 4.*  
Ex quarum rerum cognitione Verbum Divinum procedat. *ib. n. 3.*  
Quid Fides Catholica de tertia Persona doceat. *sect. 5.*  
Cur vocetur Spiritus Sanctus. *ibid.*  
An Spiritus Sanctus a Patre, & Filio tanquam ab unico princi-  
pio procedat. *ib. n. 3.*  
Quo sensu Spiritus Sanctus vocetur Amor. *sect. 6.*  
Qua ratione una Persona in Divinis dicatur mitti ab alia. *sect. 7.*  
Quomodo de SS. Trinitatis mysterio loquendum sit. *sect. 8.*

### *Visio beatifica.*

An clara, & intuitiva Dei cognitio sit intellectui creato possibi-  
lis. *tr. 2. cap. 6. sect. 1.*  
An de facto nunc Beati essentiam Divinam intuitive videant. *sect.*  
*2.*  
An intellectus creatus indigeat specie aliqua intelligibili ad viden-  
dum Deum. *sect. 3.*



An

## I N D E X.

An ad Deum clare videndum intellectus creatus aliquo lumine gloriæ indigeat. *sect. 4. n. 1.*

Quid sit illud lumen gloriæ. *ibid. n. 2.*

An per aliquod lumen gloriæ oculus corporeus ad intuitivam Dei visionem elevari possit. *ibid. n. 4.*

Quid intellectus gloriæ lumine illustratus in Divina Essentia videat. *sect. 4.*

An Beati in cœlo cognoscant futura contingentia libera, & cordium cogitationes liberas. *sect. 6.*

An omnes Beati æqualiter Deum videant. *sect. 7.*

## Unio hypostatica.

Quid sit unio hypostatica. *tr. 5. cap. 2. sect. 1.*

An unio hypostatica sit modus aliquis substantialis. *ibid.*

An sit relativus. *ibid.*

An unio Verbi Divini cum natura humana sit unionum maxima, & arctissima. *ibid.*

## F I N I S











